

ҲЕРМАНН ҲЕССЕ



ЧУД
БҮРЙИСИ

РОМАН
қайта нашр

ТОШКЕНТ – «О‘ЗБЕКИСТОН» – 2015

821.112.2-Немисафабиети


Х-42

УЎК: 821.512.133

КБК 84(4Гем)

X - 43

Оломон тилидан
Мирзаали АКБАРОВ таржимаси



N1 32060
291

ISBN 978-9943-28-162-2

© Херманн Хессе, 2015

© «O'zbekiston» НМИУ, 2015

РУХИЙ ОЛАМ ИЗТИРОБЛАРИ

* * *

Тил билган дил билади, дейишади. Дарҳақиқат, Тошкент Давлат чет тиллар педагогика институти (бугунги Ўзбекистон Давлат Жаҳон тиллари университети)нинг олмон филологияси факультетида ўқиб юрган талабалик пайтларимиздаёқ дунё адабиёти, хусусан олмон адабиёти билан илк бор ошно бўлганмиз. Мехридарё устозларимиз тилга ва адабиётга дилимизда ҳавас, иштиёқ уйғотиб, бизни адабиётнинг сеҳрли оламига олиб кирган ва бунинг учун биз улардан бир умр миннатдормиз.

Бироқ тан олиб айтиш керакки, олмон адабиётига мансуб кўпгина асарлар ўша даврда биз, талабалар учун бамисоли «тошёнфоқ» бўлиб, уларга кўпам «тишимиз ўтавермаган». Мисол учун, XX аср нафақат олмон, балки жаҳон адабиётининг ҳам улкан намояндаларидан бири, халқаро Нобель мукофоти совриндори Ҳерманн Ҳессе (1877–1962) ижодини олайлик. Маълумки, адабнинг кўплаб роман, қисса, ҳикоялари, шеърлари, сиёсий, адабий-танқидий руҳдаги асарлари чоп этилган. Улар орасида, айниқса, «Чўл бўриси», «Маржонлар ўйини», «Демиан» каби китоблари довруқ қозонган. Адид шунингдек, маънавий-маърифий йўналишда ҳам баракали ижод қилган. «Гилдираклар остида» романи, «Нюрнбергга саёҳат» сафарномаси, «Курортдаги киши» қиссаси ва бошка кўпгина асарлари шулар жумласидандир.

Илк бор 1927 йилда босилиб чиққан «Чўл бўриси» романи теран психологик асар бўлиб, муаллифга олам шумул шухрат келтирди. «Чўл бўриси»да ўз-ўзини таҳлил қилиш ва ҳал этилмаган маънавий-рухий зиддиятларни енгиш йўлидаги саъй-ҳаракатлар қаламга олина-

ди. Унда муаллифнинг аввалги асарларида озми-кўпми акс эттирилган Рухга мурожаат этиш услуги ўзининг якуний ҳамда тўлақонли ифодасини топган. Ёзувчи Томас Манн ушбу роман ҳақида шундай деган эди: «Чўл бўриси» экспериментал дадилликда «Улисс» ва «Faux Monnaieurs» сингари асарлардан қолишмайдиган китоб эканлигини айтиб ўтиришга ҳожат бормикин? «Чўл бўриси» менга анчадан буён илк бор ҳақиқий китоб мутолааси нималигини қайтадан ўргатган асардир».

Дарҳақиқат, мазкур роман Ҳессе ижодининг дурдонаси ҳисобланади. Адаб ушбу асар устида 1924–1927 йиллар мобайнида ишлаган ва у китоб ҳолида дастлаб Фишер нашриётида 1927 йилнинг ёзида – ёзувчи 50 ёшга тўлган чоғида босилиб чиққан. Асарнинг яратилиши кўп жиҳатдан адаб ўтган асрнинг йигирманчи йилларида ўз бошидан кечирган руҳий инқироз билан боғлиқдир. Рут Венгер хоним билан бўлган никоҳнинг барбод бўлиши, ижодий ишларнинг мажбуран тўхтаб қолиши, ўша даврдаги пул қадрсизланиши ва бошқа иқтисодий қийинчиликларга боғлиқ танг аҳвол, шунингдек, Германиядаги сиёсий вазият – буларнинг барчаси ёзувчини тушкун бир ҳолатга, боши берк кўчага олиб келади. У ўзини чиндан ҳам ёлғиз, ҳорғин ва ҳолдан тойган «чўл бўриси» янглиғ ҳис эта бошлайди. Роман нима учун «Чўл бўриси» деб аталади? Эътибор берган бўлсангиз, асарнинг асосий қисмини Харри Халлер – «Чўл бўриси»нинг ёзишмалари ташкил қиласиди. Асарда воқеалар биринчи шахс номидан, яъни ёлғизланиб қолган эллик ёшлар атрофидағи инсон тилидан ҳикоя қилинади. Мазкур шахс тимсолида инсон ички дунёсининг, ботиний вужудининг бениҳоя серқирра эканлиги ибратли тарзда очиб берилади. Чўл бўриси – ҳаётдан тўйган, яшашдан безган, тарки дунё қилган дарвешдир. У ҳатто эллик ёшга тўлган кунида ўзини ўзи бўғизлаб ўлдириш учун уйда устарани ҳам шай қилиб қўйган. Ўзини ярим инсон, ярим бўри, деб ҳисоблайди. Ўз вужудидаги ҳам инсон, ҳам бўридан иборат бўлган иккиёклама бўлинишни енга олмайди.

Бироқ яна шуни алоҳида таъкидлаш жоизки, «Чўл бўриси» ёзib қолдирган эсдаликлар ёлғизланиб қолган, асаб хасталигига учраган невротик хастанинг шунчаки «патологик ёзишмалари»гина эмас, балки янада муҳимроқ бир нарсаки, у муайян давр ҳужжати, «давр хасталиги», яъни «Ҳаллер мансуб бўлган авлод чалинган невроз касаллиги тарихи» ҳамдир. Ҳессе ана шу хасталик аломатларини чуқур таҳлил қилиб, аёвсиз фош этади. Адиб романнинг Швейцарияда чоп этилиши муносабати билан (1941) ёзган «Чўл бўриси»га, «сўнгсўз»ида шундай сатрлар бор: **«Мен, албатта, китобхонларга ушбу қиссамни қандай тушунишлари хусусида маслаҳат берা олмайман ва бермоқчи ҳам эмасман. Ҳар бир ўқувчи ундан ўзига керакли ва фойдали хуносани ўзи чикариб олаверсин! Чўл бўриси ҳақидаги ҳикоя, гарчи хасталик ва танглиkn тасвир этса-да, бироқ бу хасталик ўлимга олиб бормайди, бу танглик таназзул эмас, балки аксинча: шифо, даво, муолажадир».**

«Чўл бўриси» романида Фарб ва Шарқ ғоялари, Фарб ва Шарқ фалсафаси, шу билан бир қаторда инсоннинг ўз мураккаб «мен»ига бўлган қувноқ ва вазмин муносабати, ўз-ўзини билиш ва англаш, ўз-ўзини топиш сари концепция ўзининг ёрқин ифодасини топган. Бу эса Ҳессенинг Шарққа, Шарқ фалсафаси ва анъаналарига азал-азалдан ихлоси ҳамда ҳурмати сарбаланд бўлганлигидан далолатдир. «Чўл бўриси» — теран мазмун ва чуқур фалсафий мушоҳадаларга бой психологик асар бўлиб, тили ҳам шунга яраша мураккаб дейиш мумкин, бироқ бу нарса асарнинг китобхон томонидан енгил ва равон ўқилишига асло монелик қилмайди.

«...Мен бутун бир асрлик олмон адабиёти билан шу қадар батафсил танишиб чиқдимки, — деб ёзади Ҳерманн Ҳессе ўзининг «Жаҳон адабиёти кутубхонаси» номли мақоласида, — ҳатто мутахассислар ҳам у билан мен-чалик кенг танишмаган бўлсалар керак. Бир қисми аллақачонлар эскириб кетган бу китоблардан мен учун бениҳоя қадрдон бўлган жонажон она тилим — олмон

тилиниң муаттар бүйи уфуриб турарди. Бу тил айни XVIII асрда ўзининг гуллаб-яшнаш даврига қадам қўйиш арафасида турган эди. Олмон тилини мен ана шу мажмуалардан, ана шу чанг босиб ётган романлару қаҳрамонлик достонларидан ўрганганман». Ўзини у ёки бу миллат намояндаси, деб билган ҳар бир киши учун Ҳессенинг куйидаги фикрлари ибраторумуздир: «Ўз тилини яхши билмаган, уни севиб ардоқламаган, парваришламаган ва ҳимоя қилмаган ҳалқнинг шоири бўлиш уятдир».****

Чиндан ҳам Ҳессе асарларидан кўп нарсани ўрганиш мумкин. Унинг тили ширали, таъсирчан, камалак янглиғ турфа бўёқларга, тагдор, нозик қочиримларга, рамзлар, ўткир ибораларга, асарлари эса теран мазмун ва фалсафий мушоҳадаларга, фантазияларга бой. Бундан ташқари, адибнинг ҳар бир асари зиммасидаги «юк» ниҳоятда салмоқли. Мисол тариқасида яна «Чўл бўриси» га мурожаат қиласайлик. «Чўл бўриси», энг аввало, табиат фарзанди, у Она табиат билан узвий уйғунликда ҳаёт кечиради. Роман қаҳрамони Ҳарри шахсида табиатга яқинликни, инсонийликдан кўра кўпроқ бўриларга хос ёввойилашиб ҳодисасини кузатамиз. Табиат фарзанди эмасми, унда бу ҳолат тобора кучая боради. Бундай ҳолатдан кутулишнинг бирдан-бир йўли, унинг назарида ўз жонига қасд бўлиб кўринади. Ҳаррининг Ҳерминани учратиб қолиши эса тасодиф эмас, балки ёзувчи бадиий тўқимаси воситасида инсонга хос табиатнинг иккинчи хил кўринишидир. Ҳерминани ўлдирап экан, гўё у ўзининг иккиламчи, енгил-елпи ҳаётдан лаззат оловичи «мен»ини маҳв этади. Яшашдан мақсад — Инсоннинг Табиат олдидағи бурчи майда унсурлардан устун туришини англаб етади. Шу билан бирга, Чўл бўриси ҳалол, камтар, камсуқум, иккиюзламачилик, хушомадгўйликни билмайдиган диёнатли, маънавиятли, маърифатли инсон, китоб ўқийди, асарлар ёзади, кўп вақтини кутубхоналарда ўтказади, у урушга қарши, тинчлик учун астойдил курашади. Одамларнинг ўткинчи ҳою ҳавасларга ўчлигини, ўлиб-тирилиб елиб-югуришларини тушунолмай-

ди, замон ва макон тушунчаси унга бегона, чунки у Табиат фарзанди, қандай яралган бўлса, шундай яшашга маҳкум, табиий мувозанатнинг бузилишига жон-жаҳди билан қарши, бунга ҳеч қачон йўл қўя олмайди.

Қолаверса, ёзувчи Ҳерманн Ҳессенинг бутун ҳаётини бағрикенглик ва сабр-қаноат билан яшашнинг намунаси, деб аташ мумкин. Адиб бутун умри мобайнида ўз ижодига суюниб яшади. У ўз асарларида илгари сурган фоялар — бутун дунёда тинчлик, хавфсизлик, ҳамкорлик, аҳиллик ва баҳамжиҳатликка эришишга бугун жаҳондаги барча халқлар, эл-элатлар интилиб яшаётганинг шоҳиди бўлиб турибмиз. Бу эса ушбу асарларнинг, ёзувчи ижодининг умрбоқийлигига яна бир карра далиллариди.

Яна шуниси қизиқки, Ҳессенинг Ватани — Германиянинг ўзида адабий танқиднинг умуман Ҳессе ижодига муносабати аксарият салбий бўлган. Адиб номи ўтган асрнинг иккинчи ярмида, айниқса, 1946 йили унга Нобель мукофоти берилгандан сўнг, бутун дунёга танилди. Ҳарвард университетининг собиқ профессори Тимоти Лири шундай деган эди: **«Чўл бўриси»нинг якуний қисми — бебаҳо дарслидир».**

Юртимиз мустақилликка эришгач, жуда кўп ажойиб нашрлар дунё юзини кўрди. Улардан бири — севимли журнализмиз «Жаҳон адабиёти» саҳифаларида 2002 йил «Чўл бўриси»нинг чоп этилиши. Асарнинг халқаро миқёсда қабул қилиниши нуқтаи назаридан олганда, унинг бевосита олмон тилидан илк бор таржима қилиниб, бошлишини маданий ҳаётимиздаги ўзига хос воқеа, деб аташ мумкин. Натижада ўзбек китобхони Ҳерманн Ҳессенинг ижоди билан яқиндан танишиш имконига эга бўлди.

Мазкур асардан оддий китобхон сифатида фоят мутаассир бўлганман ва турли ёшдаги кўплаб китобсеварлар қатори камина ҳам унда... ўзимни топганман. Менимча, китобнинг оламшумул довруқ қозонишига хизмат қилган муҳим омиллардан бири ҳам айнан мана шу нарса, яъни асарнинг ўқувчи қалбига руҳан яқинлиги бўлса

керак, деб ўйлайман. Қолаверса, Ҳарри руҳига кириш, баъзан унга тақлид этиш, унга ўхшашга ҳаракат қилиш, асарни ўқиб, гўё ёзувчи менинг ўзимни тасвирлагану унда ўзимни топганман, қабилидаги ҳис-туйфулар, кечинмалар — буларнинг барчаси пировардида асар бош қаҳрамони яшаб, нафас олган ёки олаётган бой маънавий-рухий олам билан ошно бўлишимида озми-кўпми, омил сифатида хизмат қилган бўлса ажаб эмас.

«Ҳар ҳолда менга «Чўл бўриси» китобларим орасида кўпроқ нотўғри тушунилган асар бўлиб қўринади, кўпинча унинг ўқувчилари хайриҳоҳ, инкор қилиш у ёқда турсин, ҳатто қойил қолишган китобхонлардир», — дейилади муаллиф «Сўнгсўз»ида, — **«улар каминанинг китобидан мутаассир бўлишган, лекин қизиги шундаки, улар асар мазмун-моҳиятининг атиги ярминигина тушуниб етишган, холос. Ушбу ўқувчилар, менинг назаримда, «Чўл бўриси»да ўзларини топишиган, ўзларини унга ўхшатиб, у билан тенглаштиришиган, унинг изтиробларига шерик бўлишиб, орзуларини баҳам кўришган...»**

Хулоса ўрнида асар бош қаҳрамонининг маънавий-рухий дунёсидаги ўзлик ва ўзига хосликни «Чўл бўриси ҳақида трактат (факат жиннилар учун)»дан ҳамда «Чўл бўриси» шеъридан ҳам яққол англаб олиш мумкин. Жумладан, 1925 / 26 йиллар қиши фаслида ёзилган ушбу шеър қуидагича жаранглайди:

Мен — Чўл бўрисиман, изғийман бетин,
Дунё қор қўйнида ухлайди сокин.
Қайнзорда қанот қоқар қарға, зоф.
На қуён кўринар, на кийик, эвоҳ.
Оҳуларга ишқим тушган азалдан,
Уларнинг тўшлари ширин асалдан.
Қанийди, биттаси дуч келса шу он,
Таппа босардиму, ғажирдим чакқон!
Лаззат борми, менга бундан зиёда,
Бундай роҳатижон бўлмас дунёда.
Ул гўзални севар эдим юракдан,
Тутиб олсан яйраб кетар эди тан.
Сон гўштин еб, конин ялаб тўярдим,
Сўнг кечаси ёлғиз «ув»лаб кўярдим.

Майли эди ҳозир учраса қуён,
Менинг шодлигимга бўлмасди поён!
Эх, қўлдан кетдими, барчаси наҳот?
Ҳаётнинг кизиги қолмади, ҳайҳот!
Кўниб думимдаги тукларга қиров
Кўзларим ҳам хира тортиб қолди-ёв.
Хотин ўлиб кетди, йиллардир ёху!
Ёлғиз тентирайман, хаёлда оху.
Тушларимга кирав ҳатто қуёнлар,
Қиши кечаси шамол увлаган онлар,
Томоқ ёнар, қордир унга тасалли,
Энди иблис жоним олса ҳам майли.

Мухтасар қилиб айтганда, ёзувчи Ҳерманн Ҳессенинг юқорида тилга олинган «Чўл бўриси» асарини мутолаа қилиб, ундан шу қадар мутаассир бўлдимки, оқибатда уни ўзбек тилига таржима қилишга ҳам журъат этдим. Албатта, тил ва услугуб жиҳатидан ўзига хос, юксак дид билан ёзилган асар таржимаси мутаржимдан катта маҳорат талаб қилиши табиий. Шубҳасиз, асар таржимаси жараёнида бир катор қийинчиликларга дуч келингани айни ҳақиқат. Шу ўринда улардан атиги иккита сига, яъни муайян сўз ва иборалар таржимасига тўхталиб ўтмоқчиман. Аслиятга мурожаат қиласиз: **«Giottosche Engelscharen aus einem kleinen blauen Kirchengewölbe in Padua»**. Ушбу жумлани биринчи марта таржима қилаётганимда **Giottosche Engelscharen** иборасидаги **«Giottosche»** сўзини кўриб, кўнглимда мабодо бу матбаа хатоси эмасмикин, балки **«Giottische»** бўлиши лозимdir, деган шубҳа туғилди. Бир ҳамкасб дўстимизга шу ҳақда мурожаат қилсан, у ҳам ушбу фикримни маъкуллади. Хуллас, дастлабки хомаки таржимада мазкур жумла шундай янгради: **«Падуадаги кичкинагина мовий тусли черков гумбазидан тушган тангри фаришта-малоикалари»**, яъни **«Giottosche»**ни **«Gottische»** бўлса керак, деган ўй билан худога менгзаб, «тангри» деб ўзбекчалаштиридим. Бироқ кейинги тинимсиз изланишлар натижасида мазкур сўз таржимасининг бутунлай нотўғри бўлганига амин бўлдим, яъни **«Giottosche»** сўзи муаллиф томонидан итальян мусаввири **Жотто ди Бондоне**

(1266–1337)га нисбатан кўлланилган экан. Энг сўнгти вариантда **Giottosche Engelscharen** иборасини, ниҳоят «Жоттонинг фаришта-малоикалари» деб таржима қилдим.

Шунга ўхшаш яна бир англашилмовчилик олмонча **«Bürger»** сўзи билан содир бўлди. Маълумки, ушбу сўз полисемантик (кўп маъноли) бўлиб, таржимада **«фуқаро»**, **«бюргер» (шахарлик)**, **«мешчан»** каби маъноларни англатади. Аслиятдан мисол келтирамиз: **«...den ich aber im Traum mit Bürger verwechselte»**. Илк таржимада ушбу жумла қуидагича янгради: **«...тушимда уни фуқаро билан алмаштириб юборибман»**. Бир қарашда ҳеч қандай хато йўқ, жумла таржимаси бинойидек. Таасусуфки, **«Bürger»**ни биз ҳам **«фуқаро»** билан алмаштириб қўйибмиз. Натижада биринчи таржимада жиддий хотога йўл қўйилган: **«Bürger» «фуқаро»** эмас, балки олмон шоири **Готфрид Август Бюргер (1747–1794)** бўлиб чиқди. Бунга олмон тилида кўпроқ атоқли отлар, номлар, умуман отларнинг бош ҳарф билан ёзилиши сабаб бўлгандир, эҳтимол. Бошқа кўпгина тилларда бундай хусусият мавжуд эмас. Умуман, таржимада тилни билишнинг ўзигина кифоя қилмайди. Таржимондан чукур билим, юксак маҳорат, таъбир жоиз бўлса, заргар маҳорати талаб этилади. У жаҳон тилларини яхши билиши, шунингдек, дунёдаги бошқа тиллардан, аввало, она тили, адабиёт, тарих, санъат, қўйингки, дунёвий ва диний илмлардан ҳам яхши хабардор бўлмоғи лозим. Таржима – бирор асарнинг бошқа бир тилдаги **«сўзма-сўз»** баёни эмас, бильякс, унда мутаржим аслият руҳини сақлай олиши, аввало, уни ўзи теран ҳис этиб, ўқувчига етказиши, унга **«юқтириш»**и керак. Тасаввур қилинг, агар ёзувчи ўз асарини ёзаётганда йиғламаган бўлса, уни ўқиётган китобхоннинг кўзларига нам қаёқдан келсин. Таржимон хусусида ҳам худди шундай фикрни билдириш мумкин. Мутаржим асар таржимаси жараёнида даставвал ўзи тўлқинланмоғи лозим. Агар у асаддаги воқеалар гирдо-бига шўнғиб, қаҳрамон руҳига кирмас экан, унинг ба-

жарган иши китобхон қалбига, онгига етиб бориши даргумон. «Чўл бўриси» романини олмон тилидан ўзбекчага ўгириш жараёнида мен айнан мана шундай ҳолатларни ўз бошимдан кечирдим. Яна тасодифни қарангки, роман бош қаҳрамони — Харри Ҳаллер 47 ёшда, — камина ҳам асарни қирқ етти ёшимда таржима қилдим.

Инсон дунёни қанчалик билса, ўзлигини ҳам шунчалик англайди, деб ёзган эди улуф олмон шоири ва мутафаккири Йоҳанн Вольфганг Гёте. Мен бу фикрни, киши дунё маданиятини, маънавиятини ва адабиётини қанчалик чукур ўрганса, ўзлигини ҳам шу қадар теран англай олади, деб тушундим. Дарҳақиқат, бугун истиқлол туфайли дунёга юз тутган юртимиз жамолида, халқимиз камолида буни ҳар биримиз кўриб, билиб, ҳис қилиб турибмиз.

Мирзаали АКБАРОВ

МУҚАДДИМА

*Китобнинг илк нашри
масъул муҳарриридан*

Бу китоб ўзини «Чўл бўриси» деб ҳисоблаган одамдан қолган эсдалик хотиралардан иборат. Унинг қўлёзмасига кириш сўзи зарурми-йўқми, буни қўятурайлик; ҳар ҳолда уни эслашга, хотирлашга уриниб кўришга, шу тариқа Чўл бўрисининг ёзиг қолдирганларига баъзи бир нарсаларни илова қилишга эҳтиёж сездим. Лекин у ҳақда жуда кам биламан. Бироқ унинг шахсияти менда кучли таассурот қолдирганди.

Чўл бўриси – эллик ёшлар атрофидаги киши, кунларнинг бирида холамникига келиб, ижарага жиҳозланган, тайёр хона излаб юрганини айтган. У юқоридан болохона ва унинг ёнидаги ётоқхонани ижарага олди. Бир неча кундан кейин қўлида иккита чамадон ва китобга тўла катта кути билан келиб, бизникида тўққиз ё ўн ойча яшади. У жуда осойишта, ўзи билан ўзи андармон эди. Ётоқхоналаримизнинг ёнма-ёнлиги сабаб, зина ё йўлакда баъзан рўпара келиб, кўришиб турмаганимизда бирбиirimizni умуман билмасмидик. Бу одам камгап ва шу қадар одамови, ўзини ўзи баъзан атаганидек, Чўл бўриси, менга қараганда бошқа оламдан келган, бегона, ёввойи ва журъатсиз, ҳаттоки юраксиз зот эди. Унинг истеъоди ва тақдирни сабаб нақадар ёлғиз ва фаривона ҳаётга кўнишиб кетганлиги, ўзи бу ёлғизликни онгли равиша қисмат деб билганлигини, албатта, унинг қолдириб кетган ёзишмаларидангина билиб олдим; шундай бўлса-да, у билан илгариги учрашув ва суҳбатлар орқали ҳам ҳар қалай бир оз, бир нави танишгандим, хуллас, шахсан танишлигимиз ва унинг ёзиг қолдирганлари бир бўлиб, у ҳақда тўлиқ бўлмаган, хира тасаввур кўз ўнгимда намоён бўлди.

Чўл бўриси холамникига биринчи бор келганида мен ҳам тасодифан уйда эдим. Ўшандада тушлик пайти эди, стол устида ликоблар турарди. Ишхонага боришимга яна ярим соат вақтим қолган. Хаёлимда у билан илк бор рўбарў келганимда ҳосил бўлган ажиб, фалати таассурот ҳамон ёдимда. У қўнғироқни тортиб чалди-да, ойнабанд эшиқдан кириб келди. Нимқоронги даҳлизда қарши олган холам ундан муддаоси нелигини сўради. Чўл бўриси эса, жавоб ўрнига калта сочли бошини юқорига чўзиб, асабий ҳолатда чор-атрофни димофи билан исказб кўрдида, деди: — О, бу ернинг ҳавоси муаттар экан, — дея кулими сиради. Холам ҳам бунга жавобан жилмайди, бироқ менга бу салом-алик кулгили туюлди ва ичимда уни янидим.

— Ҳа-я, — деди у, — менга хона керак эди, агарда, ижара қўядиган бўлсангиз...

Учаламиз зинадан юқорига қўтарилиганимиздан сўнгтина, мен уни аниқ-таниқ кўра олдим. Унинг бўйи айтарли баланд эмас, лекин ўзини тутиши новча одамларни эслатарди. Эгнида замонавий қишки пальто, ўзи баодоб, бамъни, бироқ пала-партиш кийинган, соқоли силлиқ тарашланган, калта сочининг у ер-бу ерига оқ оралаган. Юриши бошда менга умуман ёқмади; оғир ва қатъиятсиз қадам ташлар, бу эса унинг ташки қўриниши ва нутқидаги оҳанг ҳамда жўшқинликка мутлақо мос келмасди. Унинг касал эканлиги, юриш малол келишини кейинроқ билдим. У зина, деворлар ва деразаларни, зинахонадаги эски, баланд жавонларни кўздан кечиаркан, ўзига хос, фалати жилмайди, албатта, бу ҳам менга ёқимсиз туолганди. Хуллас, бу одам бизга бошқа оламдан, ажнабий юртлардан келган-у, уйимиздаги ҳамма нарса унга гўзал, шу билан бирга, бир оз кулгили кўрингандай таассурот қолдирди. Қисқа қилиб айтганда, у очиқ, хушмуомалали киши эди. Уй, хона, ижара ҳақи ва бошқа барча нарсалар унга сўзсиз маъкул бўлганди. Бироқ шунга қарамай, ундан аллақандай ётсираш, нима десамикин, совуқликми, ёвузликми, шунга ўхшаш нимадир уфуриб турарди. У уйни,

ётоқхонани ҳам күшиб ижарага олди, иситиши тизими, сув, хизмат күрсатиш ва уйдаги тартиб-интизом ҳақида сүраб-сурыштириди, барча гапларни дикқат-эътибор ва очиқ чехра билан тинглади, ҳаммасига рози бўлди ва ҳатто ижара ҳақини олдиндан тўлаб қўйишга ҳам тайёр эканлигини билдириди. Лекин, барибир, унда нимадир етишмаётгандек, феъл-автори, юриш-туриши, хатти-харатидида фалатилик, ножиддийлик сезилар, ижара туриш, одамлар билан олмон тилида сўзлашиб унга қандайдир гаройиб янгиликдек туюлар, ботинан ва зоҳирлан бошқа бир нималар билан андармондек кўринарди. Хуллас, у менда шундай таассурот қолдирганди ва унга, агар турли-туман хусусият, сифат ва фазилатлар ўзаро қориштирилиб, тузатиш киритилмаганида, бундан бошқача бўлиши ҳам мумкин эмасди. Энг аввало, у менга бошданоқ ёқиб қолган инсон қиёфаси эди; бегоналик барқ уриб турганига қарамасдан, бир оз ўзига хос ва маъюс, фамгин, бироқ сезгир, ўйчан, қоришиқ ва улуғвор кўриниш менга ёққанди. Ундаги хушмуомалалик ва илтифотда (гарчи булар унга бир қадар малол келаётгандек туюлса-да), такаббурлиқдан асар ҳам йўқ — аксинча, бир оз таъсирчанликми, ўтинчми, илтижоми, шунга ўхшаш нимадир мужассам эди. Мен уларни кейинроқ тушуниб етган бўлсан-да, буларнинг бари, ўшанда менда унга нисбатан хайриҳоҳлик уйғотганди.

Иккала хонани кўздан кечириб улгурмасимиздан ва бошқа музокаралар поёнига етмасдан, менинг тушлик вақтим тугаб, ишга боришимга тўғри келди ва мен хайрлашиб, уни холам ихтиёрига қолдирдим. Кечқурун ишдан қайтганимда, холам менга мусофири ижарада турадиган бўлганини, шу кунларда кўчиб келишини, фақатгина бир илтимоси борлигини айтди. Илтимоси шундан иборат эдики, унинг келишини полициядагилар билмай қўяқолсин экан. Сабаби, касалманд бўлгани учун унинг ортиқча расмиятчиликка ҳамда полиция маҳкамаси эшигига сарфайиб туриш ва ҳоказоларга сира тоқати йўқ экан. Ўшанда унинг илтимосидан қанчалик ҳайронлигим

холам бу шартга кўнмаслиги юзасидан огоҳлантирганим ҳануз кечагидек эсимда. Ундаги ишончсизлик ва ётси-раш, бунинг устига полициядан ҳадиксираши менда қандайдир шубҳа туғдирганди. Мен холамга, бу фалати шартни бажарган тақдирда ҳам ўзи учун хунук оқибатлар юзага келишини тушунтириб, рози бўлмасликни уқтиридим. Бироқ холам мусофирга маҳлиё бўлиб, тилидан илинганд, унинг истак-ҳоҳишини бажо қилишга аллақачоноқ розилик бергани кейинроқ маълум бўлди, чунки холам ўзига хос бўлган: одамгарчилик, хушмуомала, илтифот, оналарга хос бўлган меҳр-оқибатни ижаракиларга илгари ҳам кўрсатган. Баъзи ижаракилар бундан фойдаланиб қолишарди. Худди шундай, дастлабки ҳафталарда мен янги ижаракимииздан камчилик излаб, нолисам, холам ҳар гал уни ўз ҳимоясига оларди.

Полицияга хабар бермаслик ҳақидаги гап менга унча ўтиришмаганиданми, ҳар қалай нотаниш кимса, унинг келиб чиқиши-ю, ният-мақсадлари тўғрисида нималар билишлигини холамдан сўраб-суриштирдим. Гарчи мен ўшанда, туш пайтида хайрлашиб чиқиб кетганимдан сўнг, у ҳам уйда узок қолмаган бўлса-да, холам мусофири ҳақида ул-бул нарсани билиб олишга улгурибди. Унинг айтишича, шахримизда бир неча ой бўлиб, кутубхоналардан фойдаланаркан ва шаҳар осори атиқаларини томоша қиларкан. Аслида унинг шу қадар қисқа фурсат ижарада туриши холамга ҳам унча тўғри келмас, бироқ холам уни ёқтириб қолганди, чамаси. Қисқаси, хоналар ижарага топширилди, менинг эътиrozларим эса, кеч эди.

— У нима учун: «Бу ернинг ҳавоси муаттар экан», деди? — сўрадим мен.

Шунда, кўп нарсани олдиндан сезадиган холам:

— Буни мен аниқ биламан, — деди. — Бизницида озодалик, саранжом-саришталик ва хушхулқ, бамаъни ҳаётнинг изи сезилиб турибди. У гўё бундай ҳаётта кўникмаган, бундай ҳаётдан маҳрум бўлган кўринади.

Бўлиши мумкин, ўзимча ҳаёлимдан ўтказдим. Лекин борди-ю, саранжом-сариштали ва одобли турмушга ўрган-

маган экан, исқирт, палид бўлса-чи, ҳаммаёқни булғаб ташлайверса, ё уйга нуқул ичиб, маст-аласт келаверса-чи, унда нима қиласиз?

— Буни ҳали кўрамиз, — деди холам ва жилмайиб қўйди. Мен холамнинг жавоби билан кифояландим.

Ҳақиқатан ҳам менинг ҳадикларим асоссиз бўлиб чиқди. Ижаракининг бизга на оғирлиги туши, на зиёни тегди. Уни биз ҳалиям яхши ном билан эслаймиз. Бу одамнинг ботини вужуд-вужудимизни, бутун кўнгли-мизу, қалбимизни афдар-тўнтар қилиб юборганди, гапнинг очиги, бундан ҳалиям халос бўлолганимча йўқ. Уни баъзан кечалари ўйлай бошлайман. Дунёда шундай зот (гарчи у менга азиз бўлиб қолган бўлса-да), мавжудлигидан вужуд-вужудимда алғов-далғов ва бесаранжомлик сезаман.

Орадан икки қун ўтиб, извошчи мусоғир Ҳарри Ҳаллернинг нарсаларини олиб келди. Буюмлари орасида ажойиб чарм чамадон менда яхши таассурот қолдирди. Уларнинг ичидагина бир ясси сафар чамадони ҳам бўлиб, унга турли-туман, ҳатто уммон орти мамлакатларининг меҳмонхоналари ва нақлиёт ширкатларининг фирмаси белгилари ёпишириб ташланганди. Улар сарғайиб кетганигидан чамадон соҳиби илгари кўп сафар ва саёҳатларда бўлганини билса бўларди.

Нихоят, унинг ўзи ҳам кириб келди. Вақт сайин мен бу фалати, ажабтовур одамга аста-секин ўргана бошладим. Гарчи мен Ҳаллерга кўзим тушган илк дақиқаданоқ кизиқиб қолган бўлсан-да, илк ҳафталарда у билан сухбатлашишга ҳафсала қилмадим. Шундай бўлсан-да, аввалбошданоқ бу кишини бир оз кузатиб юриб, баъзан унинг йўқлигига хонасигаям кирганман, азбаройи қизиқишим туфайли оз-моз айғоқчилик ҳам қилганман.

Шундай қилиб, Чўл бўрисининг ташки қиёфасига доир баъзи бир маълумотларга эга бўлдим. Бир қарашдаёқ, у мислсиз, камдан-кам учрайдиган ва фавқулодда қобилиятга эга инсон сифатида таассурот қолдирар, чехрасидан ақл, нур ёғилар, кутилмаган нозик файриоддий,

гаройиб, ҳассос руҳий ва маънавий ҳаёт барқ уриб турарди. Сұхбат чоғида у баъзан, сал ошириб юборгудек бўлса, азбаройи табиатан гаройиблигидан ўзига хос сўзласа, шунда унга сўзсиз қулок солишимизга тўғри келарди. Ҳақиқатан ҳам унда чин маънавиятли инсонларда учрайдиган кенг фикрлилик, билим, мақсадга мувофиқлик сингари фазилатлар бошқаларга қараганда кўпроқ мужассам эди. Бундай тоифадаги кишиларга шуҳратпрастлик бегона; улар кўзга ташланиш, ўзларин бозорга солиш-у, бирорга гапини маъқуллатиш фикридан йироқ юришади.

Шу ўринда бир ҳикматли фикр, уни ҳикматли деб ҳам бўлмайди, балки атиги биргина нигоҳ билан боғлиқ бўлган воқеани айтиб ўтмоқчиман. Нима бўлди-ю, машҳур бир тарихчи-файласуф, Оврўпога номи кетган маданият мунаққиди маъруза қиласидиган бўлиб қолди. Чўл бўрисини ҳам, (гарчи унинг сира-сира иштиёқи бўлмасада), аранг кўндиришга муваффақ бўлдим. Маърузани тинглашга бирга бордик, ёнма-ён ўтиридик. Нотиқ минбарга кўтарилиб, сўз бошлиши биланоқ, унга ихлоси баланд бўлган баъзи бир тингловчиларнинг ҳафсаласи пир бўлди. Чунки, у олифтанамо, кеккайган, қуруқ савлатнинг ўзи эди. У сўзини бошларкан, тингловчиларга тил-ёғламалик қилиб, маъруза тинглашга кўпчилик келишгани учун миннатдорчилик изҳор қилди. Шунда Чўл бўриси менга бир қараб қўйди. Бу нигоҳ ичидаги нотиқнинг сўзлари-ю, унинг бутун шахсияти устидан кескин танқид зоҳир эди. О, бу шунақангидан эсдан чиқмайдиган, қўрқинчли нигоҳ эдики, унинг мазмун-моҳияти ҳақида бутун бир китоб ёёса бўларди! Нигоҳ ўзининг асосли, нозик кинояси билан нафақат нотиқнинг ўзинигина танқид остига олар, балки минбардаги машҳур одамни ер билан битта қилиб ташларди, бироқ бу ҳали ҳолва эди. Унинг қарашида киноядан кўра кўпроқ изтироб, ҳаттоки тагтубсиз, ноумид қайфу-алам мужассам эди; сокин, бирмунча эҳтиёткорлик, бир қадар шаклланган ва одат тулага кирган тушкунлик мазмун-моҳияти устунороқ эди.

Ана шу тушкунлик ва умидсизлик нафақат ўзига бино күйгөн нотиқни, унинг бир оз такаббурона маърузасини, шу лаҳзадаги вазиятни, тингловчиларнинг кутган нарса-си ҳамда кайфиятини ёритиб берарди. Йўқ, Чўл бўриси-нинг бу нигоҳи бутун давримизни, бутун инсоний фимири-фимирилик, тадоригу ҳаракатларни, бутун амалпарастлик-манасбапарастликларни, бутун шухратпарастлигу ўзига бино қўйган, саёз, қуруқ зарофатнинг юзаки ўйинлари-ни нур янглиф ёритиб, тилка-пора қилганди, — эҳ, аф-susки, бу нигоҳ замонамиз, маънавиятимиз ва мадания-тилизнинг камчиликлари-ю, умидсизликларидан ҳам чу-курроқ, янада қамровлироқ эди, бу — бутун башарият-нинг юрак-юрагига етиб борганди... У бу нигоҳ бирги-на сонияда бир мутафаккир, қолаверса, донишманднинг инсон ҳаёти қадр-қимматини ва умуман, мазмун-мохия-ти хусусидаги бутун шубҳа ва гумонларини ҳам очик-оидин ифодалаб бера олди. Бу нигоҳ: «Кўрдингми, биз ана шунаقا маймунлармиз! Билиб қўй, одамзод ана шу-наقا!» дерди ва шу лаҳзада барча шон-шухрат, ақл-ид-рок, унинг эришган барча ютуқ ва муваффакиятлари, юксакликка эришиш йўлидаги ҳаракат ҳамда уринишла-ри, Инсонга хос бўлган улуғворлигу бардавомлик ўпи-рилиб қулади ва буларнинг барчаси майнавозчиликдан ўзга нарса эмаслиги аён бўлиб қолди!

Мен, ўз режам ва истак-ҳохишимга зид бўлса-да, анча илгарилаб кетдим: Ҳаллер ҳақида бутун ҳақиқатни ай-тиб бўлдим, ҳисоб. Ҳолбуки, менинг ниятим унинг сув-ратини аста-секин, ҳикояма-ҳикоя тасвирлаш, қиёфаси-ни босқичма-босқич очиб бериш эди. Шундай бўлгандан кейин энди Ҳаллернинг сирли «файриоддийлиги» ҳақида яна гапириб, батафсил тўхталиб ўтиришим ортиқча, ин-чунин камина мана шу файриоддийлининг, мана шу фав-кулодда ва даҳшатли узлатнинг сабаб ҳамда мазмун-маъ-носини аста-аста англаб, тушуниб етганман. Менимча, шундай бўлгани маъкул, чунки ўзим имкон қадар парда ортида туриб, воқеани зимдан кузатмоқчиман. Мен ўз фикрларимни тикиштирмоқчи ёки ҳикоянавислик ё бўлма-

сам, рухшунослик қилмоқчи эмасман, балки фақатгина бир гувох, шохид сифатида Чүл бўриси ҳақидаги қўлёзмаларни қолдирган ўзига хос, фалати бир инсоннинг суратига баҳоли қудрат чизмоқчиман, холос.

Мен сездимки, бу одам бетоб, қандайдир руҳий касал ёки бўшанг, иродасиз шахс ва ундан ўзимни соғлом ҳис-туйғу, сезги билан ҳимоя қилдим. Бу ҳимояланиш вақт ўтиши билан унга нисбатан ҳамдардлик ва ачинишла йўғрилган хайриҳоҳликка алмашиниб борди, чунки унинг ёлғиз, кимсасиз, фариблиги ҳамда доимий равишида ич-ичидан эзилиб, азобланиб юришига ўзим шахсан шоҳид бўлардим-да. Бу даврда менга унинг дарди-табиатида қандайдир камчилик ёки қусурлар сабабли эмас, балки аксинча, ундаги бир-бири билан уйғунлашмаган бой туғма истеъдод ва куч-қудрат орқасида намоён бўлаётгани бот-бот аён бўла борди. Нитшенинг айрим фикрлари билан айтганда, Ҳаллер ўзида ҳад-худудсиз, даҳшатли азоб-уқубатга қодирликни шакллантирган чинакам изтироб даҳоси эканлигини англаб етдим. Айни пайтда ундаги умидсизлик дунёдан нафратланиш эмас, балки ўз-ўзидан нафратланиш эканлигини ҳам англадимки, алалхусус, у муассасалар ва шахслар ҳақида аямасдан, очиқ-оидин, ҳаттоқи, уларнинг гўрига гишт қалаб гапирган пайтида ҳам зинҳор-базинҳор ўзини истисно қилмас, биринчи ўқларни у доимо ўзига қаратар, энг аввало, ўзини ўзи нафратлар ва инкор этарди...

Шу ерда бир психологик эслатмани қистириб ўтишимга тўғри келади. Гарчанд мен Чўл бўриси ҳаёти ҳақида кўп нарса билмасам-да, барибир, унинг ота-онаси ва муаллимлари ҳам меҳр-оқибатли, талабчан, қаттиқ-қўл ва ўта художўй, тақводор одамлар бўлганлигига аминман. Улар берган тарбия асоси «иродани синдириш» га қаратилганлиги маълум. Бироқ бу уриниш мазкур ўқувчида қутилган натижани бермаган; у хийла кучли, иродали, хийла мағрур ва ақлли бўлган. Иродани синдириш, шахсиятни йўқ қилишга йўналтирилган сабоқлар уни нафратини ўз-ўзидан қўзғаб келган. Шу тарика у

ҳаёти давомида ўзининг бутун таҳайюлий истеъодини, бутун ақл-идрок, заковатини ўз-ўзига — мана шу беайб ва олийжаноб вужудга қаратади. Чунки бу борада у ўтакетган насроний ва жафокаш эдиким, қўлидан келган ҳар қандай кескинликни, ҳар қандай танқидни, қаҳру фазабни, нафратни у, энг аввало, ўзига қарши йўналти-рарди. Унинг ён-беридағи одамларга келсак, уларнинг дилини оғритмасликка ҳаракат қиласарди, чунки «яқин кишиングни севиш» унинг вужуд-вужудига худди нафрати сингтан каби чукур илдиз отган эди. Шундай қилиб, ўз-ўзингни севмаслик, яқин кишиングни ҳам сева олмас-лигинга далил, қолаверса, ўз-ўзингга нафрат ҳам пи-ровард натижада худди ўтакетган худбинлик янглиғ даҳ-шатли якка-ёлғизлик ва тушкун-умидсизликни келти-риб чиқаришига яққол мисол бўлиб хизмат қиласарди.

Ўрни келганда фикрларимни далиллар билан тўлди-рарман. Ҳозирча шуни айтишим мумкинки, қисман ай-фоқчилигим, қисман холамнинг кузатувлари сабаб бўлиб, Ҳарри Ҳаллернинг турмуш тарзини аниқлашга муваффақ бўлдим. Тез орада унинг муайян бир касб билан шуғулланмаслиги, тафаккур соҳиби ва китоб шинавандаси эканлиги маълум бўлди. У ўриндиғида туш маҳалига қадар чўзилиб ётар, уйқудан тургач, эгнида халат билан ётоқ бўлмасидан хонаси томон бир-икки қадам юриб қўярди. Хона — қўш деразали, кенг ва ёруғ болохона, аввалги ижарабалар турган пайтдагига қараганда бошқачароқ кўрина бошлиганди. Деворларга суратлар, журналлардан қирқиб олинган расмлар осилар, улар тез-тез алмаштирилиб турарди. Жануб манзараси акс этган суврат, олмон шаҳарчасининг фотосурати, афтидан, Ҳаллер туғилиб ўстган юрт бўлса керак, яна қандайдир рангбаранг акварель тасвиirlар ҳам осиғлиқ турарди. Бадиий сувратларни унинг ўзи чизганлигини биз кейинроқ билдиқ. Ёш, гўзал бир аёл ёки қизнинг ҳам сурати бор эди. Деворда бир муддат Сиём Буддаси осиғлиқ турди, кейин унинг ўрнини Микеланжелонинг «Тун» асари эгаллади. Вақт ўтиб у ҳам ғойиб бўлиб, ўрнига Маҳатма

Ганди* сурати илинди. Китоблар нафақат хонадаги катта китоб жавонини тўлдириб турар, балки ҳамма жойда — столлар, бежирим эски ёзув столи устида, диванда, курсилар, ерларда сочилиб ётарди. Китоблар орасига аллақандай қофозчалар қистириб қўйилар, улар ҳам тез-тез ўзгариб турарди. Китоблар тобора қўпайиб борарди, чунки у китобларни нафақат кутубхоналардан кўтариб келар, балки почта орқали ҳам тез-тез олиб турарди. Хуллас, кўрган одамда бу хонада яшаётган одам олим бўлса керак, деган тасаввур уйғонарди. Ҳаммаёқни сигара тутуни қоплар, сигара қолдиқлари ва кулдонлар ҳар ерда ётар, хона манзараси ҳам китоблар сочилиб ётишига мос тушарди. Бироқ китобларнинг аксарият қисми илмий мазмунда эмас, балки турли ҳалқларнинг турли замонларда яшаб, ижод этган шоир ва адиблари асарларидан иборат эди. У ҳар доим чўзилиб ётадиган диван устида бир муддат ўн саккизинчи аср охирига тааллукли бўлган «Софиянинг Мемелдан Саксонияга саёҳати»** номли асарнинг қалин-қалин олти жилдини кўриш мумкин эди. Афтидан, у Гёте ва Жейн Паулнинг, шунингдек, Новалис, Лессинг, Якоби ва Лиҳтенбергнинг тўлиқ асарлар тўпламларидан кўпроқ фойдаланаарди. Достоевский асарларининг бир неча жиллари ёзиб ташланган қофозчалар билан тўла эди. Каттароқ стол устидаги кўплаб китоблар ва асарлар ўртасида кўпинча гулдаста турарди. У ерда акварель (бўёқ) қутичаси ҳам қалин чанг босиб ётарди. Унинг ёнгинасида эса кулдонлар ва яна, яшириб нима қилдим, турли-туман шишаларда ичмилклар муҳайё эди. Атрофи похол билан тўқилган шишада кўпинча италияликларнинг қизил виноси бўлар, уни яқин атрофдаги дўйончадан олиб келар, баъзан бур-

**Махатма Ганди* (1869–1948) – хинд сиёсатчиси, давлат ва жамоат арбоби.

** «Софиянинг Мемелдан Саксонияга саёҳати» – Йоҳанн Тимотеус Хермес (1738–1821) асари, беш жилдан иборат бўлиб, 1769–1773 йй. Лайшцигда нашр этилган. (Шу ва бошқа барча изоҳлар таржимонники – М. А.).

гунд ва малага виноси ҳам пайдо бўлиб қоларди. Бир гал олча ширасидан тайёрланган спиртли ичимлик шишасининг қисқа фурсат ичида анча бўшаб қолганига кўзим тушди. Шундан сўнг, у охиригача ҳам ичилмасдан бир бурчакда чанг босиб қолиб кетди. Менинг бу қилган айғоқчиликларим юзасидан ўзимни ўзим оқламоқчи эмасман, балки шуни ҳам очиқ айтишим керакки, аввалига унинг маънавий-маърифий қизиқиши-у, ҳавасларга тўла бўлиб кўринган, аслида эса бемаъни, беҳуда ва бесамар ўтаётган ҳаёти менда шубҳа ва нафрат уйғота бошлади. Мен нафақат ўзига тўқ, туб жойли, бир маромда ҳаёт кечирувчи, ишни ва вактни аниқ тақсимлашга ўрганган одамман, спиртли ичимликларни умуман оғзимга олмайман, кашандা ҳам эмасман, шунинг учунми, менга Халлернинг хонасидаги турли-туман манзара тўс-тўполондан ҳам кўра айри ботди.

Иши билан уйқуси қандай ўлда-жўлда бўлса, мусофирнинг ейиш-ичиши ҳам шунчалик тартибсиз эди. Баъзи кунлари у умуман ташқарига чиқмас ва нонуштага қаҳва билангина кифояланар, бошқа ҳеч нарса емасди. Холам унинг нонуштасидан сўнг столида ликобчадан бошқа ҳеч вақони учратмасди. Бироқ айрим кунлари у бинойи-деккина, ҳашаматли ресторонларда, шаҳар атрофидаги мўъжазгина қовоқхоналарда тамадди қиласди. Саломатлиги ҳам яхши эмасди чамамда; зинадан чиқаётганида оёқларини базўр кўтариб босарди, менимча, унинг бошқа аъзолари ҳам анча-мунча безовта қиласди. Бир куни у менга йўл-йўлакай, анча йиллардан буён овқатни яхши ҳазм қилолмаслиги, тиниқиб ухлаёлмаслигини гапириб берганди. Мен унинг камчиликларини ичкилик ичишида деб билдим. Кейинчалик, у билан ресторонларга борганимда, унинг винони тез, лиқ эткизиб ичиб юборишига гувоҳ бўлардим. Бироқ унинг маст бўлганини ё мен, ё бошқа бирор ханузгача кўрган эмасмиз.

У билан бўлган илк учрашувимиз сира ёдимдан чиқмайди. Биз бир-биримизни шунчаки, ижарада турадиган кўшнилар бир-бирларини қандай билса, шундай танир-

дик. Қайсиdir куни кечкурун ишдан уйга қайтаётган эдим. Биринчи ва иккинчи қаватлар ўртасидаги зина пиллапоясида ўтирган жаноб Ҳаллерни кўриб, ниҳоятда ажабландим. У зинапоянинг энг юқори поғонасида ўтиради. Мени кўриб, йўл бериш учун бир томонга энгашди. Шунда ундан, бирон жойингиз оғримаяптими, деб сўрадим. Юқорига чиқаётган бўлсангиз, ёрдамлашай, бирга чиқайлик, дедим. Ҳаллер менга худди уйқудан хозир уйғонгандек қараб турарди. Сўнг аста жилмайди, у ҳар доим ана шундай ўзига ярашган, чиройли табассуми билан юракларни эзib юборарди. Мени ёнига ўтиришга таклиф қилди. Мен унга миннатдорчилик билдириб, бировларнинг уйлари олдида зинапояда ўтиришга одатланмаганлигимни айтдим.

— Ҳа-я, — деди у ва яна кўпроқ жилмайди. — Гапингиз тўғри. Агар бирпас шошмасангиз, мен сизга бу ерда нима учун ўтириб қолишим сабабини тушунтириб бераман.

У шундай деб, биринчи қаватдаги бир бева аёл турадиган хонадоннинг олд майдончасига ишора қилди. Паркет қопланган майдончада зинапоя, дераза ва ойнабанд эшиклар ўртасида баланд, устига кўхна қалай қопланган, қизил ёғочдан ишланган жавон турар, жавон олдида — хона саҳнида иккита кичкина, пастаккина поя устунчага ўрнатилган каттакон гултувакларда ажойиб манзарали ўсимликлар: азалия ва араукария барқ уриб, ўсиб ётарди.

Ўсимликларнинг тоза, озодалигидан хонадон сохибаси уларни эринмай, меҳр билан парвариш қилаётгани шундоққина кўриниб турар, уларга қараган сайин кўз кувнарди.

— Кўряпсизми, — сўзида давом этди Ҳаллер, — мана шу ўсимликлар ўсиб турган мўъжазгина олд майдонча ёнидан ўтаётганингда димогингта анвойи, муаттар ҳидлар урилади. Бу ерда бир зум тўхтамасдан ўтиб кетолмайман. Холангиз хонадонида ҳам худди шундай саранжом-саришталик, покизалик ҳукм сураркан. Бироқ

бу ерда ҳаммаёқ шунақанги тоза, озода, ялтиратиб артилганки, чанг-фубор деган нарсадан асар ҳам йўқ. Шу сабаб димофимни тўлдириб нафас оламан — сиз ҳам шуни сезяпсизми? Полни ишқалаб артиш учун ишлатиладиган мумнинг, терпентин* мойи-ю, қизил ёғочнинг, меҳр билан ювиб артилган ўсимликлар япроқ ҳидлари ўзаро қўшилиб, шунақанги ажойиб бўй таратадики, буни мешчанларга хос бўлган озодалик, аниқлик, пухталиктининг, бурчга садоқат-у, уни вижданан адо этишликтининг ёрқин намунаси деса бўлади. Бу ерда ким истиқомат қилишини билмадим-у, аммо мана шу ойнабанд эшик ортида покизалик, саранжом-саришталик, батартиблик, бурч ва одатларга иккиланганинамо ҳамда таъсирчанликоми, фидойиликоми, худди шунга ўхшаш хотиржамлик ҳукмрон.

Мен жим қолганимни кўриб, у сўзида давом этди: — Пичинг қиляпти, деб ўйламанг тағин! Азизим, мана шу мешчанлик ва батартиблик устидан заррача кулмоқчи эмасман. Тўғри, ўзим бу дунёда эмас, ўзга бир оламда яшайман. Эҳтимол, мана шундай араукариялар ўсиб ётган хонада бирор кун ҳам туролмасман. Лекин мен ўзим қариган, бир оз ночор Чўл бўриси бўлсан ҳам, барибир, она фарзандиман. Менинг онам ҳам худди шундай, келиб чиқиши оддий, мешчан аёл бўлган. Гуллар ўстирган. Хонадонга, зиналарга, мебель ва дарпардаларга кўз-қулоқ бўлиб, ўйда ва турмушда ҳамиша тозалик, озодалик ва тартиб бўлиши учун тиришиб, харакат қилган. Терпентин ҳиди ва барқ уриб ўсиб турган араукария мана шуларни ёдимга солди. Бу ерда ўтириб, соқингина саранжом-саришталик бўстонини томоша қиларканман, ана шундай маъволарнинг ҳали ҳам мавжудлигидан қувониб кетаман.

* *Терпентин* — нинабаргли дараҳтлар танасидан олинадиган қуюқ ширали елим бўлиб, унинг таркибидаги терпентин мойидан бўёқларни эритиш воситаси сифатида ҳамда уй-жойларни тозалашда фойдаланилади.

У ўрнидан турмоқчи бўлди, бир оз қийналди, шекилли, ёрдамлашиб юборганимга индамай ройиш бўлди. Мен нима дейишни билмай турардим. Афтидан, бу ғалати инсон холамга ўхшаб, мени ҳам ўзининг аллақандай сеҳри билан чулғаб, ўзига ром қилиб олгандек эди. Биз зинадан жимгина юқорига кўтарилдик. Эшик олдига етгач, у кўлида калитни ушлаб тураркан, менга яна бир бор бошдан-оёқ разм солди-да, қувноқ оҳангда деди:

— Хизматдан келяпсизми, дейман? Ҳа-я, бу нарса менга бутунлай қоронфи, биласиз-у, мен бир чеккада яшайдиган одамман. Аммо ишончим комилки, сиз ҳам китоб ва шунга ўхшаш нарсаларга қизиқасиз. Холангиз айтгандилар, гимназияни тугаллаган экансиз, юоноллар тилини ҳам дурустгина биларкансиз. Бугун эрталаб денг, Новалисдан бир ҳикматли гап топиб олдим, кўрсатайми? Сиз ҳам қизиқиб қоласиз.

У шундай деб, мени хонасига бошлади. Ичкари киришим билан димомимга «гуп» этиб тамаки хиди урилди. У ўюлиб ётган китоблар орасидан биттасини суфуриб олдида, варақлай кетди.

— Буям яхши, жуда яхши гап, — деди у. — Эшитинг-а: «Азобланишдан фахрланиш лозим — ҳар бир азоб уқубат бизга унвонимиз юксаклигини эслатади». Ажойиб! Нит shedan саксон йил олдин айтилган! Бироқ бу мен сизга айтмоқчи бўлган ибора эмас — шошманг — ҳозир кўрсатаман. Демак: «Кўпчилик инсонлар ўргангунларига қадар ҳам тезроқ суза қолишни истамайдилар». Кулгили-а? Албатта, сузишни хоҳлашмайди-да! Улар сувда эмас, ерда яшаш учун туғилган-ку, ахир. Ва, албатта, ўйлашни ҳам исташмайди; улар яшаш учун яратилган, ўйлаш учун эмас! Ҳа, кимки нуқул ўйлайверса, тафаккурни моҳият деб билса, у албатта, кўп нарсага эриша олади, бироқ, ер билан сувни алмаштириб, чўкиб кетиши ҳам ҳеч гапмас.

У мени ўзига жалб қилиб олган, қизиқтириб қўйганди. Шу боисданми, унинг олдида бир оз ушланиб қолдим. Ўша кундан бошлаб, зинада ё кўчада учрашиб қол-

сак, оз-моз гурунг қиласынан бүлдик. Аввалига у менга, худди араукария ҳақида сұхбатлашған пайтимиздагига үхшаб, киноя-пичинг билан гапираётгандек туулаверди. Аслида у араукарияга нисбатан қандай бўлса, менга ҳам худди шундай хурмат-эҳтиром кўрсатарди. У ўзининг ҳад-худудсиз, таг-тубсиз ёлғизлиги-ю, ҳатто сувда сузиб юриши хусусида ҳам шу қадар комил ишончли эдики, кундалик ҳаёт ҳаракат-ташвишларига, масалан, менинг ишга аниқ, ўз вақтида бориб-келишимга кўзи тушиб қолса ёки хизматкор оқсоч ё бўлмаса, трамвай кондуктори бирор фикр-мулоҳаза билдириса-да, у ҳеч қандай киноя-кесатиксиз, бундан самимий таъсирланиб, тўлқинланиб кетарди. Бошида менга унинг бегам-беташвиш хожалардек ялло қилиб юриши, ножиддий эрка-тантлигига, гапнинг очиғи, кулгили ва муболагали бўлиб туулганди. Бирок бора-бора мен унинг ҳақиқатан ҳам бизнинг майда, мешчан дунёмизни ўзининг бўшлиқ оламидан — ёт, нотаниш, Чўл бўрисигагина хос бўлган маъводан кузатиб, ҳайратланишини, севишини аста-секин билиб олдим. Бу эса унга мустаҳкам ва ишончли, олис ва эришиб бўлмайдиган, ватан ҳамда тинчлик рамзи бўлиб туулар, буларга, афсуски, унинг йўли айри тушган эди. У янги кўчиб келган кўшни хотин — бамаъни аёл билан ҳар гал рўпара келганида, бошидан қалпоғини олиб, хурмат-эҳтиром билан саломлашарди. Холам у билан баъзан бир оз сұхбатлашган ёки унинг нарсаларидағи айрим жузъий камчиликларни, айтайлик, палтосидаги осилиб қолган тугмани кўрсатгандарда, у ажиб бир эътибор билан қулоқ солар, бундай пайтларда унинг хижолатдан ерга киргудек бўлиб кетганигини сезиб олиш қийин эмасди.

Ўша, араукария ҳақидаги илк сұхбат чоғидаёқ у ўзини Чўл бўриси деб атаганди. Бу, албатта, менга ўшанды бир оз фалати туулган эди. Шунақаям таъриф-тавсиф бўладими ахир? Лекин кейинчалик мазкур иборага шунчалик кўникиб кетдимки, тез орада Чўл бўриси деган ном фикр-хаёлимда турғун бўлиб қолди ва бугунги кунга келиб ҳам бу ҳодисани бундан бошқа бир тузукроқ, дурустрок

ном билан ифодалаб беролмасам керак. У — шаҳарга, одамлар орасига оралаган, галасидан адашган Чўл бўриси эди. Унинг яккаю ёлғизлиги, ёввойилиги, бесаранжомлиги, ватанини соғиниши, қўмсаши ва дарбадарлигини бундан-да ортикроқ таъриф билан тавсифлаб бўлмас эди.

Бир куни кечкурун симфония концертига тушгандим. Кутилмаганда уни кўриб қолдим. У менинг шундоқ яқингинамда ўтирас, бироқ мени кўрмасди. Уни анчагина кузатишга муваффақ бўлдим. Аввал Ҳенделнинг гўзал ва ажойиб мусиқаси ижро этилди. Бироқ Чўл бўриси ўзи билан ўзи овора, на мусиқага, на атрофидагиларга эътибор қилас, ёлғиз, ёт, лоқайд, аммо ўйчан, серташибиши қиёфада пастга қараб ўтиради. Шундан кейин Фридеман Бахнинг кичик симфонияси янгради. Шу пайт унга қараб, таажжубдан қотиб қолдим: мусофирим бир неча тактдан сўнг ўзича кулимсиради, кейин хаёл уммонига бутунлай фарқ бўлди шекилли, ўзи билан ўзи андармон эди. Мен энди мусиқа бу ёқда қолиб, унга кўпроқ эътибор бера бошладим. Чамаси, у ёқимли, оромбахш орзулас оғушида сузар, кайфи чоф, баҳтиёр ва масур кўринарди. Бу ҳол ўн дақиқадан мўлроқ давом этди. Мусиқа нихоясига етгач, у ўзига келди, тўғри ўтириб олди. Бир ўрнидан турмоқчи ҳам бўлди, йўқ, яна жойида ўтирганича мусиқа тинглай бошлади. Бу галгиси Регернинг вариациялари* бўлиб, кўпчиликда оғир ва зерикарли таассурот қолдирди. Уни диққат билан тинглай бошлаган Чўл бўриси ҳам энди қўлларини чўнтағига тиқиб, бўшашиб қолганди. Унинг юз-кўзида бояги сурурдан асар ҳам қолмаган, аксинча, қовоқ-тумшуғи осилган, қаримсиқ, рангпар ва домангир қиёфада эди.

Концертдан сўнг уни кўчада яна кўриб қолдим ва ортидан юрдим; у пальтосига ўралиб олганича дилгир ва ҳорғин қиёфада мавзеимиз томон аста қадам ташлаб борарди. Эскича урфда қурилган меҳмонхона-ресторан ол-

* *Вариация* – бир мусиқий мавзунинг айрим унсурлар – ритмоҳанг ва уйғунлик ўзгариши натижасида юзага келган кўриниши.

дидан ўтаётиб, тўхтади. Ҳардамхаёллик билан соатига қаради-да, ичкарига кирди. Азбаройи қизиққанимдан мен ҳам унинг ортидан эргашдим. У мешчанларга хос қиёфада стол атрофида ўтирас, бека ва официант уни эски танишлардек кутиб олишганди. Салом бериб, унинг ёнига ўтиредим. Орадан бирор соат вақт ўтди. Мен бу орада икки қадаҳ маъданли сув ичдим, у эса олдин яримта, кейин яна чорак літр қизил вино буюрди. Унга концертга тушганимни эслатдим, бироқ у бунга жавобан лом-мим демади. Маъданли сув шишиасидаги ёрликни ўқий туриб, вино ичишиб маслигимни сўраб, лутфан таклиф қилди. Вино ичмаслигимни эшитгач, яна ночор ахволда қолди.

— Ҳа, тўғри қиласиз, — деди у. — Мен ҳам узоқ йиллар давомида нафсни тийиб яшаганман. Бироқ ҳозир эса яна қорамтири ва рутубатли Далв буржи остида яшапман.

Мен шунда ҳазиллашиб, унинг илми нужум — астрологияга ихлоси борлигига ҳам унчалик ишонқирамаслигимни билдиргандим, у яна юракни эзадиган хушмуомалалик билан деди:

— Тўппа-тўғри, бу илмга ҳам, афсуски, ишона олмайман.

Мен у билан хайрлашиб, уйга кетдим. Бу оқшом у жуда кеч қайтди, аммо қадам ташлаши одатдагидек эди. Ҳамишагидек дарҳол ётиб қолмади (хоналаримиз ёнмаён эмасми, буни аниқ билдим) — хонасида бирор соат давомида чироқ ёниқ турди.

Яна бир бошқа оқшом ҳам эсимда қолган. Ўшанда уйда холам йўқ, ўзим ёлғиз эдим. Эшик кўнғироғи жиринглаб қолди. Очсан, остоңада ёш, келишган бир хоним турарди. Жаноб Ҳаллерни сўрагач, уни таниб қолдим: у хонада осигурилган турган суратдаги аёл эди. Унга эшикни кўрсатдим. Бир оздан сўнг, уларнинг бирга зинадан пастга тушиб, бир-бирлари билан ҳазиллашиб, чақчақлашиб, ўзаро сухбатлашиб бораётганликлари қулогимга чалинди. Мен бу дарвешнинг шу қадар ёш, гўзал ва келишган маҳбубаси борлигидан таажжубга тушдим. Унинг ҳаёти

ҳамда ўзи ҳақидаги барча фараз, тахмин, гумонларим тушинарсиз, айқаш-уйқаш бўлиб кетди. Бироқ орадан бирор соат ўтар-ўтмас у зинадан оғир қадамлар билан кўтарилиб, бир-бир босиб уйга ёлғиз, ғамгин кириб келди. Ўша оқшом хонасида тонгга қадар чироқ ўчмади – бамисоли қафасга қамалган бўридек соатлаб бедор юриб чиқди.

Мен уларнинг бир-бирига бўлган муносабатлари ҳақида ҳеч нима билмайман. Фақат шуни ҳам қўшимча қилмоқчиман: мен уни ўша аёл билан шаҳар кўчаларидан бирида яна бирга бораётганини кўрдим. Улар қўл ушлашган кўйи бахтиёр эдилар. Беихтиёр бу одамнинг ташвишли қиёфасида вақти келса қанчалар жозиба, болаларча соддалик мужассам бўлишидан таажжубландим ва холамнинг унга бўлган хайриҳоҳлигини ҳам, ўша аёлни ҳам тушунгандек бўлдим. Лекин у ўша куни кечқурун ҳам уйга бир аҳволда, маъюс ва маҳзун кириб келди; мен уни уй эшиги олдида учратдим. Гоҳи-гоҳида бўлганидек, у ўша куниям пальтоси остида итальян виноси шишасини тутиб турарди. У кулбасида ярим тунгача ўша аёл билан бирга бўлди. Унга раҳмим келарди. Унинг ҳаёти нақадар ночор, тушкун ва ожиз эди!..

Бас, етар!.. Энди Чўл бўрисининг ўз жонига қасд қилган кишидек турмуш кечираётганини тасвирлаб, бу ҳақда ҳикоя қилиб ўтиришга ҳожат ҳам йўқ, деб ўйлайман. Бироқ нима бўлгандаям, мен унинг қайсиdir куни, кутилмаганда барча қолган қарзларини тўлаб ва хайрмазъурни насия қилиб, шахримиздан тўсатдан фойиб бўлганидан кейин ўз ҳаётига зомин бўлган, деган фикрдан йироқман. Шундан кейин ундан ҳеч қандай хат-хабар бўлмади, фақат унинг номига бир нечта мактуб келди ва биз уларни ҳамон асраб, сақлаб келаяпмиз. Ундан бизницида яшаган пайтида ёзилган қўллэзмадан бошқа ҳеч вақо қолмаган. У қўллэzmани менга қолдираётгани, уни нима қилишим менинг ихтиёrimda эканлиги хусусида бир-икки сатр дастхат ҳам илова қилган.

Ҳаллернинг қўллэzmasida баён этилган воқеа-ҳодисалар мазмун-моҳияти жиҳатидан воқеликка қанчалик тўғри келиш-келмаслигини тафтиш қилиб ўтиришнинг иложи

йўқ эди. Шундай бўлса-да, унинг каттагина қисми хаёллот маҳсали эканлигига шак-шубҳа қилмайман. Бироқ бу тўқималар атайин ўйлаб топилган уйдирмалар эмас, балки бошдан кечирилган чукур руҳий кечинмаларни муқаррар, рўй берган воқеалар либосида маънодор, жонли ва ифодали тасвирлаб беришга бўлган уриниш эди. Ҳаллернинг қўлэзмасидаги қисман хаёлий кечинмалар унинг бизникида яшаган давридан ҳикоя қиласиди, уларнинг замирида, шак-шубҳасиз, воқелик мужассамдир. Ўша даврда мижозимизнинг рафтори ва юриш-туриши ўзгариб қолган, кўпинча уйда бўлмас, баъзан кечалари ҳам келмай қолар, китоблари ҳам мутлақо қўл тегмай, қолиб кетарди. Уни гоҳо учратган пайтларимда эса, у ниҳоятда жўшқин ва ёшариб кетгандек, баъзан ҳаттоки, хурсанд-шодон ҳам кўринарди. Шундан сўнг, ундаги оғир руҳий сиқилиш ҳолатини кузатишинга ҳам тўғри келди. У бир неча кун ўрнидан қўзғалмай, туз тотмасдан ётиб қолди. Ўша кунлари яна пайдо бўлиб қолган маҳбубаси билан бутун уйни бошларига кўтариб, қаттиқ даҳанаки жанг ҳам бўлиб ўтди. Бунинг учун Ҳаллер эртасига холамдан кечирим сўраган.

Йўқ, у ўз жонига қасд қилмаган. Бунга имоним комил. У ҳамон яшаб юрибди. Аллақаерларда, аллақайси бегоналарнинг уйларидағи зиналардан ҳориб-тўзиб чиқиб тушиб юргандир, ялтиратиб артилган хонанинг паркет сахнларига, меҳр билан парвариш қилинаётган араукарияларга суқланиб боқаётгандир, кундузлари кутубхоналарда китоб титиб, тунларни ресторонларда ўтказаётгандир, ижара уйлардаги диванларда ётиб юргандир, эҳтимол. Ким билсин, дераза олдида туриб, кенг оламни, одамлар ҳаётини кузатаётгандир, бунда ўзини ортиқча сезса-да, ўз жонига жабр қилмаётгандир. Инчунин, ундаги ўз-ўзига ишонч бу азобни, бу машъум изтиробни умрининг поёнига қадар бошдан кечиришга ундейди. Мен уни бот-бот эслаб тураман. У менинг ҳаётимни енгиллаштиrmади, аксинча, на вужудимдаги куч-кудратни ўстирди, на дилимдаги шодонликни кўпайтирди! Лекин мен у эмасман ва унга ўхшаб

яшай олмайман, балки ўзимнинг майда ва мешчанларга хос бўлган, бироқ бадастир ва бурчга тўла турмуш тарзим бор. Шундай қилиб десангиз, холам иккаламиз уни хотиржамлик ва дўст-биродарлик туйфулари билан эсга оламиз. Холам мендан кўра ҳам у ҳақда кўпроқ билади, бироқ буни хайриҳоҳ қалбида пинҳон тутади. Ҳаллернинг эсадаликлариға келсак, уларни ғалати, ғаройиб, антика, қисман алам-изтиробли таассуротлар, қисман гўзал ва мазмундор, серфиқр хаёлий асар ҳам дейиш мумкин. Очифини айтишим керак, борди-ю, бу варакалар кўлимга тасодифан тушиб қолганида ёки уларнинг муаллифи менга нотаниш бўлганида, мен уларни аччиқ устида ташлаб юборган ҳам бўлардим. Лекин Ҳаллер билан бўлган танишлигимиз туфайли уларни қисман тушунишимга ва маъқуллашимга имкон туфилди. Агар мен бу эсадаликларда фақатгина ёлғиз бир бечора руҳий бемор одамнинг файритабиий хаёлий уйдирмаларинигина кўрганимда эди, уларни бошқаларга ҳавола этишдан ўзимни тийган бўлардим. Бироқ мен уларда кўпроқ нарсани — маълум бир даврга хос хужжатни кўраяпман, десам муболага бўлмайди, чунки Ҳаллернинг руҳий хасталиги — буни мен бугун аниқ биламан — танҳо бир шахсгагина хос бўлган эмас, балки у муайян даврнинг, замоннинг дардидир. У ўша, Ҳаллер мансуб бўлган авлоднинг асаб хасталигидирким, унга ҳеч қачон кучсиз, нимжон ва норасо шахслар эмас, балки кучлилар, энг ақлли, қобилиятлиларгина чалинган кўринади.

Мазкур хотиралар — улар замирида воқелик қанчалик — кўп ё оз бўлмасин, барибир, катта бир давр хасталигин четлаб ўтиш ва бўяб-бежаш орқали эмас, балки шу хасталикнинг ўзини тасвир мавзуига айлантириш йўли билан бартараф этишга бўлган уринишdir. Улар, айнан, ғамгин руҳий оламнинг тартибсизликлари узра дам кўркув, дам жасорат билан қўйилган қадамларга ўхшайди; бу харатклар замирида тартибсизликларга зарба бериш ва азоб-мусибатни охирига қадар totиш, тортиш истаги ётади.

Ҳаллернинг бир гапи шуни англаб-тушуниб этишимга калит бўлиб хизмат қилди. Бир куни ўрта асрдаги

ваҳшийликлар тўғрисида сухбатлашиб ўтиргандик, у шундай деб қолди:

— Бу ваҳшийликлар аслида ҳеч гап эмас. Биласизми, ўрта аср одами бугунги ҳаётимизнинг бутун услубидан даҳшатли, ваҳшиёна ва варварларча деб эмас, балки бундан бутунлай бошқачароқ нафратланган бўларди! Ҳар бир давр, ҳар бир маданият, ҳар бир урф-одат ва анъана ўз услубига, унгагина тегишли бўлган оғир ва енгилликларга эга. Маълум бир азоб-уқубатларни табиий, шундай бўлиши керак, деб ҳисоблади, маълум бир кулфат-мусибатларни сабр-чидам билан қабул қиласди. Одамзоднинг ҳаёти икки замон, икки давр, икки маданият ва динлар бир-бири билан тўғри келиб қолгандагина ҳақиқий азобга, дўзахга айланади. Антик давр одами, агар ўрта асрда яшашига тўғри келганда борми, бизнинг тамаддунимизга тушиб қолган ёввойи қандай бўғилса, у ҳам шундай аянчли тарзда бўғилган бўларди. Шундай замонлар бўладики, бутун бир авлод икки давр, икки ҳаёт услуби орасига тушиб қолади, натижада унинг ҳар қандай табиийлиги, ҳар бир урф-одати, хотиржамлиги ва бегуноҳлиги изсиз йўқолади. Албатта, буни ҳар ким ҳам бирдек ҳис қилавермайди. Нитшедек инсон бугунгидек кулфатни бир авлод умридан зиёд олдинроқ бошидан кечирган — у ёлғиз ўзи тушуниб-тушунмай бошидан кечирган нарсани бугунги кунда минглаб кишилар ўз бошидан кечирмоқдалар.

Эсадаликларни ўқиётган пайтимда бу сўзларни тез-тез эслашимга тўғри келди. Ҳаллер ана шундай икки давр орасига тушиб қолган. Унинг қисмати ўз шахсий изтиробларидан ҳам кўра инсон ҳаётининг барча шубҳа ва гумонларини ўз бошидан кечиришдан иборат эди.

Бу эсадаликларининг биз учун аҳамиятли бўлиб туюлган тарафи ҳам шунда бўлса керак, деб ўйлайман. Худди шунинг учун ҳам уларни сизга ҳавола этишга қарор қилдим. Қолаверса, мен уларни оқламоқчи ё қораламоқчи ёки бўлмасам, бирор ҳукм чиқармоқчи ҳам эмасман — бу энди, ҳар бир ўкувчининг ўз виждонига ҳавола!

ҲАРРИ ҲАЛЛЕР ЭСДАЛИКЛАРИ

Бу күнни ҳам, бошқа кунлар каби тинч, сокин, ёқимли, ўзимнинг жўн ва журъатсиз турмуш тарзимга мос равишда ўтказдим; бир неча соат эски китобларни титкилаб ўтирдим, икки соатлар саломатлигим яхши бўлмай, у ербу ерим оғриб чиқди, бу ҳолат ёши ўтган одамларда учраб туради, сўнг дори ичдим. Оғриқлар бир оз тўхтагандек бўлди, ўзимни енгил ҳис қилганимдан иссиққина роҳатбахш сувда чўмилиб чиқдим. Уч маҳал почта келди. Барча керак-керакмас хат ва китобларни кўздан кечирдим, нафас олиш машқларини бажардим. Фикрлаш машқларини эса бошқа кунга қолдирдим. Бир соат очик ҳавода сайр қилдим. Сайр пайтида осмондаги патсимон чўзилган юпқа булутчаларнинг қимматбаҳо сурат янглиғ ажойиб манзарасини томоша қилдим. Ушбу манзарани қузатиш кўхна китобларни ўқищдек мароқли, илиққина сувда чўмилишдек ёқимли, хузурбахш эди, бироқ бу күнни ажойиб, омадли ва қувончли деб бўлмасди, балки у мен учун ўзим анчадан бери кўнишиб қолган одатдаги: ёши ўтиб қолган, домангир бир хожанинг ўртамиёна, чидаса бўладиган, бефарқ кунларидан бири эди. Бу кунлар у қадар азоб-уқубатлар, ўта фам-ташвиш ва тушкунликлардан холи бўларди, шу билан бирга, бундай кунларда Адалберт Штифтернинг қилганини қилиб,* соқол олаётуб, ўз жонигта қасд қилиб қўяқолиш пайти келмадимикан, деган саволни ҳаяжонланмасдан ва қўрқмасдан ўйлаб кўриб, мулоҳаза қилишга ҳам фурсат топарди, киши.

* Адалберт Штифтернинг қилганини қилиб, азоб-изтироблар исказасида қолган Штифтер 1868 йилнинг 18 январидан 19 январига ўтар кечаси устара билан томогини кесиб, ўз жонига қасд қилган.

Кимнидир дармонини олган — машъум, подагра* ёки ундан ҳам ёмонрок, кўз билан қулоқнинг ҳаракатини роҳатдан азобга айлантирадиган бош оғриғи ёки руҳсизлик, ботиний бўшлиқ ва тушкунликдан иборат бехузур кунлар — бундай кунларда эса сиз билан бизга вайрон қилинган ва бутун шираси ҳиссадорлик жамиятлари томонидан сўриб олинган еру кўк, тоқат қилиб бўлмайдиган, фақат ўзини ўйлайдиган сохта ва қуруқ инсоният олами ва маданият деб аталадиган бир нимарсадай, бозордагидек ялтир-юлтир, қустирадиган доридек ҳар қадамда ишшайиб, учраб туради. Агар кимки бундай дўзахона дамларни бошидан кечирган бўлса, бугунгидек ўртача, мўътадил, ярим-ёрти кунлардан, албатта, жуда мамнун бўлади ва печка атрофида ўтирволиб, тонгги рўзномаларни ўқииди; бугун ҳам ҳар қалай уруш-пуруш бошланмаганини, бошқа янги диктатура ўрнатилмаганини, сиёsat ва иқтисодиётда бошқа ўтакетган разолат, палидлик фош этилмаганини билиб олади, котиб қолган ижод-илҳом созини шукроналик билан қўлига олиб, уни ўртамиёна, пардаларда шодон созлай бошлайди. У ўзининг сокин, майин, ёқимли ва табиатдан бир оз сармаст мамнунлигининг ярим-ёрти эътиқодини зериктириб юборади ва мана шу зерикишнинг, мана шу раҳматга лойиқ шодонликнинг маъюс ва тушкун кайфияти узра — зериканидан мудраётган ярим-ёрти эътиқоди ва сочига оқ оралаган, паст, бўғиқ, хира овоз билан илохий қўшиқ куйлаётган ярим-ёрти Инсон бир-бирларига худди эгизклардек қараб туришади.

Мана, шундай мамнуният, дарднинг билин-билинмаслиги, ёш ўтинқираб қолган бир пайтда, чидаса бўладиган бир нави кунларни кўрганингта ҳам кўнгил кўтарилади, бундай кунларда дардни ҳам, қувончни ҳам сезмайсан, ҳаммаси ими-жимида, билин-билинмас, оҳиста, бамисоли оёқ учida юргандек бўласан. Фақат ёмон тарафи шундаки, мен мана шу қониқиши, мамнуният билан сира чиқиша олмайман-да, бир оз вақт ўтгандан сўнг, у кўзимга

* Подагра — бўғинларни зирқиратиб оғритадиган касаллик.

балодек күрина бошлайди, тоқат қилиб бўлмас даражада кўнгилни айнитади ва буткул тушкун кайфиятда бошқа бир маъволарга — мумкин қадар қувонч-шодлик, зарур бўлса — дард, фам, изтироб йўлларидан бўлса ҳам қочиб кетишинга тўғри келади. Агар мен бир оз муддат қувончсиз ё фамсиз қолсан ва мана шундай ўртамиёна кунлар ҳавосидан баҳраманд бўлсан, ана ундан кейин менинг болаларча вужудимда шунақангি бетайин, ҳавойи, англаб бўлмайдиган оғриқ-азоб пайдо бўладики, бунга чидай олмай, занг боса бошлаган шукроналик созимни мудраёттан ярим-ёрти Эътиқодимнинг мамнун башарасига қараб улоқтираман, бутун аъзойи баданимни эса шу ёқимли ҳарорат, муҳит эмас, балки иблисона бир азоб-укубат эгаллаб олади. Ана шундан сўнг вужудимда кучли ҳистуйғуларга, шов-шуввларга ёввойи бир хирс, мана шу вазмин, бир текис, мўътадил ва бичилган ҳаётга нисбатан қаҳр-ғазаб қўзғалади. Шу дамда бирон нарсани, универсал дўконними ё бўлмасам, катта бир бутхонаними ё ўзимни ўзим уриб, синдириб, майдалаб ташлагим, мусибат келтирувчи аҳмоқлик-тентакликлар қилгим, одамлар сажда қиласиган бут, санамлардан бир нечтасининг риёкорлигини очиб ташлагим, исёнкор мактаб болаларидан бир қанчасига ўзлари орзиқиб кутган Ҳамбургга йўл чипталари олиб бергим, ёш қизга яқин бўлгим ёки мешчанлар олами тартиботлари вакилларидан баъзи бирларининг каллаларини тескари бураб қўйгим келади. Чунки мен ҳаммасидан ҳам мана шу мамнунлик, шу соғломлик, шинам қуляйликни, фуқаронинг паҳпаҳлаб парвариш қилинган некбинлигини, ўртачалик, мўътадиллик ва ўртамиёналикнинг шу семириб кетган зот-зурриётларини ёмон кўрадим, улардан нафратланардим ва уларни лаънатлардим.

Шундай қилиб, мен мана шу жўн, ўртамиёна кунни қоронги тушай деганда, шундай кайфиятда кеч қилдим. Мен кунни бирор дардан азоб чекаётган одам сифатида ёқимли, яъни ўринда ётволиб, грелка қўйиб эмас, балки кундалик ишимдан қониқмай, кўнглим

айниб ўтказдим — шарт кийиндим-да, пальтога ўралиб олиб, коронғида, туманда шаҳарга отландим. Мақсадим — «Пўлат дубулға»га* бориб, ичувчилар тили билан айтганда «бир қултум вино» ютиш эди.

Болохонадаги ётоғимдан зинада пастга тушдим. Бу зиналарни энди қўяверасиз, улар ёғ тушса ялагудек то-залаф артилган, саранжом-сариштали, ўта баодоб, бироқ менга бегона бўлган мешчанларнинг уч оиласа мўлжалланган уйи зиналаридан юқорига кўтарилиш шунақаям оғирки... Бу қандай бўлади, билмадим-у, аммо-лекин мен — майда мешчанлар оламини ўлгудек ёмон кўрувчи беватан, ёлғиз Чўл бўриси ҳар доим улар орасидаги одамгарчилиги бор инсонларнинг уйларида яшаб келаман, бу менинг эски инжиқлигим. Мен на саройларда, на пролетарларнинг уйларида яшаб ўрганмаганман, балки айнан шундай майда мешчанларнинг ўта тартибли, бекамикўст ва ўта зерикарли хонадонларида истиқомат қила-ман. Бу уйлардан бир оз терпентин ва бир оз совун ҳиди анқиб туради, иннайкейин десангиз, эшикни тарақлатиб ёпишгаям, ифлос пойабзал билан кириб боришгаям кўрқа-ди, одам. Мен мана шундай мухитни, шубҳасиз, болали-гимдан яхши қўраман ва ватан соғинчим, ватанини қўмсанш ҳисси иложисизликдан мени ҳамон мана шу эски, аҳмоқона йўллардан юришга ундаиди. Қолаверса, ёлғизликдан иборат бўлган, тошбагир, оғули, ўта ва ўта бетартиб ҳаётим кечайдан, манави хонадондаги мухитнинг тескари-си бўлган қарама-қаршиликларга ҳам қўнгил қўйганман. Мен зинада туриб, мана шу сукунатни, тартиб, саранжом-саришталик, тозалик, одоб ва беозорлик ҳавосидан баҳраманд бўлишни жуда ёқтираман, чунки шунда мен-даги мешчанликка бўлган нафрат аллақандай меҳр-шаф-қат туйфуси билан алмашинади ва мен остоидан хонам-га кириб бораман. Хонадаги китоблар уюми орасида си-гара қолдиқлари ётган, вино шишалари турган, ҳамма нарса бетартиб, ташландик ва қаровсиз, ҳатто китоблар,

* «Пўлат дубулға» — Ҳессе Базелда ўтказган икки қиши фасли чоғида бориб турган, балиқ бозори ёнида жойлашган бар-ресторан.

кўлёзмалар, фикрлар ҳам ёлғиз бўлган бир жойда кимсанинг фурбати, одам бўлиш қийинлиги-ю, маъносиз ўтган инсон ҳаётига янгича маъно бахш этишга бўлган зўр иштиёқ руҳи илиа йўғрилган хонага кириб боришим биланоқ, буларнинг барчаси ўз-ўзидан барҳам топади.

Мана, араукария ёнидаман. Уйнинг биринчи қаватидаги зинапоя бир хонадон олдидағи майдонга олиб чиқади. Бу ерда бошқа жойлардагига қараганда ақл бовар қилмайдиган орасталик ҳукм сурарди, бир сўз билан айтганда, саранжом-саришталик маскани эди бу ер. Паркет қопланган ер саҳни ёғ томса ялагудек, оёқ босгани ҳайикасан, киши. Бу ерда иккита нафис, нозик, бежирим курсича бўлиб, уларнинг ҳар бирида биттадан каттакон гултувак. Гултувакларнинг бирида азалия барқ уриб, ўсиб ётибди. Иккинчисида эса, салобатли, соғлом, текис, тўғри ўсган болалар дараҳти – араукария. Унинг охирги шоҳидаги игнабарг ҳам ҳафсала билан ювиб, артилганидан яшнаб турарди. Мени ҳеч ким кузатмаётган пайтларда, мана шу масканга келиб, зина пиллапоясига ўтираман-да, араукарияга қўз ташлаб бир оз тин оламан. Мана шу тартиб, саранжом-саришталик боғи-бўстонида завқланиб ўтиарканман, у бутун вужуд-вужудимга аллақандай таъсир ўтказгандек бўлаверади. Ўйлайманки, шу майдон узра, араукарияниң табаррук сояси остида бир хонадон бор – унда яшнаб турган қизил ёғочга қўзингиз тушади. Бу хона-донда одоб, хушхулқ, тансиҳатлик, эрта туриш, бурчни адo этиш, оиласвий байрамлар ва якшанба кунларида ибодатхонага қатнаш ҳамда эрта ётишдан иборат бўлган турмуш тарзи мужассам десам, янглишмаган бўламан.

Ўзимни чаққон ҳис қилиб, тор, сернам асфальт йўлдан чопиб кета бошладим. Кўча чироқларининг хира нурлари рутубатли ҳавода намиққан ер бетини аранг ёритарди. Шу дамда ўспиринлик йилларим эсимга тушшиб кетди – ўша бўз бола пайтларимда мана шунақанги қоронғи, хира, рутубатли куз, қиши оқшомларини нақадар яхши кўрардим. Ярим кечалари пальтога ўралиб

олиб, ёмғири бўронларга қарамасдан кимсасиз, хувилланган табиат қўйнида ёлғиз, ярим, бироқ танҳолик ва дилгирлик кайфиятидан сармаст ҳолатда югуриб кетаверардим ва ўша лаҳзаларда миямга қўйилиб келган шеърий сатрларни ётогимга қайтгач, каравот четида ўтириб, қофозга тушириб қўярдим.

Мана энди, ўша кунлар ҳам ўтиб кетибди, ўша қадаҳлар ҳам сипкориб бўлинибди қайта тўлатилмабди. Бунга афсусланиб бўладими? Асло! Афсусланишнинг сирам ҳожати йўқ. Ўтган ишга салавот, унга ҳеч бир афсуснадомат чекиш керак эмас. Фақат, мана шу бугунги кунимга, менга на ҳадялар ва на рухий изтироблар келтирган, бой берилган беҳисоб соатлару кунларимга ачинардим, холос. Лекин худога шукурки, ора-сира менга рухий азоблар, ҳадялар тортиқ қилган, мен гумроҳни тўсиқлар оша олиб ўтиб, ҳаётнинг қайнаган қучогига қайтарган онлар ҳам, кунлар ҳам бўлганди. Мен шу дамда ана шундай онларни эслашга зўр бериб уринардим. Ҳамон эсимда, концертга тушгандим ўшанда. Аввалига ажойиб бир кўхна мусиқа ижро этилди. Сўнг ёғочдан ишланган, пуфлаб чалинадиган мусиқа асбоблари ижро чилари фортепъяно куйини чала бошлидилар. Худди шу куйнинг иккала такти ўртасида тўсатдан кўз олдимда у дунё эшиги очилса денг... Мен осмону фалакка чиқиб, қандайдир маконда пайдо бўлдим. Бутун вужудимни роҳатбахш азоб чулғаб олди, энди ўзимни дунёдаги ҳеч бир нарсадан химоя қилмас, оламдаги ҳеч бир нарсадан кўрқмас эдим. Ҳамма нарсага рози бўлиб, вужудимни, инон-ихтиёримни буткул топшириб бўлгандим. Бу нарса узоқ чўзилмади, чорак соатча давом этди чамамда. Бироқ бу воқеа ўша қуни оқшом тушимда яна тақрорланди. Ўшандан кейин онда-сонда тақрорланиб турди. Аниқ эсимда қолган. Олтинранг, жуда гўзал, беназир бир из ҳаётим узра сирли тарзда чақнаб, бора-бора пастлай бошлидиди. Қарасам, уни чанг ва ахлат босиб ётиби, сўнг яна тилларанг учқунлар ёруғида пайдо бўлди. Энди у сира ҳам фойиб бўлмайдигандек туюларди. Бироқ кўп ўтмай,

из пастга шўнғиб, яна кўздан йўқолди. Бир қуни кечаси ухламай ётгандим, тўсатдан шеър айта бошладим. Шунаканги гўзал, шанақанги ажиб шеърларки, уларни ёзиб қўймоқчи ҳам бўлдим. Аммо эрталаб туриб, сира эслолмадим — шу тариқа улар эски косадаги тошёнғоқдек ичимда қолиб кетаверди. Бошқа сафар бир шоирнинг асарларини ўқиётганимда, Декарт, Паскал фикрларини мушоҳада қилаётганимда ҳам шундай бўлди. Яна бир гал, маҳбубам билан биргалигимда, ўша олтиндек товланидиган изи чарақлаб, осмону фалакка ўрлади. Эҳ, бу илоҳий изни шу ҳаётимиздан, мамнун, ўта мешчан, ўта руҳсиз замонамидан, бизни қуршаган архитектуралар, дўконлар орасидан, сиёsat, одамлар орасидан топиш жуда-жуда қийин! Бу дунёning мурод-мақсадларига тушунолмасам, қувончларига шерик бўлолмасам, мен ночор зоҳид Чўл бўриси бўлмай, яна ким бўлай, ахир?! Мен на театрда ва на кинода узоқ қоламан, на рўзнома, на бир замонавий китоб ўқий оламан. Мен тушунолмайман, одамлар бу тиқилинч темир йўлларда ва меҳмонхоналарда, оғир, бўғиқ мусиқа янграётган қаҳвахоналарда, ҳашаматли шаҳарларнинг бар ва варъетеларида* излаётган қувонч ва шодлик... нима ўзи у? Жаҳон кўргазмаларидаги, карнавал сайил-томушаларидаги, билимга чанқоқ кишиларнинг маърузаларидаги, катта спорт майдончаларидаги менинг ўзим ҳам эриша олсан бўладиган ва минглаб одамлар ўзларини ўтга-чўққа уриб, бир-бирлари билан талашиб-тортишадиган бу қувончларнинг барчасини мен сира-сира тушунолмайман. Ва аксинча, мен учун онда-сонда содир бўладиган қувончли дамлардаги хузур ҳаловат, лаззат, завқ-шавқ ва кўтаринкилик ҳисобланган нарсани дунё жуда бўлмаса шеъриятдан, шеърий асарлардан излайди, ҳаётда эса буларнинг барчасини жиннилик деб ҳисоблайди. Агар ҳақиқатан ҳам бу дунё ҳақ бўлса, қаҳвахоналардаги бу мусиқа, бу оммавий кайф-сафолар, бу амриқоликлар, озгина нарсага қаноатлана-диган мамнун одамлар ҳақ бўладиган бўлса, унда мен

* *Варъете* — енгил жанрли эстрада театри.

нохақ эканман, унда мен жинни эканман, унда мен ўзимни ўзим атагандек, ҳақиқатан ҳам Чўл бўриси – ўзи учун ёт, бегона ва англаб бўлмас оламга кириб қолган, адашган, ўзининг ватанини, мухитини ва емишини топа олмаётган йиртқич эканман.

Мана шу ўзим кўникиб қолган ўй-хаёллар билан банд бўлиб, шаҳарнинг энг сокин ва энг кўҳна мавзеларидан бири бўйлаб, нам кўчадан чопиб кетавердим. Рўпарамда, тор кўчанинг нариги тарафида, қоронфилик қаърида мен ўзим илгари ҳам томоша қилиб ўтадиган эски, кулранг тошdevор кўринди. У ҳалиям ўша эски жойида – кичкина черков билан эски касалхона ўртасида мунғайиб турарди. Кундуzlари тошdevор жойлашган нотекис майдонга қараб туриб, бир оз тин олардим, чунки бундай тинч, сокин, хилват жойлар шаҳар ичкарисида анқонинг уруғи эди. Боз устига ҳар ярим квадрат метр жойда бир дўкон, қандайдир адвокат, ихтирочи, дўхтир, сартарош ёки товуқларнинг кўзини даволовчининг ишхоналари манаман деб олдингдан чиқиб турарди. Мана, ҳозир ҳам эски девор сокин уйқуда эди, бироқ унда нимадир ўзгаргандек кўринди, ҳа, девор ўртасида учи гумбазли, чиройли, ажойиб пештоқ пайдо бўлиби. Тушунмай қолдим, бу пештоқ илгаријам бормиди ёки янги ўрнатилдимикан? Шубҳасиз, у эски, кўҳна кўринарди; афтидан, қорамтири ёғоч эшикли бу дарвозадан қачонлардир сокин монастир ҳовлисига кириб-чиқилган. Бутхона аллақачоноқ йўқ бўлиб кетган бўлса-да, дарвоза ҳамон ўз жойида эди. Эҳтимол уни юз марталаб кўргандирман, шундай бўлса ҳам, эътибор бермаган бўлишим мумкин, балки у таъмирланган, бўялгандир, шунинг учун кўзга ташлангандир, ким билади. Мен у тарафга ўтмасдан, йўлкада тўхтадим, чунки ёмғирда ер бўшаб, лой бўлиб кетган эди, диққат билан разм солдим. Ҳаммаёқ қопқоронфи, кўзим илғагани шу бўлдики, дарвоза атрофига гулчамбарми ё бўлмасам, ола-була баргакми, шунга ўхшаш нимадир ўрнатилгандек туюлди. Астойдил тикилиб

қарагандим, пештоқ устида бир лавҳа оқарыб күрінді, чамамда унда бир нима ёзилгандек эди. Күзларимни каттароқ очдим. Нихоят, лой ва күлмакларга қарамасдан нариги томонға ўтдим. Шунда пештоқ устида, деворнинг кўк-кулранг тусдаги устки қисмида хира бир нуктага кўзим тушди. Нуқта устида ранг-баранг ҳарфлар пайдо бўлар, ҳаракатланар ва тезда фойиб бўларди. Ана холос, ўйладим ўзимча, келиб-келиб энди шу эски, беозор деворни ҳам тинч қўйишмай, ундан тижорат мақсадида фойдаланишибди-да!.. Бу орада баъзи бир сўзларни англагандек бўлдим, уларни ўқиш қийин, ҳарфлар ораси узук-юлук, бунинг устига хира, туссиз, тез ёниб, тез ўчарди. Буни ўйлаб топган тадбиркорга ҳам қойил қолмадим. Уям менга ўхшаб Чўл бўриси, бечорагина одамми дейман-да; нимага энди у ўзининг шундай ранг-баранг ҳарфлардан иборат лавҳасини келиб-келиб, шаҳарнинг эски қисмидаги қопкоронғи тор кўчада, ҳеч ким уйдан остона ҳатлаб, кўчага чиқмайдиган шундай бир ёмғирли, рутубатли ҳаво ҳукм сураётган кунда, бунинг устига, шу қадар тез, липлип ўтадиган, ўқиб бўлмайдиган ва фалати қилиб ўрнатдийкин?.. Бироқ шу пайт орқама-орқа келаётган бир қанча сўзларни илғаб олишга муваффақ бўлдим. Улар қуидагича эди:

Мағиявий театр

Хар ким ҳам киравермайди

— ҳар ким ҳам...

Мен дарвозани очишга уннаб кўрдим, бироқ эскирган, оғир лўқидон ҳадеганда сурилавермади. Ҳарфлар ўйини ҳам, бефойдалигини англагандек, поёнига етганди. Бир неча қадам орқага тислангандим, оёғим лойга ботди. Ҳарфлар ҳам энди кўринмас, ўйин тугаганди, чамаси. Мен турган жойимда қолдим, узоқ кутдим, бироқ фойдаси бўлмади. Энди йўлкага чиқиб, орқага қайта

бошлагандим, кўз олдимда, шундоқ хўл асфальт устида бирданига бир неча рангли ҳарфлар акси пайдо бўлди:

Фа-қат – жин-ни-лар – у-чун!

Оёқларим нам тортиб, совқота бошладим. Шундай бўлса-да, яна бирпас кутиб турдим. Бошқа ҳеч нарса бўлмади. Бу ажойиб, нафис, бежирим ранг-баранг ҳарфларнинг алдамчи нурларининг нам девор ва қорамтири тусда ялтираётган асфальт устидаги лип-лип ўйинини ўйларканман, бир нарса эсимга тушди: шу қадар тез, олис ва изсиз йўқолган олтинранг товланувчан нур билан нақадар ўхшашлик.

Мен совқотдим ва кета бошладим. Хаёлимда ҳамон ўша нур, қани энди дейман, жиннилар учун мўлжалланган ўша мўъжизавий театрга тезроқ кирақолсам. Бу орада оқшомлари тез-тез мулоқотлар, сухбатлар уюштириб туриладиган бозор майдонига бориб қолибман. Ҳар икки қадамда плакатлар ва эълонлар кўзга ташланади: хотин-қизлар хор жамоаси, варъете, кинотеатр, рақс кечаси ва ҳоказо, бироқ буларнинг барчаси менга, балки соғлом, ақли расо, эс-хуши жойида бўлганлар учун эди, уларни эса ҳамма ёқда, ҳамма жойда кўплаб учратардим. Шундай бўлса-да, ҳар ҳолда диққатлигим бир оз ёзилгандек бўлди. Ўзга олам билан мулоқот, ранг-баранг ҳарфлар руҳиятимга таъсир қилиб, ботиний товушлар ҳамоҳанглигини келтириб чиқардими, билмадим, олтинранг товланувчан нур кўз олдимда яна бир бор намоён бўлди.

Кичкинагина, эскидан қолган қовоқхонани излаб топдим. Бу ерда, шаҳарга биринчи бор келганимдан бўён – йигирма беш йилдан бери деярли ҳеч нарса ўзгармаганди. Бека ҳам ўша-ўша, мижозлар ҳам, айримлари ҳамон ўша ўтирган жойларида, аввалгидек, олдиларидағи қадаҳларига термилиб ўтиришарди. Ичкари

кирдим, бу ер мен учун, худди араукария ёнидаги зина-пояга ўхшаб, яхшигина бошпана эди, бироқ бу манзилда ҳам на макон топдим, на бир ҳамдард, гүё оғзига толқон соглан томошибинлар саҳна олдида тўпланишган, саҳнада эса бегона одамлар ўзга асарларни ўйнашяпти, аммо қовоқхонада сокинлик, қандайдир маъни бордек эди: ур-ийқит, тўполон, бақир-чақир, қулоқни батанг қила-диган мусиқа йўқ, беозор, вазмин фуқаролар оддийги-на ёғоч (мармар, сирланган тунука, духобали ёки жез эмас) стол атрофида ўтиришар, олдиларида эса ичимлиқ — асл, тоза вино. Мана, шу мен танийдиган кундашунда мижозлар ҳам ҳақиқий тор фикрли, факат ўз ҳузур-ҳаловатини ўйлайдиган одамлар бўлса керак, эҳти-мол. Уйларининг ташландиқ, қаровсиз меҳробларида калтафаҳм мамнуният бут-санамлари ҳам тургусидир, балки. Улар ҳам менга ўхшаб якка-ёлғиз, фарива адаш-ган йигитлар, сароб бўлган омолларнинг аламини шишадан олаётган майхўрлар, Чўл бўрилари ёхуд бечора баҳтиқаролардир эҳтимол, билмадим. Уларнинг ҳар биридан ватан соғинчи уфуриб туарар, юз-кўзларида кўнгил қолганлик аломатлари зоҳир, йўқотилган ниманидир ўрнини тўлдиришга эҳтиёж сезардилар. Оиласи бор бу ерда ўзининг бўйдоқлик пайтидаги кунларини, собиқ мансабдор эса талабалик йилларини эсларди. Уларнинг барчаси жимгина ўтириб ичишар ва улар менга ўхшаб, аёллар хор жамоасидан ҳам кўра, ярим литр эльзас виносини афзал кўришарди. Мен ҳам шу ерда лангар ташладим, бу ерда бир-икки соат ўтирса бўларди. Эльзас виносидан бир култум ичган ҳам эдимки, бугун нонуштадаги нонни ҳисобга олмагандা, ҳеч вақо емаганим эсимга тушди.

Буни қаранг, одамзод ҳамма нарсани юта олиши ғалатида! Битта газетада ўқиб қолдим, бир масъулиятсиз одам бошқаларнинг сўзларини оғзида чайнаб-чайнаб, уларни ҳазм қилмасдан, тупуклаб, яна оғзидан қайта чиқаараркан. Бу ҳақда бутун бошли бир устунчада ёзишибди... Кейин янги сўйилган бузоқнинг жигаридан анчагина едим,

чакки эмас экан. Бирок, барибир, эльзас виносига етмайди. Кучайиб кетган, кучли, маҳсус таъми билан машхур бўлган виноларга унчалик хушим йўқ. Ҳаммасидан ҳам кўра, тип-тиник, тоза, енгил, оддий, маҳаллий виноларни ёқтираман, уларнинг маҳсус номлари, ёрлиқлари ҳам йўқ. Ҳар қанча ичса бўлаверади, мазаси ҳам дуруст, ёғоч таъмини беради, қишлоқни, бепоён еру осмонни ёдингга солади. Бир қадаҳ эльзас виноси-ю, бир парча яхши пишган нон - бундан ортиқ, бундан яхшироқ но-нушта бўлмас. Лекин каминадек кам гўшт ейдиган одам учун бир луқма жигар тансиқ таом ҳисобланади, шунинг учунми, иккинчи қадаҳга ҳам йўқ дея олмадим. Бунинг ажойиблигини қаранг-а. Ям-яшил водийларда, олийжаноб инсонлар етиштирган узумлардан солинган виноларга гап йўқ эди. Авваламбор, улар ўзларидан узок-узоқлардаги, кўнгли совиган, ихлоси қайтган, ҳафсаласи пир бўлган баъзи бир, жимгина ўтириб, ичкилик ичувчи фуқароларни ва ожиз, паришон Чўл бўриларини ўйлашган бўлса ажаб эмас, токи уларнинг кайфиятлари кўтарилиб, кучларига куч, файратларига файрат қўшилса.

Менимча, бундан ортиқ бўлмайди. Ҳақиқатан ҳам, фойдаси тез билинди, кайфиятим кўтарилиди. Газета мақоласидаги сўз ўйини эсимга тушиб, ич-ичимдан енгил кулги келди ва кутилмагандан ёдимдан кўтарилиган фортеяно куй-оҳангини эсладим, у бир дам совун кўпигидек ялт-юлт қилди-да, сўнг яна оҳиста тарқаб кетди. Агар бу гўзал, ажойиб куй менинг вужудимда томир отиб, кунлардан бир кун ундан турли рангдаги фоят гўзал, жонон гуллар ўсиб чикқанида борми, мен ўзимни буткул йўқотиб қўйган бўлармидим? Ўз атрофидаги олами тушуниб етмаган, гумроҳ бир жонзот бўлганимда ҳам, телбаларча ҳаётим маъно-мазмун касб этган, вужудимда туриб, акс-садо берган, олис, юксак оламлар муждаларига қулоқ тутган бўларди. Миямда эса, минглаб сувратлар пайдар-пай чарх уради:

Падуадаги кичкинагина мовий тусли черков гумбазидан тушган Жоттонинг* фаришта-малоикалари, уларнинг ёnlарида эса Ҳамлет ва гулчамбар билан безанган Офелия** боришар, дунёдаги барча қайфу-алам ва фурбатнинг, барча англашилмовчилик, келишмовчилик ва зиддиятларнинг гўзал ҳикоятлари-ю, ёнаётган ҳаво шари ичидаги туриб, бурғу чалаётган аэронафт Жаноццо***, унинг янги қалпоғини қўлида тутиб, Аттила Шмелцле**** турар, Боробудур***** эса ўзи ясаган ҳайкаллар уюмини ҳавога итқитарди. Барча бу гўзал образлар минглаб бошқа қалбларда яшасалар ҳам, баривир, улар мен учун ўн минглаб бошқача сурат ва бошқача оҳанг бўлиб туюлаверар ва менинг вужудим улар учун кўрар кўз, эшитар қулоқ ва бирдан-бир макон бўлиб қолган эди. Эски касалхона деворининг шамол ялаган, нураган, доғ-дуғ босган кулранг-яшил тусли ёриқ-тирқишиларида минглаб фреска (деворга солинган расм)ларни пайқаш мумкин эди — ким уларнинг саломига алик олди, ким уларга бағрини очди, ким уларни меҳр билан сева олди, ким аста сўнаётган, ўчаётган рангларнинг мўъжизасини ҳис эта олди? Роҳибларнинг ёқимли, ёрқин, ажойиб миниатюралар ишланган кўхна китоблари ва олмон шоирларининг ўз халқи томонидан унутилган бундан икки юз ва юз йил илгариги асарлари, бу китобларнинг барчаси ти-тилиб, морор босиб кетган, шунингдек, қадимги мусиқачиларнинг нашр этилган асарлари ва қўллэзмалари — оҳанглар билан бирга орзу-мақсадлар муҳранган сарфиш нота ёзилган варажлар — уларнинг зукко ва жўшқин, соғинч тўла овозларига ким қулоқ солди, ким уларнинг

* Жотто – Жотто ди Бондоне (1266–1337) – итальян мусаввири.

** Офелия – Шекспирнинг «Ҳамлет» фожиасидаги образ.

*** Жаноццо – Жан Полнинг «Аэронафт Жаноццонинг денгиз китоби» асарининг титул варагига ишланган расм.

**** Аттила Шмелцле – жан Полнинг «Ҳарбий воиз Шмелцленинг Флэттга сафари» асарининг бош қаҳрамони.

***** Боробудур – Марказий Ява оролида жойлашган Будда ибодатхонаси.

рухи, уларнинг мўъжиза-ю, сехрини қалбига жо этиб, бошқа, уларга бегона бўлиб қолган замонларга олиб ўтди? Губио* тепасида, баланд, юксак тоғлар бағридаги устига тош қулаб, шикастланган, танаси қоқ иккига бўлинган, бироқ шунга қарамасдан, ўз ҳаётини сақлаб қололган, сийраккина бўлса-да, тириклик нишонаси — яна қайтадан барг ёзган ўша кичкинагина, матонатли сарв дарахтини тағин ким ёдга олди? Биринчи қаватдаги тиниб-тинчимас онахон ва унинг озода, ялтиратиб ювиб-артилган, меҳр билан парвариш қилинган араукариясига тан берган ким? Ким у, кечалари Райн (дарёси) узра чўзилиб кетган туманли булат карвонларининг ажиб манзарали асарларини завқ-шавқ ила мутолаа қилган? Чўл бўриси. Ҳаёт харобаларидан дудмал маъно излаган, бир қарашда бемаъни, тутуриқсиз, телбаларча ҳаёт кечирган, сўнгти хато ва чалкашлиқ, алғов-далғовлар ичра ҳам яна яширинча илоҳий хабар кутган, унинг яқинлигига умид боғлаган-чи, у ким эди?..

Қўлимдаги, бека яна тўлдирмоққа тутинган қадаҳни маҳкам тутиб, ўрнимдан турдим. Менга энди вино керак эмас эди. Олтинранг товланувчан нур чақнаб бўлган, у агадиятни, Моцартни, юлдузларни ёдимга солган эди. Мен энди яна бирор соат эркин нафас олиб, яшай олардим, азоб-уқубат чекишимга, қўрқиб-пусишимга, уялиб-қимтинишимга ҳожат йўқ эди.

Жимжит кўчага чиққанимда, ёмғир майдалаб ёғар, совуқ шамол таъсирида кўча чироқларига чирсиллаб урилар, шиша янглиғ жилва қиласарди. Энди қаерга борсамикин? Шу лаҳзада агар кўнглим тусаган мўъжиза рўй беравергандা, Луи-Сез услубидаги мўъжазгина, гўзал бир зал бўлса-ю, унда бир неча ажойиб мусиқачилар менга Ҳендел ва Моцартнинг иккита-учта асаридан ижро этиб беришса, дердим. Шу дамда мен вазмин, осойишта ва ғоят гўзал мусиқани, жон қулогим билан тинглашга тайёр эдим. О, қани энди ҳозир бир дўстим бўлсайди,

* Губио – Марказий Италиядаги шахар.

майлийди, болохонада яшаётган бўлса ҳам, қанийди, скрипкасини ёнига қўйиб, шам ёруғида у билан бирга хәёл суришиб ётсак... Мен тунда унинг олдига билдири-май писиб бориб, зинахонадан сездирмай чикиб, уни ҳай-ратда қолдирган бўлардим ва у билан бирга ширин сухбат қуриб, мусиқа тинглаб, тунни нақадар ажойиб, мўъжи-завор бир тарзда ўтказган бўлардик! Бундан анча йиллар муқаддам, шундай баҳтга тез-тез мушарраф бўлардим, бироқ бу омад дегани ҳам вақт ўтган сайин, бора-бора мендан узоқлашиб, ташлаб кетган эди. Энди у йиллар-дан хотираларгина қолган, холос.

Иккиланиб, уйга истар-истамас қайта бошладим. Паль-томнинг ёқасини кўтариб, таёқ билан хўл тош йўлни тутиб қўйдим. Йўлни шу қадар секинлик билан босиб ўтганимда ҳам, жуда тез орада болохонада – кичкина-гина, номигагина ватан ҳисобланган маконимда ўтирган бўлардим. Бу ерни у қадар севмасам-да, ундан маҳрум ҳам бўлолмасдим, чунки ёмғирли қиши оқшомларини очик ҳавода югуриб ўтказадиган даврларим ўтиб кетган эди. Инсоф билан айтганда, оқшомги яхши кайфиятимни ҳозир на ёмғир, на подагра ва на араукария бузишни истамасдим. Энди камер оркестрини, скрипкали ёлғиз ҳамдард дўстни ҳам тополмасам-да, барибир, ўша гўзал оҳанг вужудимда янграр ва мен уни секин, бир маромда ўзимга ўзим хиргойи қилиб ўйлай олардим. Шундай ўй-хаёллар билан йўлимда давом этдим. Тавба, камер мусиқасиз ҳам, ёр-офайнисиз ҳам иш битар экан-ку. Бирор нарсани сўраганингда ёки қилганингда, ожизлик қилиб қолсанг, ҳарорат томон интилиб, ўзингни адойи тамом қилишинг кулгили эди. Ёлғизлик – мустақилликдир, буни мен узоқ йиллар истаган ва ниҳоят, унга эришган эдим. У совуқ, лекин сокин, юлдузлар айланадиган жим-жит коинот сингари ажойиб улкан ва бепоён эди.

Мен ёнгинасидан ўтиб бораётган рақсхонадан янги сўйилган гўштнинг ҳилидек қайноқ, беўхшов, шўх жаз мусиқаси янгарди. Бир зум жойимда туриб қолдим; мусиқанинг бу тури, гарчи менга ёқмаса-да, сирли бир

сехри билан мени ўзига ром қилиб қўйди. Жазга тоқатим йўқ эди, бироқ у менга бугунги барча академик мусиқага қараганда ўн баравар қадрлироқ эди. У ўзининг қувноқ, тўпори ёввойилиги билан мендаги кучли ҳис-туйғу, эҳтирос оламига ҳам чукур таъсир этар ва содда, ҳалол ҳиссиёт-ла нафас оларди.

Мен бир лаҳза янграётган бераҳм, қулоқни қоматга келтирадиган, сершовқин мусиқанинг «исини олиб» туриб қолдим, залдаги баджаҳл, баттол, оч, сук, ҳирсли вазиятни ҳис қилдим. Бу мусиқанинг биринчи, яъни лирик ярми ширави, бироқ бачканга, чучмал ва сентиментал, бошқа бир қисми — иккинчи ярми эса ёввойи, фалати ва кучли эди, иккала ёрти жўнгина бирлашиб, бир бутунни ташкил этарди. У ҳалокат мусиқаси эди. Сўнгги императорлар ҳукмронлиги даврида Римда худди шунга ўхшаш мусиқа бўлган, шекилли. Албатта, уни Бах, Моцарт ва ҳақиқий мусиқа билан ҳам муқояса қилишган, бироқ ҳақиқий маданият билан солиштирилди дегунча, барча санъатимиз, барча тафаккуримиз, барча сохта маданиятимиз разолатга айланарди-қоларди. Ва бу мусиқа, катта бир самимиятга, муҳаббатга лойик, сохта эмаслиги, хабашларгагина хослиги ва қувноқ, шодон, болаларга хос кайфияти билан афзалликка эга эди. Унда хабашлардан ва америкалиқдан олинган нимадир бор, мана шу нарса ўзининг бутун бўй-басти билан биз европаликларга шу қадар болаларча беғубор ҳамда болаларга хос бўлиб кўринади. Хуллас, шу томон, шу йўлдан бориляптими? Биз, қадимги Европанинг, ҳақиқий кўхна мусиқанинг, шеъриятнинг билимдон заршунос ва мухлислари, эртага унутилиб кетадиган ва кулги бўладиган, тушуниб бўлмайдиган бир ҳовучгина аҳмоқ ва асабий одамлар бўлиб келмадикмикин? Биз «маданият» деб, рух, қалб, кўнгил деб, гўзал, муқаддас атаган нарсалар аслида аллақачон ўлган ва биз, бир ҳовучгина аҳмоқлар ҳалигача ҳақиқий ва барҳаёт санаб юрган нарса шарпа, кўланкагина эмасмиди? Балки умуман ва ҳеч қачон ҳақиқий, жонли бўлмагандир? Биз эришиш учун астой-

дил тиришиб ҳаракат қилган нарса, балки ҳамиша кўланка, қуруқ хаёлотгина бўлиб келгандир, эҳтимол?..

Эски шаҳар мавзеи мени ўз бағрига олди. Кулранг тусдаги кичкинагина черков билинар-билинмас, гүё ўрнида йўқдек туюларди. Шу пайт тўсатдан оқшомги кўрган-кечиргандарим эсимга тушди — учи жумбокли, гумбази эшик, унинг тепасидаги тушуниб бўлмас лавҳа, масхара-омуз, истехзоли «рақс» тушаётган, рангли, нурли ҳарфлар... Дарвоке, у ерда нима деб ёзилганди ўзи? «Ҳар ким ҳам киравермайди». Ва яна: «Фақат жиннилар учун». Кўхна девор тарафга синовчан назар ташладим. Ичимда, мўъжиза қани энди қайтадан бошланса-ю, лавҳа мен жиннини чорлаб, мўъжазгина дарвозадан ичкари кирсам, деб турибман. Балки мен истаган, мен орзу қилган, мен ташна бўлган нарса ўша ердадир? Балки у ерда менинг мусиқам ижро этилар, ким билади?..

Қорамтири тусли тошdevор менга вазминлик билан маҳдуд бокди, у аллақачоноқ чуқур уйқуга чўмган эди. Хеч қаерда дарвоза, учли гумбаз кўринмас, фақат туйнук-тешиксиз, сокин девор қорайиб кўзга ташланарди. Кулимсираб йўлимда давом этдим, кўхна тошdevорга илтифот билан бош иргадим. «Тинч ухлайвер, деворжон, мен сени безовта қилмайман. Вақти келиб, сени балки бузишар ёки ўзларининг очкўз, сук фирма пешлавҳали билан ёпишириб ташлашар, лекин ҳали шу ердасан, ҳали гўзал, сокин ва менга азиз, қадрлисан».

Қорайиб турган тор кўча оралифида шундок олдимдан бир одам қўққисдан чиқиб, кўрқитиб юборди. Тунда ёлғиз тентираган кечки йўловчи ҳоргин қадам ташлар, бошида шапка, эгнида ҳаворанг гимнастёрка, елкасида плакат ўрнатилган узун таёқ, қорнида — ярмарка сотувчилирига ўхшаб, камарига маҳкам танғилган очиқ катмон. У олдимда ҳоргин одимлаб бораркан, менга қайрилиб ҳам қарамади, йўқса унга салом бериб, сигара ҳадя қилмоқчийдим. Кейинги кўча чироқ ёруғида мен унинг байрофида — калтакка маҳкамланган алвон плакатида нималар ёзилганини ўқишга ҳарчанд уриниб кўрдим,

бўлмади. Бу киши у ёқ, бу ёққа тебраниб бораётгани сабабли ҳеч нимани илғай олмадим. Шунда уни чақирдим, тўхтаб, плакатини кўрсатишини сўрадим. У тўхтади ва таёфини бир оз тўғрилаб ушлаб турди, мен эса «ракс тушаётган» ҳарфларни ўқий бошладим:

Анархистлар кечаси!
Магиявий театр!
Ҳар ким ҳам киравер...

— Мен худди сизни излаб юргандим! — қичқириб юбордим хурсанд бўлганимдан. — Бу ўзи қанақанги кеча, қанақа ўтириш? Қачон, қаерда бўлади?

У индамай йўлида кета бошлади.

— Ҳар кимга эмас, — деди у лоқайд оҳангда, мудроқ овоз билан ва йўлида давом этди. Афтидан, у уйига шошиларди.

— Тўхтанг, — дедим ва унинг кетидан югурдим. — Кутичангизда нима бор ўзи? Сиздан бир нима сотиб олсан, девдим.

Йўлида давом этаркан, ҳалиги киши қутичасини ковлаштириб, ундан битта кичкинагина китобча олди ва менга узатди. Уни дарҳол чўнтакка солдим. Пальтомнинг тугмаларини қадаб бўлиб, энди пул чиқармоқчи бўлгандим, у ён тарафдаги дарвозаси бор йўлга бурилди-да, кетидан дарвозани ёпиб, кўздан фойиб бўлди. Ҳовлидан унинг аввал тоштўшама устидан, кейин ёғоч зинадан босган оғир қадамлари эшитилди, сўнгра ҳаммаёққа сукунат чўмди. Шу пайт мен ҳам ўзимни жуда хорғин ҳис қилдим, вақт алламаҳал бўлиб қолган бўлса керак, миямдан уйга қайтақолсам яхши бўларди, деган ўй кечди. Мен тез югура бошладим ва бирпаста мудроқ, шаҳар атрофидаги тор кўча орқали эски шаҳар деворлари ўрнида барпо этилган боғ-роғлар, хиёбонлар ўртасига етиб келдим, бу ерда — майсазор ва бир озгина печакўт босган сайҳонликлар ортидаги озода ижара уйларида хизматчилар ва майда нафақахўрлар истиқомат қилишарди. Сайҳонлик, майсазор ва кичкина арча ёнидан ўтиб, уй эши-

гига етиб келдим, калит туралынан тиркишни, чирокни ёқиши учун тутмачани излаб топдим. Ойнабанд эшикдан, ойнадек силлик сайқал берилген жавонлар ва туваклардаги ўсимликлар ёнидан «лип» этиб ўтиб, хонамни очдим. Соғлом, ақли расо, эс-хуши жойида бўлган бошқа одамлар уйларига келганда онаси ёки оиласи, болалари, хизматкорлари, итлари, мушуклари кутиб олишганидек, мени бу ерда — номигагина ватан бўлган маконимда оромкурси ва печка, сиёҳдон ва рассомлар қутичаси, Новалис ва Достоевский кутишарди. Ҳўл бўлиб кетган пальтомни ечишим билан кичкина китобча қўлимга илинди. У юпқагина, ёмон қофозга сифатсиз босилган, «Январь ойида туғилганлар учун» ёки «Саккиз кун ичидай қандай қилиб йигирма ёшга яшариш мумкин?» қаби-лидаги ярмаркаларда сотиладиган китобча эди.

Оромкурсига жойлашиб ўтириб, кўзойнагимни тақиб, китобчани қўлимга олдим. Унинг муқовасидаги сарлавҳани ўқиб, ғоят ажабландим, тақдир-қисматимга борлиқ ҳис-туйғулар шу он миямга шиддат билан урилди: «Чўл бўриси ҳақида трактат. Ҳар ким учун эмас».

Китобчани бир ўтиришда, саҳифама-саҳифа зўр қизиқиши билан ўқиб чиқдим. Асар мазмунини қуийдагича эди:

ЧҮЛ БҮРИСИ ҲАҚИДА ТРАКТАТ

Бор экан-да, йўқ экан, Ҳарри исмли Чўл бўриси ўтган экан. У фақатгина икки оёқда юрадиган, уст-бош киядиган Инсон бўлибгина қолмай, Чўл бўриси ҳам эди. Одамзод ўз ақли, фаҳм-фаросати билан нимаики ўрганишга қодир бўлса, шунчалик кўп нарсани ўқиб-ўрганганд, эсли-ақлли одам бўлган. У биргина нарсани, бу ҳам бўлса: ўзидан, ўз ҳаётидан мамнун бўлишни ўрганолмаган. Йўқ, бу унинг кўлидан келмасди. Ана шу Чўл бўриси домангир инсон эди. Бунинг сабаби, балки шу билан ҳам боғлиқ эдики, у ўзини ҳамиша юрагининг туб-тубидан инсон эмас, балки чўлдан келиб қолган Бўри деб билар (ёки шундай деб ишонар)ди. Ақлли одамлар у ҳакида турли хаёлларга боради: туғилмасидан олдин сеҳр-жоду билан бўридан инсонга айлантирилган; у инсон бўлиб туғилган-у, бироқ вужуди Чўл бўрисиники қилиб яратилган; у ҳақиқатан ҳам бўри деган тушунча-ишонч фақатгина унинг ўй-хаёли, касаллиги маҳсули. Мисол учун бу одам болалигига бир оз ёввойи, бебош ва бетартиб бўлган бўлиши, мураббийлари унинг вужудидаги йиртқич маҳлуқни ўлдиришиб, онгига шундай бир тасаввур, ўй-хаёл ва ишонч уругини сепган бўлишлари мумкин: сен аслида йиртқичсан, фақатгина устингга тарбия ва одамзод боласининг юпқагина филофи сирилган. Бу ҳақда узоқ гапириш, қизғин баҳслашиш, хатто китоблар ҳам ёзиш мумкин; бироқ бундан Чўл бўрисига заррача наф йўқ, чунки бўрилик унинг вужудига сеҳр-жоду, афсун билан сингдирилганми ёки уриб, қоқиб киргизилганми ё бўлмаса, фақат тасаввур маҳсулининг ўзгинасими, бу унга барибир эди. Бошқалар нима деб ўйлашлари-ю,

Ҳаррининг ўзи бу хақда қандай фикрда бўлиши унинг учун сариқ чақалик аҳамияти йўқ — ахир Бўри унинг танасидан мана мен деб ташқарига чиқиб қўя қолмасдида...

Шундай қилиб, Чўл бўрисида инсонийлик ва бўрилик хусусиятлари мужассам эди. Бу қисмат у қадар файриоддий ҳамда камдан-кам учрайдиган қисматлардан эмасди, дейиш мумкин. Не-не замонлардан буён қанчадан-қанча одамлар ўтган. Баъзи бирлари кўпроқ итга ё тулкига, балиққа ёки илонга ўхшаш бўлишган. Бу ўхшашликлар уларнинг ўзларига заррача қийинчилик туғдирмаган. Ўша одамлар вужудида ёнма-ён яшаган икки хиллик бир-бирларига озор етказмаган, аксинча, бир-бирларига ёрдам берган. Иши юришган, маълум бир соҳада муваффақият қозонган, кўпчилик ҳавас қиласидиган баъзи бир одамда, буни қарангки, ўша баҳт-омадга эришган инсоннинг ўзига қараганда тулки ёки маймун нисбатан кўпроқ бўлар экан. Бу энди ҳар бир кишига маълум нарса. Ҳаррида эса, бутунлай бунинг акси эди. Унда Инсон ва Бўри ёнма-ён яшар, бироқ улар бир-бирларига камдан-кам ёрдам бериб, доимий хусумат, ашаддий душманлик муносабатида бўлишарди. Бир жон, бир тан бўлатуриб, икковлон бир-бирига душман бўлса, бундан ёмони йўқ. Албатта, ҳар кимнинг ўз тақдир-қисмати дегандай, бу йўлда ҳеч кимга осон тутиб бўлмайди.

Бизнинг Чўл бўrimизда ҳолат шундай эдики, у ўзининг ҳиссиёти ичра ҳаммаси аралаш, қоришим: дам бўри, дам инсон бўлиб яшарди. Бироқ шуниси ҳам бор эдики, бўрилик пайтида унинг вужудида одам ҳамиша ҳушёр, сергак ва огоҳ бўлиб турар, инсон бўлган пайтида эса, бўри худди шундай ҳаракат қиласиди. Масалан, Ҳарри инсон сифатида гўзал фикрга, ажойиб, олийжаноб ҳиссиётга эга бўлган ёки бирор эзгу иш қилаётган пайтида, унинг вужудида бўри тишлари каби бераҳм, қаҳрли, масхараомуз кулги кўзғалиб олийжаноб хатти-ҳаракатлар Чўл йиртқичига нақадар кулгили туюлишини билдириб қўярди. Бу бўри, ўзининг кўнгли нима тусашини яхши биларди,

чунончи, унга чўлма-чўл изғиб, вақти-вақти билан қон сўриб турса-ю, урғочи бўрини қувиш бўлса бас — инсоннинг ҳар бир хатти-ҳаракати бўри наздида ўта кулгили, хижолатли, аҳмоқона ва такаббурона, куруқ бўлиб қоларди. Ҳарри ўзини гўё бўри ҳис қилиб, ҳаракат қилган, тишларини фижирлатиб, барча инсонларга, уларнинг алдамчи, сохта ва айниганд одан, қилиқ ҳамда муомалала-рига нисбатан ўзида ашаддий душманлик ва нафрат туйган пайтда ҳам худди шундай бўлар эди. Бундай дамларда Инсон сергак бўлар, Бўрини қузатар, уни «мол», «ҳайвон» деб сўкар, унинг содда, соғлом ва ёввойи бўрилик вужудидаги бутун қувончига рахна солар ва заҳарларди.

Хуллас, Чўл бўриси шундай яралган эди. Энди Ҳаррининг у қадар бамаъни ва баҳтиёр ҳаёт кечирмаганилигини тасаввур этиш қийин эмас. Бироқ бу, у шу даражада, бутунлай бебаҳт бўлган, деган гап эмасди (гарчи унинг ўзига ҳам, ҳар бир инсон ўз чекига тушган қийинчиликларни улкан азоб-уқубатлар деб ҳисоблаганидек, ҳар ҳолда шундай туюлган бўлса-да). Бундай гапни эса ҳеч қайси бир инсон ҳақида гапириб бўлмайди. Кимнингдир тан-вужудида бўри бўлмагани билан, барибир, у баҳтли бўлавермайди-да. Энг бебаҳт, баҳтиқаро ҳаёт ҳам ўзининг қувончли, ёруғ кунларига, гўё кум билан тош ўртасидаги каби майда-майда баҳт, омад гулларига эгадир. Чўл бўриси билан ҳам худди шундай бўлганди. Кўп ҳолларда у ўта баҳтсиз эди, буни инкор этиб бўлмайди. Баъзилар уни ажойиб, ақлли ва ўзига хос инсон сифатида яхши кўрардилар, шунда тўсатдан унинг бўрилиги тутиб қолгач, даҳшатга тушиб, ҳафсаласи пир бўларди. Улар шундай қилишга мажбур эдилар, чунки Ҳарри, ҳар бир жонли мавжудот сингари, бутунлай севилмакни истарди ва айнан шунинг учун меҳр-муҳаббатлари билан унга аҳамиятли бўлган одамлар олдида, ўзининг бўри эканлигини яшиrolмасди, уларни алдай ҳам олмасди. Колаверса, шундайлар ҳам бўлардики, улар ундаги бўрини, озод, ёввойи, саркаш, хатарли ва кучли бир вужудни яхши кўрардилар, бироқ қўққисдан йиртқич, бешаф-

қат бўри одамга айланиб қолиб, яна эзгулик ва меҳри-
бонликни софина бошласа, яна Моцартни тинглаб, шеър-
лар ўқиса, инсоният омолларига эга бўлишни хоҳлаб
колса, улар энди ундан шунакаям ихлослари қайтар ва
ўта аянчли ҳолатга тушиб қолардилар. Худди ана шун-
дайлар кўпинча ундан ўта даражада кўнгиллари қолиб,
дарғазаб бўлишар, Чўл бўриси ўзининг иккиёқламалиги-ю,
иккиюзламачилигини, ихтилофу зиддиятларини ўзидан
мутаассир бўлган бошқа бировларнинг тақдир-қисматла-
рига ҳам шу тариқа олиб кираради.

Ким агар Чўл бўриси ва унинг аянчли, ночор ҳамда
зиддиятли ҳаётини яхши биламан деса, янгишади, чун-
ки у ҳали кўп нарсани билмайди. У билмайдики (истис-
носиз қоида бўлмаганидек, бир гуноҳкор банда маълум
шароитларда тўқсон тўққиз тақводордан кўра, сийлан-
ганлар қаторида бўлиб қолиши мумкин), Ҳаррида ҳам
истисноли ҳоллар ва омадли имкониятлар кўп бўлган. У
дам бўри, дам инсон бўлиб, озод, тинч ва беташвиш
яшаб, фикр юритган, икковлон гоҳ-гоҳида, саноқли соат-
лардагина муросага келиб, бир-бирига меҳр-муҳаббат
соғинган. Бундай пайтларда икковлон бир бўлиб, икки
баравар куч-кудратга эга бўлишган. Бу инсоннинг ҳаёти-
да ҳам, бутун оламда бўлганидек, баъзан барча одатдаги,
кўнишиб кетилган кундалик турмуш, маълум ва мунтазам,
доимий, ўзгармас нарсаларнинг маъниси бир сониялик
танаффусдек туюлиб, фавқулодда нарсаларга, мўъжиза
ва раҳм-шафқатга йўл бўшатаётгандек кўринган. Энди
мана шу қисқа, онда-сонда бўлган баҳтли дамлар Чўл
бўрисининг оғир қисматини текислаб, тўлдириб, енгил-
латиб, барча азоб-укубатларни ўзига олиб, сингдириб,
афзал бир устунликни ҳосил қилгани, бу энди яна бир
масалаким, бу хусусда бекорчи одамлар хоҳлаганларича
ўйлаб, фикр юритиб, мулоҳаза қилиб кўраверадилар. Чўл
бўрисининг бу ҳақда ўйлаб, мушоҳада қилгани бесамар
ўтган қунлари ҳисобланарди.

Шу ўринда яна бир нарсани айтиб ўтиш лозим. Ҳар-
рига ўхшаган одамлар жуда кўплаб топилади. Кўплаб

санъаткорлар ҳам худди шу тоифага мансубдирлар. Бу одамларда икки дил, икки табиат мавжуддирки, улардағи илохийлик ва шайтонийлик, ота-она қони, баҳт-омад, азоб-изтиробга қодирлик Харридаги бўри ва инсон бир-бирига қандай боғланган бўлса, бир-бирлари билан шундай душманларча, бетартиб, чигал ва тумтароқ боғланиб кетган. Бундай одамларнинг ҳаёти ўта беҳаловат бўлади, улар гоҳида, ўзларининг камдан-кам баҳтиёр онларида шунақангি қудратли ва таърифга сифмайдиган гўзал воқеаларни бошидан кечиришадики, шу бир лаҳзалик баҳт-омад кўпиги кўзларни қамаштиарли даражада қайнаб чиқиб, изтироб денгизи қирғоқларидан тошиб кетади ва бу қисқа чақнаган баҳт-омад бошқаларга ҳам таъсир қилиб, уларни мафтун этади. Барча ўша санъат асарлари ҳам шу тариқа ўткинчи, қимматбаҳо баҳт-омад кўпиги янглиғ вужудга келади. Бу асарларда ёлғиз, танҳо изтироб чекаётган инсон бирор соатга бўлса-да, ўз тақдирни узра ўзини шу қадар юксак намоён этадики, унинг баҳти юлдуз бўлиб чараклайди ва буни кўриб турганларнинг барчасига бу нарса абадиятдек туюлади, ўзларининг баҳт-омад, орзулари ҳам рўёбга чиқаётгандек кўринади. Бундай инсонлар ўз асарлари ва хатти-харакатларини қандай хоҳлашса, шундай атайверсинлар, бироқ уларда умуман ҳаёт деган нарсанинг ўзи бўлмайди, бу дегани, уларнинг турмушида ҳаёт асари кўринмайди. Улар энди ҳакам, ҳаким, этикдўз ёки муаллим сингари қаҳрамон ёхуд санъаткор, мутафаккир эмас, балки ҳаёти абадий азоб берадиган фимир-фимир ҳаракат ва шовқин-сурон, баҳтсизлик ва изтиробларга тўла, даҳшатли, бемаънидирким, токи шундай ҳаёт бетартибликлари узра порлаб турган худди ўшандек, камдан-кам содир бўладиган кечинмалар, фаолиятлар, фикрлар ва асарлардан ортиқ маъно изламай қўядилар. Бундай тоифадаги инсонлар ўртасида бошқа бир фикр ҳам мавжуддирки, гўё Инсон эҳтимол, нафақат чала-ярим, ярим-ёрти онгли хайвон, боқий, абадий яшаш учун яралгандир, деган фикр ҳам пайдо бўлган.

Ҳар бир инсоннинг ўз белгилари: овози, фазилати ва иллатлар, кечирилмас гуноҳлари бор. Ҷўл бўрисининг ўзига хос белгиси — у кечкуруннинг одами эди. Эрта тонг пайти унга ҳеч қачон яхшилик келтирмаган, шунинг учун бу ёмон палладан жуда қўрқар эди. У эрталабки чоғлар бирор марта бўлса ҳам хурсанд бўлмаган, эзгу иш қилмаган, миясига яхши бир фикр ҳам келмаган, шунингдек, ўзига ва бошқаларга шодлик улашмаган. Тушдан кейингина у секин-аста ўзига келар, тирилар, кеч тушгандагина чехраси ёришиб, баъзан яшнаб ҳам кетар, хайрли, савоб ишларини жўшқинлик билан давом эттиради. Ундаги ёлғизликка ва мустақилликка бўлган эҳтиёж ҳам худди шу нарса билан боғлиқ эди. Ҳали ҳеч бир инсон ўзида мустақилликка унингчалик чуқур, эҳтиросли эҳтиёж сезмаган. Ёшлик чоғларида, ҳали у камбағал ва бир бурда нонни қийинчилик билан топиб юрган пайтларидаёт, бир баҳягина мустақилликни сақлаб қолиш илинжида оч қолишни, эски, жулдур кийим кийиб юришни афзал кўрган. У ҳеч қачон пулга ва фаровон ҳаётга, аёлларга ва кучлиларга сотилмаган, эркинлигини сақлаб қолиш учун, керак бўлса, юз марта-лаб, барчанинг кўз ўнгидаги ўз фойдаси, манфаати ва баҳтидан воз кечиб юборган. Унинг учун бу оламда бирор вазифада, мансаб-лавозимда ишлаш, кунлар ва йиллар бўлинишига риоя этиш ҳамда бошқа бирвларга бўйсунишдан кўра даҳшатлироқ ва жирканчлироқ тасаввур йўқ эди. Идора, ишхона, муассасалардан худди ўлимга дуч келгандек нафратланар эди. У тушида қўриши мумкин бўлган бирдан-бир, энг даҳшатли нарса — казармада ҳибсга олиниши. У бундай вазиятлардан катта қурбонлар бериб бўлса-да, кўпинча ўзини усталик билан олиб қочарди. Унинг куч-кудрати ва фазилати шунда бўлиб, шу сабаб, букилмас ва сотилмайдиган, виждонли одамнинг иродаси ҳам мустаҳкам эди. Унинг изтиробли қисмати худди шу ҳиммат-саҳоват билан чамбарчас боғланган, ахволи-руҳияси ҳам, барчаники қандай бўлса, шундай эди: у бутун вужуди билан ниманики изласа, истаса,

нимагаки интилса, ўша нарса унга, албатта, насиб этарди. Бироқ бир одамга бу кўплик қиласди. Даставвал, унинг орзулари рўёбга чиқиб, баҳти чопган бўлса, ке йинчалик аччиқ тақдир чекига тушди. Ҳаёт шундайки, ҳукмдор ҳокимият деб, пулга тузоқ қўйган одам пул деб, лаганбардор хушомадгўйлик ортида, ўйин-кулгига ўч одам эса, кайфу сафо, майшат деб, ўзини ҳалок қиласди. Чўл бўриси бўлса, мустақиллик деб, ўз бошига етди. У ўз мақсадига эришди, у тобора, борган сайин мустақилроқ бўла борди, ҳеч ким унга буйруқ беролмас, у ҳеч кимнинг изидан, йўлидан бормас, ўз турмуш тарзини ўзи ёлғиз, эркин ва мустақил равишда ҳал этарди. Чунки ҳар қандай кучли инсон ниманики изласа, унга интилса, ўша нарсага, албатта, эришади. Бироқ ана шу эришилган эркинликнинг ўртасига борганда, Ҳарри куттилмаганда шуни сезиб қолдики, эркинлик унинг учун ўлим билан баробар экан. У ўзи ёлғиз қолган, борлик дунё уни буткул ва вахимали тарзда холи қўйган, энди унинг одамлар билан ҳам, ўзи билан ҳам иши йўқ эди. Ҳарри энди ёлғизлиқ ва алоқа-муносабатларсиз муҳитнинг борган сайин торайиб бораётган ҳавосидан аста-секин бўғила бошлаганди. Чунки танҳолик ва мустақиллик унинг истак-хоҳиши, мақсадигина эмас, балки қисмати, унга айтилган ҳукм эканлиги аён бўлиб қолди. Айтилган сирли ният амалга ошиб бўлган, энди уни ортга қайтариб бўлмасди. У энди соғинч ва яхши ният билан қўлларини чўзиб, алоқа-муносабатларга хозир бўлгани билан, энди ҳеч нарса унга ёрдам беролмасди: уни ёлғиз ташлаб кетишганди. Бу борада у одамларга ёқмай қолган ёки уни сал бўлса-да, ёмон кўриб қолишган эмасди. Аксинча, унинг дўстлари жуда кўп эди. Уни кўпчилик яхши кўрарди. Бироқ буларнинг барчаси унга нисбатан шунчаки хайриҳоҳлик ва илтифотгина эди, холос. Унинг номига таклифномалар келар, унга совфалар инъом қилишар, ажойиб мактублар ёзишарди. Бироқ ҳеч ким у билан алоқа-муносабат қиласди, дардлашмас ва бунга қодир ҳам эмасди. Уни энди ёлғиз бир ғарибнинг дим ҳавоси,

сокин мухит, билинар-билинмас, сирғалиб кўздан фойиб бўлаётган атроф-олам, алоқа-муносабатларга ноқобиллик ўраб олгандиким, уларга қарши энди ҳеч қандай бир истак ёки хоҳиш бирон нима қила олмасди. Бу – унинг муҳим ҳаётий белгиларидан бири эди.

Херрининг яна бошқа белгиларидан бири, ўз жонига қасд қилувчилар тоифасига мансублиги эди. Кучли кўриниш, шахсият, кудратли тақдирга эга бўлмаган, ўртамиёна (ўзига хос сифатларни йўқотган) одамлар орасида ҳам (гарчи улар шахсияти нуқтаи назаридан ўз жонига қасд қилувчилар тоифасига мансуб бўлмасалар-да), ўз жонига қасд қилиб, ҳалок бўладиганлар оз эмас. Айни пайтда эса, табиатан ўз жонига қасд қилувчиларнинг жуда кўпчилиги, эҳтимол, аслида ўз жонига қасд қилмайдилар. «Ўз жонига қасд қилувчи» – Ҳарри ҳам уларнинг бири эди. У ўлим билан жуда яқин алоқада бўлиб яشاши шарт эмас – ўз жонига қасд қилувчи бўлмай туриб ҳам бунга эришиши мумкин. Бироқ бу тоифадагиларнинг ўзига хос бир хусусияти борки, бу ҳам бўлса, ўзининг «мен»ини, ҳақми, ноҳақми, барибир, ўта хавфли, шубҳали ва хавф-хатар остида қолган табиат ибтидоси, деб билади. Ҳарри ҳам ўзини доимо фавқулодда хавф остида деб ҳисоблади, гёё у қоя чўққисининг энг учида, энг тор жойида турибди-ю, ташқаридан заррагина туртки ёки ичкаридан зигирдаккина заифлик бўлса бас, бўшлиққа «гуп» этиб қулаши турган гап... Деярли эрта ёшлиқданоқ намоён бўла бошлайдиган ва бундай одамларга бутун умр бўйи ҳамроҳ, йўлдош бўладиган бундай кайфиятни юзага келтирувчи шарт-шароит ҳаётбахш кучнинг ўта заифлигидагина эмас. Аксинча, «ўз жонига қасд қилувчилар» орасида ҳам фавқулодда сабот-матонатли, чидамли, жасур ва бинойидек инсонлар учраб туради. Аммо салгина дардга иситмаси кўтариладиган, хасталикка мойил кишилар ҳам учрайдики, биз уларни «ўз жонига қасд қилувчилар» деб атаймиз – улар ҳамиша ўта сезгир ва ҳассос бўлишади – бундайлар озгина руҳий изтиробга учраши биланоқ дарҳол ўз

жонларига қасд қилиш хаёлига бериладилар. Агар бизда ҳадеб ҳаёт ҳодисалари механизмлари эмас, балки унинг ўрнига одамлар билан ҳам шугулланишга ўзида жасорат ва масъулият топа оладиган антропология ёки психологияга ўхшаганми, илм-фан бўлганда эди, бу далиллар ҳар бир кишига маълум ва равshan бўлган бўлур эди.

Биз юқорида ўз жонига қасд қилувчилар хусусида нимаики айтиб ўтган бўлсак, албатта, барчasi ўз-ўзидан сирт, юзага тааллуқли ҳамда психология ва физиканинг узвий бир қисми, дейиш мумкин. Метафизик жиҳатдан олганда, бу масала бошқачароқ ва янада равшанроқ кўринади, чунки бундай қараганда «ўз жонига қасд қилувчилар» бизга ўзларини индивидуаллашишнинг айборлик хис-туйфулари билан қамраб олингандар қилиб тасвирлайдилар. Шундай бўлса ҳам, улар биз учун, барибир, ўз жонига қасд қилувчилар хисобланади, чунки улар ўз нажотларини ҳаётда эмас, ўлимда деб биладилар, улар ўзларини камситишга, ерга уришга ва қурбон қилишга, ўз ҳаёт шамларини ўzlари ўчиришга ҳамда ибтидога қайтишга ҳамиша шай турадилар.

Ҳар қандай куч ҳам бир кунмас, бир кун заифлашиши мумкин бўлганидек (маълум шарт-шароитлар шунга олиб келади ҳам), типик ўз жонига қасд қилувчи, аксинча, ўзининг муайян заифлигидан кўпинча куч ва таянч қидиради, кўп ҳолларда уни топишга эришади ҳам. Ҳарри – Чўл бўриси хусусида ҳам худди шу гапни айтиш мумкин. Ўзига ўхшаган минглаб кишилар сингари, у ҳам ўлим сари йўл унга ҳар доим очиқ турганлигини тасаввур қилиб, бу фақат ёшликнинг дилгир ўй-хаёлларга берилиш ўйини эмаслигини тушуниб етиб, худди шу фикрдан келиб чиқкан ҳолда ўзига таскин ва тасалли, таянч топа олди. Унинг тоифасидаги барча кишиларга ўхшаб, вужудидаги ҳар бир руҳий изтироб, ҳар бир азоб, турмушдаги ҳар бир ёмон ҳолат уни ҳам ўлимга чорлар ва даъват этарди. Мана шу мойилликдан у аста-секин ҳаётга хизмат қиласиган фалсафани яратадорди. Ҳаётдан кетиш учун эҳтиёт чораларининг ҳамиша мавжудли-

ги ҳақидаги фикрнинг яқинлиги унга куч-қувват берди, уни азоб-изтиробларни, ёмон ҳолатларни бошдан кечириб кўришга қизиқтириб қўйди. Энди у ўта чор-ночор қолган пайтларида, ичи қораликнинг бир тури бўлган заҳархандалик билан ўзига-ўзи шундай дер эди:

— Ахир мен бир одамнинг сабр-бардоши қанчага етишини кўришга қизиқяпман-ку! Сабр-бардош сарҳадига еттудек бўлсам, эшикни очаман, у ёғи тамом-вассалом...

Мана шу хилдаги фикрдан фавқулодда, мисли кўрилмаган даражада куч-қувват оладиган ўз жонига қасд қилувчилар жуда кўплаб топилади.

Яна бир тарафи, барча ўз жонига қасд қилувчиларга ўз жонига қасд қилиш васvasасига қарши курашиш ҳам маълум. Ҳар бир кишининг ўз кўнглида, дилида ўз жонига қасд қилишдан кутулиш йўли, чораси бўлса-да, барibir, у ожиз, нотавон ва ноқонуний йўл эканлигини яхши билади. Аслида ўз ҳаётингга ўзинг зомин бўлгандан кўра, ёшингни яшаб, ошингни ошаб, вақт-соатинг, қисматинг етганда оёқ узатиб кетганга не етсин. Буни билиш имонсизлик ва унинг бош сабаблари бўлмағур бўлганидек, кўпчилик «ўз жонига қасд қилувчилар»ни ҳам ўз жонига қасд қилиш васvasасига қарши доимий кураш олиб боришига даъват этади. Клептоман* ўз иллатига қарши қандай курашса, улар ҳам худди шундай кураш олиб борадилар. Чўл бўрисига ҳам бу кураш яхши маълум бўлган, уни хилма-хил, турли-туман ўзгарувчан қуроллар воситасида олиб борган. Нихоят, салкам қирқ етти ёшида унинг миясига ажойиб ва жиддий бир фикр келиб қолади. Бу фикр унинг ўзини ҳам кўпинча шодлантириб юборади. У ўзи эллик ёшга тўладиган кунни маҳсус белгилаб, худди шу куни ўз жонига қасд қилишни режалашибтиради. Сўнгти чорани кўллаш ё кўлламаслик масаласини шу куннинг кайфиятига қараб ҳал этишни ўзи билан ўзи келишиб олади. У истаган нарса содир бўлиши, кутилмаганда касал бўлиб қолиши, қашшоқлашиши, алам ва

* Клептоман — ўғирлик қилишга мойиллик уйғотувчи рухий касалликка чалинган киши.

изтиробларни ўз бошидан кечириши мумкин эди, албатта барчасининг вақти-соати бор эди. Ўша «нимадир» содир бўлиши мумкин бўлган йиллар, ойлар, кунлар сони эса тобора қисқариб борарди! Ҳақиқатан ҳам илгарила-ри унга нафақат оғирроқ ва узокроқ азоб берган, балки товонигача зирқиратиб юборган айрим кўргилик, фам-кулфатларни энди у бир оз енгилроқ ўтказиб юборарди. Қандайдир сабабларга кўра ахволи ўта оғирлашган, ҳаёти-даги руҳий тушкунлик, фариблик ва ёввойиликка энди бошқа азоблар ёки йўқотишлар ҳам келиб қўшилган пайт-ларда, у ана шу азобларга қаратада: «Шошмай туринглар, яна икки йил сабр қилинглар, ана ундан кейин ўзим сизларнинг ҳукмдорингиз бўламан!» дерди ва яна ўй-хаёллар гирдобига кўмилиб кетарди. Эллик ёшга тўлган кунида эрталабдан хатлар ва табрикномалар келишини тасаввур қиласкан, ўз ортидан эшикни аста ёпиб, устарасини ишга солиб, барча азоб-уқубатлардан биратўла қутулиб қўяқолишни кўнглига туғиб қўярди. Ўшанда балким суюклардаги подагра, дилгирлик, бош оғриги ва ошқозондаги дарду иллатлар ҳам бутунлай барҳам то-пармиди...

Чўл бўрисининг шахс феноменини, хусусан, унинг мешчанликка бўлган ўзига хос муносабатини бу ҳодисаларнинг асосий қонунларига боғлаб, тушунтиришга ури-ниш ортиқчадир. Мисол учун, унинг ўша «мешчанлик-ка» бўлган муносабатини бошланғич нуқта сифатида олиб кўрайлик.

Чўл бўриси, ўзининг фикр-қарашлари бўйича, мешчанлик оламидан бутунлай ташқарида бўлган, чунки у на оилавий ҳаётни, на ижтимоий шуҳратпарамастликни билган. У ўзини мутлақо ўзига хос, бошқача одам, гоҳ касалманд дарвеш, гоҳ эса меъёридан ортиқ, даҳоларга ўхшаган қобилиятли, ўртамиёна ҳаётнинг майда меъёрларидан улуғвор бўлган шахс сифатида ҳис қиласарди. Ҳарри буржуйдан онгли равишда нафратланар, буржуй бўлмаганидан фахрланарди. Шундай бўлса-да, барибир, у баъзи бир жиҳатдан бутунлай мешчанларга ўхшаб ҳаёт

кечиарди, унинг банқда пули бор эди, камбағал, бева-бечора, қариндош-уруғларни ҳам моддий жиҳатдан қўллаб-куватлаб турарди. У кийинишга унчалик ҳам эътибор беравермас, кўзга ташланмайдиган, одми кийим киярди. Полиция, солиқ идораси ва шунга ўхшаш бошқа маъмурлар билан ахилликда яшашга ҳаракат қиласади. Бироқ бундан ташқари, у мешчанларнинг майда оламини, озода боғчалар, топ-тоза, ялтиратиб тутилган зина майдончаларига эга бўлган ва тартиб-интизом ҳамда одоб, одамшавандаликнинг камтарона ҳавоси уфуриб турган соқин, бамаъни хонадонларни доимий равишда кучли, ички бир иштиёқ билан соғинар, кўмсарди. Унга ўзининг майда иллат ва тентакликлари, ўзини мешчанлар оламидан ташқариди, ўзига хос одам ёки даҳо ҳис қилиб яшаш ёқар, лекин таъбир жоиз бўлса, у ҳеч қачон мешчанлик йўқ бўлиб бораётган овлок, чекка вилоятларда яшамаса, бундай жойларни макон тутмасди. У на зўравон, на фавқулодда қобилият эгаларининг ва на жиноятчилар ёхуд ҳақ-хукуқизларнинг орасида ўзини яхши ҳис қиласади, балки ҳамиша шундай фуқаролар билан бирга истиқомат қиласадики, уларнинг одатлари, меъёр ва муҳити билан (гарчи у зиддият, фулгула ва изтироблардан иборат бўлса ҳам), яқин ва доимий алокада бўларди. Бундан ташқари, майдага мешчанлар тарбиясини олганлигидан ўша тарафдан ҳам бирталай андаза ва тушунчаларни ўзида сақлаб қолган эди. У фоҳишаликка назарий жиҳатдан қарши бўлмаса-да, шахсан қизлар билан жиддий муносабатда бўлиш ва уларни ўзига ўхшаш деб қараш унинг қўлидан келмасди. Сиёсий жиноятчи, инқилобчи ёки маънавий фосик, давлат ва жамиятни ман қилганларни у ўз оғасидек яхши кўрарди, бироқ ўғри, томтешар, садист-қотиллар билан, кейин мешчанларга хос афсус-надомат чекиб юрмаслик учун, умуман ва ҳеч қачон ош-қатиқ бўлмасди.

Шу тариқа у ўз вужуди ўзгаришлари ҳамда хатти-харакатларининг ярмини тан олар ва ҳамиша маъқуллар, қолганини эса инкор қиласади, унга қарши кураш олиб борарди. Авайлаб-асралган, нафис ва гўзал мешчан хона-

донаида ўсиб-улғайганидан ва ўз шакл-шамойили, хулқодобини сақлаб қолганидан аллақачоноқ мешчанликка мос мезонлардан чиқиб, мослашиб, ўзини мешчанлик омол ва эътиқодидан халос қилганидан сўнг ҳам, вужудининг бир бўлаги билан у ҳамон ана шу оламнинг тартиботларига илиниб, илакишиб юради.

«Мешчанлик» тушунчаси ҳам аслини олганда, инсон хулқи, хатти-харакатлари ўртасидаги сон-саноқсиз қарама-қарши ҳолатлар ва зиддиятларни мувозанатлаштириш ва бараварлаштиришга бўлган уринишдан, интилишдан бошқа нарса эмас. Ана шу зиддиятлардан биронтасини, мисол учун, тақводор билан бузуки ўртасидаги ҳолатни оладиган бўлсак, муқоясамиз дархол тушунарли бўлади-қолади. Инсон ўзини буткул маънавиятга бағишлиш, илоҳийликка яқинлашишга ҳаракат қилиш, тақводорликка берилиш имкониятларига эга. У аксинча, ўз имкониятларини бутунлай жинсий ҳаётта, кўнглининг майл-истакларини қондиришга йўналтириши, ўзининг бутун интилишларини бир зумлик ҳою-ҳавасларга, кайф-сафо, маишатга сарф этиши ҳам мумкин. Биринчи йўл тақводорликка, руҳнинг шу йўлда жафо чекишига, ўзни ўзига топширишга олиб боради. Иккинчи йўл эса бузуқликка, ҳою-ҳаваслар азобига, ўзни айнишга, бузилишга, таназзулга маҳкум этишга элтади. Оддий фуқаро иккаловининг ўртасида мўътадил, холисона яшашга ҳаракат қилади. У ҳеч қачон на кайф, на таркидунёчиликдан возкечади, у ҳеч қачон жафокаш тақводор бўлолмайди. Ўзининг маҳв этилишига ҳам рози бўлмайди, аксинча, унинг омоли садоқат, фидокорлик эмас, балки ўз «мен»ини сақлашдир. Унинг интилиши илоҳийликка ҳам, унинг аксига ҳам дахлдор эмас, чексизлик унинг учун жуда оғир. У, албатта, Яратганинг измида бўлади, лекин шу билан бирга, кайф-сафони ҳам эсдан чиқармайди. У химматли, саҳоватли бўлиш билан биргаликда, Ер юзида бир оз яхши яшашни ҳам хоҳлайди. Қисқаси, у қарама-қаршиликлар ўртасидаги муҳитда, кучли бўронлар ва момақалдироқлар бўлмайдиган ўртамиёна, холисона ва қулай

жойда кўним топишга ҳаракат қиласи. Бироқ чексизлик ва ноиложликка йўналтирилган ҳаётбахш этадиган ўша турмуш ва ҳис-туйғулар жўшқинлиги эвазига бунга муваффақ ҳам бўлади. Қизғин ва жўшқин яшаш мумкин, факат энди «мен» эвазига. Фуқаро энди «мен»дан, ҳар ҳолда ўсмай, ривожланмай қолган «мен»дан бошқа ҳеч нарсани тан олмай қўяди. У энди жўшқинлик эвазига хотиржамлик ва хавфсизликка эришади. Яратганга астайдил сифиниш ўрнига виждан хотиржамлигини қўлга киритади, хурсандчилик ўрнига ҳузур-ҳаловатга, эркинлик ўрнига қулайликка, ўлим талvasасида қуийб-ёниш ўрнига ёқимли ҳароратга эга бўлади. Фуқаро шунинг учун ҳам ўз моҳиятига кўра, заиф ҳаёт омилига эга бўлган мавжудотдир, у қўрқок, юраксиз ва журъатсиз, ҳар бир бой беришдан чўчиб, ҳадиксирайди, уни осон бошқарса бўлади. У шунинг учун ҳам ҳокимият ўрнига (овозларнинг) кўпчилигини, куч ўрнига қонунни, масъулият ўрнига овоз бериш тартибини жорий қилган.

Бу кучсиз, қўрқоқ одамлар сон жиҳатидан шу қадар кўп бўлса ҳам, ўз хусусиятига кўра, оламда адашиб, дайдиб юрган бўрилар галаси орасига тушиб қолган қўзи-чоқлар бажарадиган вазифадан бошқасининг уддасидан чиқолмаслиги кундай равshan. Шундай бўлса-да, кучли шахслар ҳукмронлик қилган даврларда фуқаро исканжага олингани, шунга қарамасдан, барибир, завол топмай, баъзан дунёни бошқариб келгани тарихдан маълум. Бу қандай мумкин бўлар экан? Уни ҳалокатдан қутқариб қолиш учун на сурув-сурув пода, на хайр-саҳоват, на «common sense»* ва на ташкилотчилик етарли бўлмас эди-ку. Кимдаки яшаш жўшқинлиги аввал бошдан заиф, кучсиз бўлган бўлса, унинг ҳаётини дунёдаги ҳеч қандай тибиёт сақлаб қололмайди. Бироқ шунга қарамасдан, буржуазия ҳамон яшаб келмоқда, у мудом кучли ва гуллаб-яшнамоқда. «Хўш, нима учун?» деган савол туғилади.

Жавоб эса тайёр: Чўл бўриларининг борлиги туфайли. Аслида буржуазиянинг ҳаётбахш кучи ҳеч қанақаси-

*Common sense – соғлом ақл (ингл.).

га унинг соғлом, эсли-хушли аъзолари хусусиятларида эмас, балки омолларининг мужмаллиги ва мослашувчалиги оқибатида қўшиб-қамраб олинган фавқулодда кўп сонли ёт, бегона кишиларнинг фазилатлари дадир. Буржуазияда ҳамиша бирталай кучли ва ёввойи табиатли шахслар яшаб келади. Бизнинг Чўл бўримиз Ҳарри бунга ёрқин мисолдир. У фуқарога мос мезондан чиқиб, шахс сифатида шаклланган бўлиб, мушоҳаданинг мазасини нафрат ва ўз-ўзидан нафратланишига қарамасдан, барибир, буржуазиянинг зўрма-зўраки маҳбусидир ва ундан қочиб кутулолмайди. Шундай қилиб, ҳақиқий буржуазия оммаси атрофида инсониятнинг кенг қатламлари, кўп минглаб кишилар ва зиёлилар уюшадики, уларнинг ҳар бири буржуазиядан ўсиб чиққан чексизликда ҳаёт кечириш учун туғилган бўлса-да, барибир, уларга буржуазиянинг бачкана хис-туйғулари хос ва унинг ҳаёт жўшқинлиги заифлигидан бир чимдим юқтириб олган. Улар буржуазияда қандайдир туриб қолишган, унга қандайдир даражада тобе, бурчли ва қарамдирлар. Алалхусус, улуғларнинг: «Кимки менга қарши бўлмаса, у мен тарафдир» — деган тескари тамойили айнан буржуазияга хосдир.

Шунга асосан, Чўл бўрисининг қалб, кўнглини тафтиш қиласиган бўлсак, у ўзини, аввало, Инсон сифатида намоён этади, индивидуаллашишнинг юксак даражаси унинг фуқаро эмаслигини кўрсатади — чунки барча юксак бошқарилётган индивидуаллашиш «мен»га қарши, қолаверса, унинг парчаланишига ҳам мойилдир. Биз унинг ҳам тақводорлик, ҳам фосиқлик йўналишлари бўйича ўзида кучли омилларга эга эканлигини кўрамиз, бироқ қандайдир заифлиги ёки ланжлиги туфайли кенг, бепоён коинот томон қанот қоқа олмаган ҳамда буржуазиянинг бачадонидаги буржларга боғланиб, ўралашиб қолган. Бу — унинг дунё саҳнидаги ҳолатини, унинг эркин эмаслигини, қўл-оёғи боғланганини кўрсатади. Кўпгина ақл-заковат сохиблари, санъаткор одамлар худди шу тои-

фага мансубдирлар. Улардан факат энг кучлиларигина фуқаролик худуди атмосферасини ёриб ўтиб, коинотга чиқадилар. Бошқалари эса, ўзларининг кучсиз эканини тан олиб, таслим бўладилар ёки муросага келадилар, улар буржуазиядан нафратланганлари ҳолда, шу тоифага мансуб бўлиб қолаверадилар, уни мустаҳкамлаб, шуҳратини ёяверадилар, натижада, келгусида яшай олиш учун, тузумни маъқуллашга ҳам мажбур бўладилар. Кўпчиликни ташкил этган бу одамларга фожия эмас, балки анчамунча омадсизлик ва аччиқ тақдир ҳам камлик қиласиди, шунинг жаҳаннамида уларнинг истеъоддлари қиёмага етади ва сермаҳсул бўлади. Тўдадан ажралган озчилик қисми эса, чексизликка кириб боради ҳамда таажжубланарли тарзда инқирозга юз тутади — уларнинг қисмати фожиали кечади. Бошқаларига — қўл-оёқлари боғланиб қолганларга — уларнинг иззат-хурматини жойига қўйган буржуазия кўпинча учинчи империя — алдамчи, аммо суверен дунё: юмор очиқ юзини намоён этиб туради. Доимий ва даҳшатли тарзда изтироб чекадиган тинибтинчимас, бехаловат, жонсарак Чўл бўрилари фожиавийликка, юлдузлар оламига ёриб ўтишга зарур бўлган куч-кувватдан қолганларида ўзларини чексизлик учун туғилган, деб ҳис қилсалар-да, унда яшай олмайдилар. Агар руҳлари изтироб туфайли кучли ва мослашувчан бўлиб қолган бўлса, улар учун юмор сари муроса-мадора йўли очилади. Юмор, гарчи уни ҳақиқий фуқаро тушунишга қодир бўлавермаса-да, ҳамиша буржуазияга қандайдир даражада мансуб бўлиб қолаверади. Унинг ёлғондакам, сохта моҳиятида барча Чўл бўриларининг чалкаш, чигал ва парчаланувчан омоллари амалга ошаверади: унда бир вактнинг ўзида нафакат руҳоний ва фосиққа нисбатан ижобий муносабатда бўлиш, кутбларни бир-бирига эгиш мумкин, балки яна фуқарони ҳам шунга розилигини олиш имкони туғилади. Тангри ни астойдил севган банда вақти келса, жиноятчига нисбатан ҳам ижобий муносабатда бўлиши мумкин. Аксинча, бошқа барча чексизликка даъват этилганлар, ўша

бетараф, бефарқ давра — буржуазияни маъқуллашлари амримаҳолдир. Ёлғиз Юморгина — ўз вазифа, бурч, қисмати бўйича энг оғир, қийин, танг ахволга тушиб қолган, деярли фожиали, энг қобилиятли, бироқ баҳтсиз одамларнинг ажойиб ихтироси — (эҳтимол, одамзоднинг ўзига хос ва энг дохиёна ютуғиям шу бўлса керак) умуман шу иложи йўқ нарсани амалга оширади, инсониятнинг барча қатламини ўз призма нурлари билан қамраб олиб, бирлаштиради. Дунёни гёё дунё эмасдек яшаш, қонун билан ҳисоблашган ҳолда ундан юқори туриш, эгалик қилмаётгандек тасарруф этиш, инкор қилмагандек воз кечиш — юксак ҳаёт донишмандлигининг мана шу барчага севимли бўлиб қолган ва кўпинча аниқ ифода этилган талабларини амалга оширишга ёлғиз Юморгина қодирдир.

Агар Чўл бўрисига ўз дўзахининг дим, чигал-чалкашликлари узра мана шу сехр-жодули «ичимлик»ни обдан қайнатиб, тер билан чиқариб юбориш насиб қилганда эди, бунинг учун унинг истеъдод ва иштиёқи етарли, ана ўшандагина у халос этилган бўларди. Бу йўлда ҳали унга яна кўп нарса этишмайди. Бироқ умид қилса бўлади, бунинг учун имкониятлар ҳам мавжуд. Кимки уни севса, қисматига шерик бўлса, унга мана шу нажотни тилай олади. Шу туфайли у, албатта, бир умрга буржуазияда қолган бўлар, унинг азоб-изтиробларига чидай олар, улар ўз маҳсулини бера бошлар эди. Унинг мешчанлик оламига бўлган муносабати, муҳаббат ва нафрати ўз ҳассослигини йўқотган ва бу дунёга боғланиб қолишилиги ортиқ бадномлик бўлиб қийнамаган, ўз-ўзидан барҳам топган бўларди.

Бунга эришиш, коинотга етишиш учун яна бир бор журъат қилиб кўришдан олдин, бундайин Чўл бўриси, аввало, ўз-ўзига бир қарама-қарши, юзма-юз (бақамти) қўйилиши, солиширилиши, қалб-кўнглининг чигалликларига теранроқ назар ташлаши ва эс-хушини тўлароқ англаб олиши керак бўлади. Ўшандагина унинг ўзгармас, бир зайлда туюлган шубҳали, даргумон тириклиги

чок-чокидан сўкилиб, очилиб қолган бўлар эди. Энди у бундан буён ўз майл-истаклари жаҳаннамидан ҳассос фалсафий тасалли-таскин топмаган, бундан эса яна кўр-кўронга бўрилик даъво қила олмаган бўларди. Инсон ва Бўри бир-бирларини сохта ҳис-туйгулар никобисиз таний олишга, бир-бирларининг кўзларига тик боқишига мажбур бўлишарди. Шундагина улар ё портлаб, тилкапора бўлган ёки бир-бирларидан бир умрга юз кўрмас бўлиб, ажрашарди. Ана шундагина хеч қандай Чўл бўриси ҳам бўлмасди, улар юморнинг юксалаётган ёғдуси остида бир-бирлари билан оқилона турмуш қуради.

Ҳарри бир кунмас, бир кун мана шу сўнгги имконият маррасига ҳам етиб бориб қолар, балки, кунларнинг бирида у ўз-ўзини танишни ўрганар, кичкинагина кўзгумизни қўлига олар ё умрибоқийларни учратиб қолар ёки мафиявий театрларимиздан бирида ўзи излаётган — ҳувиллаган қалбини халос этишга ёрдам берадиган нарсани ҳам топиб олар. Унга бундайин минглаб имкониятлар мунтазир, унинг тақдирини, ихтиёрини олиб қўядиган даражада ўзига чорламоқда, буржуазиядаги барча бундай одамови, дамдузлар шундайин мафиявий имкониятлар вазиятида яшайдилар. Яшин уриши учун эса, арзимаган нарса кифоя қиласди.

Буларнинг барчаси, гарчи Чўл бўриси ўз ботиний таржимаи ҳолининг бундайин тузилишини хеч қачон кўра олмаса ҳам, унга жуда яхши таниш. У дунё биносидаги ўз ўрнини олдиндан кўради, умри боқийларни яхши билади, ўз-ўзи билан бўладиган учрашув имкониятларини олдиндан пайқайди, сезади ва ундан қўрқади. У ўша кўзгунинг борлигини ҳам билади, унга бир қараб олишга низоятда муҳтоҷ бўлса-да, бироқ барибир бунга журъат этолмайди.

Тадқиқотимиз сўнгига яна бир охирги сохта вазият — асосий хатони аниқлаб, ҳал қилиб олиш қоляпти. Барча «изоҳ»лар, психология, тушунтириш йўлидаги барча уринишлар, ёрдамчи воситалар, назариялар, афсоналар, ёлғонларга таяниб иш кўрадилар; ундей ёлғонларни

ҳикоя, баён сўнгидা имкон қадар очиб бермасликни инсофли муаллиф ўзига эп кўрмайди. Агар мен «юқорида» ёки «қўйида» десам, бу бир фикр, даъво ҳисобла-нади, энди уни тушунтириб, изоҳлаб бериш лозим бўлади, чунки «юқори» ва «қўйи» тушунчалари фақат тафак-курда, фақат мавҳумотда бўлади. Дунёning ўзи эса, на юқорини, на қўйини билади.

Худди шундай, мухтасар қилиб айтганда, «Чўл бўриси» деган тушунча ҳам аслида уйдирма. Агарда Ҳарри ўзини ўзи бўри-одам деб ҳис қилиб, бир-бирига душман ва қарама-қарши икки вужуддан иборат мавжудот деб билса, бу энди соддалаштирилган афсонанинг ўзгинаси-дир. Ҳарри аслида ҳеч қандай бўри-одам ҳам эмас, агар биз унинг ўзи ўйлаб топган ва ишонган ёлғонига шунча-ки инониб, «ўзлаштирган» ва уни ҳақиқатан ҳам кўш табиатли, иккиёклама мавжудот, яъни Чўл бўриси деб қараб, тушунтиришга ҳаракат қилган бўлсак, бунга энди биз, осонроқ тушунарли бўлсин деган умидда йўл қўйган-миз, яъни ёлғондан ўз ўрнида фойдланганмизки, энди мана шу ёлғон, алдов, хатони аниқлаш, тузатиш ва тўлди-ришга тўғри келади.

Бўри ва Инсонга, майл, истак, интилиш ва руҳга бўлиниш — булар орқали Ҳарри ўз тақдирини тушунти-риб беришга ҳаракат қиласи — реал воқеликнинг одам ўзида учратадиган ва унга ўз изтироблари манбаи бўлиб кўринадиган зиддиятларнинг асосли, ишонарли, тушу-нарли, бироқ ёлғон, хато ва нотўғри тушунтирилиши фойдасига бўлган жуда кўпол равишдаги ва мажбуран қилинган соддалаштирилишидир. Ҳарри ўзида «инсон-ни», яъни фикр, ҳис-туйфу, маданият, бўйсундирилган ва такомиллашган улуғвор табиат оламини учратади, шу билан бирга, «бўри»ни — майл, истак, интилишлар, ёввойи-лик, ёвузлик, такомиллашмаган табиатнинг номаълум, зулмат дунёсини ҳам топади. Ўз вужудининг бир-бирига душман бўлган икки муҳитга шу қадар аниқ бўлинишига қарамасдан, у, барибир, бўри билан инсоннинг гоҳ-гоҳи-да, баъзан бир-бирлари билан бир зумга бўлса-да, ўзаро

чиқишиб, муроса қилишганига ҳам шоҳид бўлган. Агар Ҳарри ўз ҳаётининг ҳар бир алоҳида лаҳзасида, ишлари, ҳиссиётларининг ҳар бирида Инсоннинг ҳиссаси қанчалигини, Бўрининг улуши қандайлигини аниқлашга уринганида борми, у ғоят қийин, мушкул аҳволга тушиб қолган ва унинг бутун ажойиб бўри назарияси майдамайда бўлиб кетган бўлар эди. Чунки ҳар қандай инсон, ибтидоий ҳабаш, эси паст овсар ҳам икки ёки уч асосий унсурдан таркиб топган жўнгина мавжудот эмас; ва Ҳарридек «табақалашган» инсоннинг бўри ва одамга бўлинишини тушунтириб ўтириш – болаларга хос бефойда уринишнинг ўзгинаси. Ҳарри атиги иккитагина эмас, балки юз, минглаб табиатлардан таркиб топган. Унинг ҳаёти (ҳар бир, ҳар қандай инсон ҳаёти сингари) нафақат икки қутб, башарти майл-истак, интилиш ва рух ёки руҳоний ҳамда фосиқ ўртасида бўлмаса, балки минглаб, беҳисоб, сонсаноқсиз жуфт қутблар орасида муаллақ парвоз қилади.

Ҳарридек ҳамма нарсадан хабардор, билимдон ва ақлли одам ўзини «Чўл бўриси» деб ҳисоблаб, ўз ҳаётининг бой ва мураккаб ҳосиласини содда, камтар, берахм, шафқатсиз, ваҳшиёна, шу қадар ибтидоий формулага жойлаштира олишига ишониши бизни таажжубга солмаслиги керак. Инсон юқори даражадаги тафаккурга қодир эмас. Энг ақлли ва ўқимишли одам ҳам дунёни ва ўзини, (кўпинча ўзини (!)) доимо жуда содда, соддалаштирилган ва бошқача тарзда алдовчи формуалалар кўзойнаги орқалигина кўради. Чунки ўзининг «мен»ини яхлит бир бирлик, деб тасаввур қилиш, барча инсонларнинг табиий, туғма ва бутунлай зўрма-зўраки таъсир этувчи эҳтиёжига айланган, чамаси. Бу васваса қанчалик тез-тез ва оғир даражада юзага келмасин, барибир, тузалиб, битиб кетаверади. Қотилнинг рўпарасида ўтириб, унинг кўзига тикилиб турган ҳакам қотилнинг бир лаҳза унинг (ҳакамнинг) овози билан гапира бошлаганини эшитса ва унинг барча ҳаракат, қобилият ва имкониятларини ўзида ҳам сезиб, пайқаб қолса ҳам у, барибир, кейинги лаҳзада тағин бир рақами – ҳакамдир – ўз тасаввуридаги «мен»и-

нинг парда-қобиғига қайтадан ўралиб олади-да, ўз бурчини бажараверади ва қотилни ўлимга маҳкум этади. Агар айрим қобилиятли ва нозик, сезгир инсонлар ўз кўнглида ўзларининг парчаланувчанликларини олдиндан сеза бошлашса, агар улар, ҳар бир даҳо каби, шахс бирлиги васвасасини ёриб ўтиб, ўзларини кўп қисмли, «мен»ларнинг бир тутами, деб ҳис қила бошласалар, буни билдириб қўйсалар кифоя, шу заҳоти уларни (овозларнинг) кўпчилиги қуршаб олади, илм-фани ёрдамга чақиради, шизофренияни* қайд этади ва инсониятни бу баҳтсизлар оғзидан ҳақиқат чақиригини эшитишдан асраб қолади. Энди, ҳар бир фикрли инсон учун ўз ўзидан тушунарли бўлган, қолаверса, айтиб ўтириш урф бўлмаган гаплар, нарсалар ҳақида ортиқча вақт сарфлаб, валдираб ўтиришнинг ҳожати бўлмаса керак? – демак, агар инсон ўз тасаввуридаги «мен»ни икки кишини мужассамлантирган бир бутунлик томон кенгайтиришга, ёйишга ҳаракат қилса, шунинг ўзи деярли даҳоликдир, шу билан бирга, камдан-кам учрайдиган ва қизиқарли истисно ҳамдир. Аслида эса, ҳеч қандай «мен», ҳатто энг соддаси ҳам, яхлит бирлик эмас, балки энг юксак парчаланувчан олам, митти юлдузли осмон, шакллар, поғоналар ва ҳолатлар, мерос (ворислик) ва имкониятлар тумтароқлигидир. Ҳар бир алоҳида шахс бу тумтароқликни яхлит бир бирлик, деб қарашга интилса ва ўз «мен»ни ҳақида, гўё содда, мустаҳкам шаклланган, аниқ баён қилинган ҳодисадек гапирадиган бўлса: энди ҳар бир (ҳатто энг улуғ) инсон учун ҳам маълум ва одат бўлиб қолган ёлғон, алдов, зарурият, нафас олиш ва овқатланишдек ҳаётий заруратга айланган, чамаси.

Бу ёлғон, алдов оддийгина мажозий маънода берилган. Ҳар бир инсон гавда тузилиши жиҳатидан яхлит бўлса-да, қалб, кўнгил, табиат нуқтаи назаридан асло ундей эмас. Шеъриятда – нафислик ва гўзалликни бутун, умумий, бирлашган шахслар образлари иштирокида талқин қилинади. Ҳозирги кунгача яратилган ижод бо-

* Шизофрения – рухий касалликнинг бир тури.

бida мутахассислар, адабиёт билимдонлари драмани ҳақли равишда энг юқори даражада баҳолайдилар, чунки у («мен»ни кўпчиликники деб тасвирлаш учун, агар бунга муқаррар бир марталик, бирлашган, якунланган уйғунликда тасвирланган драманинг ҳар бир алоҳида қатнашчиси яхлит бирлик, деб алдайдиган юзаки зоҳирий кўриниш монелик қилмаса), катта имконият яратади. Шунингдек, содда эстетика ҳам ҳар бир образ ниҳоятда кўринарли ва яхлит бирлик сифатида алоҳида иштирок этадиган «характер драмаси» деб аталган жанрга энг юқори даражада баҳо беради. Фақат, узоқдан ва аста-секин кўнглимиизда, биз адашмаётганмикинмиз, агар биз антик даврнинг гўзаллик ҳақидаги ажойиб, бироқ бизга табиий, тугма бўлмаган, балки фақатгина зўрлаб ўтказилган, бутун ички моҳиятидан келиб чиқиб «мен», шахс ҳақидаги ёлғонни ўйлаб топган тушунчаларини улуғ драматургларимизга нисбатан татбиқ этадиган бўлсак, бу эҳтимол, арzonгина, юзаки бир эстетика бўлиб қолмасмикин, деган шубҳа-гумон туғилади. Кўхна Ҳиндистоннинг шеърий асарларида бу тушунча бутунлай номаълум, ҳинд эпосларининг қаҳрамонлари шахслар эмас, балки шахслар тўдаси, қатор тажассум, тимсоллардан иборат. Бизнинг бугунги замонамиизда шундай асарлар борки, улардаги шахс ва хатти-харакатлар ўйини ортида, муаллифга бутунлай маълум бўлмаган ҳолда, табиатлар хилма-хиллигини тасвирлашга уриниш сезилади. Кимки буни билмоқчи бўлса, у ана шундай асарлар образларини яхлитик эмас, балки юксакроқ бирлик (менингча, ижодкор қалби)нинг қисм-бўлаклари, томонлари, турли хил жиҳатлари, деб қарashi керак бўлади.

Ким агар Фаустга шу тарзда ёндошса, унинг учун Фауст, Мефисто, Вагнер ва бошқа барчасидан битта бирлик — ўта кудратли шахс ҳосил бўлади. Худди шу юксакроқ бирликдагина — алоҳида образларда эмас — қалб, кўнгил, табиатнинг асл моҳияти намоён бўлади. Агар Фауст мактаб муаллимлари орасида машхур бўлган,

ўз хузур-ҳаловатини ўйлайдиган тор фикрли кишиларни титратиб, қалтиратадиган ҳикматли сўз: «Икки дил яшар, эҳ, кўксимда менинг» деса, у Мефистони ва кўксидаги бошқа бирталай табиатларни ҳам унутган бўлади. Бизнинг Чўл бўримиз ҳам ўз кўксисда икки кўнгил, икки табиат (Бўри ва Инсон) мавжудлигига ишонади ва шунинг учун ҳам ўз кўксини сиқилган, бехузур ва танг аҳволда, деб ҳисоблайди. Кўкрак ва қорин иккови ҳамиша бир нарса, бироқ унда яшовчи табиатларнинг сони икки ёки бешта әмас, балки беҳисобдир; инсон қат-қат қобиқдан иборат пиёз, кўп ипдан тўқилган матодир. Қадимги осиёликлар буни тўғри англаган ва билган. Будданинг йоглар фалсафий тизимида шахс васасини фош қилишнинг аниқ техникаси ўйлаб топилган. Одамзоднинг ишлари нақадар қизик ва ажойиб: Ҳиндистон минг йиллар мобайнида фош этишга зўр бериб ҳаракат қилган хато Farb қўллаб-қувватлаб, мустаҳкамлаш учун худди шундай астойдил уринган нарсанинг ўзгинасидир.

Чўл бўрисига худди шу нуқтаи назардан қарайдиган бўлсак, унинг нима учун кулгили тарздаги қўш табиати орқасидан шу қадар изтироб чекиши бизга бирмунча ойдинлашади. У худди Фаустга ўхшаб, икки табиат бир кўкракка кўплек қиласди ва улар кўкрак қафасини, ҳатто ёриб юбориши ҳам мумкин, деб ҳисоблайди. Аслида улар, аксинча, озлик қиласди ва Ҳарри ўзининг шўрлик вужудини шу қадар жўн, ибтидоий тарзда тушунишга ҳаракат қилиб, уни даҳшатли йўсинда азоблайди. Ҳарри, гарчи ўта ўқимишли киши бўлса-да, иккидан ортиқ санаши билмайдиган ёввойидек, ҳаммаёқни чалкаштириб юборади. У ўзининг бир бўлагини одам, бошқа бир қисмини эса бўри деб атайди, бу билан ўзини масаланинг охирига етган ва у ҳал бўлган деб ҳисоблайди. «Инсон»га у ўзида учрайдиган барча маънавият, улуғворлик, олийжаноблик ёки нафосат, гўзалликни жойлайди, «Бўри»га эса — барча файриихтиёрий бўладиган нарсаларни, ёввойилик, тар-

тибсизлик ва чалкашликларни жойлаштиради. Лекин ҳаётда воқелик биз фикрлагандек оддий, биз эси пастларнинг фариб тилимиздагидек, кўпол кечавермайди ва Ҳарри, ана шу ҳабашларга ўхшаб, бўрилик усулини қўлласа, ўзини икки карра алдаган бўлади. Ҳарри ўз кўнглининг чеккачеккасини, гарчи улар ҳали «одам» бўлмаса-да, «инсон» деб ҳисоблайди, аллақачоноқ бўридан холи бўлган қисмларини эса, бўри вужудига мансуб деб билади.

Барча инсонлар сингари Ҳарри ҳам, одамзоднинг кимлигини яхши биламан деб ўйлайди ва уни, гарчи тушлар ва бошқа қийин назорат қилинадиган англаш, ҳис этиш ҳолатларида тез-тез пайқаб, сезиб туришига қарамасдан, барibir, мутлақо билмайди ва билолмайди ҳам. У ўзининг бу шубҳа-гумонларини ёддан чиқармасдан, уларни имкони борича ўзлаштириб олишни истарди! Инсон мустахкам ва бардавом мавжудот эмас (бу ўз донишмандларининг тушунчаларига зид бўлишига қарамасдан, антик даврнинг омоли эди), у кўпроқ тажриба ўтиш ҳолатидир, у табиат билан рух ўртасидаги торгина, хавфли кўприқдан бошқа нарса эмас. Рух томон, илоҳийликка уни ботиний мақсад, бурч етаклайди, Она табиат томон уни чуқур соғинч, қўмсанш тортади: икки куч ўртасида унинг қўркувга тўла ҳёти силкиниб, тебраниб кечади. Одамлар «Инсон» тушунчаси остида ниманики англасалар, бу фақатгина фуқароларнинг ўткинчи келишувидир, холос. Муайян думбул майл-истак, хоҳиш ва интилишлар бу битим томонидан рад этилади ва ман қилинади. Бир мисқол онг, хушахлоқлик ва шайтондан холос бўлиш талаб қилинади, озгина рух нафақат рухсат этилади, балки талаб ҳам қилинади. Бу шартнома «кишиси» ҳар бир фуқаро омолидек, муросаю мадорадир. Ёвуз она табиатни ҳам, рухни мустахкамловчи йўлни ҳам оғир талаблари учун қоралаб, уларнинг ўртасидаги холисона жойда яшашга бўлган қўрқоқ, тортинчоқ, ҳардамхаёл ва сода-айёр уринишдир. Шунинг учун фуқаро, у ўзи «шахс»

деб атайдиган нарсага изн беради ва унга чидайди, шахсни айни пайтда ўша Молох* — «давлат»га топширади ва уларни доимо бир-бирига қарши қўяди. Шунинг учун фуқаро бугун уни еретик** сифатида ўтда куйдиради, уни жиноятчи сифатида осади, эртадан кейин — индинга эса, унга ҳайкал ўрнатади.

Буни Чўл бўриси ҳам яхши англарди. Бироқ унинг ўз «бўриси»га қарама-қарши ўлароқ ўзидағи «инсон» деб атайдигани — бу маълум ва кўп жиҳатдан фуқаролар конвенциясидаги худди ўша ўртамиёна «одам»дан бошқа нарса эмас. Ҳақиқий, чин инсон, умри бокийлар сари йўлни Ҳарри, албатта, жуда яхши англайди, тоҳ-гоҳида бу йўлдан озгина, ҳардамхаёллик билан юриб ҳам қўяди ва бу унга оғир изтироблар, ўта қайгули ёлғизликлар келтиради. Бироқ у ўша энг юксак талаб, ўша ҳақиқий, рух томонидан изланган одамга айланиш жараёнини маъқуллаб, унга интилишдан, боқийлик сари бирдан-бир, ягона тор йўлдан боришдан ниҳоятда қўрқарди. Бу йўл янада каттароқ изтиробларга, қувфинга, сўнгги воз кешишга, эҳтимол жаллод кундасигача олиб боришини ҳам жуда яхши ҳис қиласр эди. Агар бу йўл пировардида уни боқийлик ўзига чорлаб турган бўлса ҳам, барибир, барча бундайин изтиробларни чекиши нияти йўқ эди, у бундай ўлимлардан қочарди. Гарчи одамга айланиш ният, мақсадини у фуқаролардан кўра кўпроқ англаса-да, барибир, кўзларини юмиб олиб, тушкунлик кайфиятидаги «мен»га осилиб олиб, ўлимни истамаслик абадий ўлимга олиб борувчи энг хавфсиз йўл эканини билишни ҳам хоҳламайди. Ўлимнинг ҳақлиги, парда-ниқобнинг олиб ташланиши, «мен»га берилиш эса, боқийлик сари ўзгариш томон олиб боради. Агар у умри боқийлар ораси-

* Молоҳ — афсоналарга кўра, тангри, илоҳ номи, унга одамларни курбонликка келтиришган. Шунингдек, бераҳм, бешафқат, ебтўймас очофат, бало-қазо маъносида ҳам тушунилади.

** Еретик — умумий тартиб-қоидаларга, одатдаги қарашларга хилоф фикр юритувчи, иш тутувчи киши, бидъатчи.

даги ўзи яхши кўрган кишиларга, эҳтимол, Моцартга топинса, уни пировардида ҳам ҳамиша фуқарога хос кўзлар билан кўради ва Моцартнинг етуклигини ўз фидокорлиги ва изтиробларга тайёрлиги, фуқароларнинг идеалларга нисбатан лоқайдлигининг улуғворлиги ва изтироб чекаётганлар, одамга айланётганлар атрофидаги само, фазони муз қилиб суюлтириб юборадиган ўша танҳолик, Гецемане* боғидаги ўша ёлфизликка бўлган бардошидан келиб чиқиш ўрнига мактаб муаллимига ўхшаб, фақат ўзининг касбий қобилиятидангина келиб чиқиб тушунтиришга хайриҳоҳ ва мойилдир.

Ҳар ҳолда бизнинг Чўл бўримиз ўз вужудида Фаустга ўхшаб, икки табиат борлигини, ўз вужудига яхлит бирлик хос эмаслигини, балки у нари борса йўлда, мана шу уйғунлик омоли сари узоқ сафарда эканлигини тушуниб етди. У ё ўзидағи бўрини енгишни ва бутунлай инсон бўлишни ёки инсонликдан воз кечиб, бўрилигича қолиб ҳам, бирлашган, зиддиятларсиз ҳаёт кечиришни истарди. Афтидан, у ҳеч қачон ҳақиқий бўрини аниқ кузатмаган бўлса керак — агар шундай бўлганида, у эҳтимол ҳайвонлар ҳам бирлашган вужудга эга эмасликларини, уларнинг тана-гавдаларидағи аниқ, пухта, қатъий шакллар замирида ҳам хилма-хил интилиш ва ҳолатлар мужассам эканлигини, ҳатто бўри вужудида ҳам ихтилоф, келишмовчиликлар мавжудлигини, ҳаттоки, бўрининг изтироб чекишини кўрган, англаған бўларди. Йўқ, «табиатга қайтиш» шиори бўладиган бўлса, инсон ҳамиша изтиробга тўла ва ноумид, алдамчи, ҳатто йўлдан боради. Ҳарри энди ҳеч қачон яна қайтадан бутунлай бўри бўла олмайди, ҳатто Бўри ҳам шунчаки оддий ва бошланғич нарса эмас, балки унинг қандайдир серқирра ва мураккаб мавжудот эканлигини кўради. Ҳатто бўри кўксида ҳам икки ёки ундан ортиқ табиатлар мавжуд.

*Гецемане – Куддус яқинидаги боғ, Исо пайғамбар банди қилинган жой.

Кимки бўри бўлишни жуда хоҳласа, «О, ҳали ҳам бола бўлиш қандай баҳт!»* деб ашула айтиб юрадиган одамга ўхшаб, худди шундай фаромушхотирликка йўл қўяди. Баҳтли бола ҳақида қўшиқ айтиётган ана ўша хайриҳоҳ, ҳассос одам ҳам худди шундай табиатга, маъсумликка, ибтидога қайтишни истайди ва болаларнинг ҳеч қандай баҳтиёр эмасликларини, улар ҳам кўплаб зиддиятларга, кўплаб иккиёқламаликларга, изтиробларга қодир эканликларини унутиб қўйган.

Ортга – на бўриликка, на болаликка бўлсин, олиб борадиган йўл умуман йўқ. Ибтидода на маъсумлик, на бокиралик, на соддалик ва на софдиллик бор; яралган барча мавжудот, ҳаттоки, энг оддий, энг содда кўрингани ҳам, гуноҳкор ва парчаланувчандир. У шаклланишнинг ифлос оқимига итқитилган ва ҳеч қачон оқимга қарши суза олмайди. Гуноҳсизлик, яралмаганлик, Тангри томон йўл ортга эмас, балки олдинга, бўри ёки бола томон эмас, балки яна гуноҳ, инсонга айланиш томон тобора чуқурроқ олиб боради. Ўз жонингга қасд қилсанг ҳам, эй, бечора Чўл бўриси, сенга бунинг жиддий нафи тегмайди, аксинча, энди сен одамга айланишнинг узунроқ, машаққатлироқ ва оғир йўлини босиб ўтасан, вужудингдаги икки дил, табиатни бир неча баравар кўпайтиришишингга, ўз мураккаблигингни янада мураккаблаштиришишингга тўғри келади. Ўз оламингни торайтириш, ўз қалбингни соддалаштириш ўрнига сен энди, эҳтимол, охиратга, абадий оромга етишиш учун янада кенгроқ оламни, пировардида бутун дунёни ўзингнинг қайфу, ҳасрат-ла кенгайган қалбинг, кўнглингга сифдиришишингга тўғри келади. Бу йўлни Будда ҳам, ҳар бир улуғ инсон ҳам, бири билиб, бири билмай, англамай, насиб этганича, босиб ўтган. Ҳар бир туғилиш коинотдан ажралиш демакдир, бурч, вазифа, илоҳиётдан ажралиб, узилиб қолиш, изтиробларга тўла янгиланиш, янги шаклга ки-

* «О, ҳали ҳам бола бўлиш қандай баҳт!» – Лортцинг қала-мига мансуб «Шоҳ ва дурадгор» комик операсида шоҳ айтадиган лирик қўшиқдаги нақарот.

риш демақдир. Коинотга қайтиш, изтиробларга тұла индивидуаллашишнинг барҳам топиши ўз қалб-күнглингни коинотни яна қайтадан сиғдира оладиган даражада кенгайтириш демақдир.

Бу ерда гап мактаб, миллий иқтисод, статистикани билган ва таниган одам ҳақида, қўчалардаги миллионлаб инсонларга қўшилиб, елиб-югуриб юрган ёки денгиз бўйидаги қум ёхуд қирғоқ тўлқинининг сачраган зарраси, қатрасидан фарқи бўлмаган, бирор пулга олмайдиган одам ҳақида бораётгани йўқ: гап бир неча миллион кишиларнинг озми-кўплиги ҳақида ҳам эмас — улар модда, холос, бошқа нарса эмас. Йўқ, йўқ, биз бу ерда юксак маънодаги инсон, одам бўлишнинг узундан-узоқ йўли, мақсади, сервиқор, улуғвор инсон ва умри боқийлар ҳақида гапирайпмиз. Даҳо(лар), бизларга тувлганидек, у қадар камдан-кам, ва, албатта, (адабиёт ва дунё тарихи ёки газеталар фикрига қараганда), у қадар тез-тез учрайдиган ҳодиса ҳам эмас. Бизга шундай туюладики, Чўл бўриси Ҳаррига дуч келган ҳар қандай қийинчилик олдида ҳадеб ўзининг тўмтоқ Чўл бўрисини аянчли тарзда важ-корсон қилиб кўрсатавериш ўрнига одам бўлишга таваккал қилиб уриниб кўриш учун даҳолик етарли эди.

Шундай имкониятга эга кишиларнинг Чўл бўрилари ва «икки дил-табиат, эҳ!» деган гап билан қаноатланишлари, кифояланишлари, уларнинг буржуазияга бўлган ўша кўпинча суст, тушкун меҳр-муҳаббатлари сингари ғалати ва ўта қайгуидир. Буддани тушунишга қодир бўлган одам, осмонлар ҳақида тушунча-тасаввурга эга бўлган, инсониятнинг ихтилоф ҳамда келишмовчиликларидан боҳабар бўлган одам, соғлом ақл, демократия ва буржуа таълими хукмронлик қилаётган дунёда яшамаслиги лозим. Унда у кўркөклигидан, иродасизлигидангина яшайди, холос ва мезонлари уни таъқиб қилиб, эза бошласа, унга унчалик катта бўлмаган мешчанлик хонадони торлик қилиб қолса, буни «бўри»га тўнкаб, афдариб қўяқолади ва бўрининг вақти-вақти билан ўз қисматига энг яхши шерик эканини билишни ҳам истамайди. У ўзидағи барча ёввойиликни

«бўри» деб атайди ва уни ёвуз, хавфли, фуқаро учун кўркинч ва даҳшат сифатида ҳис этади — бироқ у, ўзини санъаткор ва нозик, нафис фикрларга эга деб ўйласа ҳам, барибир, ўзида бўридан ташқари, бўрининг ортида яна бошқа кўп нарсалар ҳам яшашини, ҳамма тишлайдиган нарса ҳам бўри бўлавермаслигини, ундан бошқа яна тулки, аждаҳо, йўлбарс, маймун ва жаннат қушлари* ҳам борлигини, шунингдек, ҳақиқий, чин инсон алдамчи, сохта одамлар, мешчанлар томонидан руҳий, тушкун кайфиётда бандиликда сақланганликлари янглиғ, бу бутун дунё, гўзал ва мудҳиши, катта ва кичик, кучли ва нозик мавжудотларга тўла жаннат боби ҳам бўри ҳақидаги эртакда маъюс ва фамгин асира сифатида тасвиранади.

Турли-туман дараҳтлар, турфа хил гуллар, сархил мевали дараҳтлар, ҳар турли гиёҳлар ўсаётган боғу бўстонни кўз олдимизга келтирайлик. Агар бу бўстоннинг боғбони «еб бўладиган» ва «бегона (ёвойи) ўт»дан бошқа ботаник тушунчага эга бўлмаса, у ўз боғининг ўндан тўққиз қисмини нима қилишни билмай, ҳайрон бўлиб қолади ва анвойи гулларни ҳам, асл дараҳтларни ҳам кесиб битиради, юлиб ташлайди ёки уларни кўролмайди, уларга ёмон кўз билан қарай бошлайди. Чўл бўриси ҳам ўз қалбининг минг бир чечакларига худди ана шундай муносабатда бўлади. «Инсон» ёки «Бўри» руқнларига нимаики тўғри келмаса, уларни умуман кўра олмайди. У «Инсон»га нималарни кўшмади дейсиз! Кўрқоқлик, юраксизликлар, барча маймунга хос одат ва хатти-ҳаракатлар, аҳмоқлик ва пасткашликларни (бўрига сал тўғри келмай қолса бўлди), ҳаммасини «Инсон»га тиркаб юборди. Ўзи эриша олмаган, ўзига насиб этмаган барча қуч-кудрат ва олийжанобликларни эса, Бўри ҳисобига ёзиб қўяқолди.

Биз энди Ҳарри билан хайрлашамиз. У ўз йўлида ёлғиз яна давом этади. Ўзи интилган манзилга — умри боқийлар хузурига етиб олса, у бу бетўхтов ҳаракатлар, фимир-фимир, питир-питир, югур-югурларга, ўзининг

* Жаннат қушлари — чумчуксимонлар туркумига мансуб ялтироқ патли, жуда чиройли кўринишга эга бўлган қушлар. Улар шарқи-жанубий Осиёда ва шарқий Австралиядаги яшайдилар.

ёввойи, ҳардамхаёл йўлидаги эгри-бугри, илонизи бурилишларга ҳайрон бўлиб қараган ва Чўл бўрисига рухлантирувчан, таънаомуз, куйинчаклик ва вақтичоғлик билан табассум қилган бўлармиди!..

* * *

Мутолаани тугатган ҳам эдимки, бундан бир неча хафта муқаддам тунда айнан Чўл бўриси ҳақида фалати бир шеър* ёзиб қўйганим ёдимга тушиди. Уни қоғозларга лиқ тўла ёзув столимдан бир амаллаб излаб топиб, ўқий бошладим:

Мен — Чўл бўрисиман, изғийман бетин,
Дунё қор қўйнида ухлайди сокин.
Қайнзорда қанот қоқар қарға, зоф,
На қуён кўринар, на кийик, эвоҳ.
Охуларга ишқим тушган азалдан,
Уларнинг тўшлари ширин асалдан.
Қанийди, биттаси дуч келса шу он,
Таппа босардиму ғажирдим чаққон!
Лаззат борми, менга бундан зиёда,
Бундай роҳатижон бўлмас дунёда.
Ул гўзални севар эдим юракдан,
Тутиб олсам яйраб кетар эди тан.
Сон гўштин еб, ёғин ялаб тўярдим,
Сўнг кечаси ёлғиз «ув»лаб қўярдим.
Майли эди ҳозир учраса қуён,
Менинг шодлигимга бўлмасди поён!
Эҳ, кўлдан кетдими, барчаси наҳот?
Ҳаётнинг ҳам қизиги қолмади, ҳайҳот!
Қўниб думимдаги тукларга киров
Кўзларим ҳам хира тортиб қолди-ёв.
Хотин ўлиб кетди, йиллардир ёху!
Ёлғиз тентирайман, хаёлда оху.
Тушларимга кирап ҳатто қуёнлар,
Қиши кечаси шамол увлаган онлар,
Томоқ ёнар, кордир унга тасалли,
Энди иблис жоним олса ҳам майли.

* Шеър — «Мен — Чўл бўрисиман, изғийман бетин» — Хессенинг 1925/26 йй. Киши фаслида ёзган шеъри.

Шундай қилиб, қўлларимда ўзимнинг икки суратимни тутиб турардим – бири тўқмоқ шеърдан иборат фамгин ва ўзимга ўхшаган кўрқинчли автопортрет бўлса, бошқаси мени ўзига қараганда кўпроқ ва балки биладиган ўзга, бегона, ёт киши томонидан совуққина, зоҳиран юксак холислик билан ташқаридан ва юқоридан туриб, чизилган расм эди. Бу иккала сурат – менинг тутилиб ёзилган маъюс, дилгир шеърим ҳамда нотаниш кимсанинг ақл билан яратилган илмий трактати қўшилиб, менга азоб берар, уларнинг иккалови ҳам ҳақ, иккови ҳам менинг тушкун тириклигимни, тоқат қилиб бўлмайдиган, чор-ночор аҳволимни бўяб-бекамасдан, табиий, ҳақиқий тасвирлаб берганди. Бу Чўл бўриси энди ўлиши, ўзининг манфур умрига ўз қўли билан нуқта қўйиши ёки ўзни янгидан намойиш этиб, унинг ўлимдек даҳшатли алангаси ҳовурида эриб, ўзгариши, ўз никобини олиб ташлаб, янгидан «мен»га айланиши керак эди. Эҳ, бу ҳодиса мен учун янги ва нотаниш эмасди, мен уни билардим, ҳар гал, тушкунликка тушган пайтларимда кўп марта ўз бошимдан кечиргандим. Ҳар гал, мана шу дилга фулу солувчи кечинма, воқеадан сўнг, ҳар гал ўз «мен»им майда-майда бўлиб, чил-чил синар, ҳар гал гирдобрлар исканжаси уни силтаб, қўзғатар ва вайрон қиласар, ана шунда ҳар гал ҳаётимнинг ардоқли ва ўзига хос суюкли бир бўлаги менга бевафолик қилиб, йўқлик қаърига сингиб кетарди. Бир гал ўз фуқаролик обрўйимни бутун мол-мулкимга қўшиб йўқотдим* ва шу пайтгача мен билан салом-алик қилиб юрадиганларнинг ҳам хурматидан воз кечишни ўрганишга мажбур бўлдим. Бошқа сафар эса бир кечада оилавий ҳаётим барбод бўлди; руҳий хасталаниб қолган хотиним мени уйдан ҳайдаб чиқариб, ҳузур-ҳаловатдан мосуво қилди. Севги ва ишонч кутилмагандан нафрат ва кескин курашга айланди-ю, қўшнилар менга ачиниш ва нафрат билан қарайдиган

* Ўз фуқаролик обрўйимни бутун мол-мулкимга қўшиб йўқотдим – биринчи жаҳон уруши даврида Германиядаги даромадлари инфляция оқибатида қадрсизланиб, Ҳессе бор-будидан айрилган эди.

бўлдилар. Ўшанда ёлғизликдаги, гарифликдаги ҳаётим бошланган эди. Орадан йиллар, аччик, оғир йиллар ўтгандан кейин, суронли танҳоликда, ўзимни не машаққатлар билан яна тутиб олиб, тарки дунёчилик омолидан иборат янги маънавий ҳаётимни изга солиб олганимдан сўнггина, мавҳум ақлий машқлар ҳамда қатъий тартибга солинган ўз-ўзини кузатишлар ва мушоҳадаларга берилиб, ниҳоят, турмушнинг муайян бир сокинлиги ва юксаклигига эришдим. Бироқ орадан кўп ўтмай, ҳаётимнинг бу йўналиши ҳам яна қайтадан инқирозга юз тутиб, ўзининг юксак, улуғвор маъно-мазмунидан бирданига маҳрум бўлди; энди мени дунё қайтадан яна ўзига тортар, фалати, ақлга сифмайдиган, йўл юриб чарчамайдиган узок, олис сафарлар ўзига чорлар, янги изтироблар, янги бурч, мажбуриятлар қайтадан куйилиб келарди. Ҳар гал мана шу никоб олиб ташланишидан, омол барбод бўлишидан олдин, шу даҳшатли, қўрқинчли бўм-бўшлиқ, сокинлик, мана шу ҳалокатли, ҳаддан зиёд сиқилиш, ёлғизлик, яккаланиш, меҳр-муҳаббатсизлик ва тушкунликнинг бўм-бўш ҳамда хувиллаган жаҳанамига дуч келардим. Мана, ҳозир ҳам уларга бақамти турардим, уларни яна қайта бошдан кечириб, қайтадан босиб ўтишимга тўғри келарди. Ҳаётимда рўй берган ҳар бир ана шундай руҳий изтиробдан пировардида нимадир ютардим, бир озгина эркинлик, руҳ, теранлик деймизми, лекин шу билан бирга, бир оз ёлғизлик, тушунмовчилик, кўнгил совиш ҳам бўлардики, буни инкор этиб бўлмайди. Мешчанлик тарафидан олиб кўрилганда, менинг ҳаётим, бир руҳий изтиробдан иккинчиси сари доимий пасайиш, инқироз, таназзул ҳамда меъёрий, мўътадил, мумкин, жоиз бўлган, тўғри ва соғлом нарсалардан тобора узоклашишнинг ўзи эди. Мен йиллар давомида қасб-хунарсиз, оиласиз, ватансиз, ёлғиз, барча ижтимоий гуруҳлардан ташқарида эдим, ҳеч ким мени севмас, кўпчилик менга шубҳали қарап, жамоатчилик фикри ҳамда ахлоқ билан доимий аянчли ихтилофда яшаб келардим; гарчи буржуа доирасида ҳалиям ҳаёт кечирсан-да, бу оламда бутун ҳис-туйфу ва тафаккурим

билин бегона эдим. Дин, Ватан, Оила, Давлат мен учун қадрсиз, аҳамиятсиз бўлиб қолганди. Илм-фан, гильдиялар,* санъатларнинг шуҳратпастлиги кўнглимни айнитарди; дидим, қарашларим, бутун тафаккурим туфайли бир вакълар қобилиятли, севимли инсон сифатида кўзга ташланган бўлсан ҳам, энди улар ёввойи, ҳувиллаган, бўй-бўш ва одамлар учун шубҳали туюларди. Агарда мен мана шу барча ўта ачинарли ўзгаришлардан, мабодо, бирор кўринмас ва аҳамиятсиз нарса ютиб олган бўлсан, бу менга жуда қимматга тушган ва гоҳо ҳаётим янада оғирроқ, қийинроқ, ёлғизроқ ва хавф-хатарга-да тўла-роқ бўларди. Дарҳақиқат, мени ҳамиша Нитшенинг кузги қўшиғи**, ундаги ўша тутунга ўхшаш ҳавоси оғир маъволарга бошлаб борадиган бу йўлнинг давомини ти-лашга энди менда ҳеч қандай асос йўқ эди.

Эҳ-а, мен бу, ўзининг кўп ташвишлар келтирувчи, нозик болалари тақдирини белгилаб берадиган кечинмаларни, ўзгаришларни билардим, ҳа, уларни жуда яхши билардим. Мен уларни мақтанчоқ, бироқ ови юришмас овчи ов қилиш босқичларини, кекса биржা ўйинчиси чайқовчиликнинг, фойданинг, шубҳа, иккиланишнинг, банкрот бўлиш — синишнинг босқичларини қанчалик яхши билса, шунчалик яхши билардим. Энди буларнинг барчасини яна бир бор бошдан кечиришим лозиммикин? Мана шу барча азоб-изтироб, мана шу барча хато ва кулфатларни, «мен»нинг тубанлиги-ю, унинг кераксизлигига нигоҳ ташлаш, ҳалок бўлиш олдидан мана шу барча даҳшатли кўрқувлар, мана шу барча ўлим ваҳимасини-я? Бунчалик кўп изтиробларнинг тақрорланмаслиги учун олдини олиб, шартта қочилса, осонроқ ва ақллироқ иш бўлмасмиди? Чўл бўриси китобчасида баён этилган «ўз жонига қасд қилувчилар» ҳақидаги фикр, албатта, у ёки бу тарзда бўлиши мумкин. Ҳеч ким менга

* Гильдия — Ўрта асрларда ғарбий Оврўпада йирик савдогарлар ёки хунармандлар бирлашмаси; шунингдек, революциядан илгариги Россияда савдогарларнинг давлатига кўра даражаси ёки табақаси.

** Нитшенинг кузги қўшиғи — Фрийдрих Нитшенинг «Куз» номли шеърига ишора.

тошкүмир гази, устара ёки тўппонча ёрдамида ўзим аччик қайфу-аламларини ҳақиқатан ҳам тез-тез ва етарли дара жада бошдан кечирганим жараённинг қайтадан тақоррланишига барҳам бериб кўя қолиш лаззатини тақиқлай олмасди. Йўқ, йўқ, барча иблисларда, бутун дунёда ҳам мендан ўлим титроғи-ла ўз-ўзи билан учрашувни ва яна янгитдан вужудга келиш, янги тажассумни бошдан кечириб кўришни талаб қила оладиган куч йўқ эди, буларнинг пировард мақсади тинчлик ва осойишталик эмас, балки фақатгина ўз-ўзини йўқ қилиш, янгитдан ўз-ўзини барпо этиш эди! Ўз жонига қасд қилиш ахмоқона, кўркокларча ва ожиз, нотавон, ношуд, шармандали ва иснод келтирадиган қутулиш йўли бўлганда эди — бу изтироблар тегирмонидан ҳар бир, ҳатто энг разил, қабих йўлни ҳам юракдан тиласа бўларди. Бу ерда энди олийжаноблик ва қаҳрамонликнинг бошқа театри йўқ эди, бу ерда мен арзимас, ўткинчи бир оғриқ-азоб билан ақл бовар қилмайдиган даражада алангаланаётган, ҳадсиз-худудсиз изтироблар ўртасида эдим, улардан бирини танлашим керак эди. Ўзимнинг шундай бир оғир, шундай телбанамо ҳаётимда жуда кўп марта олийжаноб Дон Кихот* бўлганман, ор-номусни ҳузур-ҳаловатдан, қаҳрамонликни эса, ақл-идроқдан афзал билганман. Бас энди, етар!

Нихоят, ўринга ётаётганимда дераза ойнасидан тонг, ёмғирли қиши кунидаги юракни сиқадиган, зик, оғир, дилгир тонг анграйиб қарай бошлаганди. Ўринга ётаётиб, қарорими ҳам қатъий ўйлаб қўйган эдим. Бироқ бутунлай фавқулодда ҳолатда, энди мудрок босаётган лаҳзада шууримнинг сўнгги сарҳадида, Чўл бўриси тўғрисидаги китобчанинг «мангуликка дахлдорлар» ҳақидаги ўша фалати жойи кўз олдимда яшин тезлигига «ярқ» этиб чақнади ва мени шу сонияда, кўхна мусиқа тинглаб, мангуликка дахлдорларнинг бутун вазмин, ёрқин, талабчан, қаттиққўл ва жиддий кулими сираб турувчи донишмандлигини бирга тотиб кўриш учун баъзан ва яқиндагина ҳам ўзимни уларга

* *Дон Кихот* — Мигел де Сервантес Сааведра (1547—1616) романининг қаҳрамони.

жуда яқин олиб юрганим билан боғлиқ «йилт» этган олис хотиралар чулғаб олди. Қандай тез пайдо бўлган бўлса, шундай «ялт» этиб чақнади, тез сўнди ва уйқуниг тоғдек юки елкамдан босиб, кўзим илинди.

Тушга яқин уйғониб, яна ўша бояги ҳолат эсимга тушди. Кичкинагина китобча ва менинг шеърим жавонча устида ётар, яқин орада кечган ҳаётимнинг алғовдалғови ичра қарорим очиқлик билан совуққина қараб турар, туни билан уйқу орасида янада вазмин ва қатъий бўлиб қолганди. Шошилиш керак эмас эди, менинг ўлим хусусидаги қарорим бир соатлик кайфият эмасди, у астасекин пишиб етилган, салмоқли, айнимайдиган мева эди, у тақдир шамолида енгил, майин тебранар, озгина туртки бўлса, тушиб кетиши ҳам мумкин эди.

Сафарга чиққанда олиб юриладиган зарур дори-дармонлар қутичамда оғриқларни қолдирадиган ажойиб бир восита бор эди — у жуда кучли қорадори препарати бўлиб, мен ундан аҳён-аҳёнда фойдаланаардим. Кўпинча, бир неча ойлаб эсимга ҳам келмасди; оғриқни қолдирувчи бу гиёхванд моддадан баданимдаги оғриқлар чидаб бўлмас даражада азоб берган пайтлардагина фойдаланаардим. Ундан ўзини ўзи ўлдириш учун фойдаланиб бўлмасди, буни мен анча йиллар муқаддам бир марта синаб ҳам кўрганман. Ўшанда, анчайин тушкунликка тушган пайтим эди, доридан бир талайини ютиб юборганман, у олти кишини ўлдиришга етарди, бироқ, барибир, мен ўлмай қолдим. Уйку босиб, бир неча соат хушсиз ҳолда ётганман, сўнгра қорнимда кучли чангак пайдо бўлиб, тортишиш-тиришишидан чала-ярим уйғониб, тирик қолганимга ўзим ҳам ишонмай, буттар ҳайрон бўлганман. Чала-ярим хушимга келиб, бутун оғуни қусиб, қайт қилгач, яна ухлаб қолганман. Эртасига кун ярмида тўла уйғонган бўлсан-да, бутун аъзойи баданим қовжираб қақшар, миям кизиб, бўшаб қолганга ўхшар, эс-хушим, хотирам ҳам жойида эмасди. Анчагина уйқусизлик ва ортиқча қорин оғриқларни хисобга олмаганда, заҳарнинг таъсири ўшанда умуман билинмаган.

Шундай қилиб, бу восита ҳам мүлжалимга түғри келмади. Мен энди ўз қароримга шундай бир бошқача шакл бердим: афюн воситасини қўллашга ўзимда эҳтиёж сездим дегунча, қутулишнинг бу қисқа йўли ўрнига каттарофини излашни, чунончи, тўппонча ўқи ёки устара ёрдамида бехавф ва ишончли ўлим топиб кўя қолишга ҳамиша шай бўлишим керак эди. Шу билан масала ҳал бўларди-қоларди. Чўл бўриси китобчасидаги ўша ўткир ҳазил аралаш рецептдан сўнг, эллик ёшимгача кутиб ўтириш мега жуда узок туюлди, чунки унгача ҳали яна икки йил бор эди. Бир йил ёки бир ой ичида, ё эртагаёқ бўладими – ишқилиб, бунинг учун энди эшиклар ланг очилган эди.

Бу «қарор» ҳаётимга кучли таъсир кўрсатиб, уни ўзгартириб юборди, дея олмайман. У мени дард-хасталикларга нисбатан бир қадар лоқайдроқ, қорадори ва вино истеъмол қилишда бир оз бегамроқ, чидаса бўладиган ҳолат сарҳадига бир оз қизиқувчан қилиб қўйди, шу холос. Ўша оқшомдаги бошқа кечинмалар, воқеаларнинг кучли таъсири эса кейинчалик ҳам сезилиб турди. Чўл бўриси ҳақидаги трактатни мен яна баъзан берилиб, миннатдорлик туйғуси-ла қайта ўқиб чиқардим. Бу билан ўзимнинг тақдиримни донолик, гоҳида эса трактатнинг мулоҳазали, мантиқийлигини менсимасдан, киноя билан бошқараётган кўринмас бир афсунгарни кўриб, пайқаб олаётгандек эдим. Назаримда, у ҳаётимнинг ўзига хос кайфияти ва кескинлигини сира ҳам тушуммаётгандек туюларди. Чўл бўрилари ва ўз жонига қасд қилувчиilar ҳақида унда нимаики ёзилган бўлса, барчаси жуда яхши, ақлли гаплар, шу билан бирга, зот, насл, тур, тоифалар ҳақидаги доно мавҳумот ҳам эди; бироқ менга, менинг шахсиятимни, қалб-кўнгил, табиатимни, дунёга бир марта келадиган ўз шахсий тақдир-қисматимни бу қадар қўпол тўр-тузоқ қамраб, ўз домига илинтириб ололмайдигандек кўринарди.

Бироқ ҳаммасидан кўпроқ, менинг хаёлимни черков деворидаги ўша галлюцинация^{*} ёки манзара, трактатда-ги шама-ишораларга мос келаётган, рақс тушаётган ўша маънодор нурли ёзув кўпроқ банд этган эди. Бунда менга кўп нарсалар ваъда қилинаётгандек кўринар, ўша ўзга оламдан келаётган овозлар мени фоят қизиқтириб қолган ва мен кўпинча бу ҳақда соатлаб ўйлаб, ўй суреб ўтирадим. Шунда ўша ёзувларнинг «ҳар ким учун эмас!» ва «Фақат жиннилар учун!» деган огоҳлантиришлари қулоғимга янада яққолроқ эшитилгандек бўларди. Жинни, бу албатта, мен ўзим ва «ҳар ким»дан анча узоқлашган ҳам ўзим эдим, агарда ўша овозлар менгача етиб келаётган ва ўша ўзга оламлар мен билан мулоқот қилаётган бўлсалар. Эҳ худо, мен ўзи ҳар кимнинг ҳаётидан, ақли расо, эсли-хушли одамларнинг туриш-турмуши ва тафаккуридан яқиндагина узоқлашдимми, яқиндагина ёлғиз, ва телба бўлиб қолдимми ўзи? Барibir, мен нидо, хитоб, чақириқни — жинниликдан, ақл-идрок, тўсиқ-ғов, танглиқдан, мешчанлиқдан халос бўлишга, қалб-кўнгилнинг, хаёлотнинг шиддат билан оқаётган қонунсиз оламига берилишга бўлган даъватни ич-ичимдан хис қилиб турардим.

Бир куни, ўша плакат кўтарган одамни излаб, кўчалар ва майдонларни, кўринмас дарвозали ўша девор ён-атрофларини кузатиб, кезиниб юрган эдим, Мартин шахри атрофида иттифоқо дағн маросимига дуч келиб қолдим. Тобут қўйилган улов ортидан оғир қадамлар билан аста, бир-бир босиб бораётган азадорларнинг афт-анголари-га қараб туриб, миямга бир фикр урилди: бу шаҳарнинг қаерида, бу ёруғ оламнинг қай чеккасида мен учун азиз бўлган инсон яшайдики, унинг ўлими мен учун оғир йўқотиш бўлса? Ва менинг ўлимимдан жилла қайфурадиган одам-чи, у қаерда яшаркин? Ҳа, дарвоҷе, севгилим Эрика бор-ку; бироқ биз бир-бишимиз билан анчадан бўён кам кўришардик, алоқаларимиз ҳам у қадар мустаҳкам

¹ Галлюцинация — йўқ нарсаларнинг кўриниши, эшитилиши ва сезилиши.

эмас эди, ҳозир эса ҳатто унинг қаердалигини ҳам билмасдим. У онда-сонда олдимга келиб турар ё мен уникуга борардим. Иккаламиз ҳам ёлғиз, оғир ва босиқ, бирбирига қалбан ва руҳий хасталик туфайли боғланиб қолган одамлар эдик, шунинг учунми, орамизда қандайдир алоқа, муносабат сақланиб қолган эди. Бироқ башарти у менинг ўлимимни эшиттүдек бўлса, ўзини қандай ҳис этаркин? Мен буни билмасдим. Ўз ҳис-туйғуларимнинг ишончлилиги хусусида ҳам бир нима дея олмас эдим. Бундай нарсалар тўғрисида бирон нима била олиш учун аввало, табиий, мўътадил ва имконли шароитда яшаш лозим бўлар эди.

Шу аснода, не кайфият билан, дағн маросими қатнашчилариға қўшилиб, барча майдачуидаларга эга бўлган, цементланган замонавий типик қабристонга бориб қолибман. Мархумни куйдиришмади — унинг тобутини ковланган оддий тупроқ ўрага қўйишди. Пастор* ва қолган бошқа барча қузғунлар, дағн этиш муассасаси ходимлари ўз вазифаларини адо этишга киришарканлар, маросимга юксак тантанаворлик ва мотам тусини беришга зўр бериб тиришаётганликларининг гувоҳи бўлдим, бироқ уларнинг ҳаракатлари худди театрнинг ўзини эслатар, хижолатдан ва риёкорликдан ерга киргудек бир ҳолатга тушишган, қора мундир (либос)даги бир киши бундан безовталанганини сезишиб шекилли, йиғилганларни ўлим салобати олдида тиз чўкиб, тавба қилишга яна зўр бериб ундей бошладилар. Аммо бу саъй-ҳаракатлардан наф бўлмади, ҳеч кимнинг қўзига ёш келмади, мархум барчага бирдай ортиқча, кераксиздек эди. Пастор ҳамон жамоатга «азиз диндош (насроний)лар» дея мурожаат қилиб, худони эсга олишга ундар, бунга жавобан савдогарлар ва новвой усталар ҳамда уларнинг хотинлари ишбилармон одамларга хос жиддий қиёфада титраб-қақшаб, жимгина олдилариға — ерга қараб туришар, уларнинг хижолатомуз ва каззоб юз-қиёфаларидан, шу ёқимсиз, зерикарли тадбир тезроқ тугай қолса эди, деган ўй-фикрни уқиб олиш қийин

*Пастор — протестант мазҳабидаги руҳоний.

эмасди. Нихоят, маросим тугади, олдинда турган икки киши нотиқнинг қўлини қисиб қўйди ва майсазор четидаги тўсиқ олдида тўхташиб, пойабзалларидағи марҳум қўйилган ердан илашган тупроқни тозалашди. Энди уларнинг юз-кўзлари яна одатдагидек инсонга хос қиёфа касб этган эди, биттаси менга ҳатто танишдек туюлди — у ўша плакат кўтариб олган ва қўлимга китобча тутқазган одамга ўхшаб кўринди.

Уни танидим дегунча, тез бурилди-да, энгалиб, кора шимининг почасини ҳафсала билан қайиришга тушди, сўнгра ёмғирпўшини қўлтиғига қистирганича, тезгина жуфтакни ростлаб қолди. Кетидан югурдим, қувиб етиб, унга бош иргадим, лекин у мени танимагандек бўлди.

— Бугун оқшом тадбир бўлмайдими? — сўрадим ундан, ва унга, бирон нарсадан боҳабар сирдош одамларнинг ўзаро имо-ишоралари янглиғ, кўз қисиб, имлашга уриниб кўрдим. Бироқ бундай мимик, юз мушакларининг маъноли ҳаракатлари, имо-ишоралардан иборат машқлар менга анча йиллардан бўён ёт эди. Менинг турмуш тарзим шундай эдики, ҳатто сал бўлмаса, гапиришни ҳам унутаётган эдим; шунинг учунми, қандайдир маъно англатиш ўрнига, афтиими аллақандай тентакларга ўхшаб, буриштирганимни сезиб қолдим.

— Оқшомги ўтиришми? — дўнғиллади ҳалиги одам ва менга бегонасираб қарапкан, деди:

— Зарур бўлса, «Чўл бургути»га* боринг, оғайни.

Мен унинг аниқ ўша одам эканлигига унчалик ишон-қирамадим. Ҳафсалам пир бўлиб, йўлимда давом этдим. Энди қаерга боришниям билмасдим, мен учун энди бошқа мақсад, интилиш, бурч-вазифа деган нарсалар қолмаганди. Ҳаёт кўнгилни айнитадиган даражада жонга теккан, анчадан бўён ўсиб, кучайиб келаётган ёқимсиз, жирканч нарса ўзининг юқори нуқтасига етганини, ҳаёт мени туртиб-суртиб, чеккага чиқариб қўйганини сезиб турардим. Коронфилик босган шаҳар бўйлаб дарғазаб ҳолда

* «Чўл бургути» — Цюрихдаги меҳмонхона номи.

юргилаб кетдим, менга шу дамда ҳамма нарсадан нам тупроқ ва мозор ҳиди келаётганга ўхшаб туюларди. Йўқ, йўқ, менинг гўрим устида бундай япалоқушлардан* биронтасиям турмайди, ридо-жуббасини кийволиб, «дин-дош (насроний)лар» дея ҳассос нутқлар ирод этмайди! Эҳ, қаёққа қарамай, қай тарафга фикр юритмайин, ҳеч қаерда мени на шодлик, на қувонч кутар, ҳеч қаердан менга садо-сас келмас, ҳеч нарса мени ўзига чорламас, ҳамма нарсадан айниган, бузилган ярим-ёрти мамнуниятнинг бадбўй ҳиди таралар, ҳамма нарса эскирган, тўзиган, сўлиган, шалвираган, ҳолдан тойганди. Эҳ, художон, бу қандайин кўргилик ўзи? Мен, файрати жўш урган ёш йигит, шоиртабиат, илҳом парсининг дўсти, жаҳонгашта, оташин хаёлпаст бўлсан-у, қандай қилиб бу ҳолга тушиб қолдим? Қайдан, қандай қилиб, секингина ва билдириласдан пусиб бошимга кела қолди бу кўргилик, бу фалажлик, менга бўлган барча нафрат ва мана шу барча ҳис-туйфулар таназзули, бу манфур ранжу аламлар, ҳувиллаган қалбнинг кимсасизлиги-ю, тушқунликнинг палид жаҳаннами, қайдан, қандай қилиб кела қолди?..

Кутубхона ёнидан ўтиб кетаётиб, мен ўзим илгари тоҳ-гоҳида суҳбатлашиб турадиган ўшгина профессорни учратиб қолдим. Уни бундан бир неча йиллар муқаддам, шу шаҳарда охирги марта бўлган пайтимда, ўшандада ўзим қизикиб шуғулланган соҳа – кўхна Шарқ афсоналари мавзууда гурунглашиб туриш мақсадида ҳатто, хонадонига ҳам кўп марта излаб боргандим. Олим ўзи менга пешвоз чиқди, у ўжар ва бир оз калтабин инсон эди, мени унинг олдига йўл-йўлакай кириб ўтганимни айтганимдан сўнггина таниди. У каминани зўр бир самимият билан кутиб олди ва мен унга аянчли, ночор ва фариб бир ҳолатда ярим-ёрти миннатдорчилик билдиридим. У курсанд бўлиб, жўшиб кетди. Бурунги суҳбатларимиздан айрим тафсилотларни ёдимга соларкан, кўп нарсага менинг ундов, даъватларим туфайли эришганини эътироф этиб, мени тез-тез эслаб туришини айтди; ўшандан

* Япалоқушлар – бу ерда: қовоғидан қор ёғадиган одамлар.

буён у билан ҳамкаслари ўртасида бундай қизғин ва сермахсул баҳс-мунозара, тортишувлар жуда кам, ахён-ахёндагина бўлганини ҳам гап орасида қистириб ўтди. Қачондан бери шаҳарда эканлигимни (камроқ кунни айтиб, уни алдадим), нега дарҳол уни излаб топмаганим сабабини сўради. Мен эса, тарбия кўрган, ўқимишли бу одамнинг бамаъни юзига қараб туриб, бўлаётган бу то-мошага кулгим қистади. Бироқ, барибир, ўзимни оч қол-ган итга қиёс этиб, бир мисқол ҳарорат, заррача эъти-роф ва меҳр-муҳаббатга мушарраф бўлганимдан бошим осмонга етди. Бундан таъсиrlаниб кетган Чўл бўриси Ҳарри ишшаяр, томоғи қуриб, оғзидан кўпиги оқар, ҳас-сослик хоҳиш-иродасига қарши ўлароқ, уни итоаткор, мўмин-қобил этиб қўйган эди. Ҳа, мен уни зўр бериб алдар, ўқиши-ўрганиш, билим орттириш мақсадида бу ерга келганим, шунинг учун йўл-йўлакай кириб ўтганимни, бунинг устига мазам йўқлиги, ўзимни унча яхши ҳис қилмаётганимни айтиб: ҳеч бўлмаганда бирор марта, уни албатта кўргани кирган бўлардим, дея ёлғон-яшиқ баҳо-налар билан кутулмоқчи бўлардим. Нихоят, у менга бу-гунги оқшомни уницида бирга ўтказишга самимий так-лиф қилган эди, мен йўқ дея олмай, миннатдорчилик или рози бўла қолдим, рафиқасига менинг номимдан салом айтишини сўрадим. Шунда зўр бериб, тиришиб сўзлага-нимга, мажбуран жилмайганимга ёнокларим қизариб, бўзариб оғриб кетди, чунки улар бундайин чираниш, кучанишга унчалик ўрганмаган, кўниkmаган эди-да. Ва мен, ҳайрон ҳам мамнун, хушмуомали ва файратли Ҳарри Ҳаллер кўчада туриб, очик кўнгил, калтабин кишининг бамаъни афт-ангoriga жилмайиб қараб турарканман, шундоқ ёнгинамизда бошқа бир Ҳарри иржайиб турган кўйи менинг ҳақимда, қанақанги беакл, тентак-телба, жин-ни, алдамчи ва каззоб оға бу ўзи, дея ўйларди, чунки ахир мен ўзим бундан атиги икки дақиқа олдин бутун лаънати дунёга тишларимни фижирлатиб, фазабимни соч-ган, энди эса, хурматли бир одамнинг мулоийим салом-алиги ва биринчи таклифиданоқ таъсиrlаниб, ўзимни

йўқотиб, эътиroz билдириш ўрнига кўниб, рози бўлиб, бир оз мойиллик, хайриҳоҳлик, кўнгил яқинлик, хурмат-эътибор, меҳрибонлик, илтифот ва самимиятдан лаззатланиш илинжида, ўзимни кўярга жой тополмай қолган эдим-да. Бир-бирига фавкулодда нохайриҳо бўлган иккала Ҳарри ана шундай ёнма-ён туришар, бир-бирини кузатишар, мазах қилишар, бир-бирининг олдида ерга тупуриб, бундай ҳолатларда ҳамиша бўлгани каби, ўз-ўзларига яна шундай савол ҳам беришарди: бу ўзи инсонга хос аҳмоқлик ёки заифликми, умумбашарий тақдир-қисматми ёки бу ҳассос худбинлик, иродаси сустлик, бўшанг-лақмалик, ҳис-туйгулар нопоклиги, икки ёқламалиги, мунофиқлиги ёхуд Чўл бўрисигагина мансуб бўлган ўзига хосликмикин? Бу разолат умумбашарий бўлса эди, у ҳолда менинг дунёга бўлган нафратим унга янги куч-кувват билан ташлана оларди; борди-ю, менинг шахсий заифлигим бўлса, унда ўз-ўзидан нафратланишнинг тантанасига сабаб бўлган бўларди...

Иккала Ҳаррилар ўртасидаги тортишув билан бўлиб, сал бўлмаса профессор ёдимдан кўтарилаёзибди; у менга бирдан яна ортиқча бўлиб туюлди ва ундан тез қутулишга шошилдим. У барглар тўкилган, шипшийдам хиёбон бўйлаб идеалистга хос бир оз ғалати юриш қилиб, диндорларга хос кўнгилчанлик билан кетиб бораркан, ортидан узоқ қараб қолдим. Ич-ичимда, бутун вужудимда шу дамда шиддатли жанг борарди, беихтиёр увушиб қолган бармоқларимни букиб-ёзиб, билдирмай ковлаб кетаётган подагра билан олишарканман, соат етти яримдаги кечки овқатга таклифга розилик бериб, хушмуомалик, илмий сафсалалар ва бегона оила баҳтини зимдан кузатиш мажбуриятидан иборат қанчалик ортиқча ташвиш, даҳмазани ўзимга орттириб олиб, нақадар аҳмоқлик қилганимни ич-ичимдан англаб турардим. Аччиқ устида уйга бордим-да, конъяк билан сувни аралаштириб урдим, устига подаграга қарши ҳапдорини ютдим-да, диванга чўзилиб, китоб ўқишига тутиндим. Ўн саккизинчи асрдан ҳикоя қилувчи, бениҳоя ўзига тортадиган,

кўлма-кўл бўлиб, ўқилаверганидан титилиб кетган китоб — «Софиянинг Мемелдан Саксонияга саёхати»ни бирпас ўқиганимдан сўнг, бояги таклиф тўсатдан яна ёдимга тушди. Соқолим олинмаганини эслаб, кийинишим кераклигини сездим. Худо билади, бу ташвишнинг менга ўзи нима кераги бор эди! Демак, Ҳарри, тур ўрнингдан, китобингни йифиштири. Юзингга совун сур-да, иягингни қонатиб қиртишлаб ол. Кийиниб, одамлар хузурига, уларнинг илтифотига сазовор бўлишга шошил! Юзимга совун сураётиб, бугун бир бегона киши қўйилган қабристондаги ўша тупроқ ўрани, унинг атрофида туриб зериккан ўша «диндош (насроний)лар»нинг кути учган, буришган афт-башараларини эсладим, бироқ бу энди сирам кулгили эмасди. Ўша ерда, ифлос тупроқ ўрада, ваъзхоннинг аҳмоқона сўзларида, мотамсаро жамоатнинг хижолатли қиёфасида, барча тунука, мармар тахта ва хочларни кўрганда, барча симдан ясалган сунъий ва барқ уриб очилган гулларда, нафақат ўша нотаниш одам, балки, менга ҳам шундай туюлди. Эртами, индинми, мен ҳам, йифилгандарнинг хижолатли ва сохта нигоҳлари остида шу тупроққа аралаштирилиб, кўимилиб тугардим, йўқ, йўқ, нафақат шугина, балки барча-барчаси, бизнинг муқаррар хаста, касалманд бўлган ва тез орада ўша ерда кўмиб ташланадиган барча интилишларимиз, барча маданиятимиз, барча имон-эътиқодимиз, барча ҳаёт қувончларимиз ва шодмонлигимиз ҳам ана шу тариқа ўз ниҳоясига етарди. Қабристон бизнинг маданий дунёмиз эди, бу ерда Исо пайғамбар ва Сукрот, Моцарт ва Ҳайдн, Данте ва Гёте ётардилар. Занг босган тунука тахталарга муҳрланган, шухрати сўнган яна қанчадан-қанча номлар бор эди бу ерда, уларнинг атрофида эса, агар ана шу ўзлари учун бир пайтлар муқаддас бўлган тунука тахталарга ишона олганларида, уни қиммат оладиган, мана шу ўтган дунё ҳақида қайfu ва тушкунликнинг озгина бўлса-да, ҳалол ва жиддий сўзини айта олишни қадрлайдиганлар хижолатли ва сохта нигоҳ билан тўпланишиб турадилар, энди уларга қабр тепасида

хижолат-ла ишшайиб туришдан бошқа иш ҳам қолмаганди... Жаҳл билан иягимдаги эски жойни билмай яна кесиб олдим, эски яра яна янги бўлди. Ҳозиргина қўйганим янги ёқани яна алмаштиришга тўғри келди ва бу ишларнинг барчасини нимага қилаётганимни ўзим ҳам билмасдим, чунки ўша таклиф этилган жойга сираям боргим келмаётганди. Бироқ Ҳаррининг бошқа бир бўлаги яна томоша қўйиб, профессорни ёқимтой йигит деб атади, одамлар даврасига, гап сотиш ва дилкашликка талпинди, профессорнинг келишган хотинини эслатди, савимий ва меҳрибон мезбонлар хузурида бир кеча меҳмон бўлиш тўғрисидаги фикрни ҳақиқатан ҳам фоят илҳомбахш деб топди ва энгагимга инглизча пластир (малҳамли мато) ёпиштиришимга, кийинишиимга ва ажойиб, кўркам бўйинбог тақишимга ёрдамлашворди ҳамда мени ўз кўнглимнинг кўчасига караб, уйда қолиш фикримдан юмшоққина қайтариб, боришга кўндириди. Айни пайтда ўйланиб ҳам қолдим: мана ҳозир кийиниб, кўчага чиқаман, профессорни кўргани бораман ва у билан озми-кўпми ёлғондакам ширин, ёқимли, хушомад, мақтов гапларни бир-биримизга тўкиб соламиз, гарчи буни ўзимиз хоҳламасак ҳам; жуда кўп одамлар ўзлари хоҳламаган ҳолда кун сайин, соат сайин шундай қиласидилар, шундай яшайдилар ва ҳаракатда бўладидилар, меҳмонга борадилар, сухбат қурадилар, ишхона ва идораларда иш (хизмат) соатларини шу зайлда зўрма-зўраки, енгил-елпи, юзаки, истар-истамас, ноилож ўтказадилар, бу ишларнинг барчасини машиналар ҳам худди шундай яхшилаб бажаришлари ёки аксинча, бажармасликлари ҳам мумкин эди; худди мана шу абадий давом этгувчи механика уларни, худди менга ўхшаб, ўз ҳаётини танқид қилишга, ўз аҳмоқлиги ва юзакилиги, саёзлиги, ўзининг қабих, мудхиш шубҳалилигини, ноумид дард-алам, ҳасратларини, ёлғизлигини билиш ва ҳис этишларига монелик қиласиди. О, улар, одамлар ҳақ эди, мендек бир гумрохга ўхшаб, тушкун кайфиятда бўшлиққа термилиб ўтириш ўрнига, қайгули, ўта аянчли механикага қаршилик кўрсатиш ўр-

нига шундай яшаб, доимо қандайдир «мухим» ишлари кетидан зир югуриб юришганларида, улар чексиз ҳақ әдилар. Мен бу саҳифаларда гоҳида одамларни писанд қилмай, уларнинг устидан кулсам, кимдир тағин нотўғри ўйламасин, мен зинҳор айбни уларга ағдармоқчи ё уларни айбламоқчи ёки ўз шахсий баҳтсизлигим учун уларни жавобгар қилмоқчи эмасман! Бироқ мен, шунчаликка бориб, таг-тубсиз зулматга, ҳалокат ёқасига бориб қолган эканман, гёё мен учун ҳам худди ўша механика ишлаётгандек, гёё мен ҳам абадий иш дунёсининг болаларга хос гўзал оламига мансубман, дея ўзимни ва бошқаларни ҳам алдашга уринаётганимда доимо ёлғон сўйлаб, ноҳақ ҳамда нотўғри йўл тутиб келаман!..

Кечакутнигидан ҳам зиёда, хўп ажойиб бўлди. Танишимнинг уйи олдига яқинлашаётиб, беихтиёр бир зум тўхтаб қолдим ва деразаларига назар ташладим. «Мана шу ерда», дедим ўзимга ўзим, бир одам яшайди ва йил сайин ўз ишини давом эттиради, матнларни ўқийди, уларга изоҳлар беради, олд Осиё ва ҳинд афсоналари ўртасидаги боғлиқликларни ўрганади, изланади, бундан ўзича мамнунлик туяди, чунки у ўз ишининг аҳамиятига, муҳимлигига, ўзи хизмат қилаётган илм-фанга куруқ билимга, уни тўплаб, ўрганишнинг аҳамиятига ишонади, чунки у тараққиётга, ривожланишга ишонади. У урушни кўрмаган, Эйнштейн туфайли рўй берган тафаккур асослари ларзаларини бошидан кечирмаган (у буни фақат математикларгагина тааллуқли, деб ўйлайди), ўз атрофига бўлаётган навбатдаги урушга тайёргарлик ҳаракатларида у ҳеч қандай «ёмон» нарсани кўрмайди, яхудийлар ва коммунистларни нафратга лойиқ деб ҳисоблайди, у жуда яхши одам, бепарво, паришонхотир, қувноқ инсон, ўзини катта тутади, қисқаси, унга ҳавас қилса арзийди.

Ўзимни қўлга олиб, ичкари кирдим. Мени оқ пешбанд таққан қиз – уй хизматчиси кутиб олди. Қандайдир ички сезгим орқали у шляпа ва пальтомни қаерга илишини ҳам олдиндан билиб турадим. У мени илиқ,

ёруғ хонага бошлади ва бир оз кутиб туришимни сўра-ди. Мен эса, дуо қилиш ё бўлмасам зифирча мизғиб олиш ўрнига, қандайдир ножиддий қизиқиш билан дуч келган биринчи буюмни қўлимга олдим. У кичкинагина рамкага солинган сурат бўлиб, думалоқ стол устида алақандай қаттиқ картон қоплама туфайли қийшайиб ётарди. Ўйма нақшли бу суратда шоир Гёте акс эттирилган, унинг жонли, чиройли ясаниб-таранган чехрасида ўша машҳур кўзлар чўғдек чақнар, мўйсафиднинг қиёфасидан сарой аъёнларига хос енгил пардозланган ёлғизлик ва фожиа-вийлик нафаси уфурар, буни тасвиirlаш учун рассом анчагина тер тўкканлиги сезилиб турарди. У бу ёвуз, жоҳил, иблис қариянинг ўзни тута билиш, дадиллик ва ҳалоллик, инсофлилик ва андишаликдан иборат бир оз профессор ёки артистларга хос қиёфасини унинг теран-лигига путур етказмай ифодалашга ва умуман, уни ҳақиқий келишган кекса жаноб сифатида акс эттира олиш-га муваффак бўлган эдики, бу расм энди ҳар бир фуқа-ро хонадонини зеб-зийнат бўлиб безай оларди. Эҳти-мол, бу сурат шу хилдаги барча расмлардан, файратли, тиришқоқ мусавиirlар мўйқаламига мансуб гўзал нажот-корлар, Апостол*, худога етишган азиз-авлиёлар, ақл-заковат, тафаккур, истеъод соҳиблари — даҳолар ва давлат арбоблари тасвиirlangan асарлардан ҳам қолиши-масди, балки унинг муайян юксак маҳорат билан ишлан-ганлиги мени шу қадар тўлқинлантириб юборгандир; нима бўлгандаям, ҳар ҳолда кекса Гётенинг бу такаббурона, қуруқ ва мағур тасвири мендек етарли даражада асабий-лашган, дарғазаб ва эзилган одамга шу заҳоти тақдирий ёқимсиз бир уйғунлик бузилган бўлиб кўзга ташланди-ки, бу менинг янгилиш бир жойга келиб қолганимни кўрса-тиб турарди. Бу ерда Чўл бўриларига ўрин йўқ, балки гўзал услубий ўхшатилган буюк классиклар, иллатнинг атоқли арбоблари эъзоз-хурматда эдилар.

* Апостол – хаворий (Исонинг афсонавий ўн икки шогирдла-ридан бири).

Хозир агар уй эгаси кириб келганды эди, унга жүяли баҳоналарни айтиб, ортга қайтвoriшим ҳам мумкин эди. Аммо шу дамда унинг хотини кўринди-ю, гарчи кўнглим олдиндан қандайдир дилхираликни сезиб турса-да, тақдирга тан беришдан ўзга чорам қолмади. Биз саломлашдик ва навбатдаги англашилмовчиликлар содир бўла бошлади. Аёл менинг кўринишим дурустлигини айтиб кутлади, мен эса шу дамда, охирги учрашувимиздан буён ўтган йиллар ичидан анча қариб-қартайганимни ўзим яққол хис этиб турардим; у мен билан қўл бериб сўрашгандаёқ, бармоқларимдаги лаънати подагра буни ёдимга солганди. Кейин суюкли хотинимнинг ҳол-аҳволини сўради, шунда мен унга, аёлим ташлаб кетганини, ажрашганимизни айтишга мажбур бўлдим. Шу пайт профессор кириб келиб, жонимизга оро кирди. У ҳам мен билан самимий саломлашди ва ҳукм суроётган фалати ҳамда кулгили вазият ўзининг энг ажойиб ифодасини топди. Унинг қўлида қандайдир газета бор эди — у обуна бўлган бу нашр милитаристлар ва уруш оловини ёқувчилар партиясига мансуб рўзнома эди. Мен билан сўрашиб бўлгач, у газетага ишора қилиб, алланималарни сўзлай кетди. Англашимча, рўзномада менга адаш бўлган аллақандай публицист Ҳаллер ҳақида ёзилган бўлиб, бу ярамас, беватан дарбадар кайзерни мазах қилганмиш, буям етмагандек, у яна шундай фикрни ҳам билдирибди, гўё унинг ватани урушнинг юзага келишида бекордан-бекорга душман мамлакатлардан ҳам кўра кўпроқ айбдор бўлиб қолаётганмиш. Бу ўзи қанақанги аҳмоқ йигит бўлдийкин-а! Мана, у оларини олибди. Тахририят бу бузғунчини боплаб таъзирини бериб, шармандасини чиқарибди. Қараса, бу гаплар мени мутлақо қизиқтирмаляпти, шунданми, сухбатимиз бошқа мавзуга кўчди, бироқ, барибир, иккаламиз ҳам шу топда «қани энди ҳозир ўша ифлос шу ерда бўлсайди», деган хаёл билан банд эдик, аслида эса, ўша ифлос худди менинг ўзим эдим. Хўш, энди ортиқча шовқин солиб, одамларни безовта, бехузур қилишнинг нима кераги бор! Бунинг ўрнига ичимда ним кулиб қўя қол-

дим, бироқ бугунги оқшом ёқимли, күнгилли бўлишидан умидимни узгандим. Ўша лаҳза ҳали ҳам аниқ эсимда. Чунончи, профессор ўша ватан хоини Ҳаллер ҳакида гапираётган лаҳзада, мендаги ҳов ўша дафн маросими машмашсидан бошлаб йиғилиб, тобора кескинлашиб бораётган оғир руҳий кайфият ва тушкунликнинг чидаб бўлмас ҳиссиёти тобора тўпланиб, шунақанги исканжага олдики, асти қўяверасиз; натижада қорнимнинг пастки қисмида кучли оғриқ пайдо бўлиб, нафасим бўғилди, кўз олдим қоронfilaшиб, даҳшатли тақдир-қисматимни англагандек бўлдим.

Сезиб турардим, нимадир мени пойлар, аллақандай хавф-хатар ортимдан таъқиб этиб келарди. Бахтимга шу чоқ, таом тайёр бўлганини маълум қилишди. Ошхонада ўтириб, қаттиқ ботмайдиган бирон гап айтмоқчи ёхуд сўрамоқчи бўлиб уриндим, қаёқда, аксига олиб, одатдагидан кўра кўпроқ овқат еб қўйиб, ўзимни тобора бехузур, ночор ҳис эта бошладим. Эҳ, худойим-еъ, дердим яна ўзимга ўзим, намунча биз бу қадар тиришамиз, бирбиirimизга сир бермай, сипогарчилик қиласиз?.. Ками-нанинг фалаж қилувчи таъсириданми ё уйда аввалроқ бирон кўнгилсиз воқеа ўтганми, мезбонлар ҳам ўзларини мутлақо яхши ҳис қилмаётганликлари, сир бой бермай ўтиришлари ўзларига ҳам малол келаётгани аникойдин сезилиб турарди. Менга аниқ нарсалар ҳакида саволлар беришар, уларга эса тўғри ва очик жавоб қайтариб бўлмасди. Шу тариқа ўзимни ўзим бутқул, бошдан-оёқ, кетма-кет алдай бошладим, натижада оғзимдан чиқаётган ҳар бир сўздан кўнглим айнирди. Нихоят, сухбатдошларимни чалғитиш мақсадида, уларга бугун гувоҳ бўлганим – дафн маросими ҳакида сўзлаб бердим. Бироқ афсуски, юморга бўлган уринишим, ҳаракатларим уларга ёқинқирамади, аксинча кайфиятини бузди, чамамда. Гапларимиз ҳам энди бир-бирига сира қовушмас, бир-бири миздан тобора узоклашиб борардик, ичимдаги Чўл бўриси эса тишларини иржайтириб, мазахомуз куларди. Овқатдан сўнг учаламиз ҳам оғзимизга толқон солгандек, батамом жимиб қолдик.

Биз яна ўша биринчи хонага қайтиб кирдик, қаҳва, ароқ ичгани, балки энди шу нарса бизларнинг руҳимизни бир оз кўттарармиди... Аммо бу ерда яна ўша маликушшуарога, гарчи энди унинг сурати бир четга — комод* устига олиб қўйилган бўлса-да, кўзим тушиб, у яна хаёлимни банд этди. Ич-ичимдан ботиний огоҳ этгувчи овозларни сезиб, пайқаб турган бўлишимга қарамасдан, уни яна қўлимга олиб, бақамти бўлдим, у билан очиқласига «баҳслаша» бошладим. Вазият қалтис, мен энди бутун вужудим билан шундай бир туйфуга берилгандимки, нима қилиб бўлса ҳам мезбонларнинг қўнглини топиб, гап оҳангини мослаб муомала қилишим, ё бўлмаса, улар билан алоқа-муносабатни бутунлай узиб, ҳозир орани очиқ қилиб қўяқолишим керак эди.

— Шунга аминманки, — дедим мен, — Гётенинг қўриниши ҳақиқатан ҳам бундай бўлмаган! Қаранг, қандай такаббурона ва олийжаноб қиёфа, муҳтарам жамоат билан бўлаётган эркаланиш-навозишни салобат-виқор ҳамда етуклик сиртидаги гўзал ҳассосликнинг бундайин олами! Албатта, унга кўп эътиroz билдириш мумкин, менинг ҳам бу кекса мактанджоқ-шуҳратпастга эътиrozларим кўп, бироқ уни бундай тасвирлаш, йўқ, йўқ, бу энди ҳаддан зиёд, ўта ошириб юборилган.

Уй бекаси қаҳванинг борини идишларга қуийб чиқди-да, тезгина хонани тарқ этди, унинг юз-кўзларида чуқур изтироб аломатлари зохир эди. Шунда хожаси ярим хижолатомуз, ярим гинахонлик билан Гётенинг ушбу сурати рафиқасига қарашли эканлиги, уни ўзгача меҳр билан, ўзига хос ардоқлаб-эъзозлашини айтиб берди. Башарти, холисанилло ҳақ бўлган тақдирингизда ҳам, дарвоқе, бу қадар кескин фикр билдирмасангиз бўларди, деди у.

— Гапингиз тўғри, — дея юзландим унга, — бироқ афсуски, ҳар доим имкони борича кескин тарзда ифода изҳор қилиш, бу менинг одатим, балки иллатимдир, дарвоқе, Гёте ҳам ўз замонасида доимо шундай қилган экан.

* Комод — кийим-кечак турадиган яшикли жавон.

Колаверса, бу шириңсұхан, одамшаванда, мешчан оқсусык Гётега кескин, чин, ҳақиқий, түғридан-түғри ифода керак ҳам бўлмагандир. Мен Сиз ва аёлингиздан узр сўрайман — у кишига, яхшиси, мени шизофренияга чалинган экан, дея қолинг. Бир йўла менга ижозат ҳам берсангиз, энди сизлар билан хайрлашсам.

Уй сохиби яна айрим эътиrozларини билдирапкан, ўша гурунгларимиз нақадар гўзал ва мароқли бўлғанлигини сўзлай бошлади, ҳа, менинг Митрас ва Кришна* хусусидаги фараз, тахминларим ўшанда унда чукур таас-сурот қолдирган, бугун ҳам у шундай сухбатлардан умидвор бўлиб турган экан... ва ҳоказо. Мен бундай самимий сўзларига жавобан унга миннатдорчилик билдиридим ва, афсуски, Кришнага бўлган қизиқишим худди илмий гурунгларга нисбатан ҳоҳиш-истакларим сингари бутунлай сўнганилиги, бугун ҳам унга анча-мунча ёлғон гапирганилигим, масалан, шаҳарда бир неча кундан бўён эмас, балки анча йиллардан бери яшаётганилигим, бироқ ўзим ёлғиз турмуш кечираётганим ва доимо ўта ёмон кайфијатда юришим, подагра билан хасталанганим, иккиламчи, кўпинча кайф ҳолда бўлишим сабабли яхши инсонларнинг хонадонларига энди муносиб эмаслигимни айтиб, бор дардимни тўкиб солдим. Яна, биратўла орани очик қилиб қўяқолиш ва уларнинг хонадонини ёлғончи сифатида тарк этмаслик мақсадида, ҳурматли жанобга, мени бугун жуда-жуда хафа қилиб қўйганини ҳам айтиб ўтишимга тўғри келди. У ахир бир реакцион газетанинг Ҳаллер фикрларига нисбатан олим одамга муносиб бўлмаган, балки бир ишсиз, бекорчи зобитга хос бўлган ўша аҳмоқона, ўтакетган қайсар нуқтаи назарини «ўзиники» қилиб олганди-да. Бироқ бу «йигит», бу дарбадар, беватан кимса Ҳаллер айнан ўзим эдим. Ўша, фикрлашга қодир бир қанча инсонлар кўр-кўрона, васвасага берилиб, ҳадеб янги уруш йўлида зўр беравериш ўрнига,

* Кришна — санскрит тилида «қора» демакдир. Афсонавий ҳинд подшоси, унинг қаҳрамонликлари ва ишкий саргузаштлари ҳакида кўпгина ривоятлар тўқилган.

ақл-идрок билан иш тутиб, тинчликсеварлик тарафдорлари бўлишганларида эди, мамлакатимиз ва жаҳонда аҳвол янада яхшиланармиди. Илоё, худойим ўз паноҳида асрасин!

Шундай қилиб, ўрнимдан турдим. Гёте ва профессор билан хайрлашдим, ташқаридаги кийим илгакдан нарсаларимни олиб, жўнаб қолдим. Вужудимдаги ичи қора бўри эса овози борича увиллар, иккала Ҳарри ўртасида зўр томоша бўлиб ўтарди. Чунки, бу кўнгилсиз оқшом аччиғланган профессордан кўра камина учун кўпроқ аҳамиятга эгалиги менга дарҳол аён бўлган эди; унинг учун бу кўнгил қолиш ва кичкинагина нохуш воқеа бўлган бўлса, мен учун сўнгти бор муваффакиятсизлик ҳамда жуфтакни ростлаш, мешчанлар, одобли, ахлоқлилар ва олимлар олами билан хайрлашув, Чўл бўрисининг узилкесил фалабаси эди. Шу билан бирга, у қочоқ ва мағлубнинг хайр-маъзури, ўз-ўзига таслим бўлиш изҳори, устун бўлмаган, бетаскин ва фамгин видолашув ҳам эди. Мен ўзимнинг ўтмишдаги оламим ва ватаним билан, мешчанлик, урф-одатлар, олимлик билан хайрлашарканман, баъйни ошқозонидаги тўнғиз гўшти қовурдоғидан ҳосил бўлган ярадан азоб чекаётган одам ҳолатига тушдим. Чироқлар қаққайиб турган кўча бўйлаб дарғазаб ҳолатда югуриб кетдим, шу дамда ғоят аччиғланган ва қаттиқ қайғуга чўмган эдим. Бу ўзи бугунги, эрталабдан кечгача, қабристондан тортиб, профессор хузуридаги машмашага қадар қандай кун бўлди-а? Шунақаям бетасалли-бетаскин, шармандали, бехосият ва беҳузур кун бўладими! Хўш, нимага? Нима учун? Яна шундай кунларни бошдан кечириб, шундай «шўрва»ларни охирига қадар татиб кўришдан маъни бормикин? Йўқ! Бундай майнавозчиликка шу бугунги оқшом нуқта қўйганим бўлсин. Уйингга боргин-да, Ҳарри, ўзингни ўзинг бўғизлаб қўяқол! Бас, шунча кутганинг ҳам етар.

Бахтсизлик, кулфат таъқиб этган мен бечора шўрлик кўчалар бўйлаб, у ёқдан-бу ёққа зир югурадим. Албатта, бамаъни одамларнинг оқсуякларга хос бўлган зеб-зийна-

тини ерга уриб, камситганим яхши иш бўлмади, бу аҳмоқлик ва адабсизликнинг ўзгинаси эди, бироқ мен зинҳор бошқача йўл ҳам тутолмасдим, мен бу беозор, боадаб, аммо алдамчи, ёлғондакам ва соҳта ҳайтга ортиқ тоқат қилолмасдим. Энди менинг танҳоликка, ёлғизлиқка ҳам ортиқ бардошим қолмагандек туюлар, ўз жони-жаҳоним ҳам шу қадар кўнглимга урган, шу қадар кўнглимни айнитардики, буни тасвирилашга тил оқиз эди. Ўз дўзахимнинг бўм-бўш, хувиллаган, ҳавосиз маъвоси узра бўғилиб, зўриқиб, ўзни ҳар ён урарканман, миямда бир савол чарх уради: «Ўзи бу ёруғ дунёда яна бирор најот бормикин?» Йўқ, најот йўқ эди. Оҳ, отажоним, онажоним, эҳ, олисларда қолган ўт-олов ёшлигим, эй, унинг бағридаги минглаб қувончлар, ҳайтимнинг мазмуни ва орзу-мақсадлар! Барчасидан менга ҳеч вақо, ҳаттоти, армон ҳам қолмаганди, фақатгина азоб ва нафратли бўлдим, холос. Шу дамда ҳаёт, тириклиқ, яшашга мажбурлик менга жуда ҳам оғир туюлиб кетдики, умримда ҳеч қачон бунақа ҳолатга тушмаган эдим.

Шаҳар атрофидаги бир кўримсизгина қовоқҳонада бир оз тўхтаб, тин олдим, сув ва конъяк ичдим, сўнг яна ақлдан озган одамга ўхшаб, Эски шаҳарнинг узукюлуқ, қинғир-қийшиқ тор кўчалари, хиёбонлар, темир йўл шоҳбекати жойлашган майдон бўйлаб юргилаб кетдим. Бутунлай жўнаб кетаман, тамом, ўйладим ўзимча ва шоҳбекатга кириб, деворда осиғлиқ поездлар жўнаш жадвалига термилдим, ўзимга келволиш учун озроқ шароб ичдим, эс-хушимни йифиб олишга уриндим. Юрагимга қўркув соладиган шарпа менга тобора яқинлашиб, кўзимга янада аниқроқ қўрина бошлади. У — ётоғимга қайтиш эди, тушкунлик олдидағи ўзни хотиржам тутишга, тақдирга тан беришга мажбурлик эди! Кўчада неча соатлаб тентираб юрмайин, барибир, ундан эшигимга, китоблар тўла столимга, тепасида маҳбубам сурати осиғлиқ диванга қайтиб боришдан, ўша кутилган лаҳзадан қочиб кутулолмасдим, чунки устарани олиб, ўзимни ўзим шартта бўғизлаб қўяқолишим керак эди. Бу манзара кўз

олдимда тобора аниқроқ, равшанроқ намоён бўла бошлади. Юрагим дукиллаб урар, барча қўрқинчлар даҳшати: ўлим ваҳшатини сезиб, ҳис қилиб турадим! Ҳа, ўлимдан ниҳоятда қўрқардим. Гарчи бошқа чорам қолмаган, изтироб, нафрат ва тушкунлик теварак-атрофимда устма-уст қалашиб ётган бўлса-да, гарчанд мени энди ўзига тортадиган, жалб эта оладиган, менга умид ва кувонч бахш этадиган ҳеч нарса қолмаган эса-да, барибир, ўз-ўзимни қатл этиш олдидан сўнгги лаҳзада ўзимга ўзим шириллатиб тиф тортиб юбориш даҳшати керагидан ортиқ таъқиб этарди!

Дилимга даҳшат солиб, мени ўлгудек қўрқитиб турган бу нарсадан қутулишнинг бошқа бирон йўлини то-полмасдим. Борди-ю, агар тушкунлик билан юраксизлик ўртасидаги курашда бугун ҳам қўрқоқлик ғолиб чиқадиган бўлса борми, унда эртага ва ҳар куни тушкунлик яна олдимда кўндаланг турар, ўз-ўзимдан жирканишим боис, у янада кучайиб кетаверарди. Бу ишни охирига етказмагунимча, пичокни қўлимга олиб, яна улоқтириб юбораверардим. Ундан кўра, бўладиган ишнинг шу бу-гуноқ бўлақолгани маъқул! Ўзимга ўзим, худди қўрқитилган ёш болага гапираётгандек сўзлардим, бироқ болакай гапга қулоқ солмай, қочиб кетди, чунки у яшашни истарди. Титраб-қақшаб, яна шаҳар бўйлаб кезиндим, ётоқхонам атрофларида узоқ тентираб юрдим, хаёлимда эса ҳамон уйга қайтиш фикри чарх урар, дам қайтгим келса, дам оёғим тортмасди. Ана-мана деб, бир майхонада қолиб кетдим. Биринчи қадаҳни бўшатдим, бўлмади, сўнг иккинчисини... ана ундан кейин яна мени ўша мақсад, ўша устара, ўша ўлим даҳшати таъқиб эта бошлади. Ўлгудек чарчаб, хориб, ўриндиққа чўқдим, кейин фаввора четига ўтдим, йўл чеккасидаги тош устига ўтириб, юрагим ураётганини тинглай бошладим, пешонамдаги терларни артиб, яна йўлга тушдим, хаёлимда эса дам ўлим ваҳшати, дам ҳаёт соғинчи...

Шу алфозда кеч оқшом чўкканда, узокроқ ҳамда менга унча таниш бўлмаган шаҳар атрофида жойлашган

мехмонхона-ресторанга кириб бордим. Ресторан дera-
залири ортидан сершовқин рақс мусиқаси янгарди.
Кираверишда, дарвоза пештоқида эски пешлавҳа кўзга
ташланди: «Чўл бургути». Ичкарида бўш, озод, эркин,
бежилов тун хукм сурар, одамларнинг бўғиқ ғовур-ғувур
овозлари эшитилар, димоққа тутун, шароб ҳиди урилар,
орқадаги залда эса рақс мусиқаси айни авжиди эди. Мен
олдинги — кираверишдаги хонада тўхтадим, бу ерда
оддий, факирона кийинган кишилар ўтиришар, айни пайт-
да орқа тарафда — бал залида эса башанг кийинган
қиёфалар кўзга ташланарди. Хона мижозлар билан тўла,
тирбанд эди. Тиқилинчда буфет столига яқин бориб
қолибман. Деворга ўрнатилган ўринидикда келишган, ран-
ги оппоққина бир қиз ўтиради, эгнидаги балга мўлжал-
ланган декольте* кўйлаги ўзига ярашган, сочига тақиб
олган гули сўлиб қолганди. Қиз яқин бораёттанимни
кўриб, менга очиқ чехра ва эътибор билан назар ташла-
ди, майнин жилмайганича бир оз сурилиб, жой берди.

— Мумкинми? — сўрадим қиздан.

— Албатта, — деди қиз. — Сен ўзинг кимсан?

— Раҳмат, — деб, қизнинг ёнига ўтиредим. — Уйга
боришга сира иложим йўқ, боролмайман, боролмай-
ман, мен шу ерда, агар ижозат берсангиз, сизнинг ол-
дингизда қолсам. Ростини айтсам, уйга сирайм боргим
йўқ.

Қиз, мени тушунгандек, бош силкиди, шунда унинг
пешонасидан қулоқларига тушиб турган жингалак соч-
ларига кўзим тушди, соchlаридаги сўлиб қолган гул —
камелия эди. Ичкарида мусиқа қулоқни қоматга келти-
радиган даражада янгарар, официантлар берилган буюрт-
маларни баланд овозда эълон қилишар, кимларнидир
чақириб, зир югуришарди.

— Қолақол, — деди қиз менга ёқимли овозда. —
Нега энди уйингга бора олмайсан?

* Декольте — аёллар кўйлагининг чукур ўйилган ёқаси ва шун-
дай ёқали кўйлак.

— Боролмайман. Уйда мени... йўқ, йўқ, боролмайман, жуда қўркиб кетаяпман.

— Ундей бўлса, шу ерда қолақол. Қани, аввал кўзой-нагингни бер-чи,вой-бў, ҳеч нарсани кўролмай қолибсан-ку. Қани, дастрўмолчангни бер. Хўш, энди нима ичамиз? Бургунд виносига қалайсан?

Қиз кўзойнагимни олди, артди, шундагина мен унинг оппоқ юзини, қип-қизил бўялган лабларини, оч кулранг кўзларини, сип-силлиқ пешонаси ва қулоқларига тушиб турган калта силлиқ жингалак зулфини аниқ кўрдим. У менга мулоимлик билан бир оз киноюмуз разм солиб тургач, шароб буюрди, мен билан қадаҳ уриштириди ва бирдан пойафзалимга кўзи тушиб қолди.

— Вой худойим-ей, сен ўзи қаерлардан келаяпсан? Шу туришингда, нақ Париждан пиёда келаётган одамга ўхшайсан-а. Балга бундоқ келмайди-да.

Мен ҳеч нима демадим, бунинг ўрнига жимиб, кулиб кўяқолдим, қиз эса гапида давом этди. У менга жуда ёқиб қолди, бундан ўзим ҳам таажжубда эдим, чунки бунақанги ёш қизлардан шу пайтгача ўзимни иложи борича узоқроқ олиб юрар, кўпинча уларга ишонқирамай қаардим. У эса менга шунақанги ширин муомалада бўлардики... шунақа авайлаб-аярдики, бу менга керак эди, баъзан эса шунақанги пичинг қилардики, бу ҳам менга зарур эди. Қиз мен учун бутерброд буюрди, қадаҳни қўйиб узатди, шошмасдан, бир қултумдан ичишимни тайинлади. Шундан сўнг, итоаткорлигимни мақтай кетди.

— Асл шоввоз йигит экансан, — деди у кўнглимни кўтариб, — бирорга оғирлигинг тушмас экан. Менга қара, гаров ўйнаймизми, ўзиям бирорга қулоқ солмай кўйганингта анча замонлар бўлгандир-ов?

— Ҳа, топдингиз, гаровда ютдингиз. Буни қаёқдан билақолдингиз, ақлим етмай турибди.

— Бу қийин эмас. Қулоқ солиш ҳам худди ейиш-ичишдек гап. Кимки ундан узоқ мосуво бўлган бўлса, унинг учун бундан яхшироқ нарса бўлмайди. Менга энди бажонидил қулоқ солсанг керак-а, шундайми?

— Албатта, жоним билан. Сиз ҳамма нарсани билар-канси.

— Ахир, буни ўзинг айтиб турибсан-ку. Балки, дўстим, уйингда сени кутаётган ва сен бунчалик кўрқаётган нарсанинг нима эканини ҳам айтиб берарман. Аммо, буни ўзинг яхши биласан, бу ҳақда гапириб ўтиришнинг ҳожати ҳам йўқ, шундай эмасми? Бўлмағур нар-са! Ё бирор ўзини осади, осадиган бўлгандан кейин осади, бошқа иложи йўқ, бунинг эса, ўзига яраша сабаблари бўлади. Ёки яшаб кетади ва бу, албатта, ўз ҳаёти ҳақида ўйлашга мажбурилигидан. Ҳаётда ҳеч нарса ўз-ўзидан, бесабаб, жўнгина бўлмайди.

— О! — қичқириб юбордим мен, — қанийди энди шундай бўлса. Инсоф билан айтадиган бўлсам, мен ўз ҳаётим учун қўлдан келганча ҳаракат қилдим, бироқ бундан ҳеч қандай наф бўлмади. Эҳтимол, ўз-ўзини осиш кийиндир, билмадим. Бироқ яшаш ундан-да қийин, ундан-да оғирроқ! Бу — ёлғиз худонинг ўзига аён.

— Шошмай тур, ҳали кўрасан, бу жуда осон, оддий иш. Мана, бугун бошлаб олдик, сен кўзойнагингни артиб олдинг, единг, ичдинг. Энди эса, шимингни чўтка-лаймиз, ботинкангни тозалаймиз, буям керак. Ундан кейин иккаламиш шиммига* рақс тушамиз.

— Ана, кўрдингизми, — дедим қизишиб, — мен ҳақ эканман! Агар бирор амрингизни бажо этолмай қолсам, ғоят таассуфга тушган бўлардим. Лекин ҳозир айтганингизни уddaлаш қўлимдан келмайди. Нега десангиз, мен на шиммига, на вальс, на полькага ўйнай оламан. Умрим бино бўлиб, рақсга тушишни ўрганмаганман. Ана кўрдингизми, ҳамма нарса, сиз айтмоқчи, жўнгина эмас экан.

Гўзал қизнинг қип-қизил қилиб бўялган лаблари чиройли жилмайди, бошини сарак-сарак қилди, болаларни кига ўхшаб тараалган соchlари енгил силкинди. Кизга қараб туриб, уни бир пайлар, болалик чоғларимда ўзим илк бор учратган ва севиб қолган Роза Крайслерга ўхшатдим, бироқ у қўнғир тусли, қора сочли қиз эди. Бу

*Шимми — рақс тури (ингл.).

нотаниш қиз менга кимларни эслатди, билолмадим, аммо у нимаси биландир олис ёшлигимни, узоқ болалик йилларимни ёдимга соглан эди.

— Секин, секин! — деди қиз. — Демак, рақсга түшолмайсан? Умуман билмайсанми? Ҳаттоки, вонстепни* ҳам? Яна худони ўртага солиб, ҳаётда кўп ҳаракат қилганман дейсан-а! Шу ерда ёлғон гапирдинг, оғайни, бу сенинг ёшингда ярашмайди. Ҳаттоки, рақсга тушолмас экансан, сен қандай қилиб, ҳаётимда ҳаракат қилганман, дея оласан?

— Кўлимдан келмагандан кейин нима қилай? Ҳеч қачон ўрганиб кўрмаган бўлсам...

Қиз кулди.

— Бироқ ўқиши ҳамда ёзишни ўргангансан, шундайми? Ҳисоблаш ва яна эҳтимол, лотин ҳамда фаранг тилларини, иннайкейин, шунга ўхшаш яна алламбалоларни ҳам ўргангандирсан-а? Сен билан гаров ўйнайман, мактабда ўн ёки ўн икки йил ўқигансан, мумкин, талаба ҳам бўлгандирсан, эҳтимол, ҳатто докторлик унвонинг ҳам бордир, балки хитой ё испан тилларини ҳам биларсан? Ё йўқми? Шундай... Лекин бир неча соатгина вақт ажратиб, рақс дарсига қатнашиб, буниям ўрганиб қўймагансан. Шунга қолганда, сенда озгина вақт ва маблағ бўлмаган! Яша!..

— Ота-онам... — чайналиб, оқладим ўзимни, — мени лотин ҳамда юон тилларига ва бошқа нарсаларга ўқитган. Аммо рақсга ўқитишмаган, бизда бу нарса урф бўлмаган, ота-онамнинг ўzlари ҳам ҳеч қачон рақс тушишмаган.

Қиз менга совуқ назар билан қараб қўйди, унинг юзкўзларидаги нимадир менга яна ёшлик чоғларимни эслатди.

— Шунаقا дегин, демак, ота-онанг айбдор экан-да! Бугун оқшом «Чўл бургути»га келаётганингда ҳам, улардан рухсат сўрадингми, ишқилиб? Айт, сўраганмидинг? Улар аллақачон оламдан ўтиб кетишган, демоқчисан,

* Вонстеп — рақс тури (ингл.).

шундайми? Агар ёшлигингда итоаткорлик юзасидангина рақс тушишни ўрганишни хоҳламаган бўлсанг, унда майли. Ўшандаям мўмин-қобил бола бўлганингга ишонгим келмайди. Хўш, кейин-чи? Кейинги ўтган йиллар ичida нималар билан шуғулландинг?

— Эх, очигини айтсам, ўзим ҳам билмайман. Ўқидим, мусиқани ўргандим, китоблар мутолаа қилдим, асарлар ёздим, сайру саёҳатларга бордим.

— Ана, ҳаётда хўб ажойиб нарсаларни кўрибсан-ку! Демак, сен ҳамиша қийин ва мураккаб нарсалар билан шуғуллангансан, оддий нарсаларни эса, умуман ўрганмагансан. Нима, вактинг бўлмаганми? Ё қизиқмаганмисан? Ҳа майли, Худога шукурки, мен сенинг онанг эмасман. Лекин шунча яшаб, ҳаётдан ҳеч нарса топмадим, дея нолишинг... йўқ, йўқ, бунақаси кетмайди!

— Илтимос, уришманг, — ялиндим қизга. — Биламан, мен ўзи жинниман.

— Нима, нима! Кўйсанг-чи, бунақа гапларингни!.. Сен ҳечам жинни эмассан, жаноб профессор, сендан сирайм жинни чиқмайди! Сен шунчаки ўта ақллисан, нақ профессорнинг ўзисан. Кел, нондан яна озгина еб ол! Қолганини кейин гапириб берасан.

Киз мен учун яна нон буюрди, бутерброд устига озгина туз, бир оз горчица* сепиб, ўзига ҳам бир бўлакча кесиб олди, менга «ма, ол, есанг-чи», дея манзират қилди. Нондан олдим. У нима деса, барчасини, рақсдан ташқари барча айтганларини қилишга тайёр эдим. Кимгadir қулоқ солиш, бўйсуниш, кимнингдир ёнида ўтириш, тағин у сен ҳақингда сўраб-суриштиrsa, сенга буйруқлар берса, сени койиб турса, буларнинг барчаси шунақангি хуш ёқардики, асти қўяверасиз... Агар профессор ёки унинг хотини шу ишни бундан бир неча соат олдин қилгандарида эди, булар менга насиб этмаган бўлармиди. Ҳа, майли, қайтанга шу яхши бўлди, йўқса, кўп нарса йўқотган бўлардим.

* Горчица – хантал ўсимлигининг уруғи ва ундан тайёрланган зиравор.

— Ўзи отинг нима сени? — сўраб қолди қиз тўсатдан.

— Ҳарри.

— Ҳарри дейсанми? Гўдак боланинг исми-ку! Сочингдаги бирда-ярим оқни ҳисобга олмаганда, нақ гўдакнинг ўзисан-да, Ҳарри! Ҳали ёш боласан, сенга қарайдиган одаминг бўлиши керак. Рақс ҳақида-ку, энди бошқа гапирмайман. Лекин, сочларингни қара! Хотин-потининг, севгилинг ҳам йўқми дейман?

— Хотиним бор эди, ажрашганмиз. Севгилим эса бор, лекин у бу ерда яшамайди. Уни кам кўраман, бир-бirimiz билан унча чиқишолмаймиз.

Қизтишлари орасидан секингина ҳуштак чалиб юборди.

— Хотин туриш бермаганидан феъли ёмон эркакка ўхшайсан. Лекин очиғини айт: бугун оқшом ўзи нима бўлди? Нега бунчалик руҳинг тушиб кетди? Бирор билан уришдингми? Ё каттароқ пул ютқазиб қўйдингми?

Бу саволларга жавоб бериш мен учун ғоят мушкул эди.

— Кўрмайсизми, — аста гап бошладим, — ўзи арзимаган нарсайди. Бир профессор, лекин ҳеч қанақа профессор эмасман, уйига таклиф қилувди, аслида бормаслигим лозим эди, чунки одамлар билан ўтириб, ҳангомалашишдан анча узоқлашиб кетганман, бунақанги нарсалар аллақачонлар эсимдан ҳам чиқиб кетган. Уйига кирганимдаёқ ўзи кўнглим сезувди — шляпамни илаётганимда уни яна дарров қайтиб олсан керак, деган фикр хаёлимдан ўтувди. Кирсам, профессорникида — стол устида бир расм турган экан, ўзи бир бўлмағур сурат, шу кайфиятимни бузди денг...

— Қанақа расм? Нега бузади кайфиятингни? — гапимни бўлди қиз.

— Ха, у расм Гёте, билсангиз, шоир Гётенинг сурати экан. Лекин шуниси борки, у суратда аслида ўзи қандай бўлса, шундай тасвириланмаган — буни умуман, ҳеч ким аниқ билмайдиям, чунки у бундан юз йиллар илгари

ўлиб кетган. Аллақандай замонавий рассом Гётени қандай тасаввур қылған бўлса, ўзича шундай тасвирилаган кўйган. Шу сурат денг, шунақанги ёқимсиз кўриниб, жаҳлимни чиқардики, билмадим, буни тушуна оларми-кинсиз?

— Жуда яхши тушунаман, нега тушунмас эканман. Кани, давом эт-чи.

— Профессор билан илгаритдан муросамиз келишмайди; у деярли барча профессорлар сингари ўта «ватанпарвар», уруш пайтида халқни бадном қилишда зўр бериб иштирок этган — албатта, тўғри иш қилаяпман, деб ўйлаган. Мен эса, урушга мутлақо қаршиман... Аслида, ўша суратга қарамасам, эътибор бермасам бўларкан.

— Ҳа-я, нима қиласардинг қараб.

— Шундай-ку-я, лекин Гётега ачиниб кетдим-да, у менга жуда, жуда суюкли, қолаверса, улар ҳам ўзимга ўхшаган одамлар бўлса, улар ҳам Гётени менчалик севсалар, худди менга ўхшаб тасаввур қилсалар керак, деб ўйладим, шундай бўлса-ю, улар манави дидсиз ишланган, бўяб-бежалган сохта расмни зўр, ажойиб деб мактаб, суратдаги рух Гётенинг рухига батамом зид эканини сезишмаса, пайқашмаса... бу ҳам майлия, бироқ шу билан бу одамларга нисбатан барча ишончу дўстлигим ҳамда яқинлик ва ўзаро бир бутун ҳис-туйфуларим ҳам бирданига барбод бўлди, сўнди, ўчди-кетди... Аслида-ку, бирбиirimiz билан у қадар қалин дўст ҳам эмасдик. Шундай қилиб, мени ҳеч ким тўғри тушунмаганига ачифим келиб, якка-ёлғиз эканлигимдан хафа бўлиб кетдим-да. Энди тушунгандирсиз?

— Тушунмай ўлибманми, Ҳарри. Хўш, кейин-чи? Кейин нима бўлди? Ўша сурат билан бошларига боплаб туширдингми?

— Йўқ, сўкиниб чиқиб кетдим, холос. Уйга бормоқчи эдим, лекин...

— Лекин сен эси йўқ болани юпатишга, ё бўлмасам, уришиб-койишга ойинг бўлмаган... Менга қара, Ҳарри, сен ҳалиям бола экансан. Сенга раҳмим келади.

— Албатта, буни тушунаман, ўзим ҳам тан оламан.

Қиз менга шароб қуиб узатди. Ҳақиқатан ҳам у менга нисбатан худди онаизордек муюмала қиласади. Орасира унга разм солиб қўярдим, у ёш ва гўзал эди.

— Демак, — яна гап бошлади қиз, — Гёте бундан юз йиллар мукаддам ўлиб кетган, Ҳарри эса уни ҳамон жуда-жуда севади. Унинг ташқи кўриниши қандай бўлган-лигидан қатъи назар, ўзича ажойиб бир тарзда тасаввур қиласади, бунга Ҳарри ҳақли ҳам, шундай эмасми? Бироқ Гётега қизиқадиган, уни ўзича тасаввур қиласадиган рассомнинг бунга ҳаққи йўқ, профессорнинг ҳам ҳаққи йўқ, умуман, ҳеч кимнинг ҳаққи йўқ, чунки бу Ҳаррига тўғри келмайди, у бу нарсалар билан муроса қилолмайди, аксинча сўкиниб, қочиб кетишга мажбур бўлади! Агар у ақлли бўлганида эди, рассом ва профессор устидан шунчаки кулиб қўяқолган бўларди. Агар у жинни бўлганида, Гётеларини уларнинг юзига қараб улоқтираради. У эса, ҳали ёш бола эмасми, бунинг ўрнига чопиб уйига бориб, ўзини осмоқчи бўлган. Мен сенинг тарихингни билиб бўлдим, Ҳарри. У ҳақиқатан ҳам фалати, кулгили экан. Туриб, туриб, кулгим қистайди. Шошма, бунчалик тез ичмагин! Бургунд шароби секин ичилади, тез ичсанг ичининг ёндириб юборади. Сенга ҳамма нарсани айтиб туриш керак экан-да, гўдагим.

Қизнинг ҳозирги нигоҳи худди олтмиш ёшли гувернант* аёлнинг қаттиққўл, жиддий ва талабчан қиёфасини эслатарди.

— Албатта, — дедим мен мамнунлик билан, — менга ҳамма нарсани айтиб туришингиз керак.

— Нимани айтишим керак сенга?

— Нимани истасангиз, шуни.

— Яхши, мен сенга бир нарсани айтай бўлмаса.

Мана, ўзинг бир соатдан бери эшитиб ўтирибсан, мен сени сенсираяпман, сен бўлсанг, менга ҳамон сизлаб гапирайпсан. Ҳамон лотин, юнон тилларингта ўхшатиб, ҳаммаёқни мураккаблаштириб юборяпсан! Қиз бола сени

* Гувернант — тарбиячи, мураббий (фр.).

сенсирадими, қиз күнглингга ўтиридими, сен ҳам унга бемалол «сен» деб гапираверишинг керак. Ана, буниям ўрганиб олдинг. Энди, иккиламчи гап: ярим соатча бўлди, исминг Ҳарри эканини билиб олдим. Буни, албатта, ўзингдан сўраб билдим. Лекин сен менинг исмимни билишга қизиқмаяпсан.

— О, нега энди, мен буни жон деб билмоқчийдим.

— Кеч қолдинг, болакай! Энди кейинги сафар учрашганимизда сўрарсан. Бугун, барибир, сенга буни айтмайман. Хўш, энди мен бориб, бир оз рақс тушмоқчиман.

Қиз ўрнидан турмоқчи бўлаётганини кўриб, руҳим тушиб кетди. Мени ёлғиз қолдириб, кетиб қолса-я, деб қўрқдим, чунки у ҳолда ҳаммаси илгари қандай бўлса, шундайлигича қолиб кетавериши мумкин эди. Бир зум тўхтаган тиш оғриғи тўсатдан кучайгандек, вужудимни қўрқув ва даҳшат чулғаб олди. Эҳ, худойим-ей, мени нималар кутаётганини наҳотки унута бошлаган бўлсам! Бирон кор-ҳол юз бермасин-да, ишқилиб...

— Тўхтанг, тўхта! — дедим қизга илтижо билан. — Кетма! Майли, истаганингча рақс туш, лекин узоқ қолиб кетма, тез кел, тез келгин, хўпми?

Қиз кулиб ўрнидан турди. Бўйи новча бўлса керак, деб ўйлагандим, йўқ, қадди-қомати ўзига ярашган экан. Шу туришида у менга яна кимнидир эслатди, лекин кимлигини билолмай, яна бошим қотди.

— Аниқ келасан-а?

— Келаман, аммо бир оз ҳаяллашим ҳам мумкин, бир соатми, ярим соатми, аниқ билмайман. Менга қара, кўзларингни юмгин-да, озгина ухлаб ол, бу сенга керак.

Қиз кетди, юбкачаси тиззамга енгил тегиб, сирғалиб ўтди. Кетаётиб, кўлидаги думалоқ кўзгучага бир қараб олди, қошлирини чимириб, упа сурадиган момикча билан иягини артди-да, рақс зали томон йўл олди. Ён-атрофимга разм солдим: бегона, нотаниш одамлар чекиб ўтиришарди, мармар стол усти тўла пиво, чинқироқ овоз-

лар, қийқириқлар ҳаммаёқни тутиб кетган, ёнгинамизда эса гумбурлаб рақс мусиқаси янграрди. Менга ухла деганини қаранг, вой боласи тушмагур-ей, уйқумизни ҳам ўйлайди-я, бизларда уйқу нима қиласи, қуш уйқумиз-ку! Тағин бу ерда, столда ётиб ухлаб бўларканми, бунинг устига пиво қуйилган идишларнинг шақир-шуқурини айтмайсизми; ичимлиқдан озгина ҳўплаб, чўнтағимдан сигара олдим, гугурт излаб, у ёқ-бу ёғимни ковлаштиридим, бироқ чекким келмади, сигарани стол устига қўйдим. «Кўзларингни юмгин-да...» Бундай теран, мулоийм, она-ларга хос бўлган овозни бу киз қаердан олганикин, худо билади. Бу овозга қулоқ солиш, бўйсуниш, итоат қилиш мен учун нақадар ёқимли эди, бунга ўзим амин бўлдим. Кўзларимни итоаткорона юмид, бошимни деворга суждим. Лекин ухломадим, чунки юзлаб кучли ва қаттиқ овозлар қулоқни қоматга келтиради. Шу ерда ухламоқчи бўлганимга ўзимча кулиб, ундан қўра бориб, раксхонага бирров назар ташлай, ахир у ерда менинг гўзалим ракс тушяпти-ку, дея ўрнимдан тураман десам, қаёқда, санфийвериб роса чарчаган эканманми, яна жойимга ўтириб қолдим. Беихтиёр кўзим илинибди. Оналарга хос буйрукни бажо қилиб, ухлаб қолибман, туш кўрибман. Тушимда: эски урф бўйича жихозланган қандайдир қабулхонада ўтирган эмишман, ниманидир кутаётганмишман. Англашимча, қайсиdir жаноби олийлари ҳузурига ташриф буюрибман, у олий зот Гёте жанобларининг ўзлари экан. Энг ёмони, бу ерга шахсан эмас, балки аллақайси журналнинг мухбири сифатида келганим эди. Бу эса мени ноқулай ахволга солар, қайси иблис бу ишни қилганига сира ақлим етмасди. Бунинг устига, худди шу заҳоти қаердандир пайдо бўлиб, оёқларимга ўрмалаб чиқишига уринаётган чаён ҳам мени ташвишга солар, гарчи ўзими у митти газандадан ҳимоялаб, силкитиб юборган бўлсам-да, барибир, унинг қаердалигини билолмаганимдан, қўлим билан у ер-бу еримни пайпаслаб кўришга ҳам ботинолмасдим.

Мени яна безовта қилган нарса шу эдики, Гёте ўрнига адашиб, тағин Матиссон* хузурига келиб қолмадим-микин, деб ҳам ўйлардим, чунки уни тушимда Бюргер** билан алмаштириб юбориб, «Моллига аталган шеър»ни*** уники деб хаёл қилибман. Шундай бўлса ҳам, Молли билан учрашувга жон-жон деб рози бўлардим, тасаввуримда у ажойиб, гўзал, нафис, мусиқавий ва мағрибона эди. Ишқилиб, ўша лаънати таҳририят топширифи билан келмаган бўлсам бўлди-да! Мендаги ноҳуш кайфият бора-бора кучайиб, аста-секин Гётега ҳам юқа бошлади, ҳозир унга ўзимнинг бор шубҳа-гумонларим-у, ўпка-гиналаримни тўкиб солишга тайёр эдим. Ўзиям қабулмисан қабул бўладиган бўлди-да! Чаён бўлса, гарчи шундоққина биқинимда яшириниб, менга хавф солиб турганига қарамасдан, энди у қадар ёмон туюлмас, аксинча, менга яхшилик аломати бўлиб кўринарди. Эҳтимол, у Молли билан боғлиқ бўлиб чиқар, балки унинг ўзига хос даракчиси ёки белгиси, аёлларга хос назокатнинг гўзал, гуноҳи азимларнинг хатарли тамғасидир, ким билади. Мабодо унинг номи Вулпиус**** эмасмиди?.. Шу пайт эшик очилиб, хизматчи кўринди-ю, мен ўрнимдан кўзғалиб, ичкари кирдим.

Қаршимда кекса Гёте кичкинагина бўлиб, ўта расмий ва жиддий қиёфада туарар, мумтоз шоир кўксидаги муносиб равишда орден юлдузи порларди. Важоҳатидан ҳали ҳам тобида, ҳамон қабул маросимлари ўтказар, ҳануз дунёни Ваймардаги ажойибхонасидан туриб, назорат қиласарди. У менга кўзи тушиши билан, бошини худди қари қарғага ўхшаб бир силкиб, тантанавор оҳангда гап бошлади:

— Хўш, сиз ёшлар, биз ва бизларнинг саъй-харакатларимиздан унчалик хурсандмасга ўхшайсизлар, шундайми?

* *Матиссон* — Фрийдрих фон Матиссон (1761–1831), шоир.

** *Бюргер* — Готфрийд Август Бюргер (1747–1794), шоир.

*** *Моллига аталган шеър* — Г.А.Бюргер қаламига мансуб.

**** *Вулпиус* — Гётенинг рафиқаси — Кристиана Вулпиус (1765–1816)га ишора.

— Худди шундай, — дедим мен, унинг вазирларга хос ўткир нигоҳига аранг дош бераб. — Биз, ёшлар ҳақиқатан ҳам Сиздан норозимиз, муҳтарам жаноб. Сиз, зоти олийлари, бизга ўта тантанавор, ўта мағур ва мақтанчоқ кўринасиз ҳамда у қадар очик кўнгил, самимий эмассиз. Энг муҳими: очик кўнгил, самимий эмассиз.

Кариянинг вазмин боши бир оз олдинга юкинди, жиддий қимтилган лабларида билинг-билинмас табасум пайдо бўлди. Буни кўриб, юрагим дукиллаб ура бошлади ва «*Коронгилек босиб келди аста кўкдан*»* деган сатрлар ёдимга тушди. Наҳотки ана шу сатрларни мана шу инсон ижод қилган, илк бор ана шу лаблар пичирлаб айтган бўлса... Шу лаҳзада ўзимни бутунлай ожиз ва мағлуб ҳис эта бошладим, иложи бўлса, ҳозир унинг олдида, ҳатто тиз чўкишга ҳам тайёр эдим. Аммо ўзимни сипо тутиб туравердим. Нихоят, унинг ним табассум аралаш овози эшитилди:

— Э-э, сизлар ҳали мени носамимийликда айблаяп-сизларми? Бу гапларингизга унчалик тушунолмадим! Мундок тушунтириброк айтсаларингиз бўлмайдими?

— Бўлади, жоним билан, бажонидил. Сиз, Гёте жаноблари, барча улуғ даҳолар сингари инсон ҳаётининг бутун шубҳалилиги-ю умидсизликларини: яъни лаҳзанинг улуғворлиги ва унинг ночор таназзули, ҳис-туйфуларнинг гўзал юксаклиги эвазига қундалик ҳаётнинг диққинаfasлиги билан бақамти бўлиш, Рух салтанатига бўлган оташин соғинч, у билан табиат маъсумлиги ўртасида худди шундай оташин ва илоҳий муҳаббат-ла йўғрилган абадий ҳаёт-мамот кураши боради, бу бўшлиқ ва муҳмал оламдаги даҳшатли муаллақлик, фонийлик ва бебақоликка маҳкумлик, абадий номукаммаллик, власваса ва юзакилик — қисқаси, одамзоднинг бутун ночорлигини, тумтароқлилигини ҳамда юракни ёндирадиган, ични куйдира-диган тушқунлигини кўриб-билиб, теран ҳис этгансиз. Сиз буларнинг барчасини кўра-билатуриб, ўзингизни ҳам

* «*Коронгилек босиб келди аста кўкдан*» — Гёте шеъри.

баъзан бунга дахлдор деб ҳисоблагансиз, шундай бўлсада, бутун онгли ҳаётингиз давомида бунга зид равишда ишонч-эътиқод ва некбинлик ҳақида ваъзхонлик қилиб келдингиз, бу билан ўзингизни ва бошқаларни ҳам гўё маънавий-руҳий саъй-ҳаракатларимизнинг маъно-мазмуни борлигига ва уларнинг бардавомлигига ишонтирмоқчи бўлдингиз. Сиз теранлик тарафдорларини, тушқунликка тушган ҳақиқат овозларини рад этдингиз ҳамда уларни худди Клайст ва Бетховенда бўлганидек, ўзингизда ҳам бўйиб, йўқ қилдингиз. Сиз ўтган ўнлаб йиллар мобайнида буни гўё билим тўплаш, ёзув-чизув, тўпламлар ва хатларни жамлаш деб кўрсатиб келдингиз. Сизнинг Ваймарда ўтган бутун умрингиз ўзингиз ниқоб сифатида маълум услубга сола оладиган, табиатни илохийлаштириш учун Сиз мўмиёлаб кўя оладиган лаҳзани агадийлаштириш йўли эди гўё... Биз Сиздан ўпкалаётган носамимийлик мана шу.

Кекса махфий маслаҳатчи лабларида табассум билан кўзларимга тикилган кўйи ўйланиб қолди. Сўнг мени лол қолдириб, сўради:

— Унда, Моцартнинг сеҳрли флейтаси* ҳам роса нафратингизни кўзғатса керак?

Унга эътиroz билдиromoқчи эдим, аммо у сўзида давом этди:

— Сеҳрли флейта ҳаётни ажойиб, дилрабо, бебаҳо кўшик қилиб тасвирлайди. Ўткинчи ҳис-туйгуларимизни гўё агадий ва илохий нарсалардек, кўкларга кўтариб мақтайди, бу билан у на жаноб фон Клайстга, на жаноб Бетховенга кўшилади, балки некбинлик ҳамда ишонч-эътиқодни тарғиб ва тараннум этади.

— Биламан, биламан буни! — қичқирдим фазаб билан. — Худо билади, шу сеҳрли флейта миянгизга қаёқданам келиб қолди, ахир у мен учун дунёда энг азиз нарса-ку! Лекин Моцарт саксон икки ёшга кирмаган ва шахсий ҳаётида Сизга ўҳшаб бардавомлик, тартиб-интизом, расмий мартаба, мансаб талаб қилмаган! У ҳеч

* *Флейта* – найсимон мусиқа асбоби.

қачон кеккаймаган, кибру ҳавога берилмаган! У ўзининг илохий тароналарини куйлаб, камбағалликда ўтди ва бу дунёдан эрта кетди...

Нафасим тиқилиб, энтикиб қолдим. Ҳозир ўнта сўз билан мингта нарсани айтвориш мумкин эди, лекин пешонам терлаб, ўзимни беҳол сездим.

Гёте эса очик чехра билан деди:

— Саксон икки ёшга кирганим, эҳтимол, кечириб бўлмас ҳолдир. Бироқ мен ҳам бундан, сиз ўйлаганчалик, масрур бўлаётганим йўқ. Сиз ҳақсиз: бардавомлик талаби ҳамиша вужудимни чулғаб келган, мен доимо ўлимдан кўркиб яшаганман ва унга қарши курашиб келганман. Ўлимга қарши кураш, муқаррар ва ўжар, қайсар турмуш тарзи шундай бир майл-истакки, барча буюк инсонлар шундан келиб чиқиб иш тутишган, яшаган, деб ўйлайман. Пировардида, барибир, ўлим ҳақ эканлигини эса, навқирон дўстим, саксон икки ёшимда шу нарса билан лўнда килиб исботладимки, мен гўё мактаб боласи бўлиб ўлгандекман. Ўзимни оқлаш керак бўлса, яна шуни ҳам айтишим мумкинки, менинг табиатимда болаларга хос нарсалар кўп бўлган: ҳар нарсага қизиқувчанлик, ўйинга ҳавас, вақтни беҳуда сарфлашга мойиллик ва ҳоказо. Ўйиннинг бир мартаси етарли эканини англа, тушуниб етгунча эса, орадан шунча умр ўтиб кетибди...

Бу гапларни айтәтиб, қувлик билан, очиқдан-очик беҳаё қулимсиради ва унинг қиёфаси катталашиб, юзкўзларидаги жиддийлик, безовта ва бесаранжом викор аллақаёқларга йўқолди. Ён-беримиз ҳам энди куй ва оҳанглар билан тўла бошлади. Гёте кўшиқлари, Шубертнинг «Ўрмон ва водийларни тўлдирдинг яна», Моцартнинг «Бинафша»си янграрди. Гётенинг юзи қип-қизил, ўзи ёшариб кетган, кулиб, очилиб-сочилиб, дам Моцартга, дам Шубертга оға-инидек ўхшаб кетар, кўксидаги юлдуз эса гўё қир чечакларини эслатар, унинг ўртасида сарик наврўзгул барқ уриб очилиб турарди.

Қариянинг саволларим ва айбловларимга бундай ҳазиломуз тарзда чап бериб, устомонлик қилиши, тўғри-

си, менга маъқул келмади. Унга таънаомуз қараётганимни кўриб, бир оз энгашди-да, болаларнига ўхшаб кетадиган оғзини кулоғимга яқинлатиб, аста шивирлади:

— Бўтам, кекса Гётени бу қадар жиддий қабул қилма. Марҳум кексаларни жиддий қабул қилиб бўлмайди, акс ҳолда уларга нисбатан ноҳақлик қилган бўламиз. Биз — мангаликка даҳлдорлар бизларни жиддий қабул қилишларини ёқтирамаймиз, аксинча, ҳазил-хузулни ёқтирамиз. Жиддийлик, болам, замоннинг ишидир; у, агар мен сени сотмоқчи бўлсан, ўшандা, замонга ортиқча баҳо бериб юборилгандагина юзага келади. Мен ҳам бир пайтлар замонга ортиқча баҳо бериб юборганман, шунинг учун юз ёшга кирмоқчи бўлганман. Абадиятда эса, кўриб турибсанки, вақт деган тушунча йўқ; абадият — биргина ҳазил учун етиб ортадиган лаҳзадир, холос.

Ҳақиқатан ҳам бу одам билан энди жиддий гаплашиб бўлмасди. У қувноқ ва мамнун, эпчил ва чаққон дикиллаб ўйнار, кўксидаги юлдуздан наврўзгул дам пориллаб учиб тушар, дам кичраярди ва ахийри шу тарзда кўздан ғойиб бўлди. Рақсга тушаркан, қариянинг ҳаракатларини кўриб туриб, бу одам ҳар қалай рақс тушишни ҳам ўрганган экан-да, деган ўй ўтди хаёлимдан. У ажойиб ўйнарди... Шу пайт кутилмаганда чаённи, йўқ, кўпроқ Моллини эсладим ва Гётедан сўрадим:

— Айтинг-чи, мабодо Молли ҳам шу ерда эмасми?

Гёте қаттиқ кулиб, столи томон юрди, унинг ғаладонини очди-да, ундан қимматбаҳо чарм ёки баҳмал духобадан ясалган кутичани олди, уни очиб, кўзларимга яқин олиб келиб кўрсатди. Кутичада тўқ баҳмал устида кичкинагина, мафтункор, хушбичим аёл оёғи жимиirlаб турар, у тиззадан бир озгина эгилган, нозик, бежирим оёқ панжалари томон ингичкалашиб кетганди.

Мен қўлларимни узатиб, жимитдеккина оёқни олмоқчи бўлдим, у мени ўзига бутунлай мафтун этган, бармоқларим тегар-тегмас, ўйинчоқقا жон киргандек бехосдан ҳаракатланди ва миямда, бу чаён бўлмасин тағин, деган шубҳа уйғонди. Гёте бу чуқур саросимани, ҳирс билан

кўркув ўртасидаги сескантирувчи номутаносибликни тушунгандек, ҳатто ўзи шуни хоҳлаб, мақсад қилиб кўйгандек кўринди. У жозибадор чаёнчани юзимга теккудек яқин олиб келди, уни истаётганимни, бироқ даҳшатга тушиб, ундан тисланаётганимни кўриб, бундан роса хузур қилаётандек туюлди. Гўзал ва хатарли нарса билан жиғимга тегаркан, у яна бирдан бутунлай қари, қартайган, мункиллаган чолга айланди. Гўё минг ёшга киргандек, соchlари қордек оппоқ нуроний мўйсафиднинг сўлғин чехраси секин, унсиз кулди, қарияларгагина хос бўлган бу чуқур маъноли кулги унинг ич-ичига сингиб кетди...

Уйғонганимда, тушим эсимдан чиқиб кетган эди, кейинроқ бирдан яна эсимга тушди. Шундай сершовқин мусиқа ва фала-ғовур ичида, стол атрофида ўтириб, бир соатча ухлабман, бунга ишонгим ҳам келмасди. Мен учун азиз бўлган қиз олдимда, бир қўлини елкамга қўйганича турарди.

— Менга икки ёки уч марка бериб тур, — деди қиз, — у ёқда ул-бул олиб едим.

Кизга катмонни узатдим. У бир оздан сўнг қайтиб келди.

— Хўш-ш, ана энди сен билан пича гаплашиб ўтиришим мумкин, ундан кейин эса, яна боришим керак, ваъдалашганимиз.

Кўрқиб кетдим.

— Ким билан? — сўрадим дарҳол.

— Бир жаноб билан, Ҳарривой. Биласанми, у мени Одеон-Барга* таклиф қилган.

— О, мени ёлғиз ташламасанг бўларди-да...

— Бунинг учун ўзинг мени олдинроқ таклиф қилишинг керак эди. У сендан кўра аввалроқ отни қамчилаган. Ҳечқиси йўқ, пулинг ёнингга қоладиган бўлди. Одеон-Барни биласанми ўзи? Ярим кечадан сўнг фақат шампан бўлади, оромкурсилар, негрлар капелласи, э, жуда зўр.

* Одеон-Бар – Щюриҳдаги «Cafe Odeon», 1911 йилдан бери мавжуд. Мазкур қаҳвахона бир замонлар ёзувчилар, мусавиirlар ҳамда муҳожирлар учрашиб, дийдорлашадиган жой сифатида машҳур бўлган.

Буларни мен илгарироқ ўйламаган эканман, афсус.

— Эх, — дедим ўтинч билан, — ҳалиям сени ўзим таклиф қилиб күяқолсам бўлмайдими? Ахир, биз энди дўстмиз-ку! Йўқ дема, қаерга десанг олиб борай, ўтина-ман сендан.

— Сен ҳам лутф қилдинг, раҳмат. Бироқ биласанми, гап битта, бормасам бўлмайди. Энди мени ҳадеб қистай-верма, ундан кўра, ке, озгина уриб ол, шишада ҳали ша-робимиз бор экан. Уни ичиб тугатгин-да, уйингта бориб, маза қилиб ухлагин. Хўпми?

— Йўғ-е, нималар деяпсан, мен уйга боролмайман.

— Э, сени қара-ю, ҳамон эски ашулангни чўзяпсан-ми? Нима, ҳалиям Гёtedан қутулоғмадингми? (Худди шу лаҳзада Гёте билан боғлиқ тушим яна эсимга тушди.) Ҳақиқатан ҳам уйингта боролмасанг, унда шу ерда қолақол. Бу ерда мусофирхоналар бор, биттасини гапла-шиб берайми?

Мен бундан хурсанд бўлиб, яна учрашиш учун уни қаердан топа олишим мумкинлигини сўрадим. Унинг қаерда яшашини ҳам билмасдим, буни ўзи менга айтма-ганди. Айтганда, ўзим излаб топиб борардим.

— Сени ўзим таклиф қилсан бўлмайдими?

— Хўш, қаерга таклиф қилмоқчисан?

— Қаерни хоҳласанг, ўша ерга, қайси куни десанг, ўша куни.

— Яхши. Бўлмаса, сешанба куни кечқурун, «Кекса францисклик роҳиб»да*, иккинчи қават. Хайр!

Қиз қўлини узатди, шундагина мен унинг қўллари ҳам овозига монанд юмшоқ ва майин эканини сездим. Унинг қўлидан ўпдим, қиз эса бунга жавобан масхара-омуз кулиб қўйди.

Охири дақиқада у мен томонга яна бир бор ўгири-либ, деди:

— Мен сенга яна бир нарсани айтмоқчийдим, Гёте хусусида. Буни қара, сен Гётенинг сурати билан чиқи-

* «Кекса францисклик роҳиб» – Цюриҳдаги меҳмонхона номи.

шолмаганингдек, мен ҳам авлиёлар билан баъзан шунақа чиқиша олмайман.

— Авлиёлар билан дейсанми? Шунчалик художўй-мисан?

— Йўқ, художўй-ку эмасман, бироқ афсуски, бир пайтлар бўлганман ва яна қачонлардир бўлсам керак, эҳтимол. Художўйликка вақт ҳам йўқ-да.

— Вақт йўқ деганинг нимаси? Шунга ҳам вақт керак бўларканми?

— О, бўлмасам-чи. Художўйлик, тақводорликка кўпроқ вақт мустақиллиги керак бўлади. Сен жиддий художўй бўлмаслигинг мумкин, айни пайтда эса, воқе-ликда яшашинг ҳамда уларнинг барчасини: вақт, пул, Одеон-Бар — барча-барчасини жиддий қабул қилишинг мумкин.

— Тушунарли. Аммо авлиёлар дединг, энди буёғи қандоқ бўлади?

— Ҳа, мен ўзим жуда яхши кўрадиган айрим авлиёлар бор: Стефан, авлиё Франц ва бошқалар. Уларнинг суратларини, Нажоткорнинг ҳамда Биби Марямнинг* суратларини ҳам баъзан кўриб тураман. Улар энди шунақаям сохта, расво, бузиб ишланган расмларки, сен худди ўша Гётенинг суратини кўрганда қандай ҳолатга тушган бўлсанг, мен ҳам уларни кўрганда, худди шундай ҳолатга тушаман, аранг чидаб тураман. Мана шундай чучмал, аҳмоқона ишланган Нажоткор сурати ёки авлиё Францнинг расмини кўриб туриб, ўзимча ўйлайман: одамлар бу расмларни зўр деб баҳолашади, бу ахир ўша ҳақиқий Нажоткорни таҳқирилаш эмасми? Одамларга унинг шунақа аҳмоқона сурати ҳам етиб ортар экан, унда у яшаб, шунча азоб тортиб, изтироб чекиб нима қиласарди! Бироқ мен шунга аминманки, мендаги Франц ёки Нажоткор сурати аслида шунчаки одам расми холос ва албатта, унинг асл нусхасига етмайди. Ваҳоланки, ўша Нажоткорнинг ўзига менинг у ҳақдаги ботиний тасаввурим менга

* *Биби Марям* — насронийларда: Исонинг онаси.

ўша кўчирма нусхалар қандай bemаза, чучмал туюлган бўлса, худди шундай саёз, асосиз ва аҳмоқона кўриниши мумкин эди... Буни мен сенга, Гётенинг суратига нисбатан ўкинч ва фазабингда ҳақ эканлигингни тан олиш учун айтаётганим йўқ, аксинча, сен бу ўринда адашяпсан. Буни сенга, сени тушуна олишим мумкинлигини кўрсатиш учунгина айтяпман, холос. Сиз, олимлар ва санъаткорларнинг мияларингиз турли-туман файриоддий нарсалар билан тўла, бироқ сизлар ҳам бошқаларга ўхшаган оддий одамсизлар ва бизга ўхшаганларнинг калласида ҳам ўзига яраша орзу-ният, ҳаракатлар бор. Гёте ҳакидаги ҳикоянгни айта бошлаганингдаёқ, бир оз довдираб, хижолат тортганингни пайқагандим, сен — жаноби олим, бунинг ўрнига, ўзингнинг идеал нарсаларингни содда қизга мундоқ ётифи билан тушунтиришинг лозим эди, демоқчиманки, энди бунинг ҳожати йўқ. Мен сени аллақачон тушуниб бўлганман. Ана шунақа гаплар. Энди бас, бориб ухла.

Қиз кетди ва мени кекса уй хизматчиси зинапоядан юқорига олиб чиқди, шундан сўнгина юкларимни сўради. Ҳеч вақом йўқлигини айтиб, у тилга олган «уйку кира»ни олдиндан тўлаб қўйдим. Шундан сўнг у мени эски, қоронғи зинахонадан олиб ўтиб, юқоридаги кичикроқ хонага бошлаб борди. Бу ерга қуруқ ёғоч каравот қўйилган бўлиб, у калта ва қаттиқ эди. Деворда қилич ҳамда Гарибалдининг* рангли портрети ва яна аллақайси уюшма ўтказган тантанали байрамдан ёдгорлик — аллақачонлар сўлиб қолган гулчамбар осиғлик турарди. Қани энди ҳозир ич кийимим бўлганида, сув, сочиқ бор, ювиниб олсам бўларди. Кўйлагим билан ўринга чўзилдим, чироқни ўчирмадим, ўй суриш учун вақтим бемалол эди. Шундай қилиб, Гёте «масаласи» ижобий ҳал бўлди. Унинг ўзи тушимга кирганини қаранг, қойил! Анави ажойиб қиз эса — қани энди унинг исмини ҳам

*Гарибалди — Жузеппе Гарибалди (1807–1882), Италия озодлик ҳаракатининг қаҳрамони.

билсам эди! Тўсатдан бир одам, тирик бир одам, карахт жонсизлигимнинг хира тортган шиша қалпоғини уриб синдириб, менга қўлини — юмшоқ, майингина қўлини чўзиб турса-я! Ўзимга оз-моз тегишли бўлган, мен қувонч ва ташвишлар-ла қизғин ўйлай оладиган нарсалар бирданiga яна қайтадан пайдо бўла бошлагани-чи! Кутилмаганда эшик очилиб, ундан ҳаёт нафаси оқиб турибди-я! Мен энди эҳтимол яна яшаб кета оларман, балки яна қайтадан одам бўлиб қоларман... Совукда мудраб, деярли музлаб қолаёзган кўнглим қайтадан яна илиб, нафас олар, мудроқ бир тарзда ўзининг ожиз, полапон қанотларини қоқиб кўярди. Кимсан Гёте ҳузуримда бўлганди. Бир қиз мени едириб, ичириб, ухла деб, меҳрибончилик қилди, устимдан кулди, мени тентак болакай деб атади. Бу ажойиб қиз яна менга авлиёлар ҳақида сўзлаб, фалати, файриоддий қилиқларимга қарамасдан, якка-ёлғиз эмаслигимни билдириб, тушунилмаган, тан олинмаган, қалби дард-изтиробларга тўла фавқулодда бир шахс эканлигимни айтиб, ўзини сингилдек яқин олиб, мени тушунишини, тушуна олишини изҳор қилди. Уни яна кўра олармикинман? Ҳа, албатта. У — ишончли қиз. Ўзи айтганидек, «гап-гап», «сўз-сўз».

Нихоят, ухлаб қолдим, тўрт-беш соатча ухлабман. Ўйғонганимда, соат ўндан ошган, кийимларим эзилган, ўзим хориган, миямда эса кечаги воқеалар билан боғлиқ аллақандай жирканч, кўрқинчли хотиралар фувиллар, бироқ ўзим тетик ва бардам, кўнглим яхши фикрлар, орзу-умидларга тўла эди. Ўйга қайтаётганимда, кеча мени таъқиб этган кўркув-даҳшатлардан деярли ҳеч нарса қолмаганди.

Зина устида, араукария тепасида уй эгаси — ижара кўювчи «холам» билан учрашиб қолдим. У киши билан онда-сонда кўришардик, шундай бўлса-да, унинг очиқ чехраси менга жуда ёқарди. Бироқ бугунги учрашув мен учун ёқимсиз эди, чунки ўзимга қаролмаган, тунги бедорликдан жуда чарчаган эдим. Сочларим ҳам таралмаган, соқолим тарашланмаганди. Салом бериб, индамайгина ўтиб кетмоқчи бўлдим. Одатда у менинг ёлғизликка ва

кўзга ташланмасликка бўлган интилишинга хурмат билан муносабатда бўларди. Аммо бугун мен билан атроф-мухит ўртасидаги парда, тўсиқ, фов олиб ташланганми, ҳар қалай, кулиб тўхтади.

— Қаерларда қолиб кетдингиз, жаноб Ҳаллер, бугун уйда кўринмадингиз. Ўзиям роса ҳориганга ўхшайсиз?

— Ҳа, — дедим, аранг қулимсираб, — оқшом жуда файзли бўлди. Уйингиздаги мавжуд одатни бузгим келмади, шунинг учун меҳмонхонада ухлаб қолдим. Биласиз, уйингиздаги тинчлик-осойишталик ва одамшавандаликка хурматим баланд, баъзан унда ўзимни ёт, бегона кишидек ҳис қиламан.

— Масхара қилманг, жаноб Ҳаллер!

— О йўқ, ўзимни ўзим масхара қиляпман.

— Буни ҳам қилмаслигингиз лозим. Менинг уйимда ўзингизни бегонадек ҳис қилмаслигингиз керак. Сиз кўнглингизга ёқсан ишни қилишингиз, қандай маъкул бўлса, шундай яшашингиз лозим. Мен одамшавандаликнинг дурдонаси бўлган, шунақангি хурмат-эътиборга сазовор ижара ўтирувчиларнинг қўпини кўрганман, бироқ уларнинг хеч қайси бири сизчалик беозор, вазмин эмасди ва бизни сиздан кўра кўпроқ безовта қилишган бўлса қилишганки, асло кам эмас. Ҳа, майли. Хўш, чой-пой ичасизми?

Мен йўқ деяолмадим. Ота-боболарининг гўзал суратлари ва мебеллари билан жиҳозланган меҳмонхонасига таклиф қиларкан, бу очиқ чехрали аёл олдимга чой келтириб қўйди ва биз у ёқ-бу ёқдан гаплашиб ўтирдик. Сухбат асносида эркакларнинг ғалати довдирликларини оналарга хос тарзда бутунлай, тўлиқ жиддий қабул қилмайдиган ақлли аёлларга ўхшаб, мени ҳам диққат билан тинглаб ўтириб, ҳаётимдан ул-бул нарсани сўрамасдан билиб олишга муваффақ бўлди. Гапдан гап чиқиб, жияни ҳақида сўз очиб қолди ва қўшни хонада турган радиоаппаратни кўрсатди, бу унинг ишдан сўнгти бўш вақтларида ясаган нарсаси экан. Симсиз алоқа фоясига муккасидан берилган тиришқоқ йигитча кечалари ўтирво-

либ, минг йиллар давомида шу нарсаларни, ўта номукам-
мал бўлса-да, кашф қилган (буни билган ҳар бир олим,
мутафаккир ўз навбатида бундан ақл билан фойдалан-
ган) техника худосига чўк тушиб, сажда қилган кўйи
темир-терсакни ковлаштириб, шуни яратибди. Холаги-
нам бир оз тақводорликка берилган, художўй аёл эмас-
ми, диний мавзудаги суҳбатларни берилиб тинглайди.
Мен унга, Тангрининг куч-қудрати ва ишлари қадимги
ҳиндуларга жуда яхши маълум бўлганлигини, техника
бу далилнинг кичкинагина бўлагини одамлар онгига синг-
дириб, чунончи, товуш тўлқинларини қабул қилиш ҳамда
узатиш учун, даставвал, ўта номукаммал бўлган радио-
приёмник ва радиостанцияни яратганлигини гапириб
бердим. Ўша қадимги хулосанинг моҳиятини, замоннинг
нохолислигини техника шу кунга қадар «пайқамай» кел-
ган, аммо, барибир, у «кашф этилади» ва бир кунмас,
бир кун тиниб-тинчимас, серфайрат, муҳандислар қўлига,
албатта, тушади. Балки жуда яқин орада шу нарсани
ҳам кашф этишар, яъни худди ҳозиргидек Франкфурт
ёки Цюрихда туриб, Париж ёки Берлиндан мусиқа тинг-
лаётганимизга ўхшаб, бизни нафақат ҳозирги, шу лаҳза-
даги манзаралар ҳамда воқеа-ходисалар доимий равишда
ўраб туради, балки барча ҳар бир рўй берган воқеа худ-
ди шундай қайд этилиб, у билан танишиш имкони туғи-
лади ҳамда кунлардан бир куни биз, симли ёки симсиз
алоқа орқали, ортиқча нокерак шовқинли ёки уларсиз
қирол Соломон ёки Валтер фон дер Фогелвайде билан
ҳам гаплаша олишимиз мумкин бўлади. Лекин булар-
нинг барчаси, радионинг худди бугунги ибтидоисига
ўхшаб, одамларни ўз-ўзларидан чалғитиб, ишларидан
кўйиб, уларга доимий равишда эрмак-овунчоқ ҳамда бе-
фойда куймаланиш манбаи бўлиб қолмаса эди... Мен
ўзимга маълум ва таниш бўлган бу нарсаларни замонга
ҳамда техникага нисбатан одатдаги аччиқ зарда ва ки-
ноя билан эмас, балки ҳазил-мутойиба қилиб гапириб
бердим, хола гапларимни эшитиб жилмайди ва биз чой
ичиб, бирор соатча гурунглашиб ўтиридик, бундан икко-
вимиз ҳам мамнун эдик.

Сешанба кунига «Чўл бургуги»да учратганим ўша гўзал ва ажойиб қизни таклиф қилиб қўйган эдим ва ўша кунгача бўлган вақтни бир амаллаб ўтказиш мен учун осон бўлмади. Нихоят, сешанба куни етиб келгач, бу нотаниш қизга бўлган муносабатимнинг нечоғли муҳимлиги ўзимга даҳшат билан аён бўла бошлади. Мен нуқул уни ўйлардим, ҳамма нарсани ундан кутардим, қизнинг ўзини заррача севмаган ҳолда, унинг учун ҳамма нарсани қурбон қилишга ва унинг оёқлари остига ташлашга-да тайёр эдим. Мен фақат бир нарсани: қиз шартномамизни бузиши ёки унутиб юбориши ҳам мумкинлигини тасаввур қилиб кўришим керак эди, ана унда ҳолим не кечишини мен аниқ кўра олардим; унда олам-жаҳон мен учун яна бўм-бўш бўлиб қолар, кунлар бир-биридан бекадр ва бехузур ўтар, атрофимда яна қайтадан қўрқинчли сукунат ҳамда маҳдудлик ҳукм сурар ва менга шу жимжит жаҳаннамдан қутулишим учун устарадан бошқа нажот қолмаган бўларди. Мана шу уч-тўрт кун ичида устара мен учун янада қадрлироқ бўлиб қолган ва дилимга қўрқинч, ваҳима солиб турарди. Энг ёмони ҳам шу эди-да: ўзимни ўзим бўғизлашимни ўйласам, этим жимирилаб кетарди. Вужудимдаги қандайдир ёввойи, саркаш, ўжар ва қайсар куч ўлимдан шунақангি қўрқар ва унга шунақангি қаршилик қўрсатардики, гўё мен дунёда энг соғлом одамман-у, ҳаётим ҳам худди жаннатнинг ўзигинаси бўлган. Ўзимнинг ҳозирги ҳолатимни тўлиқ ва аниқ кўриб турардим ва шунга амин эдимки, ҳаёт билан ўлим ўргасидаги чидаб бўлмайдиган ана шу танглик ўша нотаниш қиз – «Чўл бургуги»да учратганим кичик гўзал раккосага бўлган муҳим муносабатим билан боғлиқ эди. Қиз менинг қоронғи, хира, маъюс ва фамгин, қўрқинчли унгурумни ёритган мўъжазгина ойна, жимитдеккина нурли дарча эди. У мен учун нажот, кенг, очик ҳаво, эркинлик сари йўл эди. Қиз мени ё яшашга ўргатиши керак ё ўлимга, у ўзининг кучли ва дўндиққина қўллари билан музлаган, тош қотган юрагимни аста ушлаб кўриши керак эди, ҳаёт нафаси тегиши билан балки у яна гупиллаб

ура бошлаши аксинча, кунпаяқун бўлиши ҳам мумкин эди. Қиз бунча куч-файратни қаердан оларкин, унга мафия қаёқдан келади, қайси сир-синоатли сабабларга кўра у мен учун бу қадар чуқур аҳамиятга эга бўлиб қолди, булар ҳакида ўйлаб ҳам кўролмасдим, қолаверса, бу нарсалар мен учун барибир эди; буни билишнинг мен учун ҳеч қандай аҳамияти йўқ эди. Ҳеч қандай билимнинг, бирон нарсани англаш, тушунишнинг менга энди ортиқ заррача аҳамияти қолмаганди, чунки улар менда керагидан зиёда эди. Мен учун оғир бўлган ва мазах бўлиб туюлаётган азоб-уқубат ҳамда иснод ҳам худди шунда эдики, мен ўзимнинг ҳолатимни шу қадар аниқ кўриб, шу қадар чуқур англаб турардим. Бу йигит, бу ҳайвон – Чўл бўриси кўз олдимда гўё тўр ичидағи пашшага ўхшарди ва мен унинг тақдири нима бўлишини кузатиш билан овора эдим. У чалғиган, гангиган, химоясиз, ожиз бир ҳолатда тўр ичиди муаллақ учар, уни ўргимчак чанг солиб, фиппа бўғиши ҳам, қандайдир нажоткор қўл кутқариб қолиши ҳам мумкин эди. Мен ўз изтиробларим, руҳий хасталигим, чигаллик ва мушкулотлар ҳамда дикқат бўлишимнинг алоқадорлик, боғлиқлик сабаблари тўғрисида энг ақлли ва мулоҳазали гапларни айтсам бўларди, бу механика менга аниқ, очик-ойдин ва равshan эди. Бироқ менга керак бўлган, умидсиз ҳамда тушкун бир ҳолатда қўмсаётган, интилаётган нарсам билим ва тушуниш, англаш эмас, балки бошдан кечириш, бир қарорга, узил-кесил хуносага келиш, руҳий ларза ҳамда портлаш эди...

Гарчи мен ўша кутиш билан ўтказган уч-тўрт кунларим мобайнида қиз ўз сўзида туришига ҳеч қандай шак-шубҳа қилмаган бўлсам-да, охирги куни негадир дикқатим ошиб, жуда асабий ва ҳардамхаёл бўлиб қолдим; ҳаётимда ҳеч қачон бирор куннинг оқшомини бу қадар сабрсизлик билан интиқ кутмаган эдим. Ана шундай сабрсизлик ва безовталик роса кучайиб, чидаб бўлмас даражага етгач, айни пайтда бу ажойиб бир тарзда хуш ёқа бошлаганди ҳам: узоқ вақтлардан буён ҳеч бир нарсани кутмаган, ҳеч бир нарсадан шодланмаган, қайтанга нуқул ҳафсаласи пир

бўлган, кўнгли қолган, ихлоси қайтган мендек бир одам учун бутун кун бўйи бесаранжом-бетоқатлик, ваҳима-ҳадик ҳамда зўр интиқлик билан у ёқдан-бу ёққа зир югуриб, бўлажак учрашув ва сухбатларни ҳамда оқшомги дийдорлашув натижаларини олдиндан ўйлаш, тасаввур қилиш, бунинг учун соқол олиш ва янги қўйлак кийиб, янги бўйинбоғ тақиб, янги ботинка боғичларини боғлаб, алоҳида, пишиқ ва пухта тайёргарлик кўриб, кийиниши акл бовар қилмайдиган даражада ажойиб, гўзал янгилик эди. Бу ақлли ва кичкинагина сеҳрли қизча ким бўлишидан қатъи назар, у мен билан қай йўсинда боғланиб қолган бўлмасин, бу нарса мен учун барибир эди; энг муҳими, у шу ерда эди, худди каромат кўрсатилгандаи, камина янги бир инсонни, ҳаётимдаги янги қувончни топиб олган эдим! Муҳими, бу нарса давом этарди ва мен жозибадорликка берилиб, ўша юлдуз кетидан эргашардим.

Қизга кўзим тушган ўша лаҳзани сира-сира унуполмайман! Мен кўхна, шинамгина ресторонда, ихчамгина стол атрофида ўтирадим, бу столни зарур бўлмаса ҳам, олдиндан телефон орқали буюртма бериб, банд қилиб кўйган эдим. Қизга атаб харид қилганим икки дона ажойиб орхидеяни* истиконга — сувга солиб қўйиб, таомномани ўқиб ўтирадим. Аввалига уни бир оз кутишимга тўғри келди, лекин келишига ишонардим, шунинг учун ўйланишимга ҳам ҳожат йўқ эди. Нихоят, у кириб келди. Гардероб олдида тўхтаб, мен тарафга диққат билан қаради, оч кулранг кўзлари билан менга синовчан назар ташлаб, салом берди. Кельнер** қизга қанака муомала қиларкин, деб қулоқ солиб турдим, йўқ, худога шукур, ўргада ҳеч қандай сир, яқинлик йўқ, фақат у қизга нисбатан ўта хушмуомалали эди, холос. Улар бир-бирлари билан шунчаки таниш эдилар, қиз унга Эмил дея мурожаат қилди. Лолаларни бергандим, хурсанд бўлиб кетди, кулиб:

* Орхидея — лоланинг бир тури.

** Кельнер — Германияда ва баъзи бошқа мамлакатларда ресторан хизматчиси.

— Бу ишиңг ажайиб бўлибди, Ҳарри! — деди. — Сен менга совға қилмоқчи эдинг, шундайми? Лекин нима совға қилишни билмасдинг, мени хафа қилиб қўймаслик учун нималар совға қилишга қанчалик ҳаққинг бор-йўқ, буни ҳам яхши билмас эдинг. Мана, орхидея харид қилибсан, булар гул бўлгандаям анча-мунча пул турадиган гуллар. Хўш, бунинг учун сенга катта раҳмат. Лекин бир гапни айтиб қўяй: менга совға беришингни истамайман. Мен-ку, эркаклар ҳисобига кун кечираман, аммо зинҳор сенинг ҳисобингга яшамоқчи эмасман. Вой-бў, пўрим бўлиб кетибсанми! Бу туришингда сени ҳеч ким таниёлмайди-ку. Куни кеча кўринишинг мурдадан ҳам ҳароб, рамақижон эдинг, бугун эса, бинойидек одам бўлиб қолибсан. Тинчликми ишқилиб? Ҳа, дарвоқе, буйруғими ни бажардингми?

— Қайси буйруқни?

— Ана, дарров эсингдан чиқдими? Фокстротни* ўргандингми деяпман? Ахир, ўзинг айтгандинг-ку, мен учун сенинг буйруғингни бажаришдан, сенга итоат қилишдан кўра яхшироқ, азиизроқ нарса йўқ деб, шундайми? Эсингдами?

— О, албатта эсимда. Бундан кейин ҳам шундай бўлиб қолади. Беҳазил!

— Хўш, унда нега энди рақс тушишни ҳалиям ўрганмадинг?

— Уни шу қадар тез, атиги уч-тўрт кун ичида ўрганиб бўларканми?

— Бўлмасам-чи! Фокстротни бир соат, бостонни эса икки соат ичида ўрганса бўлади. Танго кўпроқ вақтни олади, сенга унинг мутлақо керагиям йўқ.

— Менга қара, ниҳоят, мен сенинг исмингни билиб олишим керак!

Киз менга бир зум индамай қараб турди, сўнг:

— Балки уни ўзинг ўйлаб топарсан, — деди. — Исмимни ўзинг топақолганингда жуда соз бўларди-да. Қулоқ сол, менга яхшилаб қара! Сенга ҳеч нарса сезил-

* *Фокстрот, бостон, танго* — рақс турлари.

маяптими? Менинг юзим баъзан ўсмирларни кига ўхшаб кетмаяптими? Масалан, ҳозир дейлик?

Қизнинг чехрасига астойдил разм соганида, ҳақиқатан ҳам у худди ўсмир боланинг юзига ўхшаб кетарди. Бир дақиқа қараб қолгандим, у менга гапира бошлади ва ўсмирлик чоғларимни, ўша даврлардаги Ҳерманн исмли ўртогимни ёдимга солди. Бир зумда қиз буткул худди шу Ҳерманнга айланиб қолгандек туюлди.

— Агар ўғил бола бўлганингда, — дедим мен ҳайратимни яширолмай, — исминг Ҳерманн бўлиши керак эди.

— Ким билади, балки мен ўшадирман, фақат бошқача кийиниб, қиёфамни ўзгартириб олгандирман, холос, — деди қиз ҳазиллашиб.

— Исминг Ҳермина, шундайми?

У хурсанд бўлиб, топдинг маъносида бош қимирлатди. Шу пайт шўрва ҳам келди ва биз овқатлана бошладик, қиз эса болаларга ўхшаб, шод ва мамнун эди. Энг аввало, ундангина менга ёқсан ва мени ўзига мафтун этган ажойиб ва ўзига хос нарса шу эдики, у теран жиддийликдан кутилмаганда аломат бир хушчакчақликка тез ўта олар ва аксинча, бунда эса афт-ангори сира-сира ўзгармас, бамисоли қобилиятли болаларни эслатарди. Ҳозир у ўта қувноқ эди. Фокстротни ёдимга солиб, ҳазиллашар, жиғимга тегар, ҳатто оёқлари билан туртиб ҳам қўяр, зўр бериб овқатни мақтар, яхши кийиниш учун анча-мунча саъй-ҳаракат қилганимни эътироф этибгина қолмай, ташқи кўринишмдан аллақанча камчилик ҳам топарди.

Бу орада қизни саволга тутдим:

— Менга қара, бирпастда ўспирин, бўз болага ўхшаб қолдинг ва мен исмингни ўйлаб топдим. Буни қандай қилдинг, шунга сира ақлим етмаяпти.

— О, ахир бунинг барчасини ўзинг қилдинг-ку. Шунга ақлинг етмапти-да, жаноби олим: мен сенга ўзига хос кўзгу бўлганим учун, менда сени тушунадиган ва сенга жавоб қайтара оладиган нимадир борлиги учунгина ёқаётганимни, сен учун керакли бўлаётганимни наҳотки ўзинг

тушунмаётган бўлсанг? Ўзи аслида барча одамлар бир-бирлари учун ана шундай ойна бўлишлари, бир-бирлари-га ана шундай жавоб қайтара оладиган ва мос келишлари лозим. Бироқ сенга ўхшаган йигитчалар ғалати-да, улар сехр, жоду, жозиба деган нарсаларга дарров маҳлиё бўла-ди-қолади ва бошқа одамларнинг кўзларидан, гўёки бу-нинг уларга ҳеч бир дахли йўқдек, бирон нимани уқиб олишга ҳам қодир эмас. Башарти ўша йигитча кутилма-ганда бирортасини учратиб, унинг ўзига нисбатан руҳан яқинлигини сезиб қолгудек бўлса, унда, албатта, ўзида йўқ хурсанд бўлиб кетарди.

— Сен ҳамма нарсани биларкансан, Ҳермина, — де-дим қизга ҳайрон қолиб. — Ҳаммаси худди сен айтган-дек, гап йўқ. Бироқ, барибир, сен менга мутлақо ўхша-майсан. Сен менинг бутунлай аксимсан; сенда... менда йўқ нарсаларнинг ҳаммаси бор.

— Балки сенга шундай туюлаётгандир, — деди қиз муҳтасар қилиб, — лекин бу яхши, албатта.

Энди унинг менга ҳакиқатан ҳам бамисоли сехрли кўзгу бўлиб туюлган чехрасидан жиддийликнинг вазмин булути ёпирилиб келди, бу чехра бирданига жиддий ва вазмин гапира бошлади, гўё ниқобнинг бўм-бўш кўзла-ридан фақат беҳад фожиавийлик нафаси уфурарди. У секин, сўзларни дона-дона талаффуз қилиб, шошилмай, истар-истамас гап бошлади:

— Эй сен, менга нималар деганингни асло унумтагин! Сенинг айтишинг бўйича, мен сенга буйруқ беришим керак ва барча буйруқларимга итоат қилиш сенга қувонч бағишлийди, шундайми? Буни зинҳор унумтма! Шуни бил-гинки, Ҳарривой, сенинг аҳволинг мен билан қандай кечса, менинг афт-ангорми сенга қандай жавоб қайтарса, мен-даги нимадир сенга пешвоз чиқиб, ишонч туғдирса, сен билан ҳам менинг аҳволим худди шундай кечади. Яқин-дагина, мен сени ўша «Чўл бургуги»да хорғин ва пари-шон бир ҳолатда кириб келаётганингни кўрганимдаёқ дарҳол сезгандим: ҳа, у менга қулоқ солади, у буйруқ беришимни кутиб турибди, холос! Мен буни қиласман,

шунинг учун ҳам сенга ёқиб қолдим, шунинг учун ҳам биз бир-биримиз билан дўст бўлиб қолдик.

Қиз шу қадар жиддий, шу қадар юрақдан гапирадики, мен унга на гап қўша олдим, на уни тинчлантириб, мавзуни бошқа ёқقا бура олдим. У қошларини қоқиб, менга маъноли қараб қўйди-да, совуқ оҳанг билан сўзида давом этди:

— Сен ўз сўзингнинг устидан чиқишинг керак, болакай. Мен сенга буни айтиб қўйяпман, тағин пушаймон бўлиб юрмагин. Ҳали мендан кўплаб буйруқлар оласан ва уларга амал қиласан, улар ажойиб ва ёқимли буйруқлардир, уларга итоат қилиш сенга қувонч бағишлади. Пировардида эса менинг охирги амримни ҳам бажарасан, Ҳарри.

— Бажараман, — дедим ярим ихтиёрсиз. — Мен учун сенинг охирги буйруғинг нима ҳам бўлиши мумкин?

Ўзим эса, уни олдиндан билиб, сезиб турардим. Қиз иситма аралаш қалтироқ тутгандек, бир сесканиб тушди, у гўё хаёл гирдобидан аста чиқиб келарди. Кўзларини мендан узмай, қараб турарди. Туйкусдан унинг қиёфаси янада фамгин тусга кирди.

— Буни сенга айтмасам, яхши бўларди. Аммо бу сафар ҳам ақлли бўлмоқчи эмасман, Ҳарри. Мен бутунлай бошқа бир нарсани назарда тутяпман. Менга қара, қулоқ сол! Буни эшитгач, унутиб юборарсан. Дам кулгинг қистаса, дам йифлагинг келади. Менга қара, болакай! Билсанг, мен сен билан ҳаёт-мамот ўйинини ўйнамоқчиман, акажон. Ва бу ўйинни бошлашдан олдин, мен сенга ўз қарталаримни очиқ-оидин кўрсатиш ниятидаман.

Қиз ушбу сўзларни айтаётган маҳал унинг юз-кўзлари шунақаям гўзаллашиб, шунақаям файритабиий, илоҳий тус олдики!.. Унинг фам-ҳасрат мужассам кўзлари барча нарсалардан огоҳ, вазмин ва сокин боқарди, бу кўзлар бўлиши мумкин бўлган барча азоб-изтиробларни кўрган ва тақдирга тан бергандек эди. У қийналиб гапирад, гўё қаттиқ аёзда совқотган одамнинг ҳолатини эслатар, бироқ лаблари нигоҳи ҳамда овозига номутано-

сиб равиша шириң, енгил, ўйноқи ҳиссиётдан сўйлар, кўнгли хурсандчиликни қўмсаб турганлиги сезилиб турарди. Силлиқ пешонасига тушиб турган қалтагина қўнфироқ сочи ҳар замон, ҳар замон силкиниб, ундан ўсмир, ўспириннинг, икки жинсга мансуб магиянинг жонли, барҳаёт нафаси уфуриб турарди. Нафасим ичимга тушиб, қарахт бир ҳолатда қизнинг сўзларини тинглай бошладим.

— Сен мени яхши кўрасан, биламан, — давом этди у, — бунинг сабабини эса боя сенга айтган эдим; мен сенинг ёлғизлигингни ёриб ўтиб, сени дўзах ёқасида тутиб қолдим ва яна қайтадан ҳаётга қайтардим. Лекин ҳали мен сендан кўп нарса истайман, кўп нарса... Сени ўзимга шундай мафтун қиласки, токи мени севиб қолгин. Шошма, гапимни бўлмай тур! Сен мени жуда яхши кўрасан, буни сезиб турибман, мендан миннатдорсан ҳам, бироқ ҳали мени севиб қолганингча йўқ. Мен эса шу ишни қилмоқчиман, бу менинг касб-корим; мен эркакларни ўзимга шундай жалб қила оламанки, охир-оқибат улар мени севиб қоладилар, агар билсанг. Лекин гапимга қулоқ сол, мен сенга жуда мафтун бўлиб турганим йўқ, бу ишни шунинг учун қилаётганим ҳам йўқ. Мен сени севиб қолганим йўқ, Ҳарри, бироқ сен, мен сенга қандай керак бўлсан, менгаям худди шундай кераксан, билдингми. Мен сенга ҳозир, худди шу дақиқада керакман, чунки сен тушкун бир кайфиятдасан, сенга биргина туртки зарур бўлиб турибди, у сени сувга итариб юбориб, сенга қайтадан яна жон бахши этади. Мен сенга рақсни ўрганишингда, кулишни ўрганишингда, яшашни ўрганишингда ёрдам бераман. Сен эса менга бугун эмас, балки кейинрок, жуда муҳим ва гўзал бир ишда асқотасан. Сенга, мени севиб қолганингдан кейин, сўнгги буйруғимни бераман ва сен уни бажарасан, бу эса, сену мен учун яхши бўлади.

Қиз жигарранг-бинафшаранг, яшил тарам-тарам йўлли лолалардан бирини бир оз кўтариб қўйди-да, унга энгашди ва гулга пича қараб туриб қолди.

— Сенга осон бўлмайди, албатта, бироқ, барибир, бу ишни қиласан. Сен менинг охирги амримни бажарасан ва мени... ўлдирасан. Гап шу. Энди ортиқ савол бера кўрма!

Лоладан кўз узмай тураркан, у бирпас жим бўлиб қолди. Сўнг юзида жиддийликдан асар ҳам қолмади, гулғунчадек очилиб кетди. Кўзлари ҳамон қотиб қолгандек, ҳаракатсиз бўлса-да, лабларида жозибадор табассум пайдо бўлди. Нихоят, у қўнғироқ сочли бошини сарак-сарак қилиб, бир қултум сув ичди, олдидағи таомга кўзи тушиб, иштача билан овқат ея бошлади.

Қиз ваҳимали гапларини айтмасиданоқ, мен унинг «сўнгги буйруғи»ни билиб бўлгандим, шунинг учунми, «мени ўлдирасан» деган гапидан ҳам унча қўрқмадим. Унинг барча айтганлари менга ишонарли ҳамда пешонага ёзилган, тақдирий бўлиб туюлар ва мен уларни хеч қандай қаршиликсиз қабул қиласдим, бироқ шундай бўлса ҳам, барибир, бу гаплар мен учун тўла ҳақиқийлик ва жиддийликдан мосуво эди. Бир қўнглим қизнинг сўзларига чиппа-чин ишонса, бир қўнглим шундай ақлли, ишончли ва соғлом Ҳерминанинг эси кирди-чикди бўлиб қолгани, бу нарсалар унинг хаёлий уйдирмалари бўлса керак, дея мени тинчлантиради. У охирги сўзини айтиб ултурмай, сохталик ва беҳудалик пардаси бутун сахнани чулғаб олди. Мен Ҳерминанинг эҳтимоллик ҳамда воқелик сари худди дорбозларга ўхшаб, енгилгина сакрай олишини ҳамон ортга қайтариб, тасаввур қилолмасдим.

— Демак, мен сени бир кун ўлдираман, шундайми? — сўрадим ундан. Қиз эса қулиб, олдидағи парранда гўштини зўр бериб кесиб, қиймаларди.

— Албатта, — беписандлик билан бош силкиди у, — бас энди, ҳозир овқат пайти. Ҳарри, марҳамат қилиб, мен учун яна бир оз кўкат буюртири. Нима, иштаҳанг йўқми?.. Ўйлайманки, сен бошқа одамлар ўз-ўзидан тушунадиган барча нарсаларни, ҳаттоқи овқат пайтида хурсанд бўлиб ўтиришни ҳам ўрганишинг керак. Менга қара, болакай, манови ўрдак оёқчаси, шундай ажойиб гўштни

суюқдан ажрататайтганда ҳам худди байрамдагидек, гүё ошиқ йигит маъшуқасининг кофтасини илк бор ечишга ёрдамлашаётгандек, шодон ва шукур қилиб, иштаҳа билан ҳаракат қилиш керак. Тушундингми, йўқми? Эсинг йўқ сени. Кулоқ сол, мен сенга манови ажойиб ўрдак оёқчасидан бир бўлак бераман, ҳозир ўзинг кўрасан. Ана шундай, оч оғзингни! О, қанақа маҳлуқсан сен ўзи? Ҳозир у, худо билади, менинг санчқимдан бир тишлам гўштни оғзига согланини мабодо бирор кўриб қолмадимикан, деган хавотирда ён-берига кўз қирини ташлаб ҳам олди... Ташвиш қилмасанг-чи, эй сен, ноқобил фарзанд, мен сени уялтириб кўярмидим... Аммо башарти сен ўз ҳузур-ҳаловатинг учун бошқалардан изн сўрайдиган бўлсанг, унда сен ҳақиқий шўрпешона экансан...

Ҳозирги саҳна олдингисига ўхшамас, бу кўзлар бир неча дақиқа аввал нақадар оғир ва қўрқинчли боқиб турганига ишонгинг келмасди. О, Ҳермина бамисоли ҳаётнинг ўзи эди: турмушда ҳеч нарсани олдиндан айтиб бўлмайди. Лахзалар... масалани ҳал қиласди. Ҳозир у иштаҳа билан овқатланарди. Ўрдак оёғи ва салат, торт ҳамда ликёр* унга қувонч ва фикр-мулоҳаза, суҳбат ҳамда хаёлот манбаи эди гўё... Ликоблар олиб кетилгандан сўнг, яна бир янги саҳифа очилди. Мени шу қадар мукаммал ўрганиб ултурган, ҳаёт ҳақида бошқа барча донолардан кўпроқ биладигандек кўринган бу аёл болаларча феъл-қилиқлар қилиб, лаҳзалик ҳаётнинг майдада ўйинларини шу қадар усталик билан ўйнардики, охир-оқибат мен унинг издошига айлангандим. Бу юксак донишмандлик эдими ё оддий соддадилликми, билмадим: кимки шу лаҳза, шу дақиқа, шу замон билан яшаб ўрганган бўлса ва ўз йўлидаги ҳар бир кичик гул-чечакни асраб-авайлаб, ножидий, ҳазил-ҳузулдан иборат ҳар бир дақиқанинг қадрига етса, ҳаётда унга ҳеч қандай зиён-захмат етмасди. Иштаҳаси зўр, чучуктомоқ бу қувноқ ва ҳазилкаш Ҳермина-нинг ўзига ўлим тилаганини кўриб, уни ҳаёлпараст ё

* Ликёр – ўткир, ширин спиртли ичимлик.

жазаваси тутадиган аёл дейиш мумкин эди ёки мени атай, совуққонлик билан ўзига мафтун этиб, асирига айлантириб олмоқчи бўлган сергак, ҳушёр, янгишмайдиган одам дейиш ҳам мумкин эди... Йўқ, йўқ, бундай бўлиши мумкин эмасди. У шунчаки лаҳза-дақиқага бутунлай берилган, шунингдек, ҳар бир шодон фикрга ҳам, кўнгил тубидан пайдо бўладиган ҳар бир ўткинчи, қайғу-аламли титроқ-ҳаяжонга ҳам кўксини тутиб берадиганлардан эди.

Бугун иккинчи марта кўриб турганим бу Ҳермина тушмагур менинг ҳақимда ҳамма нарсани биларди, ундан бирон нимани сир сақлай олишим фоят мушкул эди. У эҳтимол, менинг маънавий ҳаётимни бутунлай, тўла тушуниб етмаган, менинг мусиқага, Гётега, Новалис ёки Бодельерга бўлган муносабатларимни балки тўлиқ англаёлмаган бўлиши ҳам мумкин эди — бироқ буларни ҳам сўраб билиб олиш унга ҳеч қандай қийин эмасди, гарчи «маънавий ҳаётим»дан бирон нима қолмаган бўлса ҳам. Ахир, буларнинг барчаси аллақачон чил-чил бўлиб, ўз мазмун-моҳиятини йўқотмаганмиди? Лекин бошқа шахсий муаммоларим ҳамда истак-интилишларимнинг барчасини у яхши тушунарди, бунга шак-шубҳам йўқ эди. Сал ўтмай, у билан Чўл бўриси, трактат ва бошқа кўп нарсалар тўғрисида сухбат қурмоқчи эдим, зоро, бу нарсалар шу пайтгача фақат ўзим учунгина мавжуд бўлиб, улар ҳақида ҳали ҳеч қачон ва ҳеч ким билан гаплашманганман. Сабрим чидамай, мавзуни бошлаб юбордим.

— Ҳермина, — дедим қизга, — менга яқинда фалати бир нарса учраб қолди. Нотаниш кимса менга ярмаркаларда сотиладиган кичкинагина бир китобча берган эди, унда менинг бутун тарихим, менга тааллукли бўлган барча воқеалар аниқ ва равshan баён қилинган. Қани, ўзинг айт-чи, ахир бу фаройиб эмасми?

— Китобчанинг номи нимайди? — сўради қиз истар-истамас.

— «Чўл бўриси ҳақида трактат».

— Шундайми? О, бу зўр-ку! Чўл бўриси, бу сен, шунақами?

— Ха, шундай. Мен ўша — ярми одам, ярми бўридан иборат ёки шундай деб ўйлайдиган мавжудотман.

Қиз индамади. У кўзларимга ва қўлларимга синовчан назар ташларкан, юз-кўзларида бир зум аввал гидек чуқур жиддийлик ҳамда фамгин жўшқинлик зоҳир бўлди. Афтидан, унинг «сўнгти буйруғи»ни бажара оладиган бўриманми-йўқми, у шуни чамалаб кўраётганди.

— Албатта, бу ўзинг ўйлаб топган нарса, — деди у сўнг, яна бояги қувноқ кайфиятига қайтаркан, — ёки истасанг, бу — шеърият, лекин сал бошқачароқ. Бугун энди сен бўри эмассан, аммо яқинда, залга кириб келаётган пайтингда, худди осмондан тушгандек, дурустгина йиртқич эдинг, ўшанда худди шу ҳолатинг менга ёқиб қолганди.

Тўсатдан бир нима эсига тушди шекилли, у хижолатомуз деди:

— Ваҳший ёки йиртқич ҳайвонлар деймиз, булар фоят аҳмоқона гаплар! Ҳайвонлар ҳақида бунақа гапларни айтиш ярамайди. Албатта, улар кўпинча қўрқинчли бўлади, аммо инсонларга қараганда анча ҳақиқийдирлар.

— Ҳақиқий дейсанми? Тушунмадим, бу нима деганинг?

— Мана, бирон жониворга, мушукми, итми, қушми ёки бўлмасам, ҳайвонот боғидаги катта, чиройли ҳайвонлардан бирига, пума* ёки жирафа (зирофа)га дикқат билан разм солиб кўр. Шунда уларнинг ҳаммаси ҳақиқий эканлигини кўрасан, яъни ҳеч қайси ҳайвон тушкун ҳолатда эмас ёки бўлмасам, нима қилишни, ўзини қандай тутиши кераклигини билмайди. Улар сенга хушомад қилмайди, сенга ёкиш, яхши кўриниш илинжида ялтоқланмайди ҳам. Театр деган нарса йўқ. Улар қандай бўлса шундай, худди тошлар, гуллар ёки осмондаги юлдузларга ўхшаб. Энди тушундингми?

*Пума — Америка ёввойи мушуги.

— Тушундим.
— Кўпинча ҳайвонлар фамгин бўлади, — давом этди у.
— Агар бирорта одам жуда хафа бўлса, тиш-пиши оғриётгани ёки пул-мул йўқотганлиги сабабли эмас, балки бир кун вақти-соати келиб, ҳаётнинг нима эканини ҳис кила бошласа, ана унда у ҳақиқий фамгин ҳисобланади — ана ўшанда у бир оз ҳайвонга ҳам ўхшаб кетади — маъюс, хафа бўлса ҳам, кўриниши лекин одатдагидан кўра ҳақиқироқ ва гўзалроқ бўлади. Шундай. Сен ҳам, Чўл бўриси, дастлаб кўрганимда менга худди шундай кўринган эдинг.

— Хўш, Хермина, мен тасвирланган ўша китобча хусусида нима дейсан?

— Эҳ, биласанми, ҳадеб ўйлайвериши ёқтирмайман. Бу ҳақда бошқа сафар гаплашармиз. Ўша китобчани берсанг, бир ўқиб чиқсан бўларкан. Ёки мутолаа қилишим учун ўзинг ёзган китоблардан биронтасини бериб тур.

У қаҳва сўради ва бирпас хомуш, паришон туриб колди, сўнг бирдан кулфи дили очилиб кетди.

— Хей! — қичқириб юборди қиз хурсанд бўлиб, — топдим, ниҳоят топдим!

— Нимани?

— Фокстротни-да. Ўйлаб, ахийри топдим. Хўш, алоҳида хонанг борми, иккаламиз у ерда бир соат-ярим соат рақс тушиб турсак девдим? Кичкина бўлса ҳам майли, фақат пастки қаватда ҳеч ким турмаса яхшийди, йўқса шовқин-сурон бўлиб, жанжал чиқиши мумкин. Демак, яхши, жуда яхши! Сен энди рақс тушишни уйда ўрганишинг мумкин.

— Ҳа-я, — дедим қимтиниб, — мунча яхши. Мен бўлсам, бунга мусиқа ҳам керак бўлармикин, деб ўйлабман.

— Албатта, керак бўлади, нега керак бўлмас экан. Менга қара, мусиқани сотиб олиб қўяқоласан, нари борса, рақс муаллимасига тўлашинг лозим бўлган пулга teng туради. Муаллимани эса тежаб қоласан, унинг ўрнида ўзим бўламан. Шунда мусиқамиз ҳам бўлади, патефон эса ёнга қолади.

- Патефон дейсанми?
- Ҳа-да. Уни сотиб оласан, рақс пластинкаларини ҳам...
- Зўр-ку! Агар менга рақс тушишни чинданам ўргата олсанг, унда мен патефонни гонорар тариқасида сенга топшираман. Келишдикми?

Бу сўзларни қатъий айтган бўлсам ҳам, аммо улар чин юракдан чиқмаганди. Китобларга лиқ тўла хонамда бундай матоҳнинг туришини тасаввур ҳам қилолмасдим, қолаверса, рақс тушишгаям эътиrozим қўп эди. Гоҳгоҳида шунчаки бир ҳаракат қилиб қўйиш мумкин эди, уни ўрганишга эса ёшим ҳам ўтиб қолганди, буни ўзим билардим. Кетма-кет, узлуксиз машқ қилишга сира тоқатим йўқ эди, менга — нозик дидли мусиқа билимдонига патефонлар, жаз ва замонавий рақс мусиқалари ёқмаганидек, бу ишга ҳам сира кўнглим чопмасди. Мен учун тафаккур ҳужраси ҳамда бошпана бўлган хонамда, Новалис билан Жейн Паул ёнида энди мода бўлган, довруғи кетган амриқоча рақс қўшиқлари янграб, бунинг устига менинг рақс тушишим — буни энди ким талаб қилса ҳам, мен учун ортиқча эди. Бироқ буни «кимдир» эмас, балки Ҳермина талаб қиласарди ва унинг бунга ҳаққи бор эди. Нимаям дердим, унга бўйсунишдан бошқа иложим йўқ.

Эртаси куни тушдан сўнг у билан қаҳвахонада учрашдик. Борсам, Ҳермина чой ичиб ўтирган экан, кулиб, менга қандайдир рўзномани кўрсатди, унда менинг номим тилга олинганди. У ватанимдаги реакцион газеталардан бири эди, улар каминани ёмонлаб, бадном қилиб, ҳақоратлаб ёзилган мақолаларни бири қўйиб, бири чоп этишарди. Мен уруш пайтида унга қарши чиқиб, одамларни тинчлик, сабр-тоқат, инсонийлик ва ўз-ўзини танқид руҳида бўлишга чақирган ҳамда менга нисбатан кундан-кунга кучайиб бораётган миллатчиларга хос таъқиб, ифво ҳамда фитналардан ўзимни ҳимоя қилган эдим. Бу ҳам ўшандай ҳужумлардан бири бўлиб, мақоланинг ярмини мухаррирнинг ўзи тўқиб-бичган, қолган қисми эса унинг

ўзига яқин муносабатда бўлган матбуот нашрларидан кўчириб олинган эди. Ҳеч ким қартайган мафкуралар химоячисидек бунчалик ёмон ёзолмаслиги, ҳеч ким ўзининг хунар, касб-корини дўстларнинг бу қадар оз ёрдами билан юргизолмаслиги маълум эди. Ҳермина ушбу мақолани ўқиб кўриб, Ҳарри Ҳаллернинг заараркунанда ҳамда беватан, дарбадар, сўққабош одам эканлигини билib олган ва албатта, шу билан бирга, токи ана шундай извогарлар тийиб қўйилмас экан, токи ёшлар ашаддий душманга қарши уруш қилиб, ўч олиш васвасаси эмас, балки ҳассос инсонпарварлик фоялари руҳида тарбияланмас экан, Ватаннинг ахволи тобора ёмонлашиб бора-веришига ҳам амин бўлган эди.

— Шу сенмисан? — сўради Ҳермина, менинг номимга ишора қилиб. — Қара-я, ўзингга тузуккина душманлар орттириб олибсан. Бу fazabingни қўзғамайдими, Ҳарри?

Мен газетани олиб, бир-икки сатр ўқиб кўрдим. Ўша одатдаги, чайналган, сийқаси чиққан гаплар, бунақа бир қолипдаги ҳақорат сўзларни анчадан буён ўқийвериб, жонимга тегиб кетган эди.

— Йўқ, — дедим мен, — fazabimni қўзғамайди, бунга хийла қўнишиб қолдим. Мен ҳар бир ҳалқ, ҳатто ҳар бир одам ўзини алдамчи, сохта сиёсий «бурч масалалари» билан аллалаб овутиш ўрнига ўз-ўзини текшириб, тафтиш қилиб кўрмоғи лозимлиги ҳакида бир неча марта фикр билдирган эдим, зеро, шундагина камчилик, хато ва нуқсонларимиз, ёмон одатларимиз уруш ҳамда шу сингари бошқа дунёвий офат-кулфатларга олиб келишига амин бўламиз, бўлғуси урушдан кутулишнинг бирдан-бир йўли ҳам, эҳтимол, шудир. Ана шунинг учун улар мени кечиролмайдилар, чунки албатта улар: кайзер, генераллар, иирик саноатчилар, сиёsatчилар, рўзномалар мутлақо айбсиздирлар — ҳеч кимда ҳеч қандай, заррача айб йўқ! Ўлган бўлса, ўн миллион одам ўлгандир, хўш, нима бўпти, осмон узилиб, ерга тушибдими, дейишлари мумкин. Энди десанг, Ҳермина, мана шундай фийбат, фисқ-фасод мақолалар fazabimni келтирмаса ҳам, мени

баъзан шундай хафа қиласы... Юртдошларимнинг учдан икки қисми ҳар тонг ва ҳар оқшом мана шундай газеталарни ўқииди, уларга шу тариқа «ишлов берилиб», даъват этилади, гижгижлатилади, домангир ва бераҳм одамларга айлантирилади. Булардан кузатилган мақсад эса — яна уруш, янада даҳшатлироқ бўлиши мумкин бўлган келгуси, бўлажак уруш... Бу гапларни ҳар бир одам яхши тушунади, бироқ ҳеч ким бўлгуси урушдан кутулишни, ўзини, болаларини ва миллион-миллион кишиларни қирғиндан сақлаб қолишини ўйламайди. Дунёда рўй бераётган тартибсизликлар ва ёвуз ҳаракатларда ким қанчалик айбдор — бундай саволни ўз-ўзига бериб, бу ҳақда бир зум ўйлаб кўришни ҳеч ким хоҳламайди, қара! Иш шу зайлда кетаверади ва кўп минглаб кишилар томонидан бўлгуси урушга қизғин тайёргарлик кундан-кунга давом этаверади. Бу нарсалар мени фалаж қилиб, тушкунликка солиб қўйди, мен учун энди «ватан» тушунчаси йўқ, омоллар ҳам ортиқ қолмаган, буларнинг барчаси навбатдаги хунрезликка тайёргарлик кўраётган жаноблар учун шунчаки парда, холос. Инсонларга хос хаёл суриш, фикрлаш, айтиш, ёзишдан, каллада яхши ўй-фикрлар юритишдан ҳеч қандай маъно йўқ — борингки, шундай иш қилаётган атиги икки-уч кишига эса кун сайин бутунлай бунинг аксини қилишга интилаётган ва бунга эришаётган минглаб газеталар, журналлар, нутқлар, маҳфий ва ошкора кенгашлар тўғри келади.

Ҳермина мени хайриҳоҳлик билан тинглади.

— Ҳа, — деди у нихоят, — сен ҳақсан. Албатта, яна уруш бўлиши муқаррар, буни билиш учун газеталарни ўқиш шарт эмас. Албатта, бу жуда қайгули, бироқ қайтурганинг билан фойдаси йўқ. Бу худди ўлимга ўхшаб кетади, ийғлаб-сиқтаб, хафа бўлганинг билан, барибир, ўлим ҳақ, бир кун ўлиш бор. Ўлимга қарши кураш, азизим Ҳарри, ҳамиша гўзал, олийжаноб, ажойиб ҳамда хурмат-иззатга сазовор ишдир, бинобарин, урушга қарши кураш ҳам худди шундай. Бироқ у ҳамиша умидсиз, иложсиз, бедаво Дон Кихотликдир.

— Эҳтимол, бу түғридир, — дедим кескин оҳангда, — лекин барчамизга бир кун ўлиш бор экан деб, беларво ва лоқайд, тек қараб тураверсак, унда ҳаётимиз нотўғри изга тушиб, ҳаммаёқнинг расвоси чиқиб кетмайдими! Нима, энди ҳамма нарсага қўл силтаб, барча ақл-тафаккурдан, барча интилишлардан, барча одамгарчиликдан воз кечиб, пул ва шухратпарамастлика жиловни бериб қўйиб, пиво ичиб, кейинги сафарбарликни кутиб ўтираверишимиз керакми?

Хермина менга фалати қараб қўйди, унинг нигоҳида эрмак, киноя, шумлик, қувлик, муғамбирлик ҳамда ўртоқларча хайрихоҳлик, шу билан бирга вазминлик, огохлик ва ўта жиддийлик мужассам эди.

— Йўқ, бундай қилмайсан, — деди у бутунлай она-ларга хос оҳангда. — Агарки, сен курашинг бесамар, беҳуда эканлигини билсанг, шу туфайли ҳам ҳаётинг нотўғрилик ҳамда аҳмоқоналиқдан мосуво бўлади. Агар сен, Ҳарри, бирор яхши ният ва омол учун курашиб, унга албатта эришаман десанг, унда янада нотўғрирок кетган бўласан. Омollар уларга эришиш учунгина яратилганми? Нима, биз — инсонлар ўлимга чек қўйиб, уни бартараф этиш учун яшаймизми? Йўқ, биз ундан қўрқиб ва уни яна севиш учун яшаймиз, худди шунинг учун ҳам бу нажотсиз, рўшнолик йўқ ҳаёт гоҳи-гоҳида кўзингга шунақаям чиройли кўриниб, гўзаллашиб, яшнаб кетади. Сен ҳалиям боласан, Ҳарри. Энди буларни қўй, бугун ишимиз жуда кўп. Мен бугунча уруш ва газеталарнинг ташвишини эсимдан чиқармоқчиман. Сен-чи, сен нима дейсан?

О, албатта, мен ҳам бунга тайёр эдим.

Биз биргалашиб — бу бизнинг шаҳар бўйлаб илк бор бирга юришимиз эди — ноталар дўконига кирдик, патефонларни кўздан кечириб, бирини қўйиб, бирини очиб-ёпиб, текширтириб кўрдик, биттасини — нархи арzonроғини маъқул топиб, харид қилмоқчи бўлгандим, Хермина кўнмади. У мени қайтариб, иккинчи бошқа бир дўконга бошлади, бу ерда ҳам бир бошидан — энг қим-

мати-ю, энг арzonигача кўриб, ишлатиб, текшириб чиққанимиздан сўнг, ниҳоят, яна биринчи дўконга қайтиб бориб, олдин кўрган патефонимизни сотиб олишга рози бўлди.

— Ана, кўрдингми, — дедим, — бекорга овора бўлдик.

— Сен ҳали шундай деб ўйлаяпсанми? Агар эртага шу нарсани бошқа бир витринада йигирма франк арзонига учратиб қолсак, унда нима бўларди? Бундан ташқари, нарса харид қилишнинг ҳам ўзига яраша гашти бор, шундай бўлгандан кейин, гаштини суриш керак. Сен ҳали кўп нарсани ўрганишингга тўғри келади.

Патефонни ҳаммол ёрдамида менинг хонамга олиб келдик. Ҳермина хонамни кўздан кечиаркан, печка билан диванни мақтади, ўриндиқларни ушлаб кўрди, китоблар билан танишди, маҳбубамнинг фотосурати олдида эса узок туриб қолди. Патефонни комод устига, китоблар уюми ўртасига ўрнатдик. Шундай қилиб, рақс сабоқларим ҳам бошланди. Қиз фокстрот мусиқаси садолари остида биринчи қадамларни қандай ташлашни кўрсатиб, қўлимдан тутиб, бошлаб кетди. Мен ҳам итоаткорона у билан бориб-келардим. Буйруқлар янграп, мен эса уларни тушунмасдим, ўриндиқларга туртиниб-суртиниб, қизнинг оёқларини босиб олардим, қисқаси, қанча тиришмай, ҳаракатларим шунча қўпол ва нўноқ чиқарди. Иккинчи рақсдан сўнг Ҳермина ўзини диванга ташлади ва ёш болага ўхшаб кулиб юборди.

— Вой худойим-ей, намунча қўпол бўлмасанг! Худди сайр қилаётгандек қадам ташла-кўй! Кучаниб нима қиласан? Ўзиям, ёниб кетгандирсан-а? Хўп майли, беш дақиқа танаффус! Кўрдингми, рақс тушиш ҳам, агар қўлингдан келса, худди фикрлашга ўхшаган оддий нарса, уни ўрганиш хийла осон. Мана, ҳозир одамлар ўйлаб-нетиб ўтирмасдан Ҳарри Ҳаллерни ватан хоини деб атаб, навбатдаги урушга бамайлихотир йўл очиб бераетганига ҳам чидаб, сабр қилиб ўтирибсан-ку.

Бир соатдан сўнг у кетди. Хайларлашаётиб, кейинги гал ишларимиз анча яхши бўлади, деб ишонтирди. Ме-

нинг эса бу ҳақда фикрим бошқача эди, ўзимнинг тен-таклигим ва қўполлигимдан ҳафсалам пир бўлган, шу ўтган бир соат ичидан ҳеч нарса ўрганмагандек эдим, қолаверса, бошқа сафар ҳам ишим юришиб кетишига ишонмасдим. Йўқ, рақс тушиш учун ҳам одамда қобилият бўлиши керақ, менда эса улар: қувноқлик, маъсумлик, бегам-беташвишлик, завқ-шавқ етишмасди. Бу нарса ўзимга азалдан маълум эди.

Бироқ буни қарангки, кейинги гал ҳақиқатан ҳам ишларимиз юришиб кетди, ҳатто ўзим ҳам анча ҳузур қиладиган бўлдим. Дарс тугагач, Ҳермина «мана, фокстротни ҳам ўрганиб олдинг», деди. Аммо у шундан келиб чиқиб, эртасига ўзи билан бирга ресторанга бориб, рақс тушишим кераклигини айтган эди, гапнинг очиги, қўркиб кетдим ва зўр бериб эътиroz билдира бошладим. Бунга жавобан қиз совуққина қилиб, итоаткорлик ҳақидаги тантанали ваъдамни эслатди ва эртасига мени «Баланс»* меҳмонхонасиға чойга таклиф қилди.

Ўша оқшом уйда ўтириб, китоб ўқимоқчи бўлдим, ўқиёлмадим. Нега десангиз, эртани ўйлаб, юрагимга гулфула тушганди: мен, қари, юраксиз ва табиати нозик, инжиқ одамови энди бир камим жаз мусиқаси янграб турадиган бундай бефайз замонавий чойхона ва раксхоналарга бориб, бегона одамлар олдида рақс тушишим қолувдими, ахир, кошки бу нарса қўлимдан келса... Ишонсангиз, бир ўзим хонамда патефонни қўйволиб, пайпоқчан фокстротни машқ қилиб, ўйнаганимга ўзимдан-ўзим уялиб, ўз устимдан роса кулдим...

Эртаси куни «Баланс» меҳмонхонасида мўъжазгина капелла** ўйнаб турар, дастурхон тузалган, унга чой ва виски қўйилган эди. Ҳерминанинг кўнглини овламоқчи бўлиб, уни пирог билан сийладим, тоза шароб таклиф қилдим, бироқ у унамади.

* «Баланс» – Щорихдаги меҳмонхона номи.

** Капелла – хор ёки хор билан мусиқачиларнинг биргаликдаги жамоаси.

— Бу ерга майшат қилиш учун әмас, рақс дарсига келгансан.

Мен қиз билан икки-уч бор рақс тушдим, бу орада мени саксофон чалувчи билан танишириди. У қорача, келишган ёш йигит бўлиб, асли испан ё жанубий амриқолик эди. Қизнинг айтишича, у барча мусиқа асбобларини чала олар, дунёning барча тилларида сўзлашарди. Кўринишдан бу сенъор* Хермина билан жуда яқин дўст эди. Унинг олдида турли катталиқдаги саксофонлар турар, уларни галма-галдан чаларкан, чакнаб турган кўзлари рақс тушаётганларни дикқат билан мамнун кузатарди. Ажабланарлиси шу эдики, бу беозор, ёқимтой мусиқачига нисбатан ўзимда қандайдир рашкка ўхшаш ҳиссиёт туйдим, бу ишқий әмас, чунки мен билан Хермина ўртасида муҳаббат деган нарса умуман йўқ эди, бу кўпроқ дўстона рашкка ўхшаб кетарди, зеро, йигитнинг одамни қизиқтирадиган, алоҳида ажралиб турувчи хусусиятлари кўзга ташланмас, қизнинг унга кўрсатаётган ҳурматига ҳам унча муносиб әмасдек туюларди.

Фалати, қизиқ одамлар билан танишишимга тўғри келаркан-да, ўйлардим маъюсланиб.

Кейин Херминани оралатиб рақсга таклиф қилишди, мен эса чой ичиб, мусиқа тинглаб ёлғиз ўзим ўтиридим. Бундайин мусиқаларни ўзи азалдан эшишишга сира тоқатим йўқ эди. «Эҳ, художон», ўйлардим ўзимча, наҳот энди бекорчи ва майшатпараст одамларнинг ўзим учун бу қадар ёт, бегона ва ёқимсиз бўлган жирканч дунёсига, мармар столчалар, жаз мусиқаси, ўйнаш ҳисобига кун кўрадиган суюқоёқ аёллар ҳамда коммивояжёрларнинг** саёз ва сийқа оламига элакишиб, мослашишимга тўғри келса, ахир мен ўзимни улардан шу пайтгача иложи борича олиб қочиб, чап бериб келардим-ку! Хафа бўлиб, чой ҳўпларканман, яrim башанг оломонга разм солдим. Рақс тушаётганлар орасида иккита чиройли қиз

* Сенъор – жаноб, таксир, афанди (исп.)

** Коммивояжёр – хусусий корхона ёки фирма молларидан нусха кўрсатиб, шаҳарма-шаҳар буюртма тўпловчи вакил, гумашта.

диққатимни тортди, иккалови ҳам яхши раққоса эди, уларга ҳайрат ва ҳавас билан бөздим — улар силлик, равон, гүзәл, қувноқ ва дадил рақс тушишарди.

Шу пайт Ҳермина келди, у мендан домангир бўлиб, койиб берди; бу ерда ўшшайиб ўтириш ўрнига ўзимни қўлга олиб, дадил бўлиб, рақс тушишим керак экан. Нима, ҳеч кимни танимас эканманми? Бунинг ҳожати ҳам йўқ эди. Ахир, бу ерда менга ёқадиган қизлар қуриб кетибдими? Унга шундоққина ёнимизда турган, бошқаларга қараганда гўзалроқ, баҳмал юбкачаси ўзига ярашган, калта қилиб қирқилган оқ-малла сочли, қўллари дўмбоққина бир қизни кўрсатдим. Ҳермина ҳозироқ ўша қизнинг олдига бориб, уни рақсга таклиф қиласан, деб туриб олди. Мен мушкул аҳволда қолиб, унга эътиroz билдиридим.

— Ахир, қўлимдан келмайди, — дедим шўрим қуриб. — Келишган ёшгина йигит бўлганимда ҳам бошқа гап эди! Қари, серрайган лақма бўлсан, рақс тушиш қўлимдан келмаса — устимдан кулмайдими?!

Ҳермина менга нафрат билан тикилди.

— Мен устингдан кулсан майли, шундайми? Қанақанги қўрқоқ одамсан ўзи? Қиз болага яқин борган ҳар қандай одам таваккал қиласди — бошланиши ўзи шундай бўлади. Сен ҳам таваккал қил, Ҳарри, ҳеч бўлмагандан устингдан кулишсин, майли — акс ҳолда сенинг итоаткорлигингга бўлган мендаги ишонч тамом бўлди деявер.

Қарасам, сира бўш келмайдиган. Танг аҳволга тушиб, юрагим пўкиллаб ўрнимдан турдим ва мусиқа қайта бошланиши билан гўзал қизга аста яқинлашдим.

— Аслида бўш эмасман, — деди қиз, қувноқ қўзлари билан қизиқсиниб боқаркан, — йигитим ҳов барда бир оз ушланиб қолди, шекилли. Ҳа майли, кела қолинг!

Мен қизни белидан қучиб, илк қадамларни ташладим, у менга йўқ демаганига ҳайрон эдим. Қиз менинг аҳволимни сезди, шекилли, ташаббусни ўз қўлига олди. У ажойиб рақс тушарди, мен эса, рақс қоидаларини бир

зумда унутиб, у билан шунчаки бориб-кела бошладим. Унинг гул-гул очилиб, ёниб турган ёшгина чехрасидан кўз узолмасдим. Унга бугун ҳаётимда илк бор рақс тушиётганимни айтган эдим, қиз жилмайиб, мени рухлантирди, мафтун нигоҳим ва мақтov сўзларимга унсиз, ноzik ва жозибадор ҳаракатлар билан жавоб қайтараркан, биз бир-биримизга янада яқинлашдик. Ўнг қўлим билан қизнинг белидан маҳкам қучиб, оёклари, қўллари ва елкалари ҳаракатларига монанд равишда масъуд ва файрат билан тебраниб, еларканман, унинг оёғини бирор мартаам босиб олмаганимга ўзим ҳам ҳайрон эдим. Мусиқа ниҳоясига етгач, икковимиз ҳам турган жойимизда қарсак чалиб турдик, рақс яна бошлангач, биз ҳам завқшавқ билан давом эттиридик.

Рақс жуда тез тугади. Бахмалдек майин, гўзал қизни кучофимдан бўшатдим. Тўсатдан ёнимда Ҳермина пайдо бўлди, у бизни кузатиб турган экан.

— Хўш, нимани сездинг? — мақтov оҳангida кулди у. — Аёлларнинг оёклари стол оёкларидан фарқ килишини энди билгандирсан? Ундей бўлса, баракалла! Худога шукур, фокстротни ўрганиб олдинг, эртага Бостонга қараб жўнаймиз. Уч ҳафта ичида глобус залда бал-маскарад ҳам бошланиб қолади.

Танаффус эълон қилингач, биз ўтиридик, шунда саксофон чалувчи, ёш, ёқимтой жаноб Пабло келиб қолди, бизга бош иргаб, Ҳерминанинг ёнига ўтириди. Афтидан, у қиз билан қалин дўст эди. Менга эса, очигини айтсам, ўша илк бор учрашганимиздаёқ бу жаноб мутлақо ёқмаганди. Тўғри, у келишган йигит эди, бўй-басти, афтбашараси ҳам ўзига ярашган, бироқ унда бундан ортиқ фазилатларни топа олмадим. Кўп тилни билишига келсак, бу борада ҳам у сира жон койитмасди, яъни марҳамат, раҳмат, худди шундай, албатта, алло, алё сингари сўзлардан нарига ўтмасди, худди шу сўзларни бор-йўфи бир нечта тилда айта оларди, холос. Йўқ, сенъор Пабло

күп гапирмасди, бу ёқимтой кабальеро* кўринишдан у қадар кўп ўйламасди ҳам. Унинг қиладиган иши жаз капелласида саксофон чалиш эди. Бу касбга меҳр-муҳаббат, завқ-шавқ, иштиёқ-ла берилгани кўриниб турарди. Мусиқа чалаётганида баъзан кутилмагандек чапак чалиб ҳам қўяр ёки бўлмасам, курсанд эканлигини бошқача тарзда намоён қиласди, яъни, худди қўшиқ айтатгандек қилиб: о-о-о, а-а-а, алё!.. Булардан ташқари, унинг чиройли бўлиб юриш, аёлларга ёқиши, яхши кўриниш, энг янги модадаги ёқа ва бўйинбог, бармоқларига кўплаб узуклар тақишидан бошқа дунёда қиладиган ҳеч бир ишташвиши йўқдек эди. Унинг эрмаги шу эдикি, олдимизда ўтирволиб, бизга жилмаяр, тез-тез қўл соатига қараб қўяр, қўлида сигареталарни айлантиради — бу ишларнинг у жуда ҳадисини олган эди. Унинг креолларга** хос бўлган чиройли қорамтири кўзларида, қора патила соchlарида на романтика, на бир муаммо ва на фикрлар мужассам эди — яқиндан яхшилаб разм солинса, бу келишган фалати, файриоддий ярим авлиё ва ёқимли қиликлар қилувчи бир оз талтайган ўсмир эди, бошқа ҳеч нарса эмас. Мен у билан мусиқа асблолари ҳамда жаз мусиқасидаги товушларнинг ўзига хос сифатлари ҳақида гаплашдим, мендек ёши улуф мусиқа шинавандаси ва билимдонини ҳам бир кўриб қўйсин, дедим-да. Бироқ у бу ҳақда лом-мим дея олмади, шунда мен унга ёки тўғрироғи, Херминага нисбатан одоб юзасидан жаз мусиқаси назарияси хусусида гап бошлагандим, у менга ва менинг бу саъй-ҳаракатларимга жавобан беозор жилмайиб қўяқолди, афтидан, менга шундай туюлдики, бу дунёда жаздан олдин ва ундан ташқари бошқа мусиқалар ҳам бўлганлигини у мутлақо билмасди. У хушмуомала, шириңсўз ва мулојим эди, кўзлари катта, улар чиройли ва бемаъно кулиб турарди; бироқ у билан ўртамиизда ҳеч қандай муш-

* Кабальеро — кавалер, югит, хуштор, ошиқ (исп.).

**Креол (лар) — мустамлакачи испан ва португалларнинг Лотин Амриқосида туғилган биринчи авлоди; умуман, Лотин Амриқосида дунёга келган оврўпалик.

тараклик йўқдек эди — унинг учун муҳим ва муқаддас бўлган нарсалар мен учун ҳам шундай бўлиши мумкин, бироқ бизнинг тупроғимиз бир-бирига қарама-қарши дунё қитъаларидан олинган, тилларимиз ўртасида ҳам ҳеч қандай умумийлик йўқ (кейинчалик Ҳермина менга фалати гап айтиб қолди. Ўша сухбатдан сўнг Пабло мен ҳақимда гапириб, каминанинг ғоят баҳтсиз одам эканлигимни, шунинг учун ҳам мен билан эҳтиёт бўлиб муомала қилишини тайинлабди. Буни қаёқдан билдинг, деб сўраса: бечора, ночор одам... кўзларини қара, кулолмайди, деганмиш).

Коракўз биз билан хайрлашиб кетгач, яна мусиқа бошланди. Ҳермина ўрнидан турди:

— Мен билан рақс тушмайсанми, Харри? Ё тушгинг келмаяптими?

У билан ҳам, гарчи анов қиз билан тушган пайтдагига ўхшаб у қадар берилиб ва баҳтиёр бўлмаса-да, ҳар ҳолда енгилроқ, эркинроқ ва қувноқроқ рақс тушдим. Ҳермина мени бошлаб кетди, у худди гул япрогидек нозик ва енгил ҳаракат қилас, энди ундаги барча ўша дам намоён бўлаётган, дам ғойиб бўлаётган гўзалликларни ҳам кашф этиб, ҳис қила бошлагандим, ундан ҳам аёллик ва муҳаббат нафаси уфуриб туар, унинг тушаётган рақси аёлликнинг гўзал мафтункор қўшифи бўлиб янграр — бироқ мен буларнинг барчасига бутунлай эркин ва қувноқ жавоб қайтара олмасдим, ўзимни тўлик унутиб, бутун вужудим билан берилиб кета олмасдим. Ҳермина менга ниҳоятда яқин, у менинг ўртоғим, синглим, менга ўхшаган, ўзимга ва ёшлиқдаги дўстим Ҳерманнга, фидойи инсонга, шоирга, менинг маънавий машқларим ҳамда бузуқликларимнинг оташин ҳамрохи, йўлдoshимга ўхшаб кетарди.

— Буни биламан, — деди у, кейинроқ унга бу ҳақда сўз очганимда. — Буни яхши биламан. Мен ҳали сени ўзимга шунай мафтун қилайки, ўзинг севиб, ошиқ бўлиб қоласан, лекин ҳали бунга вақт эрта. Энг аввало, биз ўртоқлармиз, дўст бўлиб қолишга умидвор одамлармиз,

чунки бир-биримизни яхши таниб олганмиз. Энди биз иккаламиз бир-биримиздан ўрганамиз ва бир-биримиз билан ўйнаймиз. Мен сенга ўзимнинг мўъжазгина театримни намойиш этаман, сени рақс тушишга ва бир оз қувноқ ҳамда тентак бўлишга ўргатаман, сен эса ўз фикрларинг ва билимларингни мен билан баҳам кўрасан.

— Эҳ, Ҳермина, сенга нимаям кўрсата олардим, ўзинг мендан кўра кўпроқ нарсани биласан-ку. Қандай фалати одамсан-а, сен қизгина! Ҳар соҳада мени тушунасан ва мендан илгарида юрасан. Нима, мени қўлидан бирор иш келади, деб ўйлаяпсанми? Ахир, шундоғам жонингга тегиб кетмадимми?

У тумшайиб, қовоғи осилиб, ерга қаради.

— Бунақа гапдонлигингни билмаган эканман. Ўша оқшом эсингдами, изтироб ҳамда ёлғизликдан дабдаланг чиқиб, ҳорғин ва тушкун бир кайфиятда ўзинг йўлимдан чиқдинг ва мен билан дўстлашдинг! Ўшанда нима учун сени дарров таний қолдим ва тушуна олдим, биласанми?

— Нима учун, Ҳермина? Айта қол!

— Чунки мен ҳам худди сенга ўхшаб ёлғизман, ҳаётга, одамларга ва ўз-ўзимга худди сенга ўхшаб, у қадар кўнгил қўя олмайман, буларни жиддий қабул қила олмайман. Ҳаётдан жуда кўп нарсани талаб қилиб, ўзларининг аҳмоқликлари ҳамда қўполликлари билан келишолмайдиган, чиқишолмайдиган одамлар ҳам доимо учраб туради.

— Шу сенмисан?! — дедим ҳайратимни яшиrolмай. — Менгина сени тушунаман, оғайни, ҳеч ким сени менчалик тушунолмайди. Бироқ, барибир, сен мен учун жумбоқсан. Сен ҳаётга шунчаки бир ўйиндек қарайсан, майда нарсалар ва лаззатларни эса атайлаб ажойиб бир тарзда эъзозлайсан, сен ҳаётда усталик билан яшайсан. Қандай қилиб сен ҳаётдан изтироб чека оласан? Қандай қилиб тушкунликка туша оласан?

— Мен тушкунликка тушмайман, Ҳарри. Лекин ҳаётдан изтиробланишга келсак, о, бу борада тажрибам етарли.

Сен менинг бахтли бўлмаганимга ҳайрон бўлаяпсан, чунки мен рақс туша оламан, ҳаётнинг паст-баландини яхши тушунаман. Мен эса, дўстим, сен энг гўзал ва теран нарсаларни яхши била туриб, санъат, ақл-тафаккур билимдони бўлатуриб, ҳаётдан шу қадар кўнглинг қолиб, ихлосинг қайтганига ҳайрон бўлаяпман! Шунинг учун ҳам биз бир-бириизга хайриҳоҳмиз, шунинг учун биз ака-сингилмиз. Мен сени рақс тушишга, ўйнашга ва табассум қилишга ўргатаман, бироқ мамнун бўлишга эмас. Сендан эса билим ва тафаккурни ўрганаман, мамнун бўлишни эмас. Биласанми, иккаламиз ҳам Иблис болалири эканлигимизни?..

— Ҳа, биламан. Биз бебаҳт фарзандларимиз. Биз Табиат бағридан ажраб тушиб қолганмиз ва энди бўшлиқда муаллақ осилиб турибмиз. Ҳозир бир нарса эсимга тушди. Мен сенга хикоя қилиб берган Чўл бўриси трактатида шундай гап бор: Ҳарри ўзини бир ёки икки жон, руҳдан, бир ёки икки шахсадан иборат деб ўйлаши, бу унинг ўй-хаёли дейилади. Аслида эса Инсон ўн, юз, минглаб рух, жонлардан таркиб топган экан.

— Бу ғоят маъқул гап, — деди Ҳермина. — Масалан, сенда маънавий нарсалар, ақл-заковат жуда юксак ривожланган, шунинг учун ҳам турли-туман майдада турмуш санъатлари соҳасида ниҳоятда орқада қолиб кетгансан. Мутафакир Ҳарри юзга кирган, рақкос Ҳаррининг туғилганига эса ҳали ярим кун ҳам бўлгани йўқ. Мен энди уни ва унинг ўзига ўхшаган кичкина, ақли кирмаган ва вояга етмаган барча ака-укачаларини ҳам тарбияламоқчиман.

У менга жилмайиб қараб турарди. Сўнг секин, ўзгача овоз билан сўради:

- Хўш, Мария сенга ёқдими?
- Мария дейсанми? Ким ўзи у?
- Сен билан бирга рақс тушди-ку, ўша қиз. Ўзиям гўзал, жа кетворган қиз-да. Кўзим тушгандай бўлди, уни севиб қолдинг шекилли.
- Уни танийсанми?

— О, албатта, биз бир-биримизни жуда яхши таниймиз. Унга аҳамият бердингми ўзи?

— У менга ёқди, рақс тушишимга сабр-тоқат қилиб, кўнгилчанлик қилганидан хурсанд бўлдим.

— Шугина холосми! Сен унинг бир оз кўнглини овлашинг керак эди, Ҳарри. У жуда дилбар, гўзал қиз, рақсга шунақаям тушадики... балки уни севиб ҳам қолгандирсан... Омадингни берсин.

— Э йўқ, иззат-нафсимга эрк бермадим.

— Энди мени алдаяпсан. Дунёнинг қаеридаdir маҳбуланг борлигини, уни яrim йилда бир кўриб туришингни, ўшанда ҳам жанжалдан ортмаслигингни биламан-ку. Агар бу ажойиб аёлга содик қолмоқчи бўлсанг, унда зўр марҳамат қилган бўласан, лекин мени кечиргин-у, буни у қадар, бутунлай жиддий қабул қилмагин! Умуман, сен севгини даҳшатли бир тарзда жиддий қабул қиласан, деб кўрқаман. Қандай севиш, албатта, сенинг ишишинг, хоҳлаганингча сев, бу билан ишим йўқ. Мени ташвишга солган нарса шуки, турмушдаги майда, енгил санъат ҳамда ўйин турларини ҳам яхшироқ ўрганиб олишинг лозим, бу соҳада ўзим сенинг муаллимангман ва сенга ўша идеал маҳбулангдан кўра ҳам яхшироқ муаллима бўламан, бунга ишонавер! Сен ўша гўзал қиз билан бир кеча бирга бўлишинг керак, чунки бу сенга жуда ҳам зарур, Чўл бўриси.

— Ҳермина! — қичқирдим мен изтиробга тушиб. — Нималар деяпсан, ахир мен қари одам бўлсам.

— Ёш боласан ҳали. Рақсни ўрганишда ҳам ана шунақа эринчоқлик қилиб, вақтни ўтказиб юборгансан. Севишини ўрганишда эса яна суст бўлгансан, э дўстим, сен ҳали гўзал ва мукаммал, идеал ва фожиали тарзда сева олишга қодирсан, бунга шубҳам йўқ, шундай экан, буни қадрига этиш, муносиб равишида қадрламоқ керак! Шу баҳона, одамларга ўхшаб севишини ҳам бир оз ўрганиб оласан. Энди сени балга ҳам bemalol тавсия этиш мумкин. Хўш, ҳали яна бостонни ўрганишингга тўғри келади, буни эртагаёқ бошлаймиз. Мен соат учда келаман. Дарвоқе, бу ердаги мусиқа сенга ёқдими?

— Аъло.

— Кўрдингми, бу ҳам ҳарна ютуқ. Ўрганганинг қолади. Шу пайтгача мазкур ракс ҳамда мусиқасига тобтоқатинг йўқ эди, у сенга етарли даражада жиддий ва теран эмасдек туюларди, мана, ўзинг кўрдинг, уни жиддий қабул қилишнинг сирам кераги йўқ экан, бусиз ҳам у ғоят ёқимли ва жозибали бўлиб қолавераркан. Шундай бўлса-да, барибир, Паблосиз капеллани тасаввур қилиб бўлмайди. Унга раҳбарлик қиладиган ҳам, уни ҳаракатга келтирадиган, қиздирадиган ҳам ўзи.

Патефон мендек тарки дунё қилган бир зоҳиднинг маънавий ҳаётини алғов-далғов қилиб юборгани, амриқо рақслари авайлаб-ардоқлаб келинган мусиқий оламимга суқилиб кирволгани сингари, шу пайтгача маҳдуд ва бетартиб кечган ҳаётимга ҳам энди ҳар тарафдан нимадандир фориғ этувчи, шу билан бирга қандайдир қўркув ўйфотувчи янгилик кириб кела бошлаганди. Чўл бўриси ва Ҳерминанинг Инсон минглаб жон, руҳлардан таркиб топғанлиги тўғрисидаги таълимоти ҳақ эди; вужудимдаги азалий жонлар қаторида баъзи бир янгилари ҳам кундан-кунга бош кўтариб, шовқин солиб, қандайдир даъво, талаблар билан чиқа бошлаган, кўз олдимда ўзимнинг шу пайтгача бўлган шахсиятимдаги васвасалар энди сурат янглиғ аниқ-таниқ кўриниб туарди. Энди билсан, ўзимдаги бир қанча қобилият ва машқларни ишга солиб, Ҳаррининг суратини чизган ҳамда Ҳарри бўлиб яшаган эканман, у шеърият, мусиқа ва фалсафадан ўткир ва билимдон мутахассисгина эди, холос, бошқа ҳеч нарса эмасди — шахсимнинг қолган бутун бўлаги, қобилияtlар, иштиёқ ва интилишларимнинг қолган барча тартибсизлик ва чалкашликлари мен учун ортиқча эди, улар меъдамга теккан ва мен уларни Чўл бўриси деб номлаган эдим.

Бироқ, барибир, бу васвасадан юз ўгириш, ундан қайтиш ва уни ўзгартириш, шахсиятимнинг таназзулга юз тутиши — ҳеч қандай ёқимли, мароқли ва қувноқ саргузашт эмасди, аксинча аччик ва аламли, баъзан унга

хатто чидаб ҳам бўлмас эди. Патефоннинг хонамда туриши чиндан-да фалати эди, у бу маъвога маккорона, шайтоний рахна солаётгандек туюларди. Гохида, мода бўлган қандайдир ресторанларда, башанг кийинган майшатпараст ва қаллоб-муттаҳамлар даврасида вонстеп рақсига ўйнаган пайтларимда ўзимни ҳаётимдаги ҳурматиззатга сазовор ҳамда муқаддас саналиб келган барча нарсаларга худди хиёнат қилаётгандек сезардим. Агар Хермина каминани атиги бир ҳафтагина ёлғиз қолдирганда эди, бойваччаларнинг бу зерикарли, майда ва кулгили машғулотларини елкамнинг чукури кўрсин, дея ташлаб қочган бўлардим. Бироқ Хермина уззукун шу ерда эди; гарчи уни ҳар куни кўрмасам-да, у мени, барибир, кўздан қочирмасди, у мени бошқарар, пойлар, кўз-кулоқ бўлиб, фикрини мунтазам билдириб турарди, менинг бўйсунмаслик ва қочиш ҳақидаги ўй-хаёлларимни эса кулиб туриб, юз-кўзларимдан билиб оларди.

Мен ўзим илгари ўз шахсиятим деб атаган нарсанинг бора-бора емирилиб бориши билан, барча умидсизлик, руҳий тушкунликларга қарамасдан ўлимдан нега бу қадар даҳшатли тарзда қўрқишимнинг сабабини ҳам тушуна бошладим ва шунда англадимки, шармандали ва жирканч ўлим ваҳимаси ҳам аслида азалий, мешчан ҳамда алдамчи тириклигимнинг, умримнинг бир бўлаги экан. Шу пайтгача мавжуд бўлган бу жаноб Ҳаллер, мазкур истеъододли ижодкор, Моцарт ва Гётени яхши биладиган одам, санъат метафизикаси, даҳолик ҳамда фожиавийлик, инсонийлик ҳақида ўқишига арзигулик ўй-фикр ва мулоҳазалар муаллифи, кулбаси китоблар билан лиқ тўла бу дилгир дарвеш муттасил равишда ўз-ўзини танқидга берилиб кетиб, ҳеч каерда ўзини кўрсатмай келган. Бу истеъододли, қизиқ жаноб Ҳаллер ақл-идрок ва инсонийликни тарғиб қилиб, уруш шафқатсизликларига қарши норозилик билдирган, бироқ у ўзини отиб ташлашларини кутиб ўтирумай, аслида унинг тафаккури оқибатлари шуни тақозо этарди, ўта бамаъни ва албатта, олийжаноб бир тарзда вазиятга мослашади, буни муросаю мадора

йўли дейиш ҳам мумкин эди. Қолаверса, у ҳокимият ва зулмга қарши эди. Унинг банкда саноат корхоналари томонидан чиқарилган қимматли қофозлари бўлиб, улардан келадиган фоиз (даромад)лар ҳисобига виж-дон азобисиз кун кўриб келарди. Хуллас, ахволот шундай эди. Чунончи, Ҳарри Ҳаллер мўъжизавор тарзда хаёлпараст ва дунёдан нафратланувчи, фамгин қаландар ҳамда кек сақловчи, дарғазаб авлиё либосига бурканиб олганди, бироқ аслида у буржуй эди. Ҳерминаникига ўхшаш ҳаётни номуносиб, ахлоқсизлик деб ҳисоблар, ресторонларда бехуда ўтказилган тунларга, худди ўшанақанги жойларда совурилган талерларга* ачинар, аччиғи чиқарди. Ўзини пок-покиза, покдомон ҳисобламас-са-да, зинҳор баркамоллик, мукаммаллик сари интилмас, аксинча, ўзининг руҳий, ақлий эрмаклари билан овунган ва улар унга шуҳрат келтирган ҳаловатли дамларини эслаб, қўмсар эди. У масҳаралаб, майна қилган газет-хонлар ҳам урушдан олдинги идеал замонни худди шундай қўмсардилар, чунки аввал бошдан кечириб кўриб, ундан кейин сабоқ олгандан кўра бу қулайроқ эди. Эҳ, жин урсин, меъдага тегиб кетди-ку бу жаноб Ҳаллер! Бироқ шунга қарамасдан, мен ҳамон унга ёки унинг кўздан фойиб бўлаётган шарпасига, ақлини пеш қилиб, мақтанишларига, бетартиблиқ ва тасодифийлик (ўлим ҳам шунга мансуб эди) олдидаги фуқароларга хос қўркувига ёпишволиб, янги вужудга келаётган Ҳаррини, ракс-хоналарга энди-энди ўрганаётган бир оз уятchan ва фалати юзаки ҳаваскорни профессорникида Гёте суратини кўриб, дили оғриган ўша аввалги сохта идеал Ҳарри сурати билан киноя ҳамда зўр ҳавас-ла солишириардим. Мундоқ қараганда, ўша аввалги Ҳарри ҳам мешчанларча идеаллаштирилган Гётенинг, ясан-тусан ҳамда ўз кўнгил аристократиясидан ҳаяжонга тушган, юз-кўзларида улуғворлик, рух ҳамда инсонийлик барқ уриб турган, нигоҳида олийжаноб мужассам даҳо, ақл-заковат соҳибининг худди ўзи эди!.. Оббо, бу гўзал сурат ҳам бузила бош-

* Талер – эски немис кумуш тангаси.

лаганди, идеал жаноб Ҳаллер аянчли бир аҳволда қисмларга ажратиб ташланган эди! Кўча қароқчилари томонидан таланганд мансабдорга ўхшаб, шимлари йиртилиб, титилиб кетганди, агар у ҳозир, ҳалиям худди орденлари осилиб тургандек, жулдур кийимларини кийиб юрган ва қўлдан кетган мартаба-mansabinи, ном ва унвонини маъюс, фамгин даъво қилаётган ялангоёқ жулдуровкининг ролини ёдлай бошлаганида, ақлли иш қилган бўлар эди.

Мен ҳамон мусиқачи Пабло билан тез-тез учрашиб турардим. Шунинг учун энди у ҳақидаги фикр-хulosани қайта кўриб чиқиб, ўзимча текшириб олишим керак эди, чунки Ҳермина уни жуда яхши кўрар ва ҳамиша унга томон талпинарди. Паблони ўзимча чиройли ноль рақами билан белгилаб кўйгандим. У менинг назаримда майда, манман ва ўзига бино қўйган олифта, ярмаркалардаги сингари пишиллаб труба (карнай) чалишдан бошқани билмайдиган қувноқ ва бегам-беташвиш бола эди. Уни мақтов, хушомад сўзлар ҳамда шоколад билан бемалол қўлга олса бўларди. Бироқ Пабло менинг фикр-хulosаларим билан қизиқмади, улар унинг учун худди мусикий назарияларим сингари барибир эди. У мени хушмуомалалик билан мулоим тингларкан, узлуксиз жилмаяр, аммо-лекин аниқ бир жавоб беришга шошилмасди. Афтидан, уни қизиқтириб қўйдим шекилли, менга яхши кўринишга ҳаракат қилиб, хайриҳоҳлик кўрсата бошлади. Бир гал ана шундай натижасиз сухбатларнинг бирида асабийлашиб, разабим ошди. Менинг қўполлашаётганимни кўриб, юзимга маъюс ва ҳайратланиб қаради-да, чап қўлимни олиб, уни аста силади, сўнг кичкинагина зарҳалланган тунука қутичадан бир нима олиб, менга ҳидлатмоқчи бўлди. Шунда Ҳерминага савол назари билан қарадим, у майли дегандек, имо қилди. Олиб, ҳидладим. Ҳақиқатан ҳам сал ўтмай, ўзимни тетик ва бардам ҳис қилдим, афтидан, у кокаин қукуни эди. Ҳермина менга айтганди. Пабло бунақа воситаларни яширин йўллар билан кўп миқдорда олиб тураркан, гоҳи-гоҳида дўстларига ҳам келтириб бераркан. Бунақангি нарсаларни аралаштириб, доза-

лашда устаси фаранг бўлиб кетган экан: оғриқ қолдириш дейсизми, ухлатиб қўйиш, ширин хаёл сурдириш дейсизми, хурсанд қилиш, севдириш дейсизми, хуллас, ҳамма иш қўлидан келаркан.

Бир куни уни қирғоқда, дарё бўйидаги кўчада учратиб қолдим, у ўзидан-ўзи менга эргашди. Ниҳоят, бу гал уни гапиришишга муваффак бўлдим. У қўлида ингичка қора кумуш таёқчани ўйнаб турарди.

— Жаноб Пабло, сиз Ҳерминанинг дўстисиз, шу туфайли сизга бўлган қизиқишим ортаверади. Аммо бир нарсани айтишим керак, сухбатингизни олиш жуда қийин бўляпти. Мен сиз билан мусиқа тўғрисида гаплашишга кўп марта уриниб кўрдим, чунки сизнинг бу хусусдаги фикрларингиз, эътиroz ва холосаларингиз мен учун фоят қизиқарли, лекин сиз зигирча жавоб қайтаришни ҳам эп кўрмай, бу ишни пайсалга солиб келмоқдасиз.

У менга қараб кулиб турди-да, совуққонлик билан лоқайд гап бошлади:

— Биласизми, менимча, мусиқа ҳақида гапиришдан ҳеч қандай маъно йўқ. Мен ҳеч қачон мусиқа ҳақида гапирмайман. Сизнинг ўта ақлли ҳамда тўғри сўзларингизга мен нима деб ҳам жавоб қайтаришм мумкин? Барча айтганларингиз жуда ҳам тўғри гаплар. Бироқ биласизми, мен мусиқачиман, олим эмасман, ва мен аминманки, мусиқада баҳслашиб-тортишишдан зигирча фойда йўқ. Мусиқада ким ҳақу ким ноҳақ, диди, маълумоти борми-йўқми ва ҳоказо, бу нарсаларнинг мутлақо аҳамияти йўқ.

— Хўш, унда ниманинг аҳамияти бор?

— Гап шундаки, бевосита мусиқа билан шуғулланмоқ лозим, жаноб Ҳаллер. Шуғулланганда ҳам имкони борича хўб ва соз, файрат билан, қизғин шуғулланиш керак! Гап мана шунда, мсье. Агар мен Бах билан Ҳайдн асарларини сув қилиб ичиб юборган бўлсам ва бу хусусда ақл бовар қилмайдиган нарсаларни билсаму, мусиқа чалолмасам, бу билан одамларнинг кўнглини олиб бўладими. Башарти мен карнайни қўлимгага олиб, уни ҳаммабоп шиммига мослаб чала бошласам, куй яхши ё ёмон

чиқиши мумкин, бироқ энди у одамларга қувонч бахш этади, одамларнинг вужуд-вужудига сингиб, уларни ҳатто ўйинга ҳам тушириб юборади. Гап мана шунда, холос. Бал залига бориб, узокроқ танаффусдан сўнг мусиқа яна бирдан шиддат билан гумбурлаб бошланган лаҳзада одамларга бир разм солинг — юзлари яшнаб, кўзлари чақнаб, оёқлари ўз-ўзидан ўйинга тушиб кетишини ана ўшанда кўрасиз! Мусиқанинг асл мақсад-вазифаси — мана шу.

— Жуда яхши, жаноб Пабло. Лекин фақат ҳистайғу қўзғатадиган, ҳиссий мусиқанинг ўзигина мавжуд эмас-да, маънавий-рухий мусиқа ҳам бор. Фақатгина шу лаҳзада, шу дақиқада ўйналадиган мусиқа эмас, балки бардавом яшайдиган ўлмас, умрбокий мусиқа ҳам мавжуд. Фараз қилайлик, кимдир каравотда ёлғиз ўзи ётибди, дейлик, шунда у сеҳрли флейта ёки Матфей* ижодидан бирор куйни хаёлан ҳам тинглай олади, мана шу ҳам, гарчи хеч ким флейта ёки скрипка чалмаган бўлса-да, мусиқа, агар билсангиз.

— Албатта, жаноб Ҳаллер. Ҳар оқшом кўплаб ёлғиз ҳамда хаёлпараст одамлар томонидан Йенинг ва Валенсия ҳам ана шундай унсиз тарзда худди аслидай тикла-нади; ёзув машинкаси билан ишловчи бечора котиба қиз ҳам идорада ўтирган кўйи, хаёлида вонстеп, бармоқлари билан тутгачаларни беихтиёр мусиқага монанд боса бошлайди. Сиз ҳақсиз, уларнинг барчаси ёлғиз одамлар ва мен уларнинг унсиз, соқов мусиқаларини, Йенинг бўладими, сеҳрли флейта ёки Валенсия бўладими, ҳавас қилмайман! Бироқ бу одамлар ўзларининг унсиз, танҳо мусиқаларини қаердан олишади? Албатта, улар буни биздан — мусиқачилардан олишади. Кимдир ўз уйчасида ўша мусиқа ҳақида ўйлаб, уни хаёлида қайтадан тиклаши учун у аввал ижро этилиши ва тингланиши, ана ундан сўнг тингловчининг қон-қонига сингган бўлиши керак-ку, ахир.

* Матфей — Инжилнинг тўрт афсонавий муаллифларидан бири.

— Фикрингизга қўшиламан, — дедим совуққина қилиб. — Лекин Моцарт билан энг янги фокстротни тенглаштириб бўлмайди-да. Одамлар учун илохий ва умрбоқий мусиқа ижро этишингиз ёки арzon-гаров, бир кунлик мусиқа чалишингиз — булар барибир эмас-ку.

Пабло овозимдан асабийлашганимни сезиб, дарҳол мулојимлашди, қўлимни эркалаб сийпади-да, фоят майин, юмшоқ овоз билан деди:

— Эҳ, мухтарам жаноб, бу масалада сиз бутунлай ҳақсиз. Моцарт билан Ҳайдн ва Валенсияни ўзингиз билib, ҳар бирини ўз ўрнига қўйишишингизга мен мутлақо қарши эмасман! Бу менга буткул барибир, қолаверса, буни мен ҳал қилмайман, буни мендан сўрашмайди ҳам. Эҳтимол, Моцартни яна юз йил куйлашар, Валенсиянинг эса бор-йўғи яна икки йил умри қолгандир, ким билади — бу ишни энди марҳаматли Тангрининг ўзига топширсак, ўзи одил ва барчамизнинг умримиз, шу жумладан, вальс ва фокстротники ҳам ўзининг қўлида, ўзи меҳрибон. Биз, мусиқачилар эса, ўз ишимизни қилишимиз, ўз бурч ҳамда вазифамизни адо этмоғимиз лозим: одамларнинг кўнгли шу лаҳза, шу дақиқада нимани туласа, шуни ижро этишимиз, ижро этганда ҳам имкон қадар соз ва гўзал ҳамда таъсирчан ижро этмоғимиз керак.

Мен хўрсиниб, якунлаб қўяқолдим. Бу одамга бас келиб бўлмас экан.

Баъзан янгилик билан эскилик, хузур ва азоб, кўркув ҳамда қувонч фалати бир тарзда бир-бирлари билан аралаш-қуралаш бўлиб кетарди. Дам осмону фалақда бўлсан, дам жаҳаннамда, қўпинча эса бир пайтнинг ўзида ўзими ни иккаласида ҳам юргандек ҳис қилардим. Қари ва ёш Ҳарри бир-бири билан тортишиб, жанжаллашишар, гоҳ муроса қилиб, тинчгина яшашарди. Баъзида қари Ҳарри гўё жон таслим қилгандек, бутунлай ўлган ва қўмилгандек туюлар, тўсатдан яна пайдо бўлиб қолар, буйруқлар берар ва зулм ўтказар, афтидан, у ҳамма нарсани яхшироқ биларди, кичкина, ёш Ҳарри эса уялиб-қимтиниб,

жимгина турарди. Гоҳида ёш Ҳарри ҳам бўш келмай, қариянинг бўғзидан олар, уни обориб-обкеларди, шунда оҳ-воҳ, дод-фарёд бошланар, жон талвасада хаёлидан яна устара ўтарди.

Бироқ кўпинча омад ва изтироб бирдай келарди.

Худди шундай воқеа рақс тушганимдан сўнг, орадан бир-икки кун ўтгач рўй берди. Оқшом уйга кириб борсам, хонамда, ўрнимда … гўзал Мария ётганини кўриб, таажжубдан, ҳайратдан, қўркув ва хурсандлигимдан донг қотиб қолдим.

Бу энди Ҳерминанинг менга шу пайтгача тайёрлаб келган кутилмаган совфа-тухфаларининг энг зўри эди. Манови жаннат қушласини менинг ҳузуримга у жўнатганига заррача шак-шубҳам йўқ эди. Ўша оқшом Ҳермина билан бирга эмасдик, мен кўхна черков мусиқасини тинглаш учун катта бутхонага кетгандим — бу ўтмиш ҳаётимга, ёшлигим ўтган жойларга, идеал Ҳаррининг юритига қилинган гўзал ва фамгин саёҳат эди. Чиройли гумбази камгина чироқлар нурида хира ёғду сочиб турган черковнинг готик услубдаги баланд хонасида ўтириб, Букстеҳуде, Пахелбел, Бах, Ҳайднни тинглаб, ўзим учун азиз, севимли бўлган ўша эски-қадим йўллардан юргандек бўлдим. Бир пайтлар ўзимга қадрдон дўст ҳамда кўплаб фавқулодда зўр чиқишлиарининг ўзим шоҳиди бўлган Бах куйчисининг* ажойиб овозини яна тинглашга мушарраф бўлдим. Кўхна мусиқа садолари, улардаги битмас-туганмас фазилат ва табарруклик ёшлигимнинг бутун завқ-шавқ ҳамда хурсандчиликка тўла дамларини ёдимга солди. Мен черковда хаёлга чўмиб маъюс ўти-рарканман, бир пайтлар ватаним бўлган бу олийжаноб, баҳт-саодатли оламда атиги бир соат меҳмон бўлдим, холос. Ҳайдннинг дуэти янграган чоғда тўсатдан кўзимга ёш келди, концертнинг тугашини ҳам кутиб ўтирмасдан, ўша таниш хонанда билан учрашувдан ҳам воз ке-чиб (о, бир пайтлар шунаقا концертлардан сўнг санъат-

* *Бах* куйчиси – Илона Дуриго (1881–1943), венгер қўшикчиси.

корлар билан қанчадан-қанча ажойиб, чароғон кечаларни биргә ўтказған эдик), бош черковдан секин, сездирмай жүнаб қолдим, тун оғушига чўмган тор кўчаларда ҳорғин тентираб юрдим. У ер-бу ерда ресторонларнинг деразаларидан жаз капеллалари кўзга ташланар, улар ҳозирги ҳаётимнинг мунгли оҳангларини чалардилар. О, ҳаётимнинг шундайин бир дилгир гумроҳликка айланишини ким ҳам билибди дейсиз!

Тун қўйнида узоқ дийдираф кезарканман, мусиқага бўлган ғалати муносабатимни ҳам ўйлаб кетардим ва ўзимдаги мусиқага бўлган бу қадар таъсирчан, жозибали ҳамда азалий, тақдирӣ муносабат бутун олмон маънавиятининг тақдир-қисматидек туюларди менга. Олмон мухитидаги оналик ҳуқуки, табиатга боғланганлик мусиқанинг бошқа ҳеч бир қайси халқда учрамайдиган мусиқа гегемонлиги шаклида ҳукм суради. Биз, зиёлилар, бунга мардонавор қаршилик кўрсатиш, Рухга, Фанга, Сўзга қулоқ солиш ва уни тинглашга эришиш ўрнига, барчамиз тушуниб бўлмайдиган нарсаларни тасвирлайдиган сўзлардан холи Тил ҳақида орзу қиласиз. Ўз мусиқа асбобини сидқидилдан, ҳалол ва вижданан чалиш ўрнига, олмон зиёлиси доимо Сўзга ва Ақл-Идрокка қарши чиқиб, нуқул мусиқа билан овораи мубтало бўлиб келган. Олмон руҳи мусиқадан, ажойиб оҳангларда яратилган асарлардан, гўзал ҳис-туйғулардан завқланиб кетиб, уларни ҳаётга татбиқ этиш ўрнига, ўзининг кўпгина ҳақиқий вазифаларини унтиб қўйган. Биз, зиёлилар, ҳақиқийлик нималигини яхши англамаганмиз, унга ёт, бегона ва душман кўзи билан қараганмиз, шунинг учун ҳам бизнинг олмон воқелигимиизда, тарихимиз, сиёсатимиз ва ижтимоий фикримизда Рухнинг роли шу қадар ночор, аянчли бўлган. Шундай бўлса ҳам, ушбу фикрни ўйлаётисб, ҳадеб эстетика ва маънавий-рухий, бадиий ҳунармандчилик билан шуғулланавериш ўрнига ана шу воқеликни яратишда жиддий ҳамда масъулият билан иштирок этишга ўзимда кучли бир истак-иштиёқ сезганиман. Бироқ бу иштиёқ ҳамиша умидсизлик билан, аччиқ

такдир-қисмат билан тугаган. Жаноб генераллар ва оғир саноатчилар бутунлай ҳақ әдилар: «зиёлилар»га жин ҳам урмади, бизнинг жамият ортиқча, кераксиз, ҳаётдан узок ҳамда масъулиятсиз хаёлпарат әзма, маҳмадоналардан-гина иборат әди, холос. Жин урсин ҳаммасини! Қани устара?!

Ўй-хаёллар ва мусиқа таъсирида юрак ғам-қайғуга тўлиб, тушкун кайфиятда ҳаёт сари, ҳақиқат сари, маъно ва мазмун сари, абадий йўқотиш сари интилиб борарканман, ниҳоят, уйга етиб келдим. Зиналардан кўтарилиб, ичкари кирдим, чироқни ёқиб, бир оз мутолаа қилишга бехуда уриндим, чунки ваъдалашганимиз эсимга тушиб қолди — эртага кечқурун виски ичиб, ракс тушгани Сесилбарга* боришим керак әди, шунда нафақат ўзимга, балки Ҳерминага нисбатан ҳам ўзимда аччик алам түйдим. Ахир у яхши ва самимий фикр юритганида, ажойиб, мўъжизавор мавжудот бўлганида әди, мени бу фувиллаётган, жимилаётган, чигал, чалкаш ва бетартиб иш дунёсига олиб кирмаган ва ўз ҳолимга қўйган бўларди, чунки мен, барибир, у ерда ўзимни ёт, бегоналардек ҳис қилган ва мусибат чеккан бўлардим, ўзимдаги энг яхши фазилатлар эса таназзулга юз тутарди!

Маъюсланиб ечиниб, энди чироқни ўчирмоқчи бўлгандим, димоғимга хушбўй ис — енгил атири ҳиди урилди. Сергак тортиб, қайрилиб қарасам, ўрнимда гўзал Мария ётарди, унинг катта кўк кўзларида табассум жилваланар, шу билан бирга бир оз ҳадик-хавотир ҳам муҗассам әди.

— Мария! — саросимага тушиб қичқирдим.

Шу онда миямга келган биринчи фикр шу бўлдики, агар хонадон бекаси билиб қолса борми, уйдан ҳайдаб чиқаради.

— Мен келдим, — деди қиз секингина. — Ё хафа бўлдингизми?

— Йўқ, йўқ, асло. Биламан, Ҳермина сизга калитни берган. Ҳа-я.

* Сесилбар — Цюрихда жойлашган бар номи.

— О, сиз хафа бўляпсиз. Мен яхшиси кетақолай.

— Йўқ, гўзал Мария, қолинг! Мен бугунги оқшом жуда асабийлашдим.

Мен унга томон бир оз энгашгандим, у бошимни қўллари орасига олиб, ўзига тортди ва эркалади. Сўнг унинг қўлини олиб, бизни эшитиб қолмасликлари учун секин гапиришини илтимос қилдим, унинг гўзал, тўла юзига боқдим, у ажойиб каттакон гулдек очилиб, яшнай бошлади. Қиз қўлимни олиб, секин лабларига теккизди, унинг ёқимли илиқликини ҳис қилганини англадим.

— Сен хурсанд бўлишинг керак эмас, — деди у. — Ҳермина менга айтган, дардинг борлигини. Буни тушуниш мумкин... Нима, сенга ёқмаяпманми? Рақс тушаётганимизда жуда бошқача эдинг.

Унинг кўзлари, лаблари, томоғи ва кўқси кўз олдидан ўтарди. Ҳозиргина Ҳерминани аччиқ таъна-дашном билан эслагандим, мана энди эса унинг тухфаси қўлимда, ундан миннатдор эдим. Мариянинг эркалашлари, навозишлари мен бугун тинглаган ажойиб мусиқага озор етказмас, балки уни тўлдирап эди. Унинг гул юзи янада яшнаб, менга меҳрибонлик ва мойиллик билан кулиб турарди.

Бу оқшом мен ёш боладек донг қотиб ухладим. Уйғоқ пайтимда Мариянинг гўзал, қувноқ ёшлигидан баҳра олиб, суҳбатлашиб, у ва Ҳерминанинг ҳаёти ҳақида кўп қизиқ нарсаларни билиб олдим. Мен бунақанги ҳаёт тўғрисида жуда кам нарса билардим. Бунақанги инсонларни, эркакларга ўхшаш аёлларни, ярим санъаткор, ярим бойваччалар дунёсига мансуб одамларни илгарилари театрларда тасодифан, онда-сонда учратар эдим. Мана, бу ғалати, гоҳ begunoҳ, гоҳ бузук ҳаётнинг сийратига разм солиб туардим. Бу қизларнинг кўпчилиги ночор оилалардан чиқсан, ўта ақлли ва ғоят келишган бўлиб, бутун ҳаётларини қандайдир паст ҳақ тўланадиган ёки зерикарли, фамгин, нохуш ишларга тиккан, дам тасодифан, ахён-аҳёнда учраб қоладиган юмушлар билан, дам

назокат, латофат, жозиба, ишва ва навозишлар орқасидан кун кўришга мажбур эдилар. Улар гоҳ ойлаб ёзув машинкаларини чиқиллатиб ўтиришар, гоҳ давлатманд бойваччаларнинг маъшуқаларига айланишарди, чойчақа ва совғалар олишиб, дам мўйна пўстинларга ўралиб, дам енгил машиналарда, люкс меҳмонхоналарда яшашар, баъзан эса совуқ чордоқларда ҳам тунаб қолишар, қисқаси, ошиғи олчидаи кўринса-да, умуман олганда, уларга ҳавас қилиб бўлмасди. Мария ҳам уларга мансуб эди, фавқулодда севгига қодир, муҳаббатга ташна эди. Тиниб-тинчимас, серташвиш ҳамда ақлли ва онгсиз равишда ҳаёт кечирадиган бу капалакларнинг турмуши болаларча, айни пайтда уддабуро, устомон, айёр ва маккор ҳам эди, улар эркин ва мустақил, ҳаётга мафтун бўлиб, ундан баҳт омад кутиб яшардилар, бироқ бу ҳаётга фуқароларга ўхшаб боғланиб қолишмаган, эртаклардагидек шаҳзодалар учраб қолгудек бўлса эргашар, ўзларини пировардида оғир ва фамгин қисмат кутаётганини доимий тарзда элас-элас эслаб ҳам қўярдилар.

Мария менга ўша ғаройиб биринчи оқшомдаёқ ва бошқа кейинги кунларда ҳам кўп нарсани, нафақат ажойиб янги ўйинлар, онг-зехн сурури, балки янгича фикрлаш, янгича англаш, янгича ишқ-муҳаббатни ҳам ўргатди. Рақсоналар, кўнгилочар жойлар, кино, бар, меҳмонхоналар қошидаги чойхоналар — бу олам мендек дарвеш ва эстет — гўзаллик шайдоси учун ҳамон қандайдир норасо, ҳақоратомуз ва ман қилинган нарса эди, Мария учун, Хермина ва унинг дугоналари учун эса шунчаки дунё, на ёмон, на яхши, на маъқул, на манфур, бу оламда уларнинг қисқа, фамгин, маъюс ҳаёти гуллаб яшнар, бу оламни улар яхши билишар, унда ўзларини бемалол ва эркин ҳис қиласдилар. Улар, бизга ўхшаганлар бастакор ёки шоирни яхши кўрганимиздек, шампан виносидан ичиб, қовурдоқхонада маҳсус овқат буюриб, тамадди қилишни хуш кўришар, бизга ўхшаганлар Нитше ёки Хамсундан завқлангани сингари, улар янги мода бўлган рақс ашуласи ёки қандайдир жаз хонандасининг сенти-

ментал, бачкана, беҳаё қўшиғини изтироб, ҳаяжон билан, кўнгиллари эриб тинглардилар. Мария менга ўша келишган саксофончи Пабло ва унинг айтган амриқоча эстрада қўшиғи ҳақида ҳам гапириб берди, у буни шундай берилиб, завқ-шавқ, муҳаббат билан айтдики, бу менга қандайдир ўқимишли, илмли кишининг нафис, гўзал санъат асари олдида чукур ҳаяжонга тушишидан ҳам ортиқ таъсир қилди. Ўша қўшиқ қандай бўлмасин, уни тинглашга ҳозир эдим. Мариянинг муҳаббатга йўғрилган сўzlари, унинг маъюс жилваланаётган нигоҳи менинг эстетикамга раҳна солиб, уни ёриб ўтганди. Демак, аллақандай гўзаллик, қандайдир нафис, гўзал туйғу бор эдики, у менга ҳар қандай баҳс-мунозарадан ҳам, шак-шубҳадан ҳам улуғвор туюлди, у ҳатто Моцартдан юксак эди, бироқ бунда сарҳад, чегара деган нарса бормиди ўзи? Биз, билимдон ҳамда мунаққидлар барчамиз ўсмирлик чоғларимизда бугунги кунда бизга шубҳали ва азалий, тақдирний туюлаётган санъат асарлари ва санъаткорларни эҳтирос илиа севмаганмидик? Лист, Вагнер, Бетховени-чи? Мариянинг амриқоча эстрада қўшиғини тинглаётганда болаларча ийиб кетиши қандайдир штудийнратнинг* Тристан ҳақидаги ёки дирижёрнинг тўққизинчи симфония ижро этилаётган пайтдаги изтироб-ҳаяжонига ўхшаган худди шундай соғ, гўзал, ҳар қандай шубҳадан холи бўлган санъатсеварлик эмасми? Бу эса ўз навбатида жаноб Паблонинг фикр ва қарашларига тан бериш, уларнинг ажойиб бир тарзда тан олиниши эмасмикин?

Бу Паблони, ул гўзал йигитни Мария ҳам жуда-жуда севар экан!

— У гўзал инсон, — дедим мен, — у менга ҳам жуда ёқади. Бироқ айт-чи, Мария, сен қандай қилиб мени ҳам сева олдинг, ахир мен қари, дикқат, зиқ одам бўлсан, соchlаримга оқ оралаган, чиройли бўлмасам, саксофон чалолмасам, муҳаббат ҳақида инглизча қўшиқлар куйлаш қўлимдан келмаса?

* Штудийнрат — Олмонияда тўлиқ ўрта мактаб муаллимининг увони.

— Бўлмаур гапларни қўйсанг-чи! — койиди қиз. — Бундай бўлиши бутунлай табиий. Сен ҳам менга ёқасан, сенда ҳам ўзига яраша чирой, ўзига хослик бор, бундан бошқача бўлишинг мумкин эмас. Бу нарсалар ҳақида гапириш, ҳисбот талаб қилиш шарт эмас. Мана қара, мени яхши кўрасан, мен сенга ёқяпман; сенинг ўзига хос, журъатсизлигингни кўриб, ўзимга ўзим: «У сени яхши кўради, сен гўзал, барно қизсан, бунинг учун у сендан миннатдор» дейман. Мана шу нарсани жуда, жуда яхши кўраман. Бошқа бир одам бунинг аксини қилиб, менга аҳамият бермаётгандек эътибор қила бошласа, буни ҳам яхши кўраман.

Биз яна бир оз ухладик. Яна уйғондим, ул гўзал, гўзал гулим ҳамон оғушимда. Ажойиб! Бу гўзал гул, барибир, Ҳерминанинг менга қилган ажойиб совфаси эди! У муттасил шу ерда, гўё никоб, парда ортида тургандек эди. Шу аснода мен туйқусдан Эрикани, олисдаги дарғазаб маҳбубамни, бечора маъшуқамни ўйлаб кетдим. У, гарчи бу қадар очилиб-сочилиб юрмаса ҳам, азоблардан кутулолмаган бўлмаса ҳам, ҳар ҳолда гўзалликда Мариядан қолишмасди, унинг сурати кўз олдимда бир зум аниқ-таниқ ва изтироб билан намоён бўлди, гўё тақдирли тақдиримга мустаҳкам боғлангандек эди, сўнг яна бирдан йўқолиб, уйқу орасида унутилди, чексиз, бепоён, ярим қайғуга чўмган кенгликлар узра сингиб, кўздан йўқолди.

Шундай қилиб, мана шу латиф, гўзал кечада ҳаётим суратлари кўз ўнгимдан бирма-бир ўта бошлади, айни пайтгача эса турмушим бўм-бўш ва бефайз кечган эди. Энди, хиссий муҳаббат таъсириданми, суратлар сарчашмаси бой ва теран тарзда очилиб, бир зум қувончу фамдан лол бўлиб қолдим, менинг ҳаётим суратларга бу қадар бой, бечора Чўл бўрисининг вужуди юксак манг юлдузларга ҳамда буржларга шу қадар тўла экан! Болалигим ва онам ҳаёлга чўмган олис, бепоён мовий тоғ бўлаги янглиф латиф ва баҳтиёр қараб туришар, Ҳерми-

нанинг маънавий-рухий оғаси бўлмиш афсонавий Ҳерманндан бошлаб барча дўстларимнинг овозлари хор бўлиб, аниқ-таниқ ва қатъий жарангларди; сув қаъридан ўсиб чиққан хушбўй ва илоҳий денгиз чечаклари очилиб ётар, ўзим суйган, куйлаган ва кўнглим тилаган кўплаб аёлларнинг суратлари оқиб келарди, мен улардан айримларигагина эришган, ўзим ҳам ортиқ уринмаган эдим. Ана, хотиним ҳам кўринди, мен у билан кўп йиллар бирга яшаган эдим, у мени дўстлик, жанжал, можаро ҳамда тақдирга тан беришга ўргатган, турмушнинг барча етишмовчиликларига қарамасдан менда унга нисбатан чукур ишонч илдиз отганди, бироқ кунларнинг бирида, у мен телба ва хастани ташлаб кетди — шунда уни қанчалик севганимни, унга қанчалик ишониб, боғланиб қолганимни англадим, ана шу ишончнинг дарз кетиши оғир ботиб, дилимни бир умрга яралаган эди.

Бу суратлар — улар юзлаб, номли ва номсиз эди — барчаси мана шу ишқ-муҳабbat оқшомининг қайнағ турган булоғидан ёшариб, янгиланиб чиқиб келарди ва мен энди, ночорликда унут бўлган нарсаларни қайтадан билиб олардим, улар ҳаётимнинг бор-бисоти ҳамда қадрқиймати эди, улар барҳаёт, улар мен унуга олмайдиган ва йўқотолмайдиган юлдузли онлар, умримнинг ривоятлари, тириклигимнинг юлдузлар ёғдуси янглиғ завол топмас қадр-қиммати эди. Менинг ҳаётим машаққатли, гумроҳ ва бебаҳт кечган, воз кечиш ва рад этишлардан иборат, бутун башариятнинг қисматидан-да аччиқроқ, шўрли, бироқ бой ва мағрур, ночор бўлса-да, шоҳ умрига қиёс этгудек эди. Йўлнинг қолган қисми то умр поёнига қадар шундай бехуда, мазмунсиз босиб ўтилган тақдирда ҳам, барибир, бу ҳаётнинг мағзи тўқ, унинг ўз қиёфаси, насл-насаби бор эди, умр мазмуни пфенниг (танга-чаقا)лар билан эмас, балки юлдузлар баробарида сарҳисоб қилинарди.

Ўшандан буён бир оз вакт ўтди, орада кўп нарса ўзгарди, мен эса ҳамон ўша оқшомнинг айрим тафсилотларини, орамизда бўлиб ўтган айрим гап-сўзларни, теран

ишқ-муҳаббат назокатининг айрим ноз-карашма, ишвагамзаларини, унга мубтало бўлгандан сўнг, ҳолдан то-йиб уйғонган пайтдаги юлдузли лаҳзаларни эслайман. Ўша оқшом, ҳа, худди ўша оқшомда тушкунликдан сўнг илк бор кўзларим «ярқ» этиб очилиб, тасодиф менга яна тақдир бўлиб, ҳароб бўлаёзган умрим қайтадан илоҳий бир неъматдай кўринди. Бор вужудим яна қайтадан нафас ола бошлаган, кўзларим кўра бошлаганди, ана шу суратлар оламига ўзим ҳам кирволишим ва умрбоқий бўла олишим учун сочилиб кетган, тарқоқ суратларни шоша-пиша йиғволиб, Чўл бўриси – Ҳарри Ҳаллернинг ҳаётини ҳам бир бутун сурат ҳолига келтиришим керак эди. Мусибат, кулфат ва кўргиликларга тўла ҳар бир инсон ҳаётининг мурод-мақсади ва муддаоси ҳам аслида шу эмасмикин?..

Эрталаб нонушта қилиб бўлганимиздан сўнг, мен Марияни уйдан сездирмай олиб чиқиб кетдим. Ўша куниёқ шаҳарнинг яқинроқ жойидан битта хонани ижарага олдим, у ерда иккаламиз учрашиб турадиган бўлдик.

Рақс муаллимам Ҳермина тиришқоқлик билан менга яна бостонни ўргата бошлади. У талабчан, илтимосларга кўнмас, мени бир соат ҳам бўш қўймасди, чунки у билан кейинги бал-маскарадга бирга боришга келишиб олган эдик. У костюм олиш учун мендан пул сўради, бироқ бу ҳақдаги ҳар қандай маълумотни мендан сир тутарди. Уни кўргани боришим ёки қаерда туришини билишим ҳам хануз тақиқланган эди.

Бал-маскарадгача бўлган салкам уч ҳафта вақт фоят ажойиб ўтди. Мария ҳаётимдаги барча маҳбубаларим орасида энг биринчиси, ҳақиқийси бўлди, десам муболафа бўлмас. Мен ўзим севган аёллардан, ҳар қандай энг ақлли ва нисбатан билимли бўлган аёл ҳам илмимга жавоб қайтармаган, ўз муносабатини билдирамаган, аксинча, унга доим қарама-қарши туриб келганини мутлақо сезмаган ҳолда улардан ҳамиша ақл ҳамда маълумот, билим талаб қилиб келганман; мен ўзимнинг барча муаммоларим ҳамда фикрларимни ҳам аёлларга олиб келардим,

биронта китоб ўқимаган, мутолаа нималигини билмаган, ҳатто Чайковскийни Бетховендан ажрата олмайдиган қизни бир соатдан ортиқ сева олиш менга амримаҳол туюларди. Мариянинг маълумоти йўқ эди, унга бу айланма йўллар ҳамда захира оламларнинг кераги йўқ эди, унинг муаммолари ўз-ўзидан бевосита хаёлан пайдо бўла-верарди. Ўзининг келишган қадди-қомати, ранги-туси, соchlари, овози, жўшқинлиги билан севиш, севилиш баҳтига мұяссар бўлиш, танасидаги ҳар бир лаёқат, ҳар бир эгри-буғри чизик, гавдасининг нозик, нафис, хушбичимлиги хушторида жавоб, сезги ва жонли, баҳтиёр, шодиёна макр-хийла, найранг уйғотишига эришиш — мана шуларгина унинг санъати, мақсад ва вазифаси!.. Мен ўшандада билан биринчи марта тортиниб рақс тушганимдаёқ буни сезгандим, юксак даражада авайлаб-асралган жозибадор ҳис-туйфунинг хуш бўйидан масрур бўлган эдим. Албатта, барча нарсадан боҳабар Ҳерминанинг менга атай Марияни тухфа қилиши ҳам тасодиф эмасди. Унинг димофидан қирмизи атиргул янглиғ хуш бўйнинг қайнок нафаси уфуриб турарди.

Мен Мариянинг яккаю ягона ёки имтиёзли ошиқ-маъшуғи эмасдим. У совғаларни бажонидил оларди, унга қизил локланган чармдан қилинган кичкинагина янги катмон совға қилганимда, ичига икки-учта олтин танга ҳам солиб қўйгандим. Ўшандада десангиз, қизил катмонча совға қилиб, роса кулги бўлганман-да! Кейин билсан, у ажойиб бўлишига қарамасдан, дўконда сотилмай туриб қолган, аллақачон модадан чиққан мол экан. Мен аллақандай эскимослар тили ҳақида оз-моз хабарим бўлсада, бунақанги матоҳлар тўғрисида умуман ҳеч вақо билмас ва тушунмас ҳам эдим, шу боис Мариядан бу хусусда кўп нарсани ўргандим. Энг аввало, бу майдада ўйинчоқлар — атир-упадан тортиб, рақс пойафзалигача, бармоқдаги узукдан тортиб, сигарета кутичасигача, камар тўқасидан тортиб, то аёллар сумкасигача бўлган бу мода ва зеб-зийнат буюмлари нафақат усти ялтироқ, ичи қалтироқ, қалбаки, bemaza нарсалар ёки пулга ҳирс қўйган

фабрика эгалари ҳамда савдогарларнинг ўйлаб топган ихтиrolари эканлигини, балки ишқ-муҳаббатга хизмат қиладиган, ақлни пешлайдиган, ўлик атроф-муҳитга жон бағишилаб, муҳаббат туйфуларини уйғотадиган сөхрли, фусункор, ўринли, асосли, серкірра майда-чуйда безак буюмлари ҳам эканлигини билиб олдим. Бирок сумка сумка эмас, катмон катмон эмас, гуллар гул эмас, елпигич елпигич эмасди, буларнинг барчаси ишқ-муҳаббатнинг, мағиянинг гўзал, нағис, майишқоқ матоҳлари эди, уларда безовталиқ, чайқов, қурол, жанговар хитоб мужас-сам эди.

Мария аслида кимни яхши кўраркин, кўпинча бу ҳақда ҳам тез-тез ўй суриб турардим. Менимча, у кўпроқ анови қора кўзлари олма-кесак терадиган, кўллари адл ва дилгир саксофончи йигитча Паблони яхши кўрарди. Мен бу Паблони ишқ-муҳаббат масаласида бир оз суст бўлса керак, деб ўйлардим, бироқ Мариянинг айтишича, у секин-аста қизиб, жунбишга келар, ана ундан сўнг унинг олдида унча-мунча боксчи ёки чавандозиям ип эшолмай, доғда қоларкан. Шу тариқа камина униси-буниси ҳақида билиб олдим. Хермина ҳақида ҳам кўп нарсани билиб олдим. Мен энди жаноб Пабло билан ҳам тез-тез рўпара кела бошладим, чунки Мария уни жуда-жуда севарди. Баъзан эса унинг сирли воситаларидан истеъмол қилиб, гоҳ-гоҳ бу лаззатлардан каминани ҳам баҳраманд қилиб турарди. Шу тариқа, айтиш мумкинки, Пабло доимо менинг хизматимда бўларди. Бир куни у бетимга шартта:

— Сиз шу қадар бебахтсизки... — деса бўладими. — Бу яхши эмас, бундай бўлмаслик керак. Сизга ачинаман.

Бу кувноқ, ақлли, болаларга ўхшаб кетадиган, айни пайтда сирли, англаб, тушуниб бўлмайдиган одам ҳақидағи фикрим муттасил бора-бора ўзгариб, ниҳоят у билан дўстлашиб қолдик. Сезишимча, Марияга мафтунлигим унга бир оз эриш туюлар, мени ўзича калака қилиб ҳам кўярди. Кунларнинг бирида у ўз хонасида, шаҳар атрофида меконхонанинг болохонасида «байрам» уюштириди. Хонада

фақат битта курси бўлиб, Мария иккаламиз каравотда ўтирилган, сирли, ажойиб ликёр билан сийлади. Бир пайт, жуда яхши кайфиятда маза қилиб ўтиргандим, у мени кайфсафога ундали. Мен унинг таклифини кескин рад қилдим, шундай бўлса ҳам, қани, нима деркин дея, Марияга кўз кишимни ташладим, гарчи у ҳам деярли менга қўшилган бўлса-да, барибир, унинг кўзларида умид учкуни сўнмаган, таклифни рад этганимдан афсуслангандек кўринди. Пабло рад жавобимни эшитиб, ҳафсаласи пир бўлса-да, лекин хафа бўлмади.

— Афсус, — деди у. — Ҳарри кўпроқ ахлоқ тарафини ўйлаяпти. Нима ҳам дердим. Жуда ажойиб бўларди-да, жуда ажойиб! Энди эса бунинг ўрнини босадиган иш қиласиз.

Сигара тутатдик. Жойимизда қимир этмай, учовимиз ҳам у ўқтирган ҳолат-ҳодисани бошимиздан кечириб ўтирадик. Мария ҳам завқланарди. Шундан сўнг, ўзимни бир оз нохуш ҳис қила бошлагандим, Пабло мени каравотга ётқизиб, бир-икки томчи дори ичирди, бир неча дақиқа кўзимни юмиб ётдим.

Бир куни кечқурун у мени янада ҳайратга солди. Хонамга кириб келди-да, йигирма франк зарурлигини айтиб, мендан пул сўради. Тағин нима дейди денг, бу пул эвазига унинг ўрнига мен шу кеча Мария билан бирга қолишим мумкин эмиш...

— Пабло, — дедим кайфим учиб, — нималар деяётганингизни биласизми ўзи? Маҳбубасини пул учун бошка бировга ошириш, инъом қилиш бизда энг уят, bemaza иш саналади. Мен сизнинг таклифингизни эшитмадим, Пабло.

У менга раҳми келиб, ачингандек қаради.

— Демак, хоҳламайсиз, жаноб Ҳарри. Яхши. Сиз ўзи доим ўзингизни ўзингиз қийнаб юрасиз. Майли, кўнглингизнинг кўчасига қаранг. Мария билан бугун бирга қолмай қўяқолинг, пулни эса шундай бераверинг, қайтариб бераман. Жуда зарур.

— Нимага ўзи?

— Агостињо бор-ку, билсангиз — иккинчи скрипка-да турадиган болакай, ўшанга керак. У саккиз кундан бери касал. Қарайдиган одами йўқ, сариқ чақасиям қолмаган, менини ҳам тугаб қолувди.

Қизиқиб, у билан бирга Агостињонинг олдига бордик. У турган болохона ниҳоятда кўримсиз эди. Пабло унга сут ва дори-дармон олиб келди, ётган ўрнини қоқиб ташлаб, тозалади, хонани шамоллатди, иситмага қарши қоидасини келтириб, компресс қўйди. У бу ишларни тажрибали тиббиёт ҳамширасидек, тез ва соз бажарди. Ўша куни кечқурун болакайни Сити-барда кўрдим, у эрталабгача мусиқа чалиб чиқди.

Ҳермина билан кўпинча Мария тўғрисида, унинг қўллари, хипча бели, кулишлари, рақсга тушишлари ҳақида гаплашардик.

— Буни сенга кўрсатдими? — сўраб қолди Ҳермина бир куни, менга бўса билан боғлиқ ғалати ҳолатни тушунтиаркан. Ўзинг кўрсатақол, десам унамади. — Кейин, — деди у, — мен ҳали сенинг маҳбубанг эмасман-ку.

Мен ундан, Мариянинг бўса санъатини, умуман, энг яқин хушторигагина маълум бўлган бошқа баъзи бир сирларини сен қаердан биласан, деб сўрадим.

— О, ахир биз яқин дўстлармиз. Нима, у билан ўтрамизда сир қолган, деб ўйлайсанми? У билан жуда кўп бўлганман, кўп гаплашганмиз. Ҳар қалай, зўр қиз билан танишдинг-да, унинг қўлидан кўп иш келади.

— Мен бўлсам, Ҳермина, ораларингда сир қолган бўлса керак, деб ўйлаб юрибман. Ё мен ҳақимда ўзинг билган барча гапларни унга ҳам айтиб бўлдингми?

— Йўқ, булар бошқа нарса, у буларни тушунолмайди. Мария ажойиб қиз, сенинг омадинг бор экан, бироқ сен билан менинг ўртамиздаги гаплардан унинг мутлақо хабари йўқ. Албатта, унга сен ҳақингда керагидан ортикроқ гапирворгандирман, балки, ахир у сенга мафтун бўлиб қолиши керак эди-да! Бироқ, дўстим, сени менчалик на Мария, на бошқаси тушуна олади. Тўғри, мен

ҳам ундан айрим нарсаларни ўрганганман — Мария сени қандай билса, мен ҳам сени худди шундай биламан. Мен сени, гүё иккаламиз ҳамнафасдек, шу қадар яхши биламан.

Мария билан яна учрашганимизда, мени ғалати ва сирли бир ҳиссиёт чулғаб олди — у Ҳерминани ҳам худди мендек эъзозлар. Кўз олдимда янгидан-янги, билосита, мураккаб алоқалар ва муносабатлар, янгидан-янги ишқий ҳамда яшаш имкониятлари пайдо бўлаётганди ва мен беихтиёр Чўл бўриси ҳақидаги трактатда баён этилган минглаб жон, руҳлар ҳақида ўйлардим.

Мария билан танишганимдан то катта бал-маскарад-гача бўлган қисқа вақт ичида, очиғи, бахтиёр бўлсам-да, буни бир нажот, эришилган баҳт-саодат, роҳат-фарофат, ҳузур-ҳаловат деб билмадим, балки буларнинг барчаси ҳозирча бошланиши, тарраддуд эканлигини, асл моҳият эса олдиндалигини сезиб, хис қилиб турардим.

Рақс туфайли шунчалик кўп нарса ўргандимки, энди балда бемалол қатнашсам бўладигандек туюларди. Ҳермина бал-маскарадда қандай костюмда чиқишини мендан ҳануз сир сақлар, ҳамон бу фикрида қатъий турарди. Унингча, мен уни бемалол таний олармишман, мабодо таниёлмай қолсам, ўзи ёрдам бераркан, лекин ҳозирча буни билишим мумкин эмас экан. Уни бал билан боғлиқ режаларим мутлақо қизиқтиrmадиям, шунинг учун ясантусан қилиб ўтирасликка аҳд қилдим. Марияни балга таклиф қилмоқчи эдим, у байрамни хуштори билан ўтказишини, унга ҳатто чипта ҳам олиб қўйганини эшитиб, энди байрамни ёлғиз ўзим ўтказарканман-да деб, ҳафсалам пир бўлди. Ҳар йили шаҳардаги Глобус залда ўтказиладиган бу нуфузли, дабдабали бал-маскарад казо-казо санъаткорлар томонидан ўютириларди.

Шу кунларда Ҳерминани жуда кам кўрардим, у балдан бир кун олдин мен олиб қўйган чиптани олиб кетиш учун келди. Хонамда мўмин-мулойим, хотиржам ўтирапкан, у билан сухбатимиз тез қовуша қолди ва бу гурунг менда ғалати таассурот қолдирди.

— Кўринишинг чакки эмас, — деди у, — рақс сенга ёқибди. Сени уч-тўрт ҳафта кўрмаган одам танимай қолиши турган гап.

— Ҳа, — кўшилдим унга, — неча йиллардан буён бунчалик маза қилмагандим, булар ҳаммаси сен туфайли, Ҳермина.

— О, гўзал Мариянг туфайлимасми?

— Йўқ, ахир уни менга тухфа қилган ким, сен-ку. У жуда ажойиб қиз экан.

— Сенга худди шундай маҳбуба керак эди, Чўл бўриси. Ёш, гўзал, дилкаш, ишқ-муҳаббат бобида жуда ақлли, ўз қадрини билади. Агар уни бошқалар билан баҳам кўрмаганингда, агар у сеникида ётиб олганда борми, бунинг оқибати яхши бўлмаган бўларди.

Ҳа, бунга ҳам қўшилмасдан иложим йўқ эди.

— Демак, энди ўзингга керак бўлган ҳамма нарсага эга бўлдинг, шундайми?

— Йўқ, Ҳермина, ундей эмас. Мен гўзал ва мафтункор, зўр қувонч, кўнгил хуши, овунчоққагина эга бўлдим. Баҳтли бўлишим учун эса...

— Хўш, яна нима етишмайди?

— Кўп нарса. Менга баҳтли бўлишнинг ўзигина кифоя қилмайди. Мен бунинг учун яралмаганман, толеим бугина эмас. Менинг тақдир-қисматим бутунлай бошқа.

— Демак, бебаҳт бўлишинг керак экан-да, шундайми? Бу нарса бошингдан кўп ўтган-ку, эсингдами, устардан кўркиб, уйингга боролмай қолгандинг...

— Йўқ, Ҳермина, у бошқа нарса. Ўшанда, очишини айтишим керак, жуда баҳтсиз эдим. Бироқ у бемаъни, бефойда, бесамар баҳтсизлик эди.

— Нега энди?

— Чунки ўзимга ўзим тилаётган ўлимдан бунчалик қўрқмаслигим керак эди. Мен истаётган, мен интилаётган баҳтсизлик бошқа нарса; у шундайки, мен оташин эҳтиросдан изтироб чекаман, унинг хумори тутса, ўлим ҳам ҳеч гап эмас. Мен кутаётган баҳт ёки баҳтсизлик ҳам мана шу.

— Тушунаман. Шунинг учун ҳам ака-сингилмиз-да. Лекин мана ҳозир Мария туфайли эришган бахтингга нима хусуматинг бор? Нега бунчалик домангирсан?

— Мен бу бахтга қарши әмасман, о йўқ, мен уни севаман, ундан миннатдорман. У ёз ёмфиридан сўнг ча-рақлаб чиққан қуёшли кундек гўзалдир. Бироқ сезиб турибман, бу бахт ҳам самарасиз, узоқча бормайди. У мамнун этади, холос, мамнуният эса, мен учун озуқа бўлолмайди. У Чўл бўрисини аллалайди, тўйдириб юборади. Аммо шунинг учунгина ўлиш, бу — бахт әмас.

— Демак, Чўл бўриси... ўлиши керак, шундайми?

— Шундай деб ўйлайман. Мен бахтимдан фоят мамнунман, бунга яна узоқ чидашим мумкин. Лекин баъзан мана шу бахт бедор бўлишим, иштиёқ-интилишим учун имконият яратиб берса, менинг барча интилишларим, мана шу бахтни ушлаб қололмайди, балки яна аввалгидан кўра гўзалроқ, унчалик ночор бўлмаган изтироблар сари чорлади. Мен ўзимни ўлимга тайёрлайдиган, мени шунга кўндирадиган изтироблар томон интиламан.

Хермина кўзларимга назокат билан қаради, бир зумда нигоҳи ғамгинлашди. Нақадар гўзал, кўрқинчли кўзлар!.. Сўнг аста, шу қадар паст овозда гапира бошлиди, бутун вужудим қулоқча айланди:

— Бугун сенга бир нарсани айтмоқчиман, бу нарса ўзимга анчадан буён маълум, уни сен ҳам биласан, балки уни ҳали ўзингга ўзинг гапириб кўрмагандирсан. Ҳозир мен сенга иккаламизнинг тақдиримиз ҳақида билганимни айтиб бераман. Сен Ҳарри, санъаткор ва мутафаккир, қувончга ҳамда ишончга тўла инсон бўлгансан, ҳамиша улуг мақсадлар ва абадият сари интилгансан, гўзал ҳамда майда нарсалардан домангир бўлиб яшагансан. Бироқ ҳаёт сени қанчалик фафлат уйқусидан уйғотиб, ўз-ўзингга келганинг сайин, мусибатинг шу қадар катталашиб, изтироб, ҳадик-хавотир ва тушкунлик ботқоғига қулоғингга қадар ботдинг, сен гўзал ва муқаддас билган, севган ва хурмат қилган барча нарсалар, инсонларга ва юксак мақсад-вазифаларимизга бўлган азалий ишон-

чинг ўзингга наф келтирмай, қадр-қимматини йўқотиб, чилпарчин бўлди. Сенинг ишонч-эътиқодинг нафас олиши учун ҳаво етишмай қолди. Бўғилиб жон бериш эса шафқатсиз ўлим билан баробар, тўғрими, Ҳарри? Ахир, шумиди сенинг қисматинг?

— Албатта, албатта, албатта.

— Ҳаёт ҳақида сенинг ўз тасаввуринг, эътиқодинг, талабинг бор эди. Сен улуғ ишлар, изтироблар ва ҳатто қурбонлар беришга ҳам тайёр эдинг — сўнг эса астасекин дунё сендан ҳеч қандай улуғ ишлар, қурбонлар ва шунга ўхшаш нарсалар талаб қилмаётганини, ҳаёт қаҳрамонлар ва шу кабилар мадҳ этилган шеърият эмаслигини, балки ейиш-ичиш, қаҳва ва пайпок, тарок (қарта) ўйини ҳамда радиомусиқа билан бутунлай мамнун бўлиб яшаса бўладиган мешчанлар меҳмонхонаси эканлигини сезиб қолдинг. Кимки агар бундан бошқа нарсаларни — қаҳрамонлик ва гўзалликни истаса ва ўзида намоён этса, улуғ шоирларни ёки валий (авлиё)ларни хурмат қилса, эъзозлаб ардоқласа, у тентак ва ҳақиқий Дон Кихотдир. Ҳа, шундай. Агар билсанг, менинг аҳволим ҳам худди шундай кечган, дўстим!.. Мен тузуккина қобилиятли қиз эдим, яхши инсонлардан ибрат олиб яшаш, ўз олдимга юксак талаблар кўйиб, муносиб вазифаларни адо этиш пешонамга битилган эди. Катта қуръани зиммамга олиб, қиролга малика, инқилобчига маҳбуба, даҳога сингил, мартирга* она бўлиш имумкин эди. Ҳаёт эса менга чида-са бўладиган, бир нави, дурустгина таъб-дидли куртизан** аёл бўлишни насиб этди — пешонамда шу кўргилик бор экан, нима ҳам қила олардим! Ана шунаقا. Бирмунча вақт тасалли тополмай ҳасрат чекдим, узоқ вақтгача айбни ўз-ўзимдан қидириб юрдим. Ҳаёт, дедим ўзимга ўзим, барибир ҳақ бўлиши керак, у менинг орзуларимни таҳкирлабдими, демак, орзуларимда бир гап бор, улар балки bemaza, бемаъни бўлиши ҳам мумкин, ким билади. Бироқ,

* Мартирир — дин-эътиқод йўлида ҳалок бўлган насроний.

** Куртизан аёл — юқори табакалар доирасида ўралашиб юрувчи суюқоёқ хотин.

бундан ҳам ҳеч қандай наф бўлмади. Кўзларим кўради, қулоқларим эшигади, ўзим ҳам бир қадар синчков, ҳар нарсага қизикувчи одамман, ҳаёт деб аталмиш маъвога, ён-атрофимга, таниш-билиш ва қўшниларимга, эллик ва ундан ортиқ одамларнинг тақдир-қисматларига мундок разм солиб қарасам, биласанми нима, Ҳарри менинг орзуларим, худди сеники сингари ҳақ экан, минг карра ҳақ экан! Ҳаёт, воқелик эса ноҳақ эди... Мендек бир аёлнинг бошқа йўл тополмай, топармон-тутармон, пул топар одамга қарам бўлиб, ноилож ёзув машинкасини чиқиллатиб ўтириши ёки ўша пулдорга пули учунгина хотин бўлиб олиш ё бўлмасам бузуқлик йўлига кириб кетиши, бу энди сенга ўхшаган одамнинг ёлғиз-танҳо қолиб, қўрқаписа, тушкун бир кайфиятда устараға ёпишишига ўхшаган нотўғри иш эди. Менинг мусибатим моддий ва ахлоқий бўлса, сеники — рухий-маънавий — йўлимиз эса бир хил. Нима, мен фокстроотдан қўрқишишингни, барлар ва рақс майдончаларини сўймаслигингни, жаз мусиқаси ва бошқа барча майда-чуйда нарсаларга қарши эканлигингни тушунмайманми, шундай деб ўйлайсанми? Мен буларнинг барчасини — сиёsatдан кўнглинг айнишини ҳам, матбуот ва партияларнинг олди-қочди гапларидан, мастьулиятсиз хатти-ҳаракатларидан ташвиш чекишишингни ҳам, бўлиб ўтган ва бўлажак урушни, бугунги одамларнинг тафаккурини, улар нималарни ўқишияпти, нималарни қуришияпти, мусиқаси, байрамлари, таълими ва ҳоказоларни ўйлаб, руҳан тушкунликка, умидсизликка тушишингни ҳам жуда яхши тушунаман! Сен ҳақсан, Чўл бўриси, минг маротаба ҳақсан. Бироқ шундай бўлса-да, барибир, ҳалок бўлишишинг муқаррар. Сен бу оддий, кулай, озгина нарса билан мамнун бўладиган бугунги дунёга ўта талабчан ёндашяпсан, сенинг ўлчаминг унга тўғри келмайди, у сенга тупуради. Ким агар бугун яшамоқни истаса, ўз ҳаётидан шодланмоқчи бўлса, у сен билан менга ўхшаган инсон бўлмаслиги керак. Кимки динғир-динғир ўрнига асл мусиқани, кайф-сафо ўрнига ҳақиқий қувончни, пул ўрнига қалб-кўнгилни, шовқин-сурон ўрнига чи-

накам меҳнатни, юзаки ҳавас, эрмак ўрнига чин иштиёқни талаб қиласиган бўлса, унинг учун бу дилбар дунёватан бўлолмайди...

Шундан сўнг у ерга қараб, ўйланиб қолди.

— Хермина, — дедим унга аста, — сингилгинам, кўзларинг бирам ажойибки! Келиб-келиб, фокстротни ўргатганингни қара-я! Бизга ўхшаган одамлар, ўлчами бу дунёга тўғри келмайдиган инсонлар, наҳотки энди бу заминда яшай олмасак? Нима учун шундай? Бунинг сабаби нимада? Бу ҳолат бизнинг замонамизга келиб шундай бўлиб қолдими ёки олдиндан келганми?

— Билмадим... Бизнинг замонамизда шундай бўлган бўлса керак. Бу бир хасталик, ҳозирги куннинг баҳтсизлиги бўлиши мумкин. Фюрерлар зўр бериб урушга тайёрланишмоқда, биз бўлсак, фокстротга тушиб, пул топиб, шоколад еб юрибмиз. Бошқа замонлар бундан кўра яхшироқ бўлган ва янада яхшироқ, бойроқ, теранроқ бўлади, деб умид қиласиз. Бироқ бундан бизга фойда йўқ. Балки ҳамиша шундай бўлгандир, яна ким билади...

— Ҳамиша бугунгидек, дейсанми? Яъни, дунё ҳамиша сиёsatчилар, чайқовчилар, кельнерлар ва бойваччаларники бўлиб келган, оддий одамларга кун йўқ, шундай демоқчимисан?

— Ҳа, шундай, тағин билмадим, буни ҳеч ким билмайди. Барибир эмасми. Лекин мен ҳозир, дўстим, арзанданг Моцартни ўйлаяпман, эсингдами, унинг ҳақида менга гапириб, хатлар ўқиб бергандинг. Хўш, унинг ахволи не кечганийкин? Унинг замонида дунёни ким бошқарган, қаймогини ким сузган, ким бошчилик қилган, ким обрў-нуфузга эга бўлган: Моцартми ёки корчалонларми? Моцартми ё саёз, сийқа, ўртамиёна одамларми? Унинг ҳаёти қандай якун топган, қандай дафн этилган? Менимча, ҳаёт, эҳтимол, ҳамиша мана шундай бўлиб келган. Улар «жаҳон тарихи» деб атайдиган, мактабларда ўқитиладиган фан ҳам турли-туман қаҳрамонлар, даҳолар, улуғ ишлар ва ҳис-туйгулар билан тўлиб-тошган — қуруқ ёдлашдан иборат бўлган. Болаларни йиллар давомида

андармон ва банд қилиб туриш учун мактаб муаллимлари томонидан ўйлаб топилган бу дарслар ҳам аслида фирибгарликдан бошқа нарса эмас. Доим шундай бўлиб келган ва доимо шундай бўлиб қолади, яъни замон ва дунё, пул ва ҳокимият майдага ҳамда саёз одамларнидири. Бошқаларга — ҳақиқий инсонларга эса, ўлимдан бошқа ҳеч нарса йўқ.

— Наҳотки ҳеч нарса?

— Нега энди, абадият-чи.

— Келажак авлодларга қоладиган ном, шон-шуҳратни айтяпсанми?

— Йўқ, бўригинам, шон-шуҳратни айтиётганим йўқ, наҳотки унинг қадри бор деб ўйласанг? Нима, барча ҳақиқий ва тўлақонли инсонлар машхур бўлишган, уларни келажак авлодлар ҳам билган, деб ўйлайсанми?

— Йўқ, албатта, йўқ.

— Демак, у шон-шуҳрат эмас. Шон-шуҳрат таълим учун мавжуддир, у мактаб ўқитувчиларининг иши. У шон-шуҳрат эмас, Абадиятдир. Мўминлар уни Худонинг мулки деб атайдилар. Ўзимча ўйлайман: биз, талабчан, ўткир дидли, қайфу-ҳасрат, изтироб чекадиган, кенг кўламили инсонлар, агар бу дунёнинг ҳавосидан ташқари яна бир бошқа маъво бўлмаганида, агар Вақтдан ташқари яна Абадият, яъни Чин Дунё бўлмаганида, умуман яшай олмас эдик. Моцарт яратган мусиқа ҳамда улуғ шоиринг қаламига мансуб шеърлар ҳам, мўъжизалар яратган, инсонларга буюк ибрат намуналарини кўрсатган валий, авлиёлар ҳам Чин Дунё — Абадиятга дахлдордирлар. Лекин ҳар бир улуғ, мардонавор иш тимсоли ҳам, ҳар бир чин, ҳақиқий ҳис-туйғу куч-кудрати ҳам, гарчи уларни ҳеч ким билмаган, кўрмаган, ёзиб олмаган ва келажак авлодларга етказмаган бўлса ҳам, барибир, улар Абадиятга мансубдир. Абадиятда ҳеч қанақанги келажак авлод деган нарса бўлмайди, у ерда ҳақиқий, чин дунё шукм суради.

— Гапларинг рост, — дедим унга.

— Дин-диёнатли одамлар, — хаёлчан сўзида давом этди у, — бу нарсаларни жуда яхши билганлар. Улар шунинг учун валий, авлиёларни кўтариб чиқиб, «валийлар жамоати»ни тузганлар. Авлиёлар, улар — ҳақиқий, чин инсонлар, Нажоткорнинг кенжা авлодларири. Биз бутун умр бўйи, ҳар бир эзгу ишимиш, ҳар бир дадил фикримиз, ҳар бир меҳр-муҳаббатимиз билан улар томон йўлда давом этамиш. Валийлар жамоатини илгариги замонларда рассомлар заррин осмонда — чараклаб турган, гўзал ва тинч, сокин, осойишта маконда тасвирлашган — бу ҳали юқорида айтиб ўтганим «абадият»дан ҳеч бир ўзга нарса эмас. Абадият — Вақт билан Борлик, Замон ва Макон ортидаги Салтанатдир. Биз ўша ерга мансубмиз, бизнинг Ватанимиз ўша ерда, қалбимиз ҳам ўша ёққа талпинади, Чўл бўриси, шунинг учун ҳам биз ўлимни кўмсаймиз. У ерда сен яна Гёте, Новалис ҳамда Моцарт билан топишасан, мен эса азиз-авлиёларим — Кристофер*, Филипп фон Нери** ва бошқалар билан. Аввал ашаддий гуноҳкор, осий бўлган кўплаб авлиёлар бор, гуноҳ ҳам, иллат ҳам, вақти келса, табарруклик сари йўл бўла олар экан. Сен устимдан кулишинг мумкин, бироқ мен ўзимча кўп ўйлайман, дўстим Пабло ҳам яширин, пинҳоний авлиё бўлиб чиқса ажаб эмас. Эҳ, Ҳарри, чин уйимизга етиб олгунга қадар қанчадан-канча нопоклик ҳамда бемазагарчиликлар узра тентиб-тентираб, йўл босишимизга тўғри келади! Ва бизларни бошлаб борадиган ҳеч кимимиз йўқ, бизнинг бирдан-бир йўлбошчимиз — Ватан соғинчидир.

Охирги сўзларни айтаётганда унинг овози нихоятда паст эшитилди, шундан сўнг хонага баттар жимжитлик чўкди, ботаётган қуёшнинг заррин нурлари кутубхонамдаги кўплаб китоб жавонларига тушар, уларда жилваланаарди. Мен Ҳерминанинг бошини қўлларим орасига олиб,

* *Кристофер* — Кристофорус, авлиё, ривоятларга кўра жуда улкан, паҳлавон одам бўлган, Исони гўдаклигига дарёдан кўтариб олиб ўтган.

** *Филипп фон Нери* — Филиппо Нери (1515–1595), рицар (куролбардор)лик ордени асосчиси. У 1575 йилда дунё католик рухонийлари ташкилотини тузган.

уни пешонасидан ўпдим, туғишиган ақа-сингиллардек, юзини юзимга босдим. Биз бир зум шундай туриб қолдик. Менга қолса, мана шу лахзалар давом этаверса дердим, күчага ҳам чиққим йўқ эди. Лекин катта бал бошлиниши арафасидаги бу кечада Мария билан учрашишга келишган эдик.

Йўлда бораётиб, Мария ҳақида эмас, балки Ҳерминанинг гапларини ўйлардим. Менга шундай туюлардики, буларнинг барчаси унинг ўз фикрлари эмас, балки гёё менини эди, у ақлли, зийрак эмасми, мендан уқиб олгану, яна ўзимга қайтарган, улар мана энди янги қиёфа касб этиб, олдимда пешвоз турарди. Айниқса, Абадият ҳақидағи фикри учун ундан бениҳоя миннатдор эдим. Менга у керак эди, мен усиз яшай олмас, усиз бу дунёни ташлаб ҳам кетолмасдим. Муқаддас, илохий у Дунё, Охират, Вақтга боғлиқ бўлмаган Абадият, абадий қадрият дунёси, илохий моддий олам менга бугун дўстим ва ракс муаллимам томонидан яна қайтадан тухфа этилган эди. Мен Гёте ҳақидағи тушимни эслаб, файриинсоний кулиб, мен билан унутилмас ҳазил қилган кекса донишмандинг суратини кўз олдимга келтиришим керак эди. Гётенинг кулгисини, умри боқий инсоннинг кулгисини мана энди тушуниб етдим. Бу кулги қуруқ, фақат нурдан, ёруғликдан иборат эди, у изтироблар, иллатлар, гумроҳликлар, иштиёқ-интилишлар ва хато, англашилмовчиликлар орасидан ўтиб, тўғри Коинотга – Абадиятга ёриб кирган ҳақиқий, чин инсондан қолган из эди. «Абадият» эса Вақтнинг халос бўлиши, унинг қайтадан Бўшлиққа айланишидан бошқа нарса эмас эди.

Мен Марияни, у билан икковимиз доим бирга овқатланадиган жойдан излаб кўрдим, бироқ у ҳали келмаган эди. Шаҳар атрофида жойлашган жимжит қовоқхонада, тузалган дастурхон атрофида уни кутиб ўтиарканман, хаёлим ҳамон ўша сухбатда эди. Ҳермина билан ўртамизда бўлиб ўтган ушбу сухбат чоғида юзага қалқиб чиққан бу фикрлар менга шу қадар яқин, шу қадар аза-

лий, таниш туюлардики, гүё улар ўз афсоналаримдан, ўзимга тегишли бўлган суратлар оламидан олингандек эди. Бу умри бокийлар, вақт билан боғлиқ бўлмаган абадий бўшлиқда яшаганлари янглиғ, суратларга айланишиб, хаёлга чўмган, улар атрофидаги само янглиғ биллурдек тиник абадият ва Ердан ташқаридаги бу Оламнинг вазмин, юлдуздек чақнаган қувноқлиги, хушчақчақлиги – буларнинг барчаси менга қаёқдан бу қадар якин, бу қадар таниш туюлдийкин?.. Шунда «Cassations» ва «Wohltemperiertes Klavier»дан* парчалар ёдимга тушди ва бу мусиқалар ичра мана шу вазмин, юлдуз янглиғ ёрқинлик порлаб, самодек тиниклик уфуриб тургандек бўлди. Ҳа, бу мусиқа гүё Бўшлиққа айлантирилган Вакт эди, бу Вакт узра чексиз, ажойиб, ақл бовар қилмайдиган вақтичоғлик, абадий илоҳий Кулги жаранглаб турарди. О, тушимдаги ўша кекса Гёте ҳам бунга бафоят ҳамоҳанг эди. Шу пайт тўсатдан тушуниб бўлмайдиган, сирли бу Кулги – Умри бокийлар кулгиси кулокларим остида жаранглай бошлади. Унга маҳлиё бўлиб ўтирган кўйим, нимчамнинг киссасидан қалам олиб, қофоз қидира бошладим, қарасам олдимда, стол устида прейскурант – ичимлик нархномаси ётибди, уни шартта олиб, орқа тарафиға ўз-ўзидан қуюлиб келаётган сатрларни ёза бошладим... бу шеърларни бошқа куни чўнтағимдан топиб олдим. Улар қуидагича эди:

УМРИ БОҚИЙЛАР

Қадрдон она тупрок, водийлар узра
Бизга пешвоз ҳамон ҳаёт шиддати –
Ақл бовар қилмас кулфат, сархушлик,
Хайрлашув базмининг аччик тутуни,
Шодлик талвасаси, чексиз эҳтирос,
Қотиллар, судхўрларнинг қонли қўллари,

* «Cassations», «Wohltemperiertes Klavier» – Моцарт ва Бах асарларининг номлари.

Хамда дуо учун очилган қўллар,
Кўркув ҳам қувончдан караҳт оломон.
Бунда ором олар баҳту саодат,
Ёввойи хирсларнинг бўғик нафаси.
Ўз-ўзин ер, тупурар бехад,
Хаёлида уруш режаси.
Гўзал санъат бўлса фақат
Безаб туар қувонч уйларин,
Адолату, фахш, разолат
Мужассамдир ҳар жойда бу кун.

Бироқ бизлар топишдик яна
Юлдуз янглиғ сўнгсиз самода,
Кун, тун, соат бизга бегона,
На эркак, аёлмиз, на ёш, на қари.
Сизларнинг гуноҳу қўркувларингиз,
Қотиллигу хумор фарофатингиз —
Биз учун бамисли айланар куёш,
Ҳар бир кун биз учун чексиз, чексиз,
Жимгина кузатиб ҳайтингизни,
Самонинг беҳисоб юлдузларини,
Дўстлашиб олганмиз Аждаҳо билан,
Фазонинг яхлаган бўшлиқларида
Вазминидир тоабад сокин умримиз,
Вазмин ва нурлидир мангу кулгимиз.

Нихоят, Мария ҳам келди, иккаламиз шодон тамадди қилиб олгач, биргалиқда хонамизга равона бўлдик. У бу оқшом ҳар қачонгидан ҳам кўра гўзалроқ эди, менга турли ноз-карашмалар, навозишлар, қилиқлар қиласар, буларнинг барчаси эса гўё у билан бўлаётган сўнгги учрашувга дахлдордек туюларди.

— Мария, — дедим унга, — бугун жуда бошқачасан. Иккаламизни бунчалик қийнамасанг-чи, ахир эртага бал-маскарад. Бунақада хушторингга ярамай қоласан-ку, Гулғунчагинам, борди-ю хушторинг эртаклардагидек шаҳзода бўлиб чиқса, кейин мени эсдан чиқариб юборасан-

ми, деб қўрқаман. Бугунги хатти-ҳаракатларинг ҳам ба-
йни хайрлашув кечасини ёдга солаётиби...

У лабларини нақ қулоқларим остига олиб келиб, аста
шивирлади:

— Қўйсанг-чи, Ҳарри! Ҳар галги учрашувимиз ҳам
аслида охиргиси бўлиб қолиши мумкин эди... Ҳермина
агар сени чақириб олса, унда бошқа учрашмаслигимиз
аниқ. Балки бу эртага маълум бўлиб қолар?

Балдан олдинги ўша оқшом ҳиссиётларга шу қадар
бой бўлдики, бу қадар ажойиб, ширин-чучмал, иккиёқ-
лама кайфиятни таърифлашга тил ожизлик қиласди. Мен
чинакам баҳт нималигини туйгандим: Мариянинг гўзал-
лигидан, унинг менга бутун вужуди билан берилганли-
гидан, юзлаб нафис, гўзал ҳис-туйғулардан баҳраманд
бўлиш мендек кексая бошлаган одам учун ҳақиқий лаз-
зат, роҳат-фароғатнинг ўзгинаси эди. Уни яна бир идишга
ҳам қиёсласа бўларди: унда тўла мазмун, қизғинлик, тақ-
дир мужассам эдики, ишқ-муҳаббатнинг лаззатли, кўнгил-
ни ийдириб юборадиган икир-чикирлари билан машғул
бўларканман, тақдирим оёғини кўлга олиб, ҳуркак отдек
қўркув, қайfu, дард-ҳасратга тўлиб-тошиб, жарлик томон,
ўлим томон олға интилаётганини кўнглим сезиб туради.
Севги олдидаги тортинчоқлик ва қўркув янглиғ,
Мариянинг кулиб турган, ўзини бахшида этишга тайёр
бўлган гўзаллиги қаршисидаги қўркув янглиғ, ўлим ол-
дидан бўладиган шундай қўркувни ҳис қилиб, бу қўркув
ҳисси ҳадемай жонбозлик ва халос бўлиш билан алма-
шинишини ҳам билиб турадим.

Ишқ-муҳаббатнинг беҳаловат, питир-питир ўйинлари
билан жимгина машғул бўларканмиз, ўзимизни илгари бир-
биrimизга бугунгидек бу қадар яқин ҳис қилмагандик,
менинг қалбим, кўнглим, бутун вужудим эса Мария
 билан, унга боғлиқ барча нарсалар билан хайр-маъзур қилас-
ди. У туфайли мен жинс маъсумлиги олдида бола ва
ҳайвонга айланишдан иборат сирт-юзанинг ўйин ҳамда
кувончларига болаларча ўрганган эдим, бундай ҳолат-
ларни илгари ҳам истисно тариқасида камгина ўз бошим-

дан кечириб кўргандим, чунки ўй-хаёл, фикр-мулоҳаза, орзу-умидга тўла умр ва жинсий ҳаёт мен учун ҳамиша айб-гуноҳ аломати бўлиб келган, мамнун неъматнинг лаззатли, бироқ васваса уйғотадиган таъми олдида маънавиятли инсон ҳамиша ҳушёр, огоҳ бўлиб юриши лозим эди. Мана, Хермина билан Мария менга бу бофу бўстоннинг маъсумлигини кўрсатиши, мен у ерда меҳмон бўлганимдан миннатдорман — ҳадемай бофни тарк этиш вақти ҳам келди, бу чаман ўта гўзал ва ҳароратли эди. Энди эса янги орзу-истаклар чўққиси томон интилишим, ҳаётимда қилган беҳисоб гуноҳларимни ювиф, ўзимни оқлашими зарур эди. Енгил ҳаёт, енгил муҳаббат, енгил ўлим — булар мен учун аҳамиятсиз нарсалар эди.

Қизларнинг ўзаро шивир-шивир, шама, имо-ишора-ларидан эртага бўладиган бал учун бутунлай бошқача ҳийла-макрлар режалаштирилаётганини билиб олдим. Балки ҳақиқатан ҳам бугун Мария билан сўнгти марта бирга бўлаётганимиздир, балки бизни эртага яна янгича қисмат, янгича тақдир кутаётгандир, ким билади?.. Мен оташ бўлиб ёна бошладим, фам, ҳасрат, қўрқувдан бўғилай дердим. Марияга жон-жаҳдим билан ёпишиб, ул гўзал бўстоннинг барча сўқмоқ бўйлаб кезарканман, ушбу жаннат дарахтининг лаззатли мевасини яна бир бор тишларим орасига олиб, маҳкам босдим.

Шу кеча уйқудан қолган эдим, эртаси кун кундузи ухлаб ўрнини тўлдирдим. Ўзиям роса чарчаган эканман, эрталаб чўмилиб олдим, уйга бориб, хонамни қоронфи қилдим-да, уйқуни урдим. Ечинаётиб, қўлимга шеър илинди, уни бирпасда унутиб, ўзимни ҳоргин ўринга ташладим, Марияни, Херминани ва бал-маскарадни ҳам унутиб, кун бўйи ухладим. Кеч бўлганда ўрнимдан турдим, соқол олаётиб бал-маскарад бошланишига атиги бир соат қолгани эсимга тушди, фрак* кўйлак қидиришим керак. Яхши кайфият билан кийиндим-да, кўчага чиқдим, энг аввало, овқатланиб олишим керак эди.

* *Фрак* — олдинги этаги қисқа, орқа этаги узун эркаклар кийими.

Бу мен иштирок этаётган биринчи бал-маскарад эди. Албатта, илгарилари ҳам бундай байрамларга гоҳ-гоҳ бориб туардим, улар ажойиб бўларди, мен одатда рақсга тушмасдим, томошабин бўлиб, қайтиб келаверадим. Бошқаларнинг байрамлар ҳақида завқ-шавқ билан ҳикоя қилишлари менга ҳамиша қулгили туюларди. Бугунги бал ҳам мен учун воқеа эди, мен уни қизғин ва озгина ҳадик билан кутардим. Олиб борадиган маъшуқам йўқлиги сабабли, кечроқ боришга қарор қилдим, қолаверса, Ҳермина ҳам худди шундай маслаҳат берган эди.

Азалий бошпанам — «Пўлат дубулға»га кейинги пайтда камроқ борардим, у ерда асосан, ҳаётдан кўнгли соvigан, ихлоси қайтган одамлар вино ичиб, ёшлик чоғларини эслаб ўтиришарди, бу эса менинг ҳозирги яшаш услубимга унчалик тўғри келмас эди. Бироқ бугун кечқурун негадир ўзимдан-ўзим яна ўша ёқларга боргим келиб қолди; хайрлашув ва келгуси тақдирнинг ҳозирги кўрқоқ ва шодон кайфияти мени яна ўтмиш умримнинг хотиралари билан боғлиқ бекатларидан бири бўлган, чекилаверганидан тутунга тўлиб кетган ана шу мўъжазгина қовоқхонага бошлаётганди. Мен яқин-яқингача у ернинг доимий мижозларидан бири эдим, у ерда ўтириб бир шишагина оддий маҳаллий винодан ичсам, шунинг ўзи яна бир кеча ёлғиз тонг оттиришим, ҳаётимнинг яна бир кунини сабр-тоқат билан ўтказишим учун кифоя киларди. Ўшандан буён бошқа кучлироқ воситаларни ҳам, ширинроқ оғуларни ҳам кўп totиб кўрдим. Кулимсираб эски дўконга кириб бордим, бека салом бериб кутиб олди, оғизларига толқон солиб ўтирган кунда шунда мижозлар ҳам индамайгина бош силкиб қўйиши.

Оппок озода ёғоч стол устида бир зумда қовурилган хўроздча пайдо бўлди, катта қадаҳга тиниқ эльзас виноси дехқончасига тўлдирилди. Еб-ичиб ўтиарканман, вужудимни аввалги ҳаётим лавҳалари билан боғлиқ бўлган, кўшилиб, чатишиб кетган қандайдир сўлғин, аллақандай хузурбахш ҳамда оғрикли ҳиссиётлар чулғаб олди. «Замонавий» одам буни *сентименталлик* деб атайди; у нарса-

ларга, дейлик, ўзи учун муқаддас бўлган нарсаларга, машинасига кўпам меҳр қўявермайди, машинасини иложи борича тезроқ бошқа яхшироқ русумдагисига алмаштириш пайидан бўлади. Бу замонавий одам дадил, чаққон, эпчил, улдабуро, файратли, соғлом, вазмин ва қатъий, ажойиб шахс, у бўлгуси урушда ҳам ўзини худди эртаклардагидек намоён қиласди. Мен эса на замонавий, на эски модадаги одам, балки шунчаки Вақтдан сирфалиб, ажраб тушиб қолган ҳамда ўлимни истаётган, ўлим сари интилаётган одам эдим, холос. Сентименталликка нисбатан ҳеч қандай қаршилигим йўқ эди, куйиб кул бўлган юрагим ҳали ҳам ҳис-туйфуга ўхшаган нарсаларни сезаётганидан хурсанд, шод ва миннатдор эдим. Шу тариқа мен эски қовоқхона, эски, қўпол, бесўнақай курсилар, тутун ҳамда вино хиди, одатлар, ҳарорат, илиқлик, ватани эслатувчи алланималар билан боғлиқ хотираларга берилиб ўтирадим. Хайрлашиш, хайр-маъзур қилиш гўзал, ёқимли нарса. Мен учун мана шу қаттиқ ўриндиқ, манови деҳқонча қадаҳ азиз эди, эльзас виносининг мазали таъми, мана шу хонадаги барча таниш нарсалар, тушкун бир кайфиятда хаёл суриб ўтирган ичувчи биродарларимнинг юз-кўзлари мен учун азиз эди... мен бу ерда туйган, ҳис қилган нарсалар майхона, вино ва сигара нималигини билмаган болалик даврининг эски модадаги майхона сурури билан енгил йўғрилган мешчан сентименталлик эди. Бироқ мана шу сентименталликни майда-майда қилиб ташлаш учун ҳеч қандай Чўл бўриси тишларини иржайтирмас, умуман кўринмас ҳам эди. Бу ерда ўтираканман, ўтмиш хотираларимдан дилим ёришиб, шу орада сўнган бурж нурларининг хира ёғудисидан мунаввар бўлиб, тинч, осойишта, сокин тин олардим.

Шу пайт кўча савдогари келиб қолди, ундан бир ҳовуч қовурилган каштан^{*} харид қилдим. Гул кўтарган кекса аёлдан бир жуфт чиннигул сотиб олдим-да, қовоқхона бекасига совфа қилдим. Ҳисоб-китоб қилмоқчи бўлиб,

* Каштан – корақайинлар оиласига мансуб дараҳт ва унинг ёнғори.

одатдагидек ён чўнтағимга қўл солаётганимдагина, фракда эканлигимни сезиб қолдим. Бал-маскарад! Ҳермина!..

Бироқ вақт ҳали анча эрта эди, шунинг учун Глобус-залга ҳозироқ бораверайми-йўқми, деб иккиланардим. Шу билан бирга, кейинги пайтдаги бу барча томоша, ўйинкулги, кўнгилочар тадбирларни ўйларканман, аҳволими-ни дилдан ҳис қилиб, уларга нисбатан баъзи бир қаршилик ҳамда эътиrozларни кўнгилдан ўтказардим, катта-кон, одамлар билан лиқ тўла, сершовқин залларни кўнглим унча хушламас, ёт, бегона мухит олдида, айш-ишрат дунёси олдида, рақсга тушиш олдидан худди мактаб боласига ўхшаб тортиниб, қимтинардим.

Шошилмай борарканман, кинотеатрга қўзим тушиб қолди, чироқларининг нурлари ажиб товланар, улкан ранг-баранг плакатлар ўзига чорларди. Бир неча қадам ташлагач, орқага қайтдим-да, ичкарига кирдим. Соат ўн бирга қадар бемалол коронфида ўтирсам бўларди. Кўлида ёруғи кўзни оладиган фонар ушлаган хизматчи бола ёрдамида қоп-коронфи зал ичидаги ниҳоят, бўш ўрин топиб ўтирдим, ўзимни гўё Таврот орасида ҳис қилдим. Намойиш этилаётган фильм пул ишлаш учун эмас, балки катта харажатлар эвазига, муқаддас мақсадлар йўлида нозик дид билан ишланганлиги кўриниб турарди. Уни томоша қилиш учун тушдан сўнг ўзларининг дин муаллимлари бошчилигига ҳатто ўқувчилар ҳам келишарди. Фильм Мусо алайҳиссалом ҳамда Мисрдаги яҳудийлар тарихи ҳақида бўлиб, инсонлар, отлар, туялар, саройлар, фиръавнлар ҳашамати ва чўғдек қизиб турган саҳрода яҳудийларнинг тортган азоб-укубатларидан ҳикоя қиласига ҳам олди. Соч-соқоли бир оз Волт Витманнигига* ўхшаб кетадиган Мусо алайҳиссалом, албатта, уни саҳнада қоийилмақом қилиб ўйнашганди, кўлида узун асо билан саҳро бўйлаб яҳудийлар олдида худди Воданга** ўхшаб аста одимлаб, жўшқин ва фамгин кетиб борарди. Мана, у

* *Волт Витман* – америкалик шоир (1819–1892).

** *Водан* – қадимги германларда олий илоҳ, тангри.

Қизил Денгиз сохилида турган күйи муножот қила бошлади, шунда Қизил денгиз ораси очилиб, торгина күча, улкан түлкінлар ўртасида торгина тик йўл пайдо бўлди (киночилар буни қандай қилиб суратга олишгани ҳақида фильмни кўргани келгандар бир-бирлари билан соатлаб баҳслashiшарди), пайғамбар ва юраксиз, журъатсиз оломон йўлдан ўта бошлади, улар кетидан фиръавнинг ҳарбий, жанговар аравалари пайдо бўлди, мисрликлар аввалига кўркиб, сохилда туриб қолиши, сўнг мардона қадам ташлаб, олға интилдилар, сал ўтмай баланд тўлқин — пўртана кўтарилиб келиб, тилла совут кийиб олган дабдабали фиръавнни арава-паравалари-ю одамлари билан бирга қўшиб босиб кетди... шунда беихтиёр худди шу воқеа куйланадиган Ҳенделнинг икки бас (йўғон овоз)га яраша ажойиб дуэтини* эсладим. Кейин Мусо алайҳиссалом Синай бўйлаб кўтарила бошлади. Тоғ қояларидан иборат овлоқ жойга етганида унга — фамгин қаҳрамонга Иегова** бўрон, момақалдироқ ва ёруғлик (нур) ёрдамида Тангри буюрган ўн Амрни етказди. Бу орада унинг ночор ҳалқи тоғ этагида олтин (пул) ҳукмронлигини ўрнатиб, кўнгилхушлик, ўйинкулгига бутунлай берилиб кетди. Буларнинг барчасини — диний воқеалар, уларнинг қаҳрамонлари-ю мўъжизаларини кўриб туриб, ишонгим келмасди, бу нарсалар — ўша даврнинг эски, алмисоқдан қолган маданий лавҳалари, болаларимиз ҳамда уйидан олиб келган нонини жимгина кавшаб ўтирган миннатдор томошабинлар кўз ўнгидаги бошқа бир дунёнинг, ақл бовар қилмайдиган, ажойиб, мислсиз бир нарсанинг хира, фирашира тасаввурини жонлантириб юборган эди. Эҳ, худойим-ей, ўшанда нафақат мисрликлар, балки яхудийлар ва бошқа барча инсонлар ҳам файритабиий ҳамда батар-

* Ҳенделнинг икки бас (йўғон овоз)га яраша ажойиб дуэти – Георг Фридрих Ҳендел (1685–1759)нинг «Мисрдаги Исроил» ораторияси(дан).

** Иегова – иудаизм (яхудо дини)да олий тангри.

тиб равища ҳалок бўлиб қўяқолганларида эди, бугунги разолату сохта, ярим-ёрти ўлимларга ўрин ҳам қолмаган бўларди. Ҳа, ҳа!

Менинг ажиб, ғалати, сирли беҳоллигим, бал-маскарад олдидан пайдо бўлган ўзим ҳам тан ололмайдиган кўркув ҳисси кинотеатрда ҳам босилмади, аксинча, ёқимсиз, ноҳуш бир тарзда кучайиб борди ва мен Ҳерминани ўйлаб, Глобус-залга бориш учун ниҳоят, ўзимни қўлга олишим керак эди. Орадан хиёл вақт ўтган, бал аллақачон бошланган, борганимда тарақа-туруқ авжида эди. Мен ҳам хушёрлик ва тортинчоқлик билан маска (никоб)лар ур-сур, тўполонига қўшилдим. Шунда танишлардан кимдир мени тутириб ўтди, бир қиз шампан ичишга таклиф қилди, масхарабозлар сенсираб, елкамга қоқиб қўйишиди. Мен уларнинг ҳеч қайсисига эътибор бермай, одамлар билан тўлиб-тошган хоналар бўйлаб, минг машакқат чекиб, гардеробга бир амаллаб етиб олдим. Гардероб рақами ёзилган паттани, мабодо қий-чув, тўполондан зерикадиган бўлсам, яна излаб юрмай тағин деб, чўнтағимга авайлаб солиб қўйдим.

Улкан бинонинг барча хона ва залларида байрамона шовқин-сурон, ғала-ғовур, ўйин-кулги авжида эди. Ҳамма жойлар, ҳатто ертўлалар, йўлаклар ва зиналарни ҳам рақс тушаётганлар банд қилган, турли-туман ниқоблар, рақс, мусиқа, кулги-қаҳқаҳа билан тўлиб-тошган эди. Рақс тушаётган оломон орасидан урина-сурина сирғалиб, негрлар капелласидан дехқонча мусиқа янграётган жойга, улкан асосий залдан чиқиб, йўлаклар, сўнг зиналар, барлар, емакхоналардан ўтиб, ниҳоят, шампан ичиладиган барга ўтиб бордим. Деворларга кўпроқ энг ёш санъаткорларнинг ақлга сифмайдиган, шўх, ғалати, файритабиий расмлари осиб ташланганди. Санъаткорлардан тортиб, журналистлар, олимлар, ишбилармонларгача ва албатта, шаҳарнинг бутун казо-казолари, ҳамма-ҳаммаси шу ерда эди. Оркестрлардан бирида мистер Пабло ўзининг қайрилма карнайини масрур чалиб ўтиради; у мен-

га күзи тушиб, қаттиқроқ чалиб, саломлашган бўлди. Одамлар оқимига қўшилиб, хоналарнинг унисидан буни-сига кириб-чиқар, зиналардан кўтарилиб, қайта тушардим; ертўладаги йўлаклардан бирини санъаткорлар дўзах, жаҳаннамга ўхшатиб жиҳозлаганди, у ерда бир гурух иблислар зўр бериб, жон-жаҳдлари билан ноғора чалишарди. У ёқ-бу ёққа аланглаб, Хермина билан Марияни излай бошладим. Асосий залга қайтиб киришга ҳар қанча уринмай, тинмай оқиб келаётган оломонга қўшилиб, ҳар гал адашиб ўтиб кетавердим. Тун яримлашиб қолган бўлса ҳамки, ҳали ҳеч кимни тополмадим; рақсгаям тушмаган бўлсан-да, бошим айланиб, қўзим тиниб, аъзойи баданим қизиб кетди. Ҳорғин курсига чўқдим, чор-атрофимда ёт, бегона кишилар. Вино буюрдим, уни ичиб ўтириб, бунақанги сершовқин байрамларда иштирок этиш мен-дақанги ёши ўтган одамнинг иши эмас экан-да, деб ўйлай бошладим. Бўшашиб майнин сипкорарканман, рақс тушаётган аёллардан кўз узолмасдим, ён-атрофимда фалати-фалати, ажойиб маска-ниқоблар пайдо бўларди. Мени ҳар замонда туртиб қўяётган қизларни жимгина кузатардим, уларнинг нияти ё тиззамда ўтириш ёки мен билан бирга рақс тушиш эди. Қари вайсақи, деб қўйди қизлардан бири, у ҳақ эди. Мен бир оз дадил бўлиш ва кайфиятимни кўтариш учун озгина отиб олмоқчи бўлдим, бироқ вино ҳам бемаза эди, иккинчи қадаҳни эса ичолмадим. Аста-секин ортимда Чўл бўриси турганини ҳис қила бошладим, у тилини чиқаарди. Менга ҳеч гап бўлмаган, факат бу ерга адашиб келиб қолган эдим. Албатта, бу ерга яхши ниятда келган эдим, лекин хурсанд бўлолмадим. Шу пайт атрофдаги гулдурос, сершовқин қувонч, кулги-қаҳқаҳалар, бутун шовқин-сурон, тўполон қўзимга аҳмоқона ва зўраки қўриниб кетди.

Шундай қилиб, орадан бирор соат ўтмаёқ, ҳафсалам пир бўлди, ғазабим тошиб, пальтомни кийиб, кетиш учун яна гардеробга қараб юрдим. Бу мағлубият, Чўл бўрисига томон қайтиш эди, буни агар Хермина билиб қолса,

сира-сира кечирмасди. Аммо мен бошқача йўл тутолмасдим. Гардеробга етгунча ён-атрофимга диққат билан разм солиб бордим, зора қизлар кўриниб қолса, деб. Қаёқда! Мана, дарчага ҳам етиб келдим, тўсиқ ортидаги хушмуомалали киши паттани олиш учун қўл чўзди, мен нимчамнинг киссасига қўл солдим — рақам ёзилган патта йўқ эди! Жин урсин, энди шу етмай турувди. Боя заллар бўйлаб фамгин кезинган пайтимда ҳам, bemаза винони ичиб ўтирганимда ҳам чўнтағимга бир неча бор қўл солиб кўргандим, думалоқ патта жойида эди. Энди эса йўқ. Хуллас, ҳамма нарса менга қарши турарди.

— Нима, патта йўқми? — сўради ёнимда турган кичкинагина сарик-қизил иблис ўткир, чинқироқ овозда. — Фам ема, оғайни, ма, меникини олақол.

У шундай деб, паттани узатди. Уни олиб улгурмасимданоқ, абжир йигитча зумда кўздан фойиб бўлди. Картондан ясалган мўъжазгина думалоқ паттага рақамини кўрай деб кўз югуртирсам, унда рақам-пақам йўқ, факат майда ҳарфлар билан алланималар ёзилган эди. Гардеробчидан кутиб туришини илтимос қилиб, паттани қандил ёруғига тутдим. Унда қинғир-қийшиқ ҳарфлар билан ажи-бужи қилиб алланарса ёзилганди:

Бугун кечаси соат тўртдан бошлаб магиявий театр ишлайди. Фақат жиннилар учун — Кириш баҳоси ақл. Ҳар ким учун эмас. Ҳермина жаҳаннамда.

Ипи бир зум ўйинчининг қўлидан сирғалиб чиқиб кетган қўғирчоқ яна қайтадан жонлангани каби, қисқа давом этган «ўлим»дан сўнг тирилиб, яна ўйинга қўшилиб, рақс тушиб, ўйнаб, қилиқлар қилганидек, мафиявий куч таъсирида мен ҳам ёшариб, файрат кириб, ҳозиргина ўзим хоргин тарк этган тиқилинч оломон орасига яна ўзимни урдим. Ҳали ҳеч бир гуноҳкор, осий банда дўзахга тушишга бу қадар шошилмаган эди. Ҳозиргина локланган пойабзал оёғимни қисиб турган, атир ҳидига тўйин-

ган ҳаво кўнглимни оздирган, иссиқ ҳолдан тойдириган эди; энди эса вонстеп тактига ҳамоҳанг равишида оёғим ерга тегмай, енгил дингиллаб борардим. Барча заллардан ўтиб, жаҳаннам томон шошиларканман, гўё мўъжиза рўй бергандек, чор-атрофдаги қандайдир ҳарорат, сершовқин мусиқа, турфа ранглар, аёлларнинг хуш бўйла-ри, сархуш рақс тушаётган юзлаб қувноқ одамларнинг ҳис-ҳаяжондан порлаб турган юз-кўзлари худди мени аллалаб, кўтариб бораётгандек эди. Шу пайт испанча либос кийган раққоса «мен билан рақс тушмайсанми!» деб қолди, унга шоша-пиша «иложим йўқ, дўзахга туши-шим керак, аммо бир марта бўсангта йўқ демайман» де-дим. Ниқоб остидаги ақиқ лаблар мен томон яқинлашди, шунда, Марияни таниб қолдим. Уни маҳкам қучоқлаб, бағримга босдим, лаблари нақ ёзда очилган атиргулнинг ўзи эди. Биз бирга рақс тушиб кетдик. Паблонинг ёни-дан рақс тушиб ўтдик. У мусиқа чалиш билан овора, бизга ҳайрон қараб қолди, унинг нигоҳида ҳам қувонч, ҳам лоқайдлик зоҳир эди. Йигирма қадам ҳам ташлама-ган эдик, бирдан мусиқа овози тинди, Марияни истар-истамас қучофимдан бўшатдим.

— Сен билан жон деб яна рақсга тушардим, — де-дим унга, — кел, келақол, Мария, мен сенинг гўзалли-гингга мафтун бўлиб қолдим, сени яна бир зум тавоғ қиласай! Лекин кўрмайсанми, мени Хермина йўқлабди. У жаҳаннамда экан.

— Ўзимам шундай деб ўйловдим. Яхши қол, Ҳарри, мен сени доимо муҳаббат билан эслайман.

У хайр-хўшлашди. Бу хайрлашув эди, бу куз эди, бу қисмат эди, лекин барчасидан барқ уриб очилган ёзги атиргулнинг хуш бўйи уфуриб турарди.

Мен яна узундан-узун йўлаклар, тиқилинч зиналар бўйлаб дўзах томон чопиб кетдим. У ерда, сакичдек қоп-қора деворларда хунук чироқлар ўткир нур сочиб турар, иблислар хол-жони борича тарақа-туруқ килиб ётарди. Баланд баркурсида келишган йигитча ўтирас, у

ниқобсиз, әгнида фрак, менга истеҳзо билан қараб тұрарди. Шу пайт рақс тушаёттәнлар түлкіни мени деворға қисиб қўйди, ўта тор жойда йигирматача жуфтлик рақс тушарди. У ердаги аёлларнинг барчасига синчиклаб разм солдим. Уларнинг кўпчилигидаги никоб-маска бор эди, баъзилари менга кулиб қараб қўярдилар, аммо Ҳермина кўринмас эди. Курсида ўтирган хушбичим йигитча менга бошдан-оёқ бир қараб қўйди. «Ҳа майли, кутиб турай-чи, рақс тугаб, танаффус әълон қилингач, балки ўзи келиб қолар ё чақирап», ўйладим ўзимча. Аммо рақс тугади ҳамки, ҳеч кимдан дарап бўлмади.

Сўнг барга яқин бордим, у пастак кичкина хонанинг бир бурчига туташган эди. Йигитча ўтирган курси ёнига жойлашиб, виски буюрдим. Уни ичиб ўтириб, йигитчани ён томондан кузата бошладим. У менга шу қадар таниш ва ёқимтой кўриниб кетдики, гўё сурат бўлиб, ўтмишнинг олис, хира хотираларини ёдимга солди. Шунда худди ток ургандек, түлқинланиб кетдим: ахир у кимсан ёшликтаги дўстим Ҳерманн эди!

— Ҳерманн! — дедим иккиланиб.

Йигит жилмайди.

— Ҳарри! Мени ахийри топволдингми?

У Ҳермина эди, фақат соchlарини сал бошқача тараб олган, енгилгина пардоз-андоз қилволганди, холос. Унинг мода бўлган тик ёқа орасидан кўриниб турган ёқимтой, хушбичим ва оппоққина юзидан ақл ёғилиб турар, нозик қўллари эса фракнинг кенг қора енглари ва оқ манжет (қадама енг)ларидан ажиб ва бежирим чиқиб турарди, узун қора шим кийган, оёқларига эса қора-оқ ипакдан тикилган эркаклар пайтоғини илиб олган эди.

— Шуми ҳали костюминг, Ҳермина? Шу билан мени ўзингга мафтун қилмоқчимидинг?

— Ҳозирча, — деди у бош ирғаб, — бир қанча хонимни ўзимга ром қилиб бўлдим. Мана, энди навбат сенга келди. Кел, аввал бир бокалдан шампан ичайлик.

Баланд баркурсиларда ўтириб, ича бошладик. Атродимизда, шундоққина ёнгина мизда ракс давом этар, камонча билан чалинадиган асбоблардан кучли, жүшқин мусиқа янграрди. Ҳермина менга ёқиши учун деярли ҳеч нима қилмаётган бўлса-да, мен унга бирпасда маҳлиё бўлдим-қолдим. Эркакча кийиниб олганидан у билан бирга ракс туша олмасдим, нозик ҳаракатларига жавоб қайта-ришнинг ҳам иложи йўқ эди. Эркакча ниқобда у мендан олис ва холис туюлса-да, барибир, мени нигоҳлари, гапсўзлари, аёлларга хос ноз-карашма, бутун сеҳр-жодуси билан ўзиники қилиб олганди. Ҳали унга қўл тегизмасимданоқ, унинг сеҳрига таслим бўлгандим, бу сеҳр икки жинсга мансуб бўлиб, бу ролни ўзи ўйнарди. Негаки, у мен билан Ҳерманн ҳақида, менинг ва ўзининг болалиги ҳақида, жинсий балофатга етгунга қадар кечган йиллар хусусида суҳбат қуради, ёшлиқдаги севги қудрати нафақат икки жинсни, балки ўз йўлида учраган ҳар қандай нарсаларни, рухият ва ҳиссиётни ҳам қамраб олиб, уларнинг барчасига муҳаббатнинг шундай бир оташ сеҳрини, эртакларда тасвирланганидек, ўзгара олиш қобилиятини бахш этарканки, бундай қобилият бир кун вакти келиб айрим шахслар ҳамда шоирлардагина такрор юзага чиқиб, намоён бўларкан. У йигитча ролини қойилмақом ўйнарди, сигареталар чекиб, жўшқин сўзлар, айни пайтда бир оз мазах қилиб, кулиб ҳам қўярди, бироқ буларнинг барчасида хиссий муҳаббат туйфуси шуълаланиб турар, буларнинг барчаси гўё фосиқлик, власвасага айланиб бораётганини англаш, сезиб турардим.

Ҳерминани қанчалар аниқ ва яхши биламан деб ўйла-майин, бу оқшом у менга ўзини нақадар мукаммал тарзда қайтадан намоён эта бошлаганди. Орзиқиб кутилган тўрни устимга оҳиста ва сездирмай ташларкан, у нақадар ўйноқи, совуқ ва хунук бир тарзда қўлида мен учун мўлжалланган ширин оғуни тутиб турарди!

Биз бир оз у ёқ-бу ёқдан гурунглашиб, шампан ичиб ўтиридик. Сўнгра, саргузаштталаб кашфиётчиларга ўхшаб, заллар бўйлаб сандироқлаб, лақиллашиб кеза бошладик, мақсад — бирорларнинг муҳаббат ўйинларини сездир-

май кузатиб, ўзимизга муносиб жуфт ахтарардик. У менга аёлларни кўрсатиб, улар билан рақс тушишга ундар, униси ёки бошқа бирорида қўллаш мумкин бўлган йўлдан уриш санъати юзасидан маслаҳатлар берарди. Биз энди рақиблар эдик, навбатма-навбат бир аёлга яқинлашардик, у билан галма-галдан рақс тушиб, икковимиз ҳам бара-вар унинг кўнглини овлашга ҳаракат қиласардик. Бироқ буларнинг барчаси ниқоблар ўйини эди, холос, бу ўйин иккаламизни бир-бири изга янада яқинлаштирас, биз-ларни бир-бири изга учун ёндириб, алангалатарди. Буларнинг барчаси эртак эди, барчаси бир ўлчам бой, теран маъно-мазмун кашф этган ўйин, товланиш, жиловланиш ва белги, ишора, рамз эди. Биз ёш, келишган, гўзал бир аёлни учратиб қолдик, у бир оз маъюс кўринарди, шунда Ҳерманн у билан рақс туша бошлади, аёл бир зумда очилиб кетди ва улар шампан ичиладиган шийпончага қараб кетишиди. Кейин айтиб беришича, у бу аёл кўнглини эркак сифатида эмас, балки аёл бўлиб, авраб, забт этибди. Менинг кўз ўнгимда буларнинг барчаси – рақсдан гумбурлаётган заллардан иборат бўлган, гувиллаб акс-садо бераётган уй, ниқоблардан сармаст, сархуш одамлар аста-секин ажойиб, зўр хаёлий жаннатга айланаборди, гулдан гулга ўтарканман, уларнинг муаттар исларидан маст бўлар, мевадан мевага сукланиб боқар, уларни бармоқларим билан ушлаб кўрадим, ям-яшил барг-япроқлар орасидан илонлар пайдо бўлиб, мени имлаб, йўлдан оздирар, қорайиб турган ботқоқлик узра нилу-фаргул ора-сира кўзга ташланар, дарахт шохларида афсонавий қушлар чуғурлашар, хуллас, буларнинг барчаси каминани орзиқиб кутилган мақсад сари етаклар, янгича иштиёқ билан ягона ёр томон чорлар эди. Бир гал нотаниш бир қиз билан рақс тушдим, у шунақсанги ёниб, эҳтирос билан ўйнардики, ҳар қандай одамни ҳам сармаст ва сархуш қилиб, эс-хушини олиб кўярди. Икков ширин хаёлларга берилиб, орзулар қанотида парвоз қила бошладик, шунда қиз тўсатдан кулиб юборди:

– Вой, сени аввал кўрган одам танимайди-я! Бугун оқшом шунақаям эси йўқ ва bemaza эдинг-ки...

Бу ўша, бундан бир неча соат олдин мени «қари вайсақи» деб койиган қиз эди. Мана, энди у мени қўлга киритдим, деб ўйларди, мен эса кейинги рақсда бошқа бир аёл билан куйиб-ёна бошладим. Ўзиям икки соат мўл, узлуксиз рақс тушибман, рўпара келган рақсга, ҳатто ўзим билмайдиганларига ҳам тушиб кетаверибман. Рақс тушаётганимда мудом ёнимда жилмайиб турган йигитчя — Херманн пайдо бўлар, менга имо қилиб қўяр ва тиқилинч оломон ичра кўздан йўқоларди.

Эллик ёшимгача мен билмаган, кўрмаган, буни ҳар бир ўсмир, қиз бола ва талаба ўз бошидан кечирган бўлса керак, ушбу воқеа-кечинма менга мана шу бал оқшомидагина насиб этди: бу байрам шавқи, байрам сархушлиги, таназзулга учраган шахснинг кўпчилик ўртасидаги сир-синоати, шодликнинг илоҳий бирлашиши эди. Бу ҳақда мен кўплаб ҳикоялар тинглаганман, бу ҳатто ҳар бир оқсоҳ, хизматкор аёлга ҳам маълум нарсалар эди, ҳикоя қилаётгандарнинг кўзлари ҳар доим фуурдан чақнаб кетарди, мен эса бунга жавобан мудом яrim хаёлчан, яrim ҳавас ва яrim ҳасад билан кулиб қўяқолардим. Паришон, бефарқ, лоқайд кишининг, ўз-ўзидан халос бўлган одамнинг мафтун кўзларидаги ўша нурни, кўпчилик суронида ўзини йўқотмай, очилиб кетадиган одамларнинг ўша табассуми ва яrim телба паришонлигини ҳаётимда кечган олийжаноблик ва разолат, маст-аласт рекрут* ҳамда матрослар, шунингдек, байрам томошалирида завқ-шавққа тўлган улуғ санъаткорлар ва урушга борган ёш аскарлар мисолида юз марталаб кўрганман. Яқиндагина ҳам, оркестрда саксофон чалиб, мусиқадан сармаст бўлиб ўтирган дўстим Паблога ёки дирижёрга, барабан (дўмбира)чига мафтун бўлиб ҳамда қойил қолиб термилиб турган, қўлида банджо** тутган кишига разм солиб туриб, ўша баҳтиёр хаёлпараст юз-кўзларидаги мана шу нур ва табассумдан таъсирланиб, ҳайратга тушганман, уни севиб, ҳавас қилиб, андак масхаралаб, ҳазил-

* Рекрут — ҳарбий хизматга чакирилган янги аскар.

** Банджо — Америка негрларининг торли мусиқа асбоби.

лашган ҳам эдим. Мен баъзан, болаларга хос бўлган мана шундай нур, мана шундай табассум фақатгина бутунлай ёш, навқирон инсонларгагина ёки бўлмасам, кучли индивидуаллашмаган ҳамда алоҳида табақаланмаган халқларгагина жоиз, деб ўйлаб юрар эдим. Мана энди бугун эса, шу оромбахш кечада менинг ўзим, яъни Чўл бўриси — Ҳарри, гул-гул очилиб, яшнаб кетган эдим, шу теран, болаларга хос ҳамда эртакнамо баҳт-омад ичра сузардим, халойик, мусиқа, мақом, ичимликлар сурори ва суронидан нафас олардим, буни қарангки, илгарила-ри қайси бир талабанинг мана шунака баллар ҳақидаги мақтов ва ҳамду саноларга тўла ҳикоясини кўпинча ки-ноя, истехзо ва аллақандай лоқайд ўйчанлик билан тинг-лар эдим. Мен энди мен эмасдим, мен шахс сифатида байрам шовқин-суронида сувга чўккан туздек эриб кетган эдим. Мен энди у ёки бу аёл билан рақс тушардим, бироқ менинг бағримдаги, соchlари мени сийпаётган, ву-жуудидан хуш бўй таралаётган аёл биргина, униси ёки бунисигина эмасди, балки бошқа барча, барча аёллар ҳам бирга эди. Улар худди шу залда, худди шу рақс, ўша мусиқанинг ўзгинасида худди менга ўхшаб сузи-шарди, уларнинг гул-гул очилиб, яшнаб, порлаб турган юз-кўзлари улкан хаёлий, ажойиб, гаройиб гулларни эслатарди, уларнинг барчаси меники, мен эса уларники эдим, қувонч-шодлигимизни ўзаро бирга баҳам кўрардик. Бунда эркаклар ҳам иштирок этишар, улар ҳам менга бегона эмас, уларнинг табассуми меники, меники эса уларники эди, мен уларнинг, улар эса менинг кўнглимни олишарди.

Ўша йили қишида «Йенинг» номи билан пайдо бўлган янги рақс — фокстрот дунёни забт этганди. Худди шу рақс — йенинг мусиқаси оралатиб чалинар ва ҳар гал муштоқлик билан кутиб олинарди. У барчамизнинг жон-жонимизга сингиб кетган, янграганда сармаст ва сархуш бўлиб, оҳангига қўшилишиб, бирга куйлашардик. Мен йўлимда пайдо бўлган ҳар бир аёл билан, ёш-ёш қизлар билан, очилиб кетган ёшгина хотинлар, роса етилган

ойимтиллалар ҳамда ғамгин сўлиб бораётган аёллар, хуллас, биргаликда кулишиб, уларга мафтун бўлиб, баҳтиёр ва гул-гул очилиб, бетиним, узлуксиз рақс тушардим. Пабло менинг бу қадар очилиб кетганимни кўриб, шодланди чофи, ялт этиб менга қаради, чунки у мени доим қайфу-ҳасратга чўмган, одам ачинадиган бир бечора, деб ўйларди, оркестрда ўтирган жойида шартта турди-да, хурсандлигидан шох карнайи (бурғуси)ни варанглатиб чалиб юборди, бу ҳам етмагандек, стол устига чиқиб, икки лунжини тўлдириб чалди, йенинг тактига ҳамоҳанг тарзда шўх ва шодон чайқалиб туриб қолди. Мен ва менинг раққосам бунга жавобан унга ҳавоий бўса йўллаб, кўшилишиб куйлай бошладик. Эҳ, дердим ўзимга ўзим шунда, энди нима бўлса бўлавермайдими, ахир менга ҳам бир мартагина, мундоқ баҳтиёр, очилиб-сочилиб, ўзўзимдан халос бўлиб, Паблога оға ва бола бўлиш насиб этди-ку.

Билмадим, бу баҳтиёр сархушлик неча соат ёки лаҳза давом этдийкин, вақт қандай ўтганини ҳам сезмай қолибман. Байрам қизиган сайин давра ҳам тобора торайиб борарди. Кўпчилик аллақачон кетиб бўлган, йўлаклардан овоз эштилмас, чироқларнинг кўпи ўчирилган, зинахона бўм-бўш, хувиллаб ётар, юқори заллардаги мусиқачилар ҳам бирин-кетин кетиб бўлишганди; фақатгина асосий залда ва пастдаги «жаҳаннам»да ранг-баранг байрамона сархушлик тобора кучайиб, авжига чиқарди. «Йигитча» — Хермина билан рақс тушишим мумкин эмаслиги сабабли у билан танаффусларда доимий равишда учрашиб, кўришиб турдик. Ниҳоят, у бутунлай кўринмай қолди, гўё кўз ўнгимдангина эмас, балки хаёлимдан ҳам буткул унутилгандек, фойиб бўлди. Ўй-фикрларим ҳам гўё қаёққадир сингиб йўқолгандек эди. Сармаст рақс тушаётганлар орасидан бўшашиб, bemажол ўтарканман, ислар, товушлар, оҳанглар, овозлар, оҳ-воҳлар, сўзлар таъсирида, бегона юз-кўзлар, лаблар, лунжлар, кўллар, сийналар, тиззалар қуршовида, мусиқа оҳангига монанд у ёқдан-бу ёққа беихтиёр бориб келардим.

Шу пайт қутилмаганда, мусиқа янграб турган кичик заллардан бирида, уни тўлдириб турган охирги меҳмонлар орасида тўсатдан пайдо бўлган суратдек, оқ юзли қора пьеретта* — чиройли, тетиккина бир қизга қўзим тушди-ю, зумда ўзимга келдим. У юзига ёғ упа суриб олган, қадди-қомати келишган, фоят гўзал эди, бунакасини бу оқшом ҳали кўрмаган эдим. Вакт алламаҳал бўлиб қолганидан барчанинг чехраси ҳаяжондан қизарган, эгнида эзилган, фижимланган костюмлар, ранги ўчган, униқкан ёқа ва бурмалар, ёғ упа сурилган оппоқ юзли қора пьереттанинг эгнида эса тахи бузилмаган костюм, охорли бурма, топ-тоза, оппоқ манжетлар, соchlари ҳозиргина таралгани шундоккина кўриниб турарди. Мен у томон интилдим, уни кучоқлаб, рақсга тортдим. Унинг муаттар бўй таратиб турган, охори тўкилмаган бурмаси иягимни қитиқлаб, соchlари юзимни сийпади. Хипча нозик гавдаси ҳаракатларимга бу оқшом мен учратган ҳар қандай раққосадан ҳам кўра нафисроқ ва самимийроқ пешвоз чиқиб, ўйноқи бир тарзда яқинлик касб этди. Шу пайт, рақс тушаётиб бир оз энгашаётгандим, бирдан даҳани таниш кўринди, шунда унинг таранг ияги, елкалари, тирсак ва қўлларини таниб қолдим. У энди Ҳерманн эмас, балки бошқача, охорли кийиниб олган, енгил атири сепиб, упа-элик суриб олган Ҳермина эди. Шунда эҳтирос билан жуфтлашиб, босиқ ва вазмин рақс тушардик. Мусиқа тўхтади, биз эса ҳамон бир-биrimizни кўйиб юбормай турардик. Теварак-атрофимиздаги ўт-олов бўлиб ёнаётган барча жуфтлар ҳам қарсак чалиб, ташналик билан депсинишар, қичқиришиб, ҳоргин капелладан йенингни яна бир бор ижро этишини ўтиниб сўрашарди. Бу пайтда, дарпардалар ортидан бўзариб, аста тонг отмоқда эди. Шодликнинг ҳам охири кўриниб қолганини хис этиб, чарчоғимиз билиниб турса-да, кулишиб, яна рақс тушиб кетдик, бир-биrimizга қапишиб, мусиқага

* *Пьеретта* – французча исм «Пьер»нинг аёлларга нисбатан қўлланилиши.

ҳамоҳанг бахтдан энтикиб, нурдан иборат тўлқинларнинг баланд долғаси бизни қучиб, кўмиб, ўз оғушига олаётганини сезиб, ҳис қилиб турардик. Ҳермина рақс тушаётиб, устунликка интилмади, истехзо-кинояларидан, вазминлигидан воз кечди — у энди мени ўзига ром қилишнинг ҳеч қандай ҳожати йўқлигини биларди. Мен энди батамом уники эдим. У энди рақсда ҳам, нигоҳда ҳам, бўсада ҳам, табассумда ҳам менга ўзини баҳшида этган эди. Ушбу безовта, бесаранжом, ҳароратли кечадаги мен билан бирга ўйнаган, мени ёндириб-куйдирган, аланталатган, ўзлари истаб, ёпишиб-қапишган, мен кўнгилларини овлаган, мен кетларидан эҳтиросли муҳаббат туйфуси билан қараб қолганим барча аёллар, барча-барчаси шу лаҳзада қоришиб, эриб битди ва улардан яккаю ягона, ҳозир гул-гул ёниб турган қўлимдагиси қолди, холос.

Ушбу базм рақси узоқ давом этди. Мусика икки, уч бор пасайди, пуфлаб чаладиган мусиқачилар асбобларини қуи туширдилар, рояль чалувчи ўрнидан турди, биринчи скрипкачи эриниб бош чайқади, бироқ улар ҳар гал сўнгги рақкос ҳамда рақкосаларнинг илтижоли сархушлигидан илҳомланиб, жунбишга келиб, яна ва яна чалавердилар, янада тезроқ, янада шўҳроқ чалдилар. Сўнг эса — биз, охирги рақсдан ҳансирағ, ҳамон бир-бирларимиз билан чирмashiб турардик — шунда шик этиб рояль қопқоғи ёпилди, кўлларимиз ҳам пуфлаб чалувчи мусиқачилар ҳамда скрипкачиларники сингари хоргин осилиб тушди, флейта чалувчи ҳам кўз қисиб қўйди-да, флейтани филофига жойлай бошлади. Эшиклар ланг очилиб, муздек салқин ҳаво димоққа урилди, остоңада пальтоға ўранган хизматкорлар кўринди, бар (майхона) хизматчиси чироқни ўчирди. Ҳамма нарса шарпага ўхшаб, ваҳимали тарзда айқаш-уйқаш бўлиб кетди, ҳозиргина гул-гул очилиб, ёниб, қизиб турган рақкослар аёздан кунишиб, пальтоларига ўранишиб, ҳатто ёқаларини ҳам кўтариб олдилар. Ҳермина ҳам ранги оқарган, аммо жилмайиб турарди. У секин қўлларини кўтариб, соchlарини

орқага тарай бошлади, шунда унинг қўлтиқости чуқури чироқ нурида ялтираб, ингичка нафис соя унинг ёпиқ сийнасига тушди ва мана шу биргина соя-чизиқ гўзал гавдасидаги бутун сеҳр-жодулари, барча ўйинлари-ю имкониятларини, биргина табассум янглиғ қамраб, жамлаб, умумлаштириб юборадигандек туюлди.

Биз — зал ва уй ичидаги охирги меҳмонлар, бир-биримизга тикилганимизча туриб қолгандик. Қаердадир пастда эшикнинг тарақлагани, қадаҳнинг жаранглаб сингани, кимларнингдир ҳиринг-хиринг кулгиси эшитилди, уни шошилинч ўт олдирилаётган автомобилларнинг қаттиқ шовқини босиб кетди. Аллақаёқда, аниқлаш қийин бўлган олислик ҳамда юксакликда, фавқулодда жарангдор ва қувноқ, шу билан бирга, ваҳимали ва ёт кулги янгради, бу кулги гўё муз ҳамда биллурдан ҳосил бўлгандек, чақноқ ва жарангдор, бироқ совуқ ва лоқайд эди. Бу ажиб кулги менга таниш туюлди, бироқ уни қаерда эшитган эканман, сира эслай олмадим.

Биз ҳамон бир-биримизга тикилиб турардик. Бир зум ўзимга келиб, хушёр тортдим, роса ҳориб, чарчаганим энди билина бошлади, эгнимдаги тер босган ҳўл кўйлак баданимга ёқимсиз ёпишиб, йўғон томирлари кўриниб турган билакларим, қизарган қўлларим эзилган, фижим, терлаган манжетлардан чиқиб турарди. Бироқ Ҳермина-нинг биргина нигоҳи буларнинг барчасига шу заҳоти барҳам берди. Унинг нигоҳида ўзимни ўзим кўриб тургандек эдим, бу нигоҳ олдида барча воқелик, шу жумладан, менинг унга бўлган ҳиссий соғинчим ҳам барбод бўлганди. Биз бир-биримизга сеҳр-жоду қилинган кишилардек, мафтункор қаардик, менинг майда бечорагина вужудим ҳам ўз-ўзини кузатиб турарди.

— Тайёрмисан? — сўради Ҳермина ва ундаги табассум, боя сийнасидаги соя янглиғ, тезда сўнди. Нотаниш хоналарда янграган ўша бегона, ёт кулги олисларга ва юксакликларга сингиб йўқолди.

Бош иргадим. Ҳа, мен тайёр эдим.

Эшикда мусиқачи Пабло күрінди, унинг аслида ҳай-
вон күзларининг ўзгинаси бўлган күзлари бизга қувноқ
ва шодон боқарди, бироқ ҳайвонларнинг күзлари одатда
доимо жиддий бўлади, унинг күзлари эса кулиб турар-
ди, худди шу табассум уларни одамниги айлантирган
бўлса ажаб эмас. У бизга қўл силкиди, бунда унинг
бутун дилкашлиги мужассам эди. У гулдор шойи пижа-
ма кийиб олган, унинг қизил қайтарма ёқалари, ивиб
кетган кўйлаги, ҳорғин оппоқ чехраси қандайдир фала-
ти, рангсиз, хира ва сўлғин кўринар, бироқ чақнаб тур-
ган қора күзлари буни пардалаб турарди. Бу кўзлар во-
қеликни ҳам измига олиб, сеҳр-жодулақ қўйгандек эди.
Унинг ишораси билан яқин бордик, эшик тагида у менга
секин шундай деди:

— Ҳарри оға, бугун мен сизни мўъжазгина кўнгил-
хушликка таклиф этмоқчиман. Фақат жиннилар учун,
кириш баҳоси ақл. Тайёрмисиз?

Мен яна бош ирғадим.

Ёқимтой йигит! У бизни назокат ва ғамхўрлик билан
кўлларимиздан тутиб, Ҳерминани ўнг томонига, мени эса
чап томонига олиб, зина бўйлаб юқорига, кичкинагина
думалоқ хонага бошлади. Хона ичи кўқимтири тусда ёри-
тилган бўлиб, мўъжазгина юмалоқ стол ва учта ором-
курсини ҳисобга олмагандан, деярли бўм-бўш эди. Биз
аста оромкурсалрга чўқдик.

...Биз ўзи қаерда эдик? Мен ухлаётганмидим? Ё уй-
дамидим? Ё бўлмасам, бирорта машинага ўтириб, кетаёт-
ганмидим? Йўқ, мен кўкиш тусда ёритилган думалоқ
хонада ўтиргандим, ҳавоси тор жойда, ниҳоятда сийрак,
ғовак бўлиб қолган воқелик қатламида эдим. Унда нега
Ҳермина бунчалик оқариб кетди? Пабло намунча кўп
гапирди? Мабодо уни гапиртирган, у бўлиб гапирган
мен ўзим эмасмидим? Унинг қора кўзларидан ҳам, Ҳер-
минанинг кулранг кўзларида бўлгани каби, менинг ўз
вужудим — адашган тортинчоқ кўнгил қараб турмаган-
миди?..

Дўстимиз Пабло бизга қараб гапира бошлади. У кўп ва узок гапирди, унинг нигоҳида ўзининг бутун дилкашлиги ҳамда бир оз сертакаллуф илтифоти мужассам эди. Унинг бунақанги равон гапирганини хеч қачон эшитмагандим, уни аслида баҳс-мунозара ҳам, бирор фикрнинг аниқ ифодаси ҳам қизиқтирмасди, ундан бирор фикр чиқишини ҳам кутмагандим, у эса, ёқимли овози билан равон ва бехато гапирарди.

— Дўстларим, мен сизларни Ҳарри анчадан буён ўзи хоҳлаётган, анча пайтдан бери ўзи орзу қилаётган мусоҳабага таклиф этмоқчиман. Вақт алламаҳал бўлиб қолди, ҳаммамиз ҳам бир оз толиққанмиз. Шунинг учун аввалио, озгина дам олиб, нафасни ростлаб олсак.

У шундай деб, девор токчасидан учта қадаҳча билан мўъжазгина фалати шиша идиш ҳамда рангдор ёғочдан ясалган кичкинагина фаройиб қутича олди. Учала қадаҳчаларга тўлдириб қуийб чиқди, қутичадан эса учта ингичка, узун, сарик сигарета, шойи камзуланинг чўнтағидан чақмоқтош чиқариб, бизга олов тутди. Ҳар биримиз оромкурсиларга суюниб, ҳузур қилиб чека бошладик, сигареталар гёй ладан* тутунидек куюқ бурқсирди. Қадаҳчалардаги ширин-нордон ичимликдан ҳам оз-оздан ҳўплаб қўярдик, унинг таъми қандайдир фалати, тахир эди, бироқ ичган одамнинг аста кайфияти кўтарилиб, гёй ичи газ билан тўлдирилгандек, ўзини вазнсизлик ҳолатида сеза бошларди. Шундай қилиб, учов оз-оздан тортиб чекар, қадаҳчаларга дам-бадам лаб қўйиб, кам-кам ичиб, ором олардик. Бирпасда ўзимизни анча енгил ва шодон ҳис эта бошладик. Пабло паст, бўғиқ, бироқ ёқимли овоз билан сўзида давом этди:

— Азизим Ҳарри, сизни бугун арзимасгина дастурхонга таклиф этиш шарафига муяссар бўлишимнинг ўзиёқ менга қувонч бағишлийди. Сиз кўпинча ўз ҳаётингиздан нолиб, кетишга ҳам чоғланиб юрасиз, шундайми? Сиз бу замон, бу дунё, бу воқеликни тарқ этиб, ўзингизга

* Ладан – баъзи бир ўсимликлардан олинадиган, диний маросимларда тутатиладиган хушбўй мум (смола).

мосрок бошқа бир воқеликка, вактга боғлиқ бўлмаган бошқа бир оламга кўчиб ўтишни истайсиз, бунга интиласиз. Азиз дўстим, майли, буни қиласеринг, мен ҳам сизга худди шуни таклиф қилмоқчидим. Сиз ўша бошқа олам қаердалигини, ўзингиз излаётган ўша дунё ўз қалбингида эканлигини яхши биласиз. Фақат, сизнинг ўз ботинингизда, ўзингиз интилаётган ўша жойда бошқа воқелик мавжуддир. Модомики, ўзингизда ҳеч нарса мавжуд эмас экан, мен ҳам сизга ҳеч нарса бера олмайман, мен фақат сизга ўз қалб-кўнглингиз суратларинигина кўрсатишм мумкин, холос. Такрор айтаман, мен сизга ҳеч нима беролмайман, фақаттинга фурсат, имкон, калит беришим мумкин. Мен сизга ўз оламингизни кўра олишингизда ёрдамлашиб юбораман, шу холос.

У гулдор пижамасининг чўнтағидан думалоқ кўзгу чиқариб, деди:

— Қаранг, айни пайтгача сиз ўзингизни худди шундай кўриб келгансиз!

Шундай деб, кўзгучани кўзларимга яқин олиб келди (шу дам болаларнинг «Кўзгучажон, кўзгуча, қўлимдадир кўзгуча»* деган шеъри ёдимга тушди), унда мен бир оз хира тортган, бироқ ваҳимали, ўз-ўзидан жунбишга келаётган, қайнаб-кўпчиётган суратни кўрдим: у ўзим, Ҳарри Ҳаллер эдим ва мана шу Ҳарри Чўл бўриси эди, у гўзал, юраксиз, адашган ҳамда қўрқув-хавотир ила боқаётган Бўри эди, унинг кўзлари дам дарғазаб сачрап, дам ғамга ботарди. Худди мана шу Бўри Ҳаррини бетўхтов турли-туман қиёфага солар, гўё дарё бўйидаги ирмок дам-бадам бошқа рангга кириб, тўлғаниб, курашиб, кўпирисиб, бир-бирини ютиб юборгудек бўлиб, ўз шакл-шамойили томон шиддат билан интилар эди. Мана шу суюқлик сингари оқувчан, ярим шаклланган бўри чиройли, бироқ журъатсиз кўзлари билан менга маъюс ва ғамгин боқарди.

* Кўзгучажон, кўзгуча, қўлимдадир кўзгуча – ака-ука Гримм эртакларидан бири – «Қорқиз»даги шеърга ўхшатма.

— Ха, шундай кўриб келгансиз, — такрорлади Пабло майин овозда, сўнг кўзгуни яна чўнтаига солиб кўйди. Мен миннатдорлик билан кўзларимни юмдим ва хаётбахш ичимликни хўплашда давом этдим.

— Мана, бир оз дам олдик, — деди Пабло ниҳоят, — озгина бўлсаям қувватланиб, ҳангомалашдик. Агар чарчамаган бўлсаларингиз, мен ҳозир сизларни ўз панорамамга* олиб бораман, у ерда сизларга ўзимнинг мўъжазгина театримни кўрсатаман. Розимисизлар?

Биз ўрнимиздан кўзғалдик, Пабло жилмайганича йўл бошлади. Бир эшикни очиб, дарпардани ён томонга сурди, биз энди, агар шу театр бўладиган бўлса, унинг думалоқ, тақасимон йўлагида турардик, ўртадан, кия йўлакнинг икки тарафидан эса жуда кўп, сон-саноқсиз торгина ложа эшиклари бошланарди.

— Мана, шу бизнинг театр, — тушунтира бошлади Пабло, — у жуда қувноқ театр, бу ерда одамни кулдирадиган кўп ажойиб воқеаларнинг шоҳиди бўласизлар, деб ўйлайман.

У шундай деб, қаттиқ кулиб юборди, унинг қулгиси қисқа бўлса-да, қулоқларим том битиб қолаёзди, бу ўша, боя менга юқоридан туриб эшитирсанг жарангдор, бегона, ёт кулгининг худди ўзи эди.

— Менинг театрчамда сизлар истагандан ҳам кўра кўп, ўн ё юз ёки мингта ложа эшиклари бор ва ҳар бир эшик ортида айнан излаётган нарсангиз сизларга мунта-зир. Билсангиз, азиз дўстим, бу шундай бир ажойиб суратхона, бироқ уни ўзингиз қандай бўлсангиз шундай ҳолатда айланиб чиқишдан фойда йўқ. Сиз ўзингиз ўз шахсиятингиз деб аташга кўникиб қолган нарса бунга йўл қўймайди. Шубҳасиз, ўзингиз аллақачон англаб етдингизки, вақтни енгиш, воқеликдан халос бўлиш ва ҳоказо нарсалар, сиз ўз интилишларингизни нималар деб

* *Панорама* – доира шаклидаги бинонинг ички деворига гир айлана ишланган, ҳақиқий манзарадай туюладиган йирик расмлар галереяси.

атаманг, барчаси ўз шахсиятингиздан қутулиш истагидан бошқа нарса эмас. У ўзингиз ўтирган турма. Агар театрга қандай бўлсангиз, шундайлигингизча кирганингизда эди, барчасини Ҳаррининг кўзлари билан, Чўл бўрисининг эски кўзойнаги билан кўрган бўлардингиз. Шунинг учун ҳам сизга бу кўзойнакдан воз кечиш ҳамда ўз ҳурматли шахсиятингизни марҳамат қилиб шу ерда, гардеробда қолдиришингиз таклиф қилингани, хохласангиз, улар ҳар доим яна ихтиёрингизда. Ўзингиз иштирок этган гўзал рақс оқшоми, Чўл бўриси ҳақидаги трактат ва ниҳоят, ҳозиргина истеъмол қилганимиз танани уйғотувчи дори-дармонлар сизни бунга етарли даражада тайёрлаган бўлса керак, деб ўйлайман. Сиз, Ҳарри, ўз қадрли шахсиятингизни мана бу ерда — гардеробда ечиб қолдирганингиздан сўнг, театрнинг чап тарафи сизнинг ихтиёрингизда бўлади, Ҳерминага эса ўнг тарафи, ичкарида, агар лозим бўлса, учрашишларингиз мумкин. Марҳамат, Ҳермина, ҳозирча сен парда ортига ўта тур, аввал Ҳаррига йўл кўрсатай.

Ҳермина ўнг тарафдаги орқа деворни ердан то гумбазгача қоплаб турган улкан кўзгу ортига ўтиб, ғойиб бўлди.

— Қани, Ҳарри, келақолинг, кайфиятингизни туширманг. Ушбу тадбирдан кўзланган мақсад ҳам — сизнинг кайфиятингизни кўтариш, сизни қулишга ўргатишидир. Умид қиласанки, бунда ўзингиз менга ёрдам берасиз. Ўзингизни яхши ҳис қилаётгандирсиз, ҳойнаҳой? Шундайми? Кўрқмаяпсизми ишқилиб? Демак, яхши, жуда яхши. Ҳозир сиз сира кўркмасдан, дилдан хузурланиб, бизнинг омонат дунёга қадам ранжида қиласиз, у ерда шунчаки йўлига ўзингизни ўзингиз ўлдирасиз, одат шунаقا.

У яна чўнтагидан кичкина кўзгуни чиқариб, юзимга тутди. Менга яна чигал, хира, жанг қилаётган бўри қиёфа-сидаги Ҳарри қараб турарди. Бу қиёфа яхши таниш бўлса-да, аслида ёқимсиз сурат эди, шунинг учун уни чилпарчин қилиб ташлаш менга қийин эмасди.

— Энди кераксиз матоҳ бўлиб қолган ушбу сурат-кўзгуни, азиз дўстим, ҳозироқ йўқ қиласиз, энди у сизга ортиқ керак эмас. Кайфиятингизга қараб, ушбу суратга самимий кулги билан қарасангиз, шунинг ўзи кифоя. Сиз ҳозир бу ерда култи мактабидасиз, энг аввал кулишни ўрганишингиз керак. Энг юксак юмор ҳам, аслида, инсон шахсан ўзини ўзи жиддий қабул қилмай қўйган пайтдан бошланади.

Мен қўлимдаги кўзгучага қаттиқ тикилдим, унда Ҳарри-бўри талвасага тушиб турарди. Бир зум хотира-ми, ватан соғинчими ё армонми, шунга ўхшаш нимадир пайдо бўлиб, ичимни секин-аста кемира бошлади, оғриқ турди, сўнгра енгил маъюслик янги ҳиссиётга ён бериб, гўё кокайндан караҳт жағдан оғриқ тиш суфуриб олинди-ю, унинг ўрнини енгиллик ва чуқур хўрсиниши, айни пайтда оғритмаганидан таажжубланиш эгаллади. Ва бу ҳиссиётга яхши кайфият ҳамда кулафонлик келиб қўшилди-да, мен ортиқ чидаёлмай, гўё бир нимадан халос бўлгандек, кулиб юбордим. Хира сурат-кўзгуча ялт этиб ўчди, унинг юмалоқ юзаси гўё ўт тушгандек, кулранг тусга кириб, дағаллашиб, янада хира тортиб қолди. Пабло кулганича ойна парчасини улоқтириб юборди, у юмалаб бориб, охири кўринмаётган йўлак адогида кўздан йўқолди.

— Кулишинг чаккимас, Ҳарри, — деди Пабло, — ҳали умри боқийларга ўхшаб кулишни ҳам ўрганиб оласан. Мана, ниҳоят, Чўл бўрисини ўлдирдинг. Устарага ҳожат йўқ энди. Хушёр бўл, илойим ўлгани чин бўлсин! Энди биратўла аҳмоқона воқеликни ҳам тарқ этишинг мумкин. Баҳонада кейинги гал сен билан брудершафт* учун ичамиз, азизим. Сен бугун менга жуда ёқиб қолдинг, илгари ҳеч қачон бунақа бўлмаганди. Гапларимга аҳамият берадиган бўлсанг, сен билан кейин хоҳлага-

* *Брудершафт* – бир-бирини сансирашга ўтиш учун чўқишириб ичиш.

нингча фалсафами, бошқами, баҳс-мунозара қилаверамиз, мусиқа ҳақида, Моцарт, Глук ва Платон ҳамда Гёте ҳақида ҳам сұхбатлашаверамиз. Илгари ишиңг нега юришмагани сабабини мана энди билиб оласан. Шояд, бугун Чүл бўрисидан қутулсанг. Чунки, ўз-ўзингни ўлдиришинг аслида узил-кесил, якуний хулоса эмас; биз бу ерда маниявий театрдамиз, бу ерда фақат суратлар мавжуд, воқелик эмас. Гўзал ва қувноқ расмлардан ўзингга ёққанини танлаб ол, токи ўз шубҳали шахсиятингдан воз кечганинг маълум бўлсин! Борди-ю, уни яна қўнглинг қўмсаб қолгудек бўлса, мен сенга ҳозир кўрсатадиган кўзгуга қайта назар ташласанг кифоя. Ўзинг биласан-ку, эскиларнинг доно гапини: «*қўлимдаги битта кўзгугча – девордаги иккитасидан яхши (афзал)роқдир*». Ха-ха! У яна гўзал ва ваҳимали қулди. — Шундай қилиб, энди бир кичкинагина, қувноқ маросимиň үтказиш қолди. Сен энди ўз шахсиятинг кўзойнагидан қутулдинг, қани, кел, манови ҳақиқий кўзгуга бир қарагин! Ўзингга ҳам ёқиб қолиши турган гап.

У кулганича мени ғалати эркаларкан, маҳобатли девор-кўзгуга рўпара қилди. Ва унда ўз аксимни кўрдим.

Ўзимга таниш Ҳарри менга қараб туради, бироқ унинг кўриниши одатдагидек эмас, балки чехраси очик, юз-кўзлари кулиб туар, кайфияти яхши эди. Аммо унга разм солиб улгурмасимданоқ, сочилиб кетди, ундан иккинчи бўй-баст ажраб чиқди, сўнг учинчи, ўнинчи, йиғирманчи... ва бутун улкан ойна нуқул Ҳаррилар ёки Ҳарри бўлаклари, сон-саноқсиз Ҳарривойлар билан тўлиб-тошди, уларнинг ҳар бирини эса мен яшин тезлигига илғаб, таниб қолаётандим. Бу Ҳарриларнинг баъзилари ўзимга ўхшаб қари, айримлари қарироқ, баъзилари қартайиб қолган, бошқа бирорлари эса бутунлай ёш, ўғил болалар, йигитчалар, мактаб болалар, шўх зумрашалар

эди. Эллик ёшли ва йигирма ёшли Ҳаррилар аралаш-куралаш, у ёқдан-бу ёқса бетартиб югуришар, сакрашар, ўттиз яшар ҳамда беш яшар, жиддий ва шўх, хурматли ҳамда кулгили, яхши ва жулдур кийимли ва ҳатто бутунлай яланғочлари, сочсиз, тақир ҳамда жингалак сочлари узун, уларнинг барчаси мен эдим, уларнинг ҳар бири, яшин тезлигида кўриб, таниб улгурмасимданоқ, фойиб бўлишар, ҳар томонга, чапга, ўнгга, қўйига ва ойнадан ташқарига қараб югуришарди. Биттаси, ёш, башсанг йигитча чаққонлик билан Паблонинг кўксига сакраб, уни кучоқлаб олди ва у билан бирга қаёққадир фойиб бўлди. Яна бири эса, менга, айниқса, ўша бола ёқиб қолди, ўн олти ё ўн етти ёшлардаги ёқимтой, келишган ўсмир бола йўлакка яшиндай тушиб келди, барча эшиклардаги ёзувларни ҳирс билан ўқиб чиқди, мен ҳам унинг кетидан эргашдим, у эшиклардан бирининг олдида тўхтаб қолди, мен ундаги ёзувни ўқидим:

**Бир марка ташласанг,
барча қизлар сеники!**

Ёқимтой йигитча, бошини олдинга чўзиб, олға интилди, пул ташланадиган тирқишига ўзини уриб, эшик ортида кўздан фойиб бўлди.

Пабло ҳам фойиб бўлган эди, ойна ҳам, унга қўшилиб беҳисоб Ҳаррининг кўринишлари ҳам. Энди ихтиёрим ўзимда, шунингдек, театрга ҳам боғлиқ эканини сездим, қизиқувчанлик билан эшикма-эшик кеза бошладим, уларнинг ҳар бирида ёзув, васваса, ваъда битилган эди.

**Кувноқ овга олға!
Автомобиллар катта ови**

деган лавҳа диққатимни тортди, торгина эшикни очиб, ичкари кирдим.

Қарасам, шовқин-суронли ва изтироб-ҳаяжонли дунёга тушиб қолибман. Күчаларда ярим зирхли автомобиллар физиллаб елишар, улар пиёдаларни овлаш билан овора, уларни босиб, пачоғини чиқаришар, уйларнинг деворларигача қисиб бориб, ҳалок этишарди. Дарҳол тушундим: одамлар билан машиналар ўртасида кураш борарди, унга узоқ тайёргарлик кўрилган, узоқ кутилган, узоқ кўркишган, ниҳоят, мана энди у қизғин бошлаб юборилган эди. Ҳаммаёқда ўликлар, майдалаб, бурда-бурда қилиниб ташланган мурдалар ётар, ҳаммаёқда пачоғи чиқсан, эгилиб-букилиб, қийшайган, ярим куйган автомашиналар кўзга ташланар, бу бетартиб алғов-далғов узра учоқлар чарх уриб айланишар, уларни ҳам кўпгина томлар ва деразалардан туриб, ов милтиқлари ҳамда пулемётлардан ўқса тушишарди. Барча деворларда эса йўғон ҳарфлар билан тўлдирилган қизғин, жўшқин, дабдабали, васасага тўла плакатлар машъалалар каби порлар, улар миллатни ниҳоят, машиналардан ҳимоя қилишга, машиналар ёрдамида бошқаларнинг ёғини сиқиб олиб, тинкасини қуритиб, оқибатда семириб кетган, чиройли кийинган, ўзларидан хушбўй ислар таратаетган бойларни бехосият қалдираётган, қулокларни қоматга келтириб гувиллаётган, тинмай «йўталаётган» бутун автомобил-павтомобиллари билан қўшиб уриб ўлдиришга ва ниҳоят, фабрикаларга ўт қўйиб, қирғин қилиб, ифлосланган, оёқости қилинган Ерни бир оз тозалашга чақиради, тики заминда яна ўт-ўлан ўссин, чанг-ғубор босган, цемент бетондан иборат бу дунё бағрида ўрмонлар, ўтлоқлар, яйловлар кўкарсинг, сойлар шарқираб оқиб, ботқоқликлар ястаниб ётсин. Ажойиб расмлар билан безатилган, гўзал услубда, нозик, бунинг устига болаларча ранг-тус берилган, фавқулодда ақл-заковат билан ёзилган бошқа плакатлар, аксинча, барча мулқдорлар ҳамда ақлли, доно одамларни бўлажак анархия тартибсизликларидан огоҳ этар, хуқуқ-тартибот, меҳнат, мулк ва маданиятнинг самарасини таъсирили тарзда тасвиirlаб, машиналарни мак-

тар, уларни инсониятнинг энг юксак ва сўнгти ихтироси эканлигини таъкидлаб, уларнинг ёрдамида тангриларга айланиб кетиш ҳеч гапмаслигини уқтиришарди. Қизил ва яшил рангли плакатларни ўқиб, ҳам қойил қолардим, ҳам чукур ўйга толардим, улардаги оташин сўзамоллик, қатъий мантиқ менга зўр таъсир қилганди, улар ҳақ эди, бунга ишончим комил эди, шу аснода дам униси-нинг, дам бунисининг олдида турарканман, атрофда бўлаётган олатасир отишмадан хаёлим бўлинди. Воқеа маълум эди: уруш борарди, уруш бўлгандаям шиддатли, зўр ва ўта ёқимли уруш эди, чунки уруш кайзер, республика, куруқлиқдаги чегаралар, байроқлар ва рамзлар ҳамда шу сингари манзарали ва театрга оид арзимаган майда-чуйда нарсалар учун ҳам бўлмаётганди, балки ун-даги ҳар бир ҳаво етишмай қолган, ҳаёт ёқмай, ортиқ қониқтирмай қўйган одам борки, аламини ёрқин ифода билан изҳор қилишга, қурук, маънисиз тамаддуни дунёни вайронага айлантиришга интилар эди. Вайронагарчилик ва қонхўрлик истаги уларнинг юз-кўзларида шундоқкина, очик-ойдин акс этиб турарди ва менинг ботинимда ҳам ана шу қизил рангли ёввойи чечаклар жунбишга келиб, бўй чўза бошлади. Бу кураш мени ҳам беихтиёр ўз домига тортди.

Энг қизиги, шу пайт тўсатдан ёнимда мактабдош ўртоғим Густав пайдо бўлди. У неча ўн йиллаб дом-дараксиз кўринмай кетганди, болаликдаги дўстларим орасида энг шўхи, энг бақуввати ва ҳаётга энг ташнаси ҳам шу эди. Унинг оч кўк кўзлари менга қулиб қараб турарди, бундан хурсанд бўлиб кетдим.

— Ё раббий, Густав, — дедим шодланиб, — сени кўрар кун ҳам бор экан-ку! Нима касб-кор қилаяпсан, оғайни?

У фижиниб кулди, болалик пайтларида ҳам шунака одати бор эди.

— Нодон, дарҳол сўраб-суриштирганинг нимаси, жаврашиб ўтирадиган пайтмикан ҳозир? Илоҳиёт профессо-

ри бўлганман, билсанг, лекин ҳозир, кўриб турибсан, теология қаёқда, уруш бораяпти, болакай. Қани, бўлақол!

Шу пайт рўпарадан пишқириб, кичикроқ автомобиль чиқиб келди, у ҳайдовчини шартта отиб ташлади-да, ол-махондек чаққонлик билан унинг ўрнига ўтириди ва машинани тўхтатди, мен ҳам лип этиб чиқиб олдим, иккаламиз ёғилиб турган ўқлар ва ағанаб ётган машиналар орасидан қуюндек елиб, аввал шаҳарга, сўнг шаҳар ташқарисига қараб йўл олдик.

— Фабрикантлар тарафидамисан дейман? — сўрадим дўстимдан.

— Э, нима десамикин, бу ҳар кимнинг таъби, буни ҳали ўйлашиб кўрамиз. Аммо биласанми, менимча бошқа бир партияни ёқлаганимиз маъқулроқ, аслида алихўжа-хўжаали, барибирку-я. Мен теологман, бобокалоним Лютер ўз даврида князлар ва бойларга ёрдам берган экан, биз энди бунга бир оз тузатиш киритамиз. Ёмон машина экан, ишқилиб бир неча километрга чидаса бўлди!

Само фарзанди — шамолдек елиб борардик, шу юришда ям-яшил сокин водийга кириб бордик, ўзиям анчагина йўл босиб кўйибмиз, кенг, каттакон текисликдан ўтиб, сўнг аста-секин улкан тоғ этагига этиб бордик. Шу ерда — тик қоя ва кескин муюлишлардан иборат бўлган, ўқлардан сақланиш учун мўлжалланган пастаккина тупроқ уюмлари ўртасидан ўтган силлик, ярқираб турган йўл устида тўхтадик, хув пастида мовий кўл мавжланиб турарди.

— Ажойиб жой экан, — дедим мен, атрофга боқиб.

— Жуда зўр жой. Бу ерни Аксенштрассе* деб атасак ҳам бўлади, негаки турли-туман дайди ўқлар худди шу ерга келиб тушади, хушёр бўл, Ҳарривой!

Йўл ёқасида улкан пиния** дарахти бўлиб, унинг тепасида ёроч-тахталардан капа-чайлага ўхшатиб қурилган уйчага кўзимиз тушиб қолди. Маълум бўлишича, у ер назо-

* Аксенштрассе — сўз ўйини: олмон тилида «ўқ кўча» дегани.

** Пиния — итальян қарагайи.

рат ва кузатиш жойи экан. Густав менга қараб кулиб, күк күзларини муғамбирона қисиб қўйди ва биз тезда машинадан тушдик-да, дарахтга тирмашиб чиқа бошладик. Уйча жуда маъкул тушди, биз у ерга яшириниб олгач, енгил нафас олдик. Бу ерда милтиқлар, тўппончалар, ўқ-дори солинган қутилар ётарди. Ҳали жойлашиб улгурмасимизданоқ, пастдаги энг яқин муюлиш ортидан люкс машинанинг амирона ва бўғиқ сигнали эшитилди, у сирена чалганича яркираб турган тоғ йўлидан юқори тезликда шувиллаб келарди. Биз кўлимизда милтиқларни маҳкам тутиб турардик, буёғи худди кинолардагидек мароқли эди.

— Ҳайдовчини нишонга ол! — буюрди Густав. Шундоқ остимиздан оғир юқ машинаси ўтиб бораарди. Мен ҳайдовчининг ҳаворанг қалпоғини мўлжалга олиб, тепкини босдим. У ўтирган жойидан қулаб тушди, автоулов эса яна бир оз юриб, қоя деворига урилди, зарб билан қапчиб, улкан семиз тукли арига ўхшаб, пастак деворга тиралди-да, кейин ўмбалоқ ошиб, пастга қарсиллаб қулади.

— Тайёр! — мамнун кулди Густав. — Кейингисини мен оламан.

Шунда физиллаб, яна битта машина келиб қолди, унинг ичида, юмшоқ ўриндиқларда уч ёки тўрт йўловчи ўтиради. Улардан бири — аёлнинг бошида оч кўк-ҳаворанг рўмолми, ёпинчиқми қўринди, очифи, унга раҳмим келди, ким билади, балки у энг гўзал, келишган аёлдир... Ё раббий, агар биз қароқчилик қилаётган бўлсак, улуғлардан ибрат олиб, шоввозларча ваҳший лигимизни шундай келишган аёлларга нисбатан кўлламаслигимиз лозим эди, шунда балки тўғрироқ ва олийжаноброқ бўлармиди... Густав эса аллақачоноқ ўқ узиб бўлган эди. Ҳайдовчи бир қалқиб, тинчиди, машина тик қояга урилиб, ағанаб кетди, филдираклари тепага қараб, йўл ўртасида «чапак чалиб» қолди. Биз жимгина кузатиб турардик, ҳеч нарса қимир этмас, тузоққа тушиб қолгандек, уловдаги одамлардан ҳам садо чиқмасди. Машина эса ҳамон

туриллар, гилдираклари ҳавода мualлақ ғалати айланарди. Шу пайт у түсатдан қўрқинчли қарсиллаган овоз чиқариб, ёруғ окиш алнга ичида қолди.

— «Форд» машинаси, — деди Густав. — Пастга тушиб, йўлни тозалаб қўймасак бўлмайди.

Биз пастга тушдик, йўл ўртасида бир уом олов гурриллаб ёнарди. Бу орада биз ёш дараҳт ёғочидан ҳавоза-пишанг ясад, уни ён тарафга, йўл четига сал кўтариб олиб қўйдик, сўнг жарлик томон аста сурдик, ниҳоят, у бутазор орасида қасир-кусур қилиб, портлаб кетди. Уловни ўнгараётганда ундан тушиб қолган иккита ўлик ерда ётарди, уларнинг уст-бошлари ҳам қисман куйган эди. Биттасининг кийими бутун қолган экан, кимлигини билиш учун чўнтакларини ковлаштирсам, қўлимга чарм портфель илинди, унда ташрифномалар бор эди. Биттасини олиб ўқидим: «Тат твам аси»*.

— Жуда қизик, — деди Густав. — Аслида, биз асфаласофилинга жўнатаётган одамларнинг кимлиги билан заррача ишимиз йўқ. Улар ҳам худди ўзимизга ўхшаган бечоралар, гап исми шарифида эмас. Бу дунё йўқ бўлиши керак, унга қўшилиб ўзимиз ҳам. Энг осон йўли, уни ўн дақиқа сувга чўқтирсанг, тамом-вассалом. Қани, ишга!

Машина кетидан ўликларни ҳам улоқтиридик. «Дут-дут» сигнал чалиб, яна янгиси келиб қолди. Шундоқ йўл устида туриб, уни олатасир ўқقا тутдик. У чайқалиб, бир оз айланди-да, сўнг деворга урилиб, ағанади ва «пиш-пиш» лаб жойида қолди, ичидаги бир йўловчи ўтирган ўрнидан қимиirlамади, келишган ёш қизча эса, қўрққанидан ранги оқариб, дир-дир титраб, машинадан тушди. У билан самимий саломлашиб, унга ўз хизматларимизни таклиф қилдик, бироқ қиз ўта қўрққаниданми, тили калимага келмай, бизга бир зум телбаларча тикилиб қолди.

* «*Tat tvam asu*» — «Бу — сенсан» (санскрит).

— Майли, аввал анов кекса жанобнинг ҳолидан хабар олайлик, — Густав шундай деб, ҳалок бўлган ҳайдовчининг ортида, ўриндиқда ҳамон муаллақ қолган йўловчига ўгирилди. Жанобнинг кулранг соchlари калта қилиб қирқилган, оч кулранг ақлли кўзлари очик, ўзи оғир яраланган шекилли, оғиздан озгина қон оққан, бўйни қийшайтириб, аммо тик тутиб турарди.

— Рухсат этинг, мухтарам жаноб, менинг исмим Густав. Биз сизнинг ҳайдовчинингизни отиб ўлдиридик. Билсақ бўладими, ким билан танишишга мушарраф бўлаётганимизни?

Қариянинг кичкина кулранг кўзлари вазмин ва маъюс боқди.

— Мен бош прокурор Лёринг бўламан, — деди у секин. — Сизлар нафақат бечора шофёrimни, балки ўзими ҳам ўлдиридинглар, сезиб турибман. Нега энди бизни ўққа тутдинглар?

— Ўта юқори тезлиқда юрганингиз учун.

— Биз нормал тезлиқда келдик-ку.

— Кечаги меъёр бугунга тўғри келмай қолаяпти, жаноб бош прокурор. Биз бугун, умуман, автомобилларнинг ҳар қандай тезлиги ҳам юқори, деган фикрдамиз. Биз энди барча автомобилларни йўқ қилаяпмиз, шу жумладан, бошқа машиналарни ҳам.

— Милтиқларингизниямми?

— Уларга ҳам навбат келади, вақти-соати билан. Эҳтимол, эртага ё индинга ўзимиз, балки ҳаммамиз ҳам тинчирмиз. Ўзингиз биласиз, қитъамиизда аҳоли ҳаддан зиёд кўпайиб кетган. Энди бир оз енгиллашмаса бўлмайди.

— Танлаб ўтирмай, рўпара келганни отаверасизларми?

— Албатта. Айримларга шубҳасиз, ичинг ачииди, масалан, дейлик, анови ёш, келишган хонимга — у сизнинг қизингиз бўлса керак, ҳойнахой?

— Йўқ, у менинг стенографчи котибам.

— Қандоқ яхши. Энди марҳамат қилиб, машинадан тушсангиз, ё ўзимиз тушириб кўяйликми, чунки машина йўқ қилинади.

— Бирга мени ҳам йўқ қилақолинг, шуниси афзал.

— Ихтиёргиз. Яна бир савол беришга ижозат этинг! Сиз, мана, прокурорсиз. Менга бир нарса ҳамиша тушунарсиз бўлиб келган. Ҳануз ақдим етмайди, одам қандай қилиб прокурор бўлиши мумкин? Сиз бошқаларни, кўпинча бечора одамларни айблаб, уларни жазога маҳкум этиб, шунинг орқасидан тирикчилик қилиб, яшаб келасиз. Шундай эмасми?

— Шундай. Мен ҳамиша бурчимни бажарганман, чунки бу вазифам эди. Мен маҳкум этган одамларни қатл қиласиган жаллоднинг вазифаси қандай бўлса, худди шундай. Сиз ўзингиз ҳам худди шундай вазифани зиммангизга олиб, одамларни ўлдираётисиз-ку.

— Тўғри. Фақат биз бурч юзасидан эмас, балки шунчаки эрмак учун ёки аксинча: аламдан, дунёдан умидсизланганимиздан ўлдираяпмиз. Шунинг учун ҳам одам ўлдириш бизга муайян ҳузур бағишлайди. Сиз ҳам одам ўлдириб, ҳеч ҳузур қилганимисиз?

— Жонга тегиб кетдингиз. Марҳамат қилиб, ишингизни охирига етказсангиз. Агар сизга бурч тушунчаси бегона бўлса...

У жим бўлиб қолди, гўё туфламоқчи бўлгандай, лабларини бурди. Бироқ оғзидан озгина қон сизиб, иягида оқиб тушиб, қотиб қолди.

— Шошманг! — деди Густав унга хушмуомалалик билан. — Бурч тушунчаси ҳар қалай эсимдан чиқиб кетган бўлиши керак. Илгарилари хизмат юзасидан кўп ишим тушиб турарди, илохиёт профессори эдим. Бундан ташқари, аскар ҳам бўлганман, урушдаям қатнашганман. Менинг назаримда, бурч бўлиб туюлган ҳамда менга обрўэътиборли одамлар ва бошлиқлар томонидан ҳар гал буйруқ тарзида бериладиган жамики топшириқларнинг ақалли биронтасини мутлақо яхши деб бўлмасди ва мен ҳар доим, яхшиси, бунинг аксини қилган бўлардим. Бурч тушунчаси аллақачонлар эсимдан чиқиб кетган бўлсада, ҳар ҳолда гуноҳ нима эканлигини билсан керак — иккаласи ҳам бир нарсадир, балки. Онадан туғилишим-

нинг ўзиёқ — гуноҳ, мен энди яшашга маҳкумман, давлат фуқароси бўлиш, аскар бўлиш, одам ўлдириш, қуролла-ниш учун соликлар тўлаш мажбурияти зиммамда бўлади. Мана ҳозир, шу дақиқада бўлса, бир вақтлар урушда бўлгани каби, хаёт олдидаги бурч яна одам ўлдиришга мажбур қиласяпти. Бироқ бу гал энди нафрат билан ўлдирмаётибман, чунки гуноҳга кўнишиб қолдим. Мен энди мана шу аҳмоқона, бемаъни дунё тутдек тўкилса ҳам, заррача қарши эмасман, аксинча, бунга ўзим ба-жонидил кўмаклашаман ва ўзим ҳам бирга жон деб ҳалок бўламан.

Прокурор қон ёпишган лабларини қимтиб, бир оз жилмаймоқчи бўлди, лекин эплолмади, шунга қарамасдан, барибир, унинг юз-кўзларидан нияти яхши эканлиги билиниб турарди.

— Яхши, — деди у, ниҳоят. — Демак, бизлар ҳам-касб эканмиз. Марҳамат қилиб, бурчингизни бажаринг, жаноб касбдош.

Гўзал қиз эса бу орада хушидан кетиб, йўл чеккасида ётарди.

Шу лаҳзада «дут-дут» лаб, яна битта машина тўла тезлик билан келиб қолди. Биз қизни бир чеккага олиб, ўзимиз қояга қапишиб олдик. Автомашина тез келиб, қаттиқ тормоз берди, йўл устида ағанаб ётган аввалги машинага уриб юбормаган бўлса-да, барибир, тепага қараб, туриб қолди. Дарҳол ов милтиқларимизни олиб, янги келганларга ўқталдик.

— Машинадан туш! — буйруқ қилди Густав. — Кўлингни кўтар!

Машинадан тушиб келган уч киши итоат билан қўлла-рини кўтариб турарди.

— Ораларингда шифокор борми? — сўради Густав улардан.

— Йўқ.

— Ундай бўлса, марҳамат қилиб, манови жанобни эҳтиётлик билан машинадан туширинглар, у оғир яра-

ланган. Сўнгра уни машинангизда, шаҳаргача олиб кетинг. Қани олға, ишга киришдик!

Зум ўтмай, кекса жаноб бошқа машинага ўтқазилди, Густав команда бергач, улар жўнаб кетишиди. Бу орада стенографчи қиз ўзига келиб қолган ва бўлаётган воқеаларни жимгина кузатиб ётарди. Шундай гўзал ўлжани кўлга киритганимиздан ўзимда йўқ хурсанд эдим.

— Фройлайн, — деди Густав қизга, — сиз иш берувчингизни йўқотдингиз. Кекса жаноб сизга у қадар яқин бўлмагандир, деб ўйлайман. Сизни мен ўзим ишга олдим, бизга яхши ўртоқ бўлинг! Хўш, энди ишимиз бир оз шошилинч. Тез орада бу ерда вазият ёмонлашиби турган гап. Дарахтта чиқа оласизми, фройлайн? Шундайми? Унда кетдик, ўртамизга олиб, сизга ўзимиз ёрдамлашамиз.

Учовимиз жон-жаҳдимиз билан дарахтга тирмашдик. Тепага чиққач, фройлайннинг яна мазаси қочиб қолди, озгина конъяк ичирган эдик, тезда ўзига келди. Кўл ва тоғларнинг ажойиб манзарасини томоша қилиб, таъсирланди шекилли, ниҳоят, ўзини Дора деб танишистириди.

Шундан сўнг дарров яна битта машина келиб қолди. У ағанаб ётган автомобиль ёнидан эҳтиёткорлик билан секин ўтиб олди-да, сўнг тўхтамасдан тезликни ошириди.

— Юраксизлар! — кулди Густав ва ҳайдовчини дарҳол отиб ташлади. Улов бир оз «ракс» тушди-да, сўнг деворга бориб урилди, уни эзиб босиб, шундоқ жар ёқасида қия туриб қолди.

— Дора, — дедим қизга, — милтиқлар билан муомала қила оласизми?

Қизнинг кўлидан бу иш келмасди, милтиқни қандай ўқлашни биздан ўрганиб олди. Аввалига унча қўли келмай бармоғини қонатиб ҳам олди,вой-войлаб, инглизча малҳамли мато сўради. Шунда Густав унга, замон нотинч, уруш бораётганини айтиб, у ўзининг шоввоз, дов-

юрак қыз эканлигини қўрсатиши лозимлигини тушунтириди. Сўнгра барчаси изга тушиб кетди.

— Лекин бизнинг тақдиримиз нима бўлади? — сўради қыз ундан.

— Билмадим, — деди Густав. — Дўстим Ҳарри келишган аёлларни яхши кўради, у сизнинг дўстингиз бўлади.

— Бироқ улар полиция ва солдатлар билан келиб, бизни ўлдиришади-ку.

— Полиция ва ҳоказолар энди йўқ. Биз энди танлаш ҳуқуқига эгамиз, Дора. Ё биз шу ерда, тепада тинчигина ўтирамиз ё бўлмасам, бу ердан ўтмоқчи бўлган барча автомашиналарни бир ёқли қиласиз. Ёки ўзимиз битта машина олиб, жўнаймиз-да, ўқлар ёмғири остида қолиб кетамиз. Али хўжа — Хўжа али, барибир. Мен шу ерда қолиш тарафдориман.

Пастда яна бир машина кўринди, унинг жарангдор сигнали юкорига баралла эшишиларди. Уни ҳам тез саранжомладик, филдираклари осмонга қараб қолаверди.

— Қизиқ, отиш маза экан-ку! Мен бўлсан, урушга қарши чиқиб ўтирибман-а!

Густав гапларимга кулиб қўйди.

— Ҳа, дунёда одамлар кўпайиб кетди. Илгари бу қадар сезилмас эди. Энди эса, ҳар бир одам нафақат нафас олиш, балки автомобилга ҳам эга бўлишни хоҳлаб қолган пайтда, жуда билиниб қоляпти. Албатта, биз оқилона иш қилаётганимиз йўқ, буни болаларга хос хатти-ҳаракат, болалик деса ҳам бўлади. Кейинчалик инсоният ўз кўпайишни оқилона воситалар ёрдамида жиловлашни ўрганиши керак бўлади. Ҳозирча, чидаб бўлмас ҳолатларга хийла нооқилона тарзда муносабатда бўлишимизга тўғри келади, аслида тўғри иш қилаётибмиз: ахир биз камайтираяпмиз...

— Ҳа, — қўшилдим унга, — қилаётган ишимиз балки жиннилиқdir, эҳтимол, зарур ва яхши иш қилаётгандирмиз, ким билади дейсиз. Агар инсоният ақл-идрок билан битмайдиган ишларга ортиқча бош қотираверса,

бу яхши бўлмайди. У ҳолда америкалик ёки большевик-ларнига ўхшаган омоллар юзага кела бошлайди, уларнинг иккалови ҳам фавқулодда фаросатли бўлишларига қарамасдан хаётни шу қадар жўн, соддалаштириб юборишиадики, оқибатда уни даҳшатли тарзда бузиб кўрсатадилар ва ундан маҳрум қиласидилар. Бир замонлар юксак идеал бўлган инсон сурати энди сийқаси чиққан бир қолипга айланиб бормоқда. Биз, жиннилар бўлсак, унга ҳануз топиниб, ҳайбаракалла қилиб ётибмиз.

Гапларимга Густав кулиб:

— Балосан, болакай, калланг — кони ақл, сени тинглаш ҳам фойда, ҳам қувонч, гапларинг тўғрику-я, бироқ ҳадеб бекорчи ўй-хаёлларга берилавермасдан, милтифингни ўқлаб қўйишни ҳам унутмагин. Чунки ҳар дақиқада буғучалардан бир қанчаси ҳаллослаб келиб қолишлари мумкин, ана унда фалсафанг иш бермай қолади, шунинг учун замбарагинг доим ўқланган бўлсин.

Шу пайт яна бир машина физиллаб келиб қолди, кўча эса ёпиқ эди. Тирик қолган семиз, қизил бошли одам фалати ҳаракатлар қилиб, дам пастга, дам юқорига аланглаб, ахийри яширинган жойимизни сезиб қолди чофи, бир нималар деб фўлдираб, югуриб келди-да, тўппончалидан бизга қаратса бир неча марта ўқ узди.

— Жўнанг ҳозироқ, акс ҳолда отиб ташлайман, — қичқирди Густав пастга қараб. Пастдаги киши эса уни нишонга олиб, яна ўқ узди. Шунда бирварақайига иккамиз уни «пах-пах» отиб ташладик.

Яна иккита машина келди, уларни ҳам ишдан чиқариб, саранжомладик. Шундан сўнг кўча жимжит бўлиб, хувиллаб қолди, унинг хавфлилиги тўғрисидаги хабар шаҳарга етиб борган кўринади. Энди атрофдаги гўзал манзарани томоша қилишимизга имкон туғилди. Кўлнинг нариги тарафида, хув пастликда мўъжазгина шаҳарча кўринади, бирдан у ерда тутун пайдо бўлди, сал ўтмай томлардан томларга ўрлаётган оловнинг тили ялтиради, ўқ овозлари эшитилди. Дора пича йиғлаб олди, мен унинг нам юз-кўзларини сийпалаб, юпатдим.

— Нега энди ҳаммамиз ўлиб кетишимиз керак? — сўради у тўсатдан. Аммо ҳеч кимдан садо чиқмади. Шу пайт пастида бир пиёда кўринди, у пачови чиқиб кетган автомобиллар атрофида бир оз айланиб, у ёқ-бу ёғини кўздан кечирди-да, биттасининг ичига бош сұқди, сўнг у ердан ола-була қуёш соябони, аёлларнинг чарм сумкаси ва бир шиша вино топволди, девор устига бемалол ўтирголиб, шишани кўтариб ичиб, чўнтағидан станиол* қофозга ўралган бир нима олиб ея бошлади, шишани охиригача ичиб бўшатгач, соябонни қўлтиғига қисганича, йўлида шодон давом этди. Буни кўриб, Густавга сўз қотдим:

— Анови ажойиб йигитнинг... пешонасидан дарча очиб қўйиш, қўлингдан келармиди? Худо ҳақи, мен буни қилолмасдим.

— Керагиям йўқ, — тўнфиллади дўстим. Аммо унинг ҳам кўнгли бехузур бўлгани сезилиб турарди. Беозор, ювош, вазмин, болалардек содда ва бегуноҳ бирор одамга кўзимиз тушди дегунча, манови қилаётган ишларимиз бирданига бемаъни ва жирканч туюлиб кетарди. Жин урсин, ҳаммасини!.. Биз ўз қилмишимиздан уялиб кетдик. Начора, урушда ҳаттоки генераллар ҳам баъзан шундай аянчли ҳолатга тушар экан.

— Бу ерда узоқ қолмайлик, — зорланди Дора, — пастига тушайлик, зора машиналардан бирор егулик топсак. Корниларинг очмадими сизларни, эй болшавойлар?

Хув пастиликда, ёнаётган шаҳарда жомлар бесаранжом ва ташвишли чалина бошланди. Биз пастига туша бошладик. Тупроқ уюмидан ўтаётганимизда, Дорага ёрдамлашаётib, унинг тиззаси очиқлигига кўзим тушкиди. У негадир қаттиқ кулиб юборди. Бироқ шу пайт тортиш механизми панд берди ва иккаламиз ҳам бўшлиқقا қуладик...

* Станиол — қалайдан тайёрланган зар қофоз.

* * *

Мен яна юмалоқ йўлакда, ҳозиргина ўзим шоҳиди бўлган ов саргузаштларидан ҳамон ҳаяжонда эдим. Ҳаммаёқда, барча сон-саноқсиз эшиклардаги осиғлиқ турфа хил ёзувлар эса ўзига чорларди:

Мутабор*

Хоҳлаган, ҳар қандай ҳайвон ва ўсимликларга айлантира оламан.

Камасутрам**

Хиндча ишқ санъатидан сабок ўрганувчилар учун:

Кулавериб, ичагинг узилади.

Руҳингиз кўтарилишини истайсизми?

Шарқ донишмандлиги.

О, қани энди мингта тилим бўлсайди!

Фақат жаноблар учун.

Мағриб ҳалокати.

Арzon нархда. Ҳали бунақаси бўлмаган.

Санъат тимсоли.

Мусиқа орқали Вақтнинг Маконга айланиши.

Кулавериб, кўзларингиз ёшланади.

Кулги хонаси.

* *Мутабор* – Вилҳелм Ҳауфф (1802–1827)нинг Лайлак халифа ҳақидаги «Карвон» номли эртагида келтирилган сеҳрли сўз. Маъноси: «бошқа нарсага айланаман» (лотинча).

** *Камасутрам* – кадимий хиндча матн, ишқ санъатидан сабок берувчи кўлланма.

**Дарвешона ўйинлар.
Ҳар қандай алоқа-муносабатнинг ўрнини
тўлақонли равишда боса олади.**

Ёзувлар ҳадеганда тугай демасди. Улардан бири:

**Шахсни шакллантириш юзасидан йўл-йўриқлар.
Муваффақият кафолатланган.**

деб аталарди. У эътиборимни жалб қилди, эшикни очиб, ичкари кирдим.

Фира-шира, жимжит хонада бир одам шарқона услубда ерда ўтиради, унинг олдида каттакон шоҳмот тахтасига ўхшаш бир нима бор эди. Даставвал, у дўстим Паблога ўхшаб кўринди, чунки унинг эгнида ҳам гулдор шойи пижама бўлиб, кўзлари ёниб, чақнаб турарди.

- Сиз Пабломисиз? — сўрадим ундан.
- Мен ҳеч ким эмасман, — деди у самимият билан. — Бизда ҳеч қачон ном бўлмайди, биз бу ерда ҳеч қанақанги шахс эмасмиз. Мен шоҳмотчиман, холос. Шахсни шакллантириш юзасидан сабоқ олмоқчимисиз?
- Ҳа, шундай.
- Ундей бўлса, марҳамат қилиб, фигуralарингиздан бир неча донасини менга бериб турсангиз.
- Фигуralарингиздан дейсизми?
- Ҳа, уларда ўз шахсиятингиз бўлинган, парчалangan ҳолатда жойлашган бўлади. Доналарсиз ўйнолмайман-ку.

У менга кўзгу тутди, унда менинг бир бутун шахсиятим кўплаб «мен»ларга бўлиниб турганини кўрдим, уларнинг сони янада кўпайгандек туюлди. Бироқ фигуralар энди жуда кичкина, мўъжаз шоҳмот доналариdek келарди, ўйинчи улардан бир неча донасини хотиржам ва дадил чанглаб олди-да, ерда ётган шоҳмот тахтаси ёнига териб чиқди. Айни пайтда у кўп ўқилган нутқ ёки маъ-

рузасини такрорлаётган одамга ўхшаб, бирдай гапира бошлади:

— Инсонни бардавом бир бутунлик, яхлит бирлик деб қарашиб хато ва бахтсизлик келтирадиган тушунчаки, у сизга яхши маълум. Сизга яна шу нарса маълумки, инсон жуда кўп рух-жонлардан, кўплаб «мен»лардан иборат. Шахснинг фараз қилинаётган яхлит бирлигини мана шу кўпгина фигуralарга алоҳида-алоҳида бўлиб, парчалаб чиқиш жиннилик ҳисобланади, фан буни шизофрения деб атайди. Фан бу масалада ҳақ, албатта, кўпчиликни бошқарувсиз, муайян тартибот ва гурӯхларсиз жиловлаб бўлмайди. Аксинча, кўплаб ёрдамчи «мен»ларнинг фақатгина бир марталик, мажбурий ва умрбод тартиботи мумкин, деб ҳисоблаб, фан янгилашиди. Фаннинг бу хатоси баъзи бир ёқимсиз оқибатларни ҳам келтириб чиқарган, унинг «аҳамияти» атиги шундангина иборатки, давлат муассасаларида ишлаётган муаллим ҳамда тарбиячилар ўз ишларини соддагина тасаввур қилиб, бу борадаги ҳар қандай фикрлаш ва тажрибаларни ортиқча деб ҳисоблайдилар. Ана шу хато оқибатида кўп одамлар «акли расо» ва ҳатто ижтимоий тўлақонли саналадилар, аслида улар тузатиб бўлмайдиган телбалардир ва аксинча, баъзи даҳо инсонлар жиннига айлантириб кўйилади. Шундан келиб чиқиб, биз фаннинг тугал, мукаммал бўлмаган рухшунослик, рух ҳақидаги таълимотини «тузиш санъати» деб аталадиган тушунча билан тўлдирмоқчимиз. Бу билан биз ўз «мен»нинг бўлиниш-парчаланишини ўз бошидан кечирганларга, унинг бўлакларини хоҳлаган пайтларида, хоҳлаган тартибда янгитдан қайта жойлаштириб чиқиб, бу билан ўз ҳаёт ўйинларининг чексиз хилма-хиллик, ранг-баранглигига эриша олишларини кўрсатмоқчимиз. Шоир бир ҳовуч одамлардан драма яратганидек, биз ҳам бўлинган «мен»ларимиз фигуralаридан янги ўйинлар ва кес-

кин муносабатлар билан, мудом янгича вазиятларда ҳамиша янги гурухлар тузамиз. Мана, қаранг!

У менинг фигураларимни — чоллар, йигитлар, болалар, аёллар — қувноқ ва маъюс, кучли ва нозик, чаққон ва суст фигураларнинг барчасини хотиржам ва аклли бармоқлари билан йиғишириб олди-да, тахта устида ўйин ўйнагандек тез териб чиқди, ўша заҳоти улар гурухлар ва оиласлар, ўйинлар ва курашлар, дўстлик ва душманлик ҳамда рақобатларга бўлинишиб, кичкинагина дунёни ташкил этдилар. Менинг кўз ўнгимда ана шу жонли, жўшқин ва қизғин, шу билан бирга обод ва тартибли мўъжазгина олам бир зумда ҳаракатга келиб, ўйинлар ва курашлар майдонига айланди, иттифоқлар тузилди, муҳорабалар бўлиб ўтди, бир-бирлари билан ўзаро тил топишиб, уйланишиб, ўзларидан кўпайишидилар; ҳақиқатан ҳам бу кўп қиёфали, таъсирчан ва мароқли драма эди.

Сўнг яна у қувноқлик билан тахта устидаги барча шоҳмот доналарни секин суриб, ётқизди-да, уларни бир ерга тўплади ва ўйланиб қолди, у ажойиб санъаткор эди, ўша доналарнинг ўзидан бутунлай бошқа гурухлар ва муносабатлардан иборат бўлган, воқеалари ўзига хос боғланиб кетадиган бутунлай янги ўйин яратди. Ушбу иккинчи ўйин ҳам биринчисига ҳамоҳанг эди: ўша олам, ўша материал, фақат энди хулқ, юриш-туриш ўзгарган, суръат-маром ўзгарган, мотив ўзгача, вазиятлар бошқача эди, холос.

Шундай қилиб, аклли ўйинчи ўйинларни кетма-кет давом эттираверди, улардаги қиёфаларнинг ҳар бир бўлаги менинг ўзим эдим, бу ўйинлар узоқдан бир-бирига ўхшаш, бир дунёга мансуб, келиб чиқиши бир бўлса-да, бироқ ҳар гал янгича тус, янгича оҳанг касб этарди.

— Мана шу — яшаш санъати, — деди у насиҳатомуз оҳангда. — Бундан кейин, келгусида ўз ҳаётингиз ўйинларини хоҳлаганингизча тузиш ва жонлантириш, хоҳла-

ганингизча чигаллаштириш ҳамда бойитиш — ўз қўлингизда. Шундай қилиб десангиз, юксак маънодаги жиннлик бутун донишмандликнинг бошланиши бўлгани каби, шизофрения ҳам барча санъат, барча фантазияларнинг бошланишидир. Ҳаттоки алломалар ҳам буни аллақачоноқ яrim англаб етишган, буни масалан, шаҳзода Вундерхорннинг ўша ажойиб китобидан* ҳам ўқиб билса бўлади. Унда ҳикоя қилинишича, серзахмат, серғайрат бир олимнинг асари ақлдан озган деб, жиннихоналарда сақланаётган бир неча санъаткорларнинг дохиёна ҳамкорлиги туфайли қадр топган экан. — Шоҳмот доналарингизни ёнингизга солиб қўйинг, ҳали бу ўйин сизга кўп қувонч келтиради. Агар бугун бирорта дона тасқара-таъвиядек жонингизга тегиб, ўйинингизни бузадиган бўлса, эртагаёқ шартта шаштидан тушириб, уни беозор, иккинчи даражали фигурага айлантирасиз қўясиз. Ўзингиз суйган, бироқ маълум муддат сира омади чопмай, шўрпешона туюлган бечораҳол фигурачани эса, кейинги ўйинда маликага айлантирасиз. Мен сизга омад тилайман, афандим.

Камина бу истеъодли шоҳмотчи олдида чуқур таъзим қилиб, унга миннатдорчилик билдиридим ва доналарни чўнтағимга солиб, торгина эшиқдан чиқиб кетдим.

Аслида йўлакка чиқибоқ, дарҳол ерга ўтириб оламанда, доналарни олдимга терволиб, соатлаб, абадият қадар ўйнайвераман, деб ўйлаган эдим, бироқ театрнинг ёруғ думалоқ йўлагига чикишим билан, мендан-да кучлироқ бўлган янги оқимлар каминани ўзлари билан олиб кетди. Кўз ўнгимда қуидаги лавҳа манаман деб, пориллаб турарди:

Чўл бўрисини ўргатиш мўъжизаси

* Шаҳзода Вундерхорннинг ўша ажойиб китоби – мюнхенлик психиатр Ҳанс Принцхорн (1886–1933)нинг 1922 й. нашр этилган шаклланиш психологияси хақидаги китоби.

Ушбу ёзув турли-туман ҳис-туйфуларни қўзғатиб юборди; тарк этилган воқеликда, собиқ ҳаётимда кечган турли хил кўркув ва сиқувларни ёдга солиб, юрагимни беаёв қиса бошлади. Кўлим қалтираб эшикни очгандим, тўппа-тўғри ярмарка дўконига кириб қолибман. У ерда темир панжара ўрнатилган бўлиб, у мени ночоргина томоша саҳнасидан ажратиб турарди. Саҳнада ҳайвон ўргатувчига кўзим тушди, кўринишдан у бир оз лўттибоз ва ўзига бино қўйган жанобни эслатарди. Қалин, қуюқ мўйлови, мускуллари чиқиб турган, бакувват елкалари ҳамда эгнидаги олифтасатанг цирк либосига қарамасдан, у ёқимсиз ва кўнгилни айнитадиган даражада худди ўзимга ўхшаб кетар эди. Ана шу бакувват одам катта, чиройли, бироқ озиб-тўзиб кетган, ориқ, озгин ва қулларча мутелик билан кўрқиб-писиб турган бўрини худди итга ўхшатиб, чилвирда тутиб турарди — қандай аянчли манзара-я! Бу мард ҳамда шармандаларча итоаткор йиртқичнинг ёвуз, бераҳм ҳайвон ўргатувчи қўлида бир қатор турли хунар ҳамда саҳна кўринишларини ижро этишини кўриш ҳам мароқли, ҳам кўнгилни айнитар, ҳам даҳшатли, ҳам сирли томоша бўлиб туюларди.

Кийшиқ кўзгудаги менга эгизак бўлган бу лаънати одам бўрини мисли кўрилмаган даражада, худди эртаклардагидек, жиловлаб олган экан. Бўри ҳар бир буйруққа диққат билан бўйсунар, ҳар бир чақириқ ва қамчи овозига итга ўхшаб жилпангларди. У тиз чўкар, ўзини ўлганга солар, орқа оёқларида тикка турар, тумшуғида бўлка нон, тухум, бурда гўшт, саватчани итоаткорлик билан олиб келарди. Ҳайвон ўргатувчи қўлидаги қамчини тушириб юборса, уни бориб олар ва кетидан кўтариб юрар, боз устига думини ликиллатиб, хушомад ҳам қиларди. Бўрининг олдига аввал уй қуёнини, сўнг оппоққина кўзичноқни келтиришди, уларни кўриб, тишларини кўрсатди-да, нафси кўзғаб, сўлаги оқа бошлади, бироқ кўркувдан қалтираб, фужанак бўлиб турган жониворларнинг

ҳеч қайсисига тегинмади, аксинча, уларга эътибор ҳам қилмай, берилган буйруққа биноан, уларнинг устидан зеболик билан қулоч ёйиб сакраб ўтди-да, қуён билан қўзичоқ ўртасига ётиб олди ва иккаловини олд оёқлари билан қучиб, таъсири, жозибадор оилавий гуруҳ ташкил қилди. Боз устига у одамнинг қўлидан бир бўлак шоколад ҳам еди. Бўрининг ўз табиатини ақл бовар қилмас даражада инкор этиб, ундан бу қадар воз кечганини кўриб туришнинг ўзи бир азоб ва бундан тепа сочим тикка бўлди.

Аммо-лекин шунга қарамасдан, томошанинг иккинчи қисмида, худди бўри сингари, қони қайнаган томошабиннинг тортган азобини ўрни ҳам тўлдирилди. Усталик билан, маккорона намойиш этилган ушбу дастур ниҳоясига етгач, ҳайвон ўргатувчи қўзичоқ ва бўри гурухи узра тантанавор ширин табассум билан томошабинга таъзим қилди, шундан сўнг роллар алмашди. Ҳаррига ўхшаб кетадиган ҳайвон ўргатувчи тўсатдан итоаткорона, лаганбардорларча қуюқ таъзим қилиб, қўлидаги қамчини бўрининг оёқлари остига оҳиста кўйди ва худди бояги йиртқич ҳолатига тушиб, кичрайиб, қалтирай бошлади, унинг кўриниши ночор ва аянчли эди. Бўри эса ҳалқумини ялади, ундаги талваса, безовталиқ ва сохталиқ йўқолиб, нигоҳи яшнаб кетди, бутун танаси таранглашиб, тўлишиб, ундаги ваҳшийлик бир зумда яна қайтадан ўз ўрнини эгаллади.

Энди бўри буйруқ берар, одам эса унга бўйсунарди. Буйруқ янграши билан одам чўккалас, бўри ролини ўйнашга киришди, тилини осилтириб, тамбаланган тишлари билан эгнидаги кийимни тишлаб, йирта бошлади. Одам ўргатувчи буйруқ бериши билан у икки ёки тўрт оёқлаб юрар, орқа оёқларида тик турар, ўзини ўлганга солар, бўрини устига миндириб олар, қамчини кетидан кўтариб юрарди. У ҳар бир ҳақорат, ҳар бир таҳқирловчи буйруққа итга ўхшаб, бутун қобилиягини ишга солиб, ажойиб-гаройиб

тарзда итоат қиларди. Шу пайт саҳнада гўзал бир қиз пайдо бўлди. У ўргатилган одамга яқин келиб, унинг иягини силади, юзини юзига ишқади, бироқ у ҳамон тўрт оёқлаб, ҳайвон бўлиб тураверди, бошини сарак-сарак қилди. Ул гўзалга тишларини кўрсата бошлади, охири унга худди бўрига ўхшаб, шундай таҳдид қилдики, қиз бечора кўркқанидан қочиб кетди. Унинг олдига шоколад келтириб қўйишиди, бироқ униям беписанд исказ кўриб, нари сурди. Охирида яна оппоқ қўзичоқ ва семизгина, олачипор уй қуёнини олиб келишиди, шунда фаросатли, зийрак одам сўнгти бор кучини ишга солиб бўри ролини қойилмақом қилиб ўйнади. Жон талвасасида типирчилаётган жониворларга тирноқ ва тишларини ботириб, териларини шилиб, титиб, бурдалаб, гўштини тириклайн чайнай-чайнай, уларнинг илиқ-иссиқ қонини ҳам қўзларини юмиб, хузур қилиб ича бошлади...

Ушбу манзарадан даҳшатга тушиб, эшикдан қочиб чиқиб кетдим. Мазкур мағиявий театр ҳам ҳеч қандай жаннат эмас экан, унинг сиртигина гўзал эди, холос, ботинида эса барча жаҳаннамлар жамулжам эди. Э худо, наҳот бу ерда ҳам ҳеч қандай нажот йўли бўлмаса?!

Кўркқанимдан орқа-олдимга қарамай, тирақайлаб қоча бошладим. Оғзимда қон ва шоколаднинг бир-бидан bemaza таъмини туярканман, дилимда бу қайгули, фамгин, маъюс фалаён тўлқинидан узокроқ бўлиш истаги туғилди, кўнгил энди дилкашроқ суратлар, манзараларни кўмсарди, улар томон ич-ичимдан тиришиб, файрат билан интилардим. «О дўстлар, унақа эмас-да энди!»* — бу сўзлар ич-ичимда қўшиқ мисол жарангларди ва мен шу дамда уруш даҳшатларини, фронтнинг

* О дўстлар, унақа эмас-да энди! — Хессенинг «Нойе Цюрхер Цайтунг»да босилган мақоласи сарлавҳаси (3.11.1914). Унда адабнинг урушга бўлган муносабати очик-оидин баён этилган.

кўрқинчли фотосуратларини, устма-уст қалашиб, уйилиб ётган мурдаларни, уларнинг газниқобдан буришиб бужмайиб кетган башараларини эслаб, ваҳимага тушдим. Одамларга дўст, урушга қарши бўлган мендек бир одам, ушбу суратларни кўриб, қанчалар даҳшатга тушганман, ўйласам, ўшанда ҳалиям эси йўқ ёш бола эканман-да! Бугун эса, шуни билдимки, ўз ботинимда ин курган худди шундай даҳшатли, худди шундай ваҳшиёна ва машъум, худди шундай хом ва бемаъни фикрлар ҳамда суратларни ҳеч бир ҳайвон ўргатувчи, ҳеч бир вазир, ҳеч бир генерал, ҳеч бир телба ҳатто хаёлига келтиришга ҳам қодир эмас экан.

Енгил тин олиб, хўрсинарканман, театр бошланишидаги ёзув, унга жон-жаҳди билан интилган бояги йигитча ёдимга тушди, бу ёзув:

Барча қизлар сеники

деб аталарди, умуман айтганда, ҳозир кўнгил аслида худди шуни тилаб тургандек туюлди. Ларьнати бўри оламидан қутулганимга шукур қилиб, хурсанд ҳолда ичкари кирдим.

Бу ердаги манзара менга нақадар яхши таниш ва шуқадар ақл бовар қилмас даражада эдики, титраб кетдим — ёшлигим, ўсмирилик ва йигитлик даврим бутун бўй-басти билан кўз олдимда намоён бўлиб, юрагим ҳам худди ўша даврдагидек беҳаловат ура бошлади. Ҳозиргина кўрган-кечиргандарим бамисоли ҳовурдек кўтарилиб, мен яна қайтадан ёш, навқирон бўлиб қолган эдим. Бундан бир соат муқаддам, бир неча дақиқалар олдин яхши биламан деб ўйлаганим муҳаббат, истак-талаб, соғинч ва кўмсаш кекса бир одамга мансуб муҳаббат, соғинч-интилиш эди. Энди эса мен қайтадан ёшариб, вужудимдаги қайноқ аланг, улкан истак-иштиёқ, худди март ойининг

нам-илиқ шамолидан эриб бораётган ишқибозлик, буларнинг барчаси ёш, навқирон ва ҳақиқий эди. О, унут бўлган оловлар нақадар гуриллааб аланталанар, қай бир замонларнинг оҳанглари оламни тутган, томирларда қон гупурар, ич-ичимдан ҳайқириқ туғён уриб келар, дилим қўшиқ бўлиб янгарди! Мен ўн беш ё ўн олти яшар ўспирин эдим, каллам лотин, юон тилларига бўлган ҳавас ҳамда гўзал шоирона сатрлар билан, фикрларим интилишлар ва шухратпастлик, хаёлларим эса санъаткорона орзуларга лиммо-лим, бироқ вужудимда бўй кўрсатётган муҳаббат алантаси, мана шу барча ловиллаб ёнаётган аланталардан кўра теранроқ, кучлироқ ва даҳшатлироқ эди.

Мен тоғ тепаликларидан бирида эдим, бу ердан туғилиб ўсан она шаҳрим кўриниб турарди. Димоққа нам илиқ шамол ва илк бинафшалар хиди урилар, шаҳарча тарафда дарё оқариб кўринар, туғилиб ўсан уйим ҳам кўзга ташланарди ва буларнинг барчаси кўклам шамолида шу қадар теран, шу қадар файритабиий, ақл бовар қилмас даражада равshan ва нурафшон товланардики, ёшлиқ чоғларимда дунёга илк шоирона нигоҳ билан боқсан пайтларимни ёдга солар эди. Ҳамон тепаликда турардим, шамол соchlаримни тортқилаб ўйнарди; муҳаббат соғинчидан ўзимни йўқотиб, хаёлга берилиб, энди кўкараётган бутанинг ярим ниш урган куртагини чирт узиб, исказ (шунда яна ҳаммаси қайтадан ёдимга тушди), уни ҳали ҳеч бир қиз ўпмаган лабларим билан ўйнаб, чайнай бошладим. Худди мана шу тахир, ўткир аччиқ таъм баҳона сўнгги ўспирилик йилларимда кечган унутилмас бир лавҳани қайта бошимдан кечирдим. Баҳорнинг илк кунлари эди ўшанда, якшанба куни, тушдан сўнг ёлғиз ўзим сайд қилиб юрган эдим, Роза Крайслерни учратиб қолдим, у билан журъатсизгина саломлашдим, шундаёқ уни қаттиқ севиб қолган эканман.

Ўшанда ул гўзал қиз ўзи ёлғиз, хаёл суриб, токқа чиқиб келган пайти экан, мен унга журъатсизгина пешвоз чиқиб, ўғон қилиб ўрилган соchlарини томоша қилгандим, юзининг икки чаккасидаги тутам-тутам соchlарини шамол тортқилаб ўйнарди. Бу қизнинг гўзаллигини, унинг шамол билан нақадар гўзал ва ажойиб сирлашаётган нозик соchlарини, эгнидаги юпқа ҳаворанг кўйлаги ҳам ёш, навқирон гавдасига қанчалик ярашиб, иштиёқ ҳамда соғинч уйғотишини ҳаётимда илк бор кўриб турардим, чайналган куртакнинг аччик, ўткир таъми вужудимни баҳорнинг қувонч ва ташвишлари билан тўлдиргани каби, қизни кўрганимда мени муҳаббатнинг даҳшатли шубҳалари, хотинлар тўғрисидаги гумонлар ва фавқулодда имконият ҳамда ваъдаларнинг, таърифга сифмайдиган роҳат-фарофат, хузур-ҳаловатнинг, ақл бовар қилмайдиган саросиманинг, қўрқув ва изтиробларнинг, теран нажот ҳамда оғир гуноҳларнинг фулгуласи чулғаб олди. О, баҳорнинг аччик таъми тилимни нақадар ёндириб, куйдиради шу дамда! О, шамол унинг қизарган юз-кўзлари узра ёйилган соchlарини ўйнашини кўрсангиз эди!.. Нихоят, у менга яқин келди, шу лаҳзада унинг юзи ним қизариб, атрофга разм солди; шундан сўнг, бошимдан диндорлар қалпоғини олиб, унга салом бердим, Роза ҳам тараффудланиб, саломимга жилмайиб алик олди ва бошини қўтариб, секин, дадил ва ўйчан қадам ташлади, ҳозир уни мен унга ғойибона йўллаётган минглаб муҳаббат тилакларим, талаб-истакларим ва чукур хурмат-эҳтиромим чулғаб олган эди.

Бир пайтлар, бундан ўттиз беш йил муқаддам, якшанба куни худди шундай бўлган эди. Ўшандаги воқеаларнинг барчаси: тепалик ва шаҳар, март шабадаси ва куртак ҳиди, Роза ва унинг жигарранг соchlари, тўлибтошиб, чулғаб бораётган иштиёқ-интилиш ҳамда ширин

оғули қўрқув, мана энди худди шу лаҳзада қайта так-
рорланаётган эди. Барчаси худди ўша муҳаббатим ҳаётим-
да кейин бошқа ҳеч қачон учрамагандек туюлаверади.
Бироқ бу гал уни бошқачароқ кутиб олишим мумкин
эди. У мени кўргач, бир оз қизарип кетди ва буни сез-
дирмасликка ҳаракат қила бошлаганидан мени ҳам севи-
шини билиб олдим, бу учрашув менга қандай аҳамиятли
бўлса, унга ҳам худди шундай эди. Ва бу гал у ёнимдан
ўтиб бўлгунга қадар бошимдан қалпогимни олиб, тура-
вериш ўрнига, қўрқув ва тортинчоқликни йиғишириб
кўйиб, файратим жўшиб:

— Роза! — дедим унга. — Хайрият, келибсан, сен гўзал,
гўзал қизсан. Мен сени шунчалар севаманки...

Балки бу сўзлар ўша дақиқалар учун топиб айтилма-
ган гаплар бўлиши мумкин, аслида доно гапларга ҳожат
ҳам йўқ, ўзи шундоғам тушунарли эди. Роза аёлларга
хос бўлмаган тарзда юришдан тўхтаб, менга қаради ва
аввалгидан ҳам кўра қизаринқираб, деди:

— Грюс Гот*, Ҳарри, мени чинданам севасанми?

Шу дамда унинг соғлом, бақувват чехраси яшнаб,
жигарранг кўзлари чақнаб турарди, сездимки: бутун
ўтган умрим ва муҳаббатим Розани ўша якшанбада қўлдан
чиқарип юборган лаҳзамдан бошлаб, нотўғри ва чигал
ҳамда бемаъни бахтсизликларга тўла бўлган экан. Энди
эса хато тузатилган, энди ҳаммаси ўзгарган, ҳаммаси
яхши бўлган эди.

Биз қўл ушлашиб, секин бирга кета бошладик. Шун-
дай баҳтиёр эдикки, таърифига сўз ожиз эди, хижолат
тортганимиздан нима дейишни, нима қилишни ҳам бил-
мас эдик, саросимада тезроқ чопа бошладик, нафасимиз
тиқилгунча лўкиллаб югурдик, сўнг тўхташга мажбур

* Грюс Гот — баварияликларда «салом» дегани.

бўлдик, бироқ қўлларимизни ҳамон қўйиб юбормасдик. Биз иккаламиз ҳам ҳали бола эдик, нимадан бошлашниям билмасдик, ўша якшанба куни бир-биримизга ҳаттоки илк бўса ҳадя қилолмаган бўлсак ҳам, биз ниҳоятда баҳтиёр эдик. Бирпас туриб қолдик, сўнг майсалар устига чўқдик, мен унинг қўлини олиб сийпадим, у эса бошқа қўли билан соchlарини журъатсизгина силаб қўйди, сўнгра ўрнимиздан туриб, бўйларимизни ўлчай бошладик, аслида менинг бўйим уникига қараганда сал-пал баланд эди, бироқ мен бунга рози бўлмай, иккаламизнинг ҳам бўйимиз теппа-тeng эканлиги, худойим бизни бир-биримиз учун яратганини айтиб, кейинроқ турмуш қуришимиз мумкинлигини ҳам қистириб ўтдим. Шу пайт Розанинг кўнгли бинафша тусаб қолди ва биз тиззалаб, калта ўсган баҳорги майсалар орасидан бинафша излай кетдик, калта пояли бир неча бинафша топдик, уларни бир-биримизга тортиқ қилдик. Ҳаво салқинлашиб, кеч кириб қолгач, Роза уйга қайтишим керак, деди. Шунда иккала-миз ҳам маъюс бўлиб қолдик, чунки уни кузатиб қўя олмасдим, шундай бўлса-да, барибир, орамизда қандайдир сир пайдо бўлган, бу эса биз эга бўлган энг гўзал туйғу эди. Мен тоғлар устида қолдим, тик жарлик тепасида ерга ўтириб олиб, Розанинг бинафшасини ҳиддай бошладим, кўзларим эса хув паstликда, шаҳар томон олислаб кетиб бораётган кичкинагина жуссада эди, ана у қудук ёнидан ўтиб, кўпrikдан ҳам узоклашди. Энди у уйига етиб олган, у хонадан бу хонага кириб чиқарди, мен эса бу ерда, тепада, ундан узокда эдим, аммо бизни қандайдир ришта, қандайдир оқим, қандайдир сир-синоат боғлаб турарди.

Биз бутун баҳор давомида у ер-бу ерда, гоҳ қоялар устида, гоҳ боғ девори олдида учрашиб юрдик, настарин гуллай бошлаган чоғда журъатсизгина илк бўсанинг таъмини тотиб кўрдик. Бизнинг бўсамиз ҳали у қадар

қайноқ әмасди, мен унинг қулоқлари узра тушиб турган күнфироқ сочларини силаб-сийпарканман, мұхаббат ва қувончимни у билан баҳам күрардим, ҳар бир журъат-сизгина ҳаракат, ишқ-мухаббат түғрисидаги қовушмаган гапларимиз билан, бир-бирилизни ҳадиксираб кутиш орқали янги баҳт-омад сари ишқ-мухаббат пиллапоясидан яна бир поғона күтарилиб борардик.

Шундай қилиб, Роза ҳамда бинафша билан бошланған бутун ишқий ҳаётимни яна бир бор бошдан кечирдим, бунда баҳт-омад юлдузлари чараклаб турарди. Роза кетиб, унинг ўрнида Ирмгард пайдо бўлди. Қуёш янада қиздириб, юлдузлар янада тиникроқ нур соча бошлиди, бироқ менга на Роза, на Ирмгард насиб этди, поғонама-поғона күтарилишимга, кўп ўқиб-ўрганиб, кўп нарсани ўз бошимдан кечиришимга тўғри келди, бу йўлда эса Ирмгардни ҳам, Аннани ҳам йўқотдим. Бир пайтлар ёшлигимда севганим ҳар бир қизни яна қайтадан севардим, уларнинг ҳар бирида мұхаббат уйфота олардим, ҳар бирига нимадир бериб, ҳар биридан нимларнидир олардим. Илгари ўй-хаёлларимдагина яшаган тилак-истаклар, орзу-умидлар ҳамда имкониятлар мана энди рўёбга чиқиб, уларни ўз бошимдан кечираётган эдим. Эй, сиз гўзал гуллар, Ида ва Лора, барча-барчангизни бир замонлар бутун ёз бўйи, ой сайин, кун сайин нақадар севардим!

Англаб етдимки, ҳозир кўрганим ўзини астойдил ишқ-мухаббат дарвозасига урган, келишган, ёқимтой йигитча эдим, мен ҳозир ўзимнинг бир бўлагимни, ўз вужудим ҳамда ҳаётимнинг ўндан бир, мингдан бир бўлагини тўла намоён қилиб турардим, у ўз «мен»имнинг бошқа барча фигуранларига малол келмаган, мутафаккирнинг оромини бузмаган, Чўл бўрисини қийнамаган, уни ҳали бирор шоир, ўткир хаёлпараст ё насиҳатгўй қайчиламаган эди. Йўқ, йўқ, мен шу тобда мухибдан ҳеч бир ўзга

кимса эмас эдим, мен муҳаббат баҳти ҳамда изтироби билан нафас олардим. Ирмгард менга рақс тушишни, Ида ўпишишни ўргатган эди, энг гўзал Эмма эса, куз оқшомларининг бирида, элма* дарахтининг шовиллаб турган қуюқ барглари остида қўнғиртус сийнасини ўптириб, шодлик тўла жомни кўлимга тутқазганди.

Хуллас, Паблонинг мўъжазгина театрида кўп нарсани кўрдим, бошимдан кечирдим, буларнинг мингдан бирини ҳам сўз билан таърифлаб бўлмайди. Бир пайтлар ўзим севган қизларнинг барчаси яна меники эди, ҳар бири менга берадиганини бериб, мендан оладиганини оларди. Не-не муҳаббат, не баҳту иқбол, қанча лаззат, қанча чигаллигу изтиробларни кўрмадим, ҳаётим мобайнода бой берилган барча муҳаббатлар мана энди шу қайпули дамда мўъжизавор тарзда боғимда қайтадан гуллаб-яшнаб турарди, улар маъсума, нафис гуллар, ёрқин қизариб товланаётган гуллар, тез сўлийидаган қорамтири гуллар эди, уйғонаётган дилдаги эзгу орзулар, куйдираётган фам-алам, кўркув тўла ўлим талвасаси, яшнаётган янгиланишлар эди. Менга учраган аёлларнинг бирлари шошилинч ва шиддатли ҳаракатла қўлга киритилар, бошқа бировларига эса узоқ ва пишиқ-пухта тараддуд билан эришишнинг ўзи баҳт эди. Барчаси ўз ҳолича, барчаси меники бўлди. Тўқ жигарранг кўзлари ғалати, зифирдек майин сочли аёл ҳам шу ерда эди, мен у билан бир вақтлар тезюарар поезднинг йўлагида, дераза ёнида чорак соат бирга бўлгандим, у кейинчалик кўп марта тушларимга ҳам кириб чиққан эди, бир оғиз гапирмаса-да, бироқ у мени ишқ-муҳаббатнинг мислсиз, даҳшатли, ҳалокатли санъатларига ўргатди. Сокин ва вазмин, силлиққина, хира жил-

*Элма – кайрафочнинг бир тури.

майиб турадиган, силлиқ тим қора сочли, кўзлари сузилган хитой аёли ҳам, мен уни Марселда, бандаргоҳда учратгандим, кўз кўриб, қулоқ эшиитмаган, ақл бовар қилмайдиган ажойиб нарсаларни биларди. Ҳар бирининг ўзига хос сир-синоати бўлиб, улардан ўз юртлари тупроғининг ҳиди келарди, кулишлари ўзгача эди, ҳар бири ўзича шарм-иболи, ўзича бехаё, бешарм эди. Бири келиб, бири кетарди. Оқим эди уларни менга олиб келган, мени уларга олиб борган, улардан узоқлаштирган, сеҳр-жодуга, хавф-хатарга тўла, кутилмаган тасодифларга бой ўйноқи, болаларча сузиш эди буларнинг барчаси. Мен шу дамда ўзим ҳайрон қолардимки, Чўл бўрисининг, яъни менинг бир қараашда шунчалик ночор, бебаҳт туюладиган рўшнолик кўрмаган ҳаётим аслида ошиқ-маъшуқлик, қулай имконият-тасодифларга ҳамда васвасаларга шу қадар бой бўлган экан. Мен улардан қочиб, деярли барчасини бой берганман, уларга қарамасдан этак қоқиб, ҳаммасини бир зумда унутганман — лекин бу ерда уларнинг барчаси, юзлаб, ёппасига ҳозир эдилар. Мен ҳозир уларни кўриб, берилиб, бағримни очиб турардим, уларнинг қизғиши тус фир-шира жаҳаннамига аста сингиб борардим. Ўша, Пабло бир пайтлар таклиф қилган васваса, унга ҳатто ўзим ҳам тўла тушуниб-фаҳмлаб етмаган бошқалари, илгариги хаёлий ўйинлар мана энди мени ўз измига олди. Кўп ишлар, кўп ўйинлар бўлиб ўтди, буларни сўз билан айтиб бўлмайди.

Васваса, иллат ҳамда низо-можароларнинг бепоён оқимида сузиб, ахийри яна юзага қалқиб чиқдим, энди мен билимли, донишманд эдим, тажрибам ҳам етарли эди, Ҳермина учун ҳар нарсага шай эдим. Минг бир киёфамнинг энг сўнгиси, охири кўринмас қаторнинг адоди

ғидаги энг сўнгти ном, бу — Ҳермина эди, ниҳоят, эс-хушимни йифиб олиб, мазкур ишқ-муҳабbat эртагига нуқта қўйдим, чунки мен уни сеҳрли кўзгунинг фира-ширасида учратмоқчи эмасдим, унга шоҳмот ўйинимнинг ўша атиги бир донасигина эмас, балки бутун бир Ҳарри тегишли эди. Эҳ, мен энди шоҳмот доналари ўйинини шундай боплайки, токи ҳаммаси унгагина тегишли бўлсин, ахду паймонлар амалга ошсин.

Оқим мени қуруқликка чиқариб ташлади, мен яна театрнинг жимжит йўлагида турадим. Хўш, энди нима қилиш керак? Мен шошиб чўнтағимни пайпаслаб, доначаларни қидира бошладим, бироқ ушбу истак ҳам аллақачон сусайиб, сўниб бўлган эди. Мени эшикларнинг, ёзувларнинг, мафиявий кўзгуларнинг битмас-туганмас, чексиз, бепоён олами қуршаб олган эди. Беихтиёр кейинги лавҳани ўқиб, даҳшатдан титраб кетдим:

Қонга бўялган муҳаббат

деб ёзилган эди унда. Шунда тўсатдан ялт этиб, бир воқеа ёдимга тушди: ўшанда Ҳермина ресторонда шароб ичиб, овқатланиб ўтириб, кўққисдан даҳшатли бир тарзда жиддийлашиб, сухбатимиз мавзуига чукур маъно берган, мени уни ўз кўлларим билан ўлдиришим учунгина ўзига ром, мафтун қилаётганини айтганди. Кўз олдим қорон-filaшиб, қалбимни қўрқувдан иборат фалаён эгаллади, тўсатдан кўз олдимда ҳамма нарса, тақдир-қисматим қайтадан намоён бўлиб, мушкул аҳволга тушиб қолганимни вужуд-вужудимдан ҳис қилиб турадим. Умидсизланиб, бир оз мафия билан шуғулланиб, шоҳмот тахтамни тартибга солиб, уни қайтадан тузиш мақсадида доналарни олмоқчи бўлиб, чўнтағимга кўл солдим. Бироқ

доналар жойида йўқ эди. Доналар ўрнига, кўлимга пичок илинди. Кўркканимдан йўлак бўйлаб югургилаб кетдим, эшиклардан ўтиб, кутилмаганда улкан кўзгуга рўбарў бўлдим. Кўзгуда худди ўзимга ўхшаган баланд бўйли, улкан, чиройли бўри жимгина олазарак қараб турарди. У кўзларини пирпиратиб, менга қараб иршаяркан, тишлари орасидан қизил тили кўриниб кетди.

Пабло қаердайкин? Ҳермина-чи? Шахсни шакллантириш хусусида зўр бериб, гапдонлик қилаётган бояги ақлли йигит-чи, у қаерда қолдийкин?.. Мен яна кўзгуга қарадим. Энди кўринишим зўр эди. Баланд ойна ортидаги бўри энди йўқ эди. Кўзгуда мен — Ҳарри турарди, унинг чехраси кулранг тусда, барча ўйинлардан холи, барча иллатлардан чарчаган, ранги докадек оқарган, шундай бўлсада, барибир, у одам эди, у билан гаплашса бўларди.

— Ҳарри, — дедим унга, — бу ерда нима қиляпсан?

— Ҳеч нарса, — жавоб берди у ойнада туриб, — кутяпман, холос. Ўлимни кутяпман.

— Ўлим қаерда экан? — сўрадим ундан.

— Ҳозир келади, — деди у. Шунда театр ичкарисидаги бўм-бўш хоналардан мусиқа, гўзал ва қўрқинчли мусиқа садоси, «Дон Жуан»даги* тош меҳмоннинг чиқишига ҳамоҳанг янграйдиган ўша мусиқа овози эшитилди. Нариги дунёдан, умри боқийлар тарафдан худди шарпага ўхшаш, этни жунжиктирадиган ваҳимали оҳанглар тараларди. Моцарт! — ўйладим мен ва ўз ботиний ҳайтимнинг энг севимли ҳамда юксак суратларини ўзимча чорлай бошладим.

Шу пайт ортимда кулги, жарангдор ва муздек совук кулги янгради, у гўё одамзоднинг қулоги эшитмаган изтиробнинг у дунёсидан эшитилаётгандек, тангрилар юморидан туғилгандек эди. Ортимга ўгирилдим, бу кулги

* «Дон Жуан» — «Дон Жованни» (1787), Моцарт операси.

бутун вужудимни музлатиб юборган, ҳам завқимни ошириб, хурсанд қилган эди, чунки шундоқ қаршимдан Моцарт юриб келарди, у қулганича ёнимдан ўтиб, шошил масдан, вазмин ва хотиржам ложа эшикларидан бирига қараб юрди, уни очиб, ичкарига кирди, мен беҳад орзуманд, иштиёқманд ҳолда унга эргашдим, у ёшлигимдан сифинган санам, кўнгил орзуси, мен умр бўйи меҳр-муҳаббат ҳамда эъзоз-эҳтиром билан интилган манзил эди. Яна мусиқа янгради. Энди театр ўрнида ҳеч нарса кўринмас, чор-атрофни коронфилик чулғаб олган, ложалар панжараси ёнида эса ... Моцарт турарди.

— Қаранг-а, — деди Моцарт, — саксофонсиз ҳам иш битаркан-ку. Гарчи ўзимнинг бу ажойиб мусиқа асбобига яқинлашгим келмаётган бўлса ҳам.

— Биз қаердамиз? — сўрадим ундан.

— Биз Дон Жованнининг сўнгги пардасини томоша қилаётибмиз, ана, Лепорелло аллақачоноқ тиз чўккан. Ажойиб кўриниш, мусиқаси ҳам эшитимли, ана шунаقا. Гарчи ундан инсонийлик уфуриб турса-да, барибир, кулги у дунёни, охиратни ёдга солади, шундай эмасми?

— У яратилган сўнгги буюк мусиқадир, — дедим мен мактаб муаллимига ўхшаб тантанавор оҳангда. — Албатта, ундан кейин Шуберт*, яна Хуго Волф**, ундан кейин эса, бечора гўзал Шопенни*** айтиб ўтмасам бўлмайди. Пешонангиз тиришиб кетяптими, маэстро — ҳа-я, яна Бетховен ҳам бор, уям фоят ажойиб. Бирок буларнинг барчаси, қанчалик гўзал бўлишмасин, улар қандайдир қисм-парчалардан, бўлак-бўлаклардан ибо-

* Шуберт — Франц Шуберт (1797–1828), бастакор.

** Хуго Волф — бастакор, мусиқа мунаққиди (1860–1903).

*** Шопен — Фредерик Шопен (1810–1849), поляк бастакори.

рат. Яхлит, бир бутун, мукаммал қўйма асарни эса, Дон Жованнидан буён ҳали одамлар яратолгандари йўк.

— Ҳаяжонланманг, — кулди Моцарт, ваҳимали киноя билан. — Ўзингиз ҳам мусиқачига ўхшайсиз, шундайми? Мен эса бу машғулотни аллақачон бас қилганман, дам олишга чиққанман. Фақат, баъзан эрмак юзасидангина, оз-моз кўз ташлаб тураман.

У гўё дирижёрлик қилмоқчилик, қўлларини кўтарди, шунда аллақаерда ойми ё бошқа само ёритқичининг хира нурлари кўринди, панжара оша пастга қарагандим, беҳад, жуда катта фазо бўшлиғига кўзим тушди, унда туман ва булувлар сузиб юрар, олисда тоғлар, денгиз соҳили элас-элас кўзга ташланар, шундоққина оёқларимиз остида сахро-биёбонга ўхшаш текислик узоқ-узоқларга қадар ястаниб ётарди. Унда узун соқолли, дилгир қиёфали муҳтарам кекса бир жаноб ўз ортидан қора кийинган бир неча ўн минглаб кишиларни эргаштириб, аста одимлаб борарди. У маъюс кўринар, тушкун қиёфада эди, шунда Моцарт:

— Кўряпсизми, бу Брамс*. У нажот сари интилмоқда, бироқ унгача ҳали анча вақт бор.

Мен қора кийимли мана бу минглаб одамлар ўша овоз ҳамда ноталарнинг ижрочилари эканлигини, уларнинг ўша ажойиб ҳукмдан сўнг ўз партитураларида** ортиқча бўлиб қолишлари мумкинлигини билиб олдим.

— Чолғу ҳаддан зиёд кўп, — бош чайқади Моцарт.

Шундан сўнг ҳаял ўтмай, Рихард Вагнернинг*** ҳам худди шундай катта оломонни бошлаб бораётганини

* *Брамс* – Йоҳаннес Брамс (1833–1897), бастакор.

** *Партитура* – кўп овозли мусиқа асарида ҳамма қисмларнинг мажмуи.

*** *Рихард Вагнер* – бастакор (1813–1883).

күрдик, минглаб одамлар оғир қадамлар ташлаб бори-шарди; сардор ҳам сабр-чидам билан аста, базур босиб борарди.

— Ёшлик чоғларимда, — ҳазин сўз қотдим мен, — бу иккала мусиқачини бўлиши мумкин бўлган энг катта зиддиятлар сифатида қабул қилишарди.

Моцарт кулди.

— Ҳа, бу ҳамиша шундай. Бир оз масофадан туриб қаралганда, бундай зиддиятлар ҳамиша бир-бирларига ўхшаш бўлиб кўринган. Дарвоке, кўп чолгулаштириш на Вагнернинг, на Брамснинг шахсий хатоси бўлган, балки бу улар яшаган замонга хос адашиш эди.

— Қандай қилиб? Нима, энди бунинг жабрини улар иккаласи тортишлари керакми? — ёзғирдим мен қораловчи оҳангда.

— Албатта. Бу — босқичлардан иборат йўл. Улар ўз даврининг қарзидан қутулганларидан кейингина, ўчинтиқом олиш учун арзигулик шахсият қоладими-йўқми, маълум бўлади.

— Бироқ улар бунинг учун ҳеч нарса қила олмайдилар-ку!

— Албатта, ҳеч нарса қила олмайдилар. Одамато олмани еб қўйган экан, улар нима ҳам қила оларди, аммо, барибир, бунинг жабрини тортаверадилар.

— Бу даҳшат-ку.

— Шундай, ҳаёт ҳамиша даҳшатдан иборат. Бизнинг эса, қўлимиздан ҳеч нарса келмайди. Шундай бўлса ҳам, барибир, жавобгармиз. Инсон туғилиши биланоқ, гуноҳга ботади. Модомики, буни билмас экансиз, тузуккина диний сабоқ олишингизга тўғри келади.

Ҳақиқатан ҳам ночор, танг аҳволда эдим. Шу тобда ўзимни ўзим кўриб туардим, ана, ўлгудай чарчаган зиёратчи сахро бўйлаб охират сари кетиб бормоқда, елкаси-

да ўзим ёзган кераксиз китоблар, уларда барча асарларим, барча мақолаларим жамулжам эди, кетидан булар устида ишлаган ҳарф терувчилар жамоаси, буларнинг барчасини ютишга мажбур бўлган ўқувчилар оммаси боришарди. Э, худойим! Одамато-ю олма ҳам ва қолган бутун дастлабки, энг асосий гуноҳ ҳам шу ерда эди. Демак, бу ер поёни йўқ аъроф-маҳшаргоҳ* эди, аввал гуноҳни ювиб, тавба-тазарру қилмоқ лозим эди, ундан кейингина, буларнинг барчасининг ортида бир оз шахсиятим, бир оз ўзимгагина хос бўлган нарса ҳам бормикин ёки менинг бутун хатти-ҳаракатларим ва бунинг барча оқибатлари денгиздаги бўш қўпик, воқеалар гирдобидағи бемаъни ўйиндангина иборат бўлганмикин, холос, деган савол туғилиши мумкин эди!

Моцарт менинг чўзинчоқ юзимни кўриб, қаттиқ кула бошлиди. Кулгидан толмай, ҳавода муаллақ ўмбалоқ ошиб тушди-да, чуриллаб, булбулдек сайрай кетди. Бунинг устига, гапни ҳам қотириб ташлади:

— Эй, болам, нима бало, тилинг куйдириб, нафасинг қисяптими? Ё ўқувчиларингни, ўша ярамасларни, бечора очофатларни, ё ҳарф терувчиларингни, ўша бидъатчиларни, лаънати фаламисларни, қилич қайровчиларни ўйляяпсанми? Сен жодугар, билсанг, булар жуда кулгили, менга деса баттар бўл, лекин эҳтиёт бўл, ўтириб қўйма тагин! Э, сен лақма, бир ёқда босмахона бўёғинг, бир ёқда дилингда изтироб, мен сенга шам садақа қилай, бу шунчаки ҳазил, агар билсанг. Валдирадинг, шалдирадинг, тўс-тўполон, шумлик қилиб, думингни ҳам ўйнатдинг, барибир, узоққа боролмадинг. Жин урсин-а сени, бирордан ўғирлаб олган бемаъни ёзув-чиズувларинг кимга ҳам керак, хай майли, худо ўзи ёрлақасин...

* Аъроф-маҳшаргоҳ – католиклар афсоналарида: жаннатга киришдан олдин ўлганларнинг жони гуноҳлардан покланадиган жой.

Бу гаплар менга қаттиқ ботди. Газабим қўзиб, ғамандухга берилиб ўтирмасдан, шартта Моцартнинг коки-лига ёпишдим, у эса учи-и-иб кетди. Кокил худди комета думига ўхшаб, узайгандан узаяверди, ахийри бир учига осилиб олдим-да, дунё бўйлаб қуюндай учиб юравердим. Жин урсин, шунақаям совуқ дунё эканки, нақ юпқа муз ҳавосидан иборат экан! Тағин чидашаркан-да, бу умри боқийлар. Аммо-лекин муздек ҳаво баҳри дилимни очиб юборди, бунга бир зумдаёқ, ҳушимни йўқотмасимдан олдин амин бўлдим. Вужудимга аччиқ, ўткир, пўлатдек метин, совуқ қувноқлик, шодонлик ина бошлади. Худди Моцартга ўхшаб, жарангдор, шўх ва самовий кулгим келди, бироқ ушбу он нафасим тугаб, ҳушимдан кетган эдим.

* * *

Ўзимга келганимда, калаванинг учини йўқотган, ҳолдан тойган эдим, йўлакнинг у ер-бу ерида оппоқ нур жилваланарди. Мен ҳали умри боқийлар ҳузурида эмасдим. Камина ҳамон жумбоқлар, изтироблар, Чўл бўрилари ҳамда азобга тўла мушкулот ва чигалликлардан иборат бўлган бу дунёда эдим. Яхши жой эмасди бу ер, унга чида буриш амримаҳол эди. Унга нуқта қўйиш пайти келганди.

Девордаги каттакон кўзгуда Ҳарри менга рўбарў туради. Унинг кўриниши яхши эмас, профессорникига ташриф буюрган ўша оқшом ҳамда «Чўл бургуги»да бўлган бал пайдидаги қиёфадан деярли фарқ қилмас эди. Бироқ орадан йиллар, асрлар ўтган; Ҳарри энди улғайган, у рақс тушишни ўрганган, мафиявий театрларни бориб кўрган, Моцартнинг кулишларини тинглаган, у энди рақслардан, аёллар ва пичоқлардан кўркмасди. Бир неча асрлар ўтгач, ўртамиёна қобилият ҳам камол топади.

Кўзгудаги Ҳаррини узоқ кузатдим: мен уни ҳалиям яхши танирдим, у ҳали ҳам март ойининг якшанба кунларидан бирида, қоялар устида Розани учратиб қолиб, унга бошидаги диндорлар қалпоғини олиб, салом берган ўша ўн беш яшар Ҳаррига бир оз ўхшаб кетарди. Бироқ ўшандан буён у бир неча юз ёшга улғайган, мусиқа ҳамда фалсафа билан шуғулланган, бошидан кўп кўргиликларни кечирган, «*Пўлат дубулға*»да эльзас шаробидан сипкорган ва самимий, оқ кўнгил олимлар билан Кришна ҳақида баҳс-мунозаралар қилган, Эрика ва Марияни севган, Ҳерминага дўст бўлган, автомобилларни ўққа тутган ҳамда силлиқкина хитой аёлни кўрган, Гёте ва Моцартни учратган ҳамда ўзи ҳалиям банди бўлган замон ва сохта воқелик тўридан турли дарчалар очган. Ўзининг ажойиб шоҳмот доналарини яна йўқотиб қўйган бўлса-да, чўнтагида энди унинг зўр пичофи бор эди. Олға бос, қари Ҳарри, кекса ҳорғин йигит!

Жин урсин, намунча аччиқ бўлмаса бу хаёт! Мен кўзгудаги Ҳаррининг юзига қараб туфлаб юбордим, уни оёқларим билан босиб, чил-чил синдиридим. Тинимсиз гувиллаётган йўлак бўйлаб секин юриб, шу қадар кўп гўзал нарсаларни ваъда қилган эшикларни диққат билан кўздан кечира бошладим: энди уларнинг ҳеч қайси сида ёзув деган нарса йўқ эди. Аста-секин қадам ташлаб, мафиявий театрдаги жами юз эшикнинг барчасини айланиб чиқдим. Нима, мен бугун бал-маскарадда бўлмаганимидим? Орадан гўё юз йиллар вакт ўтган эди. Энди бошқа ҳеч қандай йил-пил деган нарса ҳам бўлмайди. Яна битта иш қолган эди — мени Ҳермина кутаётганди. Ўзиям тўймисан-тўй бўларди-да!.. Маъюс фалаён тўлқинлари узра сузиб, ғамгин йўлимда давом этдим. Мен қул эдим, мен Чўл бўриси эдим. Жин урсин ҳам масини!

Сўнгти эшик олдида туриб қолдим. У ерга мени фамгин ғалаён бошлаб борган эди. Эй Роза, о олис ёшлигим, эҳ Гёте ҳам Моцарт!

Эшикни очдим. Унинг ортида оддий ва гўзал манзарага дуч келдим. Полга тўшалган гилам устида икки киши ётарди. Улардан бири гўзал Ҳермина, бири эса барно йигит Пабло эди. Улар ёнма-ён донг қотиб ухлашарди. Бир-биридан чиройли инсонлар... Ҳерминанинг чап кўкраги остида янги пайдо бўлган думалоқ хол қорай-иб кўриниб турарди, у ишқдан сархуш Пабло тишларининг изи эди. Худди ўша хол устига пичоқни урдим, ўзиям сопигача кириб кетди. Гўзал Ҳерминанинг кўзлари бир зум очилиб, оғриқ ва таажжуб билан бокди. Таажжуб нечун? — ўйладим ўзимча. Шунда унинг кўзларини ёпиб қўйишим кераклигини англадим. Бироқ кўзлар ўз-ўзидан яна юмилди. Тамом. У фақат салгина ёнбошлаб олди, шунда унинг қўлтиқости чукуридан сийнаси томон гўзал нозик соя тушиб, жилваланди, у менга ни-манидир эслатмоқчи бўлди. Эслолмадим. Шундан сўнг, у қимир этмай қолди.

Унга узоқ қараб турдим. Нихоят, худди уйқудан уйғонгандек, сескандим, кетмоқчи бўлдим. Шу пайт Пабло қимиirlаб, кўзларини очди, керишганича гўзал мурда узра энгашиб, жилмайди. Бу бола ҳеч қачон жиддийликни ўрганмас экан-да, ўйладим мен, қачон қара-санг, жилмайгани-жилмайган. Пабло гиламнинг бир бурчини авайлаб буклади-да, Ҳерминанинг кўкрагига қадар, жароҳат кўринмайдиган қилиб ёпиб қўйди, сўнг оҳиста юриб, ложадан чиқди. Қаёққа кетдийкин? Ҳаммаси мени ёлғиз ташлаб кетишиса-я! Мен усти ярим очиқ мурда билан қолдим, мен уни севардим, ҳавас қилардим. Унинг оқарган пешонаси узра ўсмирларникига ўхшаш жингалак соchlари тушиб турар, юзи оппоқ оқарган, фақат

хиёл очик қолган оғзи бир оз қизаринқираб кўринар, кичкина, бежирим қулоқни ярим ёпиб турган соchlаридан муаттар бўй анқирди.

Мана, ниҳоят, унинг тилаги ҳам амалга ошганди. Ҳали у бутунлай меники бўлиб улгурмасидан, маҳбубамни ўлдирив, ақлга сифмайдиган иш қилиб қўйган эдим. Мана энди чўк тушиб қотиб қолгандим, бу иш ўзи қанақа бўлди, яхшими, ёмонми, тўғри бўлдими ё аксинчами, буни билолмай ҳайрон эдим. Бу ишимга ҳалиги ақлли шоҳмотчи нима деркин, Пабло-чи? Мен ҳеч нарсани билмасдим, бу ҳақда ўйлай ҳам олмасдим. Суратлардагидек чиройли даҳан сўниб бораётган чехрада тобора қизаринқираб кўринарди. Менинг бутун ҳаётим, озгинагина баҳтим, омадим ва севгим ҳам худди мана шу ҳаракатсиз қотиб қолган даҳангага ўхшаш: бир оз қизғиши, ўлик, жонсиз чехрада акс этган эди.

Энди ўша жонсиз чехрадан, жонсиз оппоққина елкалардан, жонсиз оппоқ қўллардан аста-секин қўркув, қишки фамгинлик ва ёлғизлик нафаси уфурарди, унинг аста кучайиб бораётган совуғида қўлларим ва лабларим тош қота бошлади. Нима бало, куёшни сўндириб қўйдиммикан? Ё бутун мавжудот юрагига болта урдимми? Коинотнинг қаттиқ совуғи бостириб келдимикан ё?..

Тош қотган пешонага, ҳаракатсиз кўнфироқ соchlарга, қулоқ супрасининг хира, совуқ йилтирашига титраб-қақшаб термилиб турардим. Улардан эсаётган совуқ эса жуда кучли, шу билан бирга гўзал ҳам эди: у мусиқа янглиғ янграрди!

Нима, бир замонлар баҳт-омаддек туюлган бундай қўркув-даҳшатни илгарилари ҳис қилмаганмидим? Бир пайтлар ушбу мусиқани ҳам тинглаб кўрмаганмидим? Ҳа, уни Моцарт ҳузурида, умри боқийлар ҳузурида тингланган эканман. Бир пайтлар, қаердандир топиб олганим шеърий сатрлар ўз-ўзидан ёдимга кела бошлади:

Бирок биз топишиб олдик
Юлдуз янглиф самода,
Кун, тун, соат бизга бегона,
На эркак, на аёлмиз, на ёш, на қари...
Вазмин ва сокин то абад умримиз,
Вазмин ва нурли мангу кулгимиз...

Шу пайт бирдан ложа эшиги очилиб, Моцарт кириб келди, уни иккинчи бор қараганимдан сўнгина танидим, у кокилсиз, бриджисиз* ва тўқали туфлисиз, замонавий кийинган эди. Келиб, ёнимга шунчалик тикилиб ўтирдики, сал бўлмаса Херминанинг кўксидан тирқираб оқаётган қонга булғанмаслиги учун уни ушлаб қолишумга бир баҳя қолди. У полда ўтирган кўйи шу атрофда турган бир талай майда асбоб-ускуналар билан андармон бўлиб, уларни суриб-тўғрилаб, бураб-маҳкамлай бошлади. Авзойидан жуда муҳим бир иш билан банд эди, мен унинг абжир, чаққон бармоқларига ҳавасим келиб қараб турардим, қани энди шу бармоқлари билан бир рояль чалиб берса, дердим. Ўй сурибми, сурмайми, гўзал, ақлли қўлларига қараб турарканман, унинг ёнимдалигидан, ёлғиз эмаслигимдан ҳам хурсанд, ҳам бир оз ҳадиксирадим. Аслида унинг нима иш қилаётганига, нималарни бураб-қотириб, куймаланаётганига заррача эътибор ҳам бермадим.

У ўрнатиб, тузатган нарса радиоаппарат экан, ниҳоят, унинг мурватини бураб, деди:

— Мюнхендан гапиряпти, Ҳендел янграмоқда, фа-мажор**, *concerto grosso****.

* Бриджи – этик шим.

* Фа-мажор – фа – мусиқа гаммасининг тўртинчи нотаси, мажор – кўтаринки, шодиёна руҳдаги мусиқий соз тури.

*** *Concerto grosso* (итал.) – «катта концерт», бу ерда: бир неча қисмлардан иборат асар.

Аслида қуриб кетгур шақилдоқ воронкадан чиқаёт-
ган нарсани эшитиб, ҳам таажжубландим, ҳам даҳшатга
тушдим, чунки у нарса бронхиал балғам билан чайнал-
ган сақичнинг қоришмаси эди, буни граммофонларнинг
эгалари ва радио абонентлари ўзаро келишиб олиб, муси-
қа деб аташарди — ҳақиқатан ҳам мана шу балғам ара-
лаш бўғиқ хириллаш ортида, худди қалин жилд ортида
ноёб сурат яширингани каби, ўша ажойиб мусиқанинг
асл тузилишини, ажойиб композицияни, вазмин кенг на-
фасни, торли мусиқа асбобининг ширали овозини пай-
қаб олиш мумкин эди.

— Э худойим-ей, — дедим мен даҳшатга тушиб, —
нима қиляпсиз ўзи, Моцарт? Шу бўлмағур ишлар ҳази-
лингизми, чинми? Замонамизнинг зўр ғалабаси, унинг
санъатни маҳв этиш йўлидаги сўнгги музaffer қуроли
бўлган ушбу кўрқинчли матоҳни бизга қолдириб нима
қилардингиз? Шу шартми энди, Моцарт?

Шунда ҳалиги ваҳимали одам бирар кулди дeng, унинг
кулгиси совуқ ва бўғиқ, унсиз ва ҳаммаёқни бузиб юбор-
гудек эди. У менинг азобланишларимга ич-ичидан ро-
ҳатланар, лаънати шақилдоқ воронкани суриб-тӯғрилаб,
бураб-қотириш билан машғул эди. Хонага тараляётган
бузук, жонсиз, оғули мусиқа товуши тинай демасди, у
эса кулганича менга жавоб қилди.

— Ўзингизни босинг, қўшнижон! Дарвоқе, ритар-
дандога* эътибор бердингизми-йўқми? Зўр фикр, химм?
Хой бесабр одам, сиз олдин бу фикрни — ритардандони
бир ўйлаб кўринг, — ана, бас садоларини эшитяпсизми?
Улар тангрилар янглиғ илгариламоқда — ана энди кекса
Ҳенделнинг бу тоясини безовта қалбингизга сингдиринг-

* Ритардандо — мусиқанинг аста-секин пасайиши, сусайиши.

да, ўзингизни босиб олинг! Сиз йигитча, киноя ва ҳаяжонни йигиштириб, аввал бир тинглаб кўринг-а, қаранг, бу кулгили аппаратнинг аслида аҳмоқона ва бемаъни туюлган пардаси ортида ўша ажойиб мусиқанинг олис қиёфаси ўтиб бормоқда! Диққат билан тингланг, бундан бир нима ўрганса бўлади. Шунга эътибор берингки, бу телба овозли карнай дунёдаги энг аҳмоқона, энг тақиқланган ва энг кераксиз бўлиб кўринган ишни қилаётган ҳамда аллақаерда чалинган мусиқани танлаб ҳам ўтирумай, хом ва фўр, бунинг устига аянчли тарзда бузиб, расвосини чиқариб, уни бир бегона, ўзига қарашли бўлмаган хонага эшилтираётган экан – бу билан гарчи у ўша мусиқанинг бирламчи руҳига зиён етказолмаса-да, факатгина ўзининг ожиз техникаси-ю укувсиз тор амалиётини унда синаб кўраяпти, холос! Яхшилаб эшилиб олинг, йигитча, бу сизга керак! Иккала қулоғингиз билан ҳам эшилинг! Ҳа, шундай. Сиз энди радиодан расвоси чиқкан Хенделнинг ўзинигина тингламанг-да, – у-ку шундай, энг хунук кўринишида ҳам, барибир, ажойиб – сиз, қадрли дўстим, радио тингласангиз, бутун ҳаётнинг ажойиб ўхшашликларини ҳам кўрасиз. Агар радио тингласангиз, ғоя билан ҳодиса ўртасидаги, абадият билан вакт ўртасидаги, илоҳийлик билан инсонийлик ўртасидаги қадимдан давом этиб келаётган қурашни тинглаб, кўрибилиб борасиз. Худди радио дунёнинг энг гўзал мусиқасини ўн дақиқа давомида мумкин бўлмаган хоналарга, мешчанлар меҳмонхоналарига ва чордоқ-боловхоналарга, жавраётган, ошалаб овқат еяётган, эснаётган, уйқуни ураётган абонентларга пайдар-пай эшилтирганидек, бу билан, гарчи ўша мусиқанинг руҳини бутунлай сўндира олмаса-да, уни ҳиссий гўзаллигидан маҳрум этиб, бузиб, тимдалаб-юмдалаб, шилимшиқ парда би-

лан қоплаб олгани каби — ҳаёт, воқелик ҳам дунёning чиройли, гўзал ўйинларини ерга кўтариб уради, Ҳенделни ўрта саноат корхоналаридаги балансни яшириш техникаси тўғрисидаги маърузани кузатиб боришга ундаиди, мафтункор оркестр садоларини шилимшиқ парда билан қопланган ёқимсиз овозга айлантиради, ўзининг техникасини, ўзининг ишчанлигини, ўзининг бузук эҳтиёжини, ўзининг ғоя ва воқелик ўртасидаги, оркестр билан қулоқ (tinglovchi) ўртасидаги ноз-қичифини ҳамма ерда бирдай тиқишираверади. Бутун ҳаёт аслида шунаقا, болам, бизлар эса, тақдирга тан бермай иложимиз йўқ, агар бизлар эшак бўлмасак, бунга кулиб қўяқоламиз. Сизга ўхшаган одамларга радиони ёки ҳаётни танқид қилишни ким қўйибди. Яхиси, аввал тинглай билишни ўрганинг! Жиддий қабул қилишга арзийдиган нарсаларни жиддий қабул қилишни ҳамда бошқа нарсалар устидан кулишни ҳам ўрганиб олинг! Ё бирон ишни яхшиrok, олийжаноброқ, ақллироқ ва дидлироқ қилиб қойиллатиб қўйган жойингиз борми? О йўқ, мсье Ҳарри, бунақаси ҳали сизда бўлмаган. Сиз ўз ҳаётингизни даҳшатли қасаллик тарихига, истеъодингизни эса, баҳтсизликка айлантириб юборгансиз. Сиз, кўриб турибманки, шундай зебо, ғоят гўзал, дилбар бир қизни нима қилишни билмасдан, бечорага пичноқ санчиб, уни нобуд қилиб ўтирибсиз! Нима, шу ишингизни ҳам тўғри деб ҳисоблайсизми?

— Тўғри? Э йўқ! — дедим мен каловланиб. — Э худо, намунча ҳаммаси бу қадар нотўғри, аҳмоқона ва чатоқ бўлмаса! Мен ҳайвонман, Моцарт, ақлсиз, ваҳший ҳайвонман, мен қасалман, айниганман, сиз минг карра ҳақсиз. Аммо бу қизга келсак: унинг ўзи шуни хоҳлади, мен фақат унинг истагини бажардим, холос.

Моцарт унсиз кулди, бироқ зўр марҳамат қилиб, радиони ўчирди.

Ўзим ҳам ҳозиргина оқкүнгиллик билан ишониб турган бундай даъвом, ўзимни бу тарзда ҳимоя қилишим кутилмаганда ўзимга ҳам ғоят бемаъни туюлиб кетди. Шу топда тўсатдан бир нима эсимга тушди – бир пайлар Ҳермина менга Вакт ва Абадият ҳақида гапирган чоғида, унинг фикрларини шу заҳоти ўз фикрларимнинг кўзгуда акс этиши деб қабул қилишга тайёр турган эдим. Бироқ Ҳерминанинг ўзим томонимдан маҳв этилиши ҳақидаги фикри унинг ўз ният-мақсади бўлган, бунда менинг заррача таъсирим йўқ эди ва мен буни табиий ҳол деб қабул қилган эдим. Аммо нега энди мен ўшандага шунчалик ёқимсиз ва шу қадар даҳшатли фикрни қабул қилиб, унга ишонибгина қолмасдан, балки уни ҳатто олдиндан ҳам билиб, фаҳмлай олган эканман? Балки у менинг ўз фикрим бўлгандир? Унда нега энди мен Ҳерминани айнан бошқа бир бегона эркак қучоғида яланғоч ётган чоғида ўлдирдим? Ҳамма нарсадан воқиф ҳамда истехзо, кинояга тўла жарангларди Моцартнинг унсиз кулгиси...

– Ҳарри, – деди у ниҳоят, – сиз қизиқчи экансиз. Нима, бу гўзал қиз сиздан пичок уришдан бошқа ҳеч нарса сўрамаган экан-да, шундайми? Бу гапингизни бориб бошқаларга айтинг! Тағин пичокни шунақаям боллаб урибсизки, бечоранинг жони чиқиб бўпти. Балки энди ушбу хонимга нисбатан кўрсатган илтифотингиз сабабларини тушунтириб берарсиз. Ё бунинг оқибатларидан ҳам тониб, жуфтакни ростламоқчимисиз?

– Э йўқ! – қичқирдим мен аччиғим чиқиб. – Нимага тушунмайсиз? Жуфтакни ростламоқчимисиз дейди-я! Менга қилмишинга яраша жазоланишдан, жазоланишдан ва жазоланишдан, бошимни кундага кўйиб, жазоланишдан ва маҳв этилишдан бошқа ҳеч нима керак эмас.

Моцарт менга шундай масхараомуз тикилдики, унга тоқат қилиб бўлмасди.

— Сизга хис-ҳаяжондан берганакан-да, ўзиям! Лекин сиз ҳали юморни ўрганиб оласиз, Ҳарри. Юмор — ҳамиша маъюс, фамгин кулги демакдир, уни зарур бўлган-да, балки дор остида ўрганиб оларсиз. Бунга тайёрмисиз, ишқилиб? Шундайми? Яхши, ундаи бўлса, прокурорга бораверинг. Тақдирга тан бериб, судьяларнинг юмордан холи бутун аппаратига чидаб берасиз. Қамоқхонада эса бир кун тонг сахарда каллангизни сапчадай узиб ташлашади, шу билан қутуласиз. Демак, шунга тайёрсиз?

Тўсатдан кўз олдимда ялт этиб, қуидаги ёзув пайдо бўлди:

Ҳаррининг қатл этилиши

ва мен бунга, албатта, рози эдим. Тўрт девор орасидаги яп-яланг, хувиллаган, бефайз ҳовли, панжарали деразалар, озода қилиб тайёрлаб қўйилган гильотина,* бошлариға мантия кийиб олган, эгниларида сюртук, бирталай жаноблар куршовида эрталабки аёздан кунишиб, юрагим ожиз кўркув олдида бир қисм бўлиб турардим, лекин қилмисимга иқрор ва жазога тайёр эдим. Буйруқ овози янграши билан юриб олдинга чиқдим. Прокурор бошидан қалпоғини олиб, йўталди, унга қўшилиб, қолган бошқа барча жаноблар ҳам томоқ қириб, йўталиб олдилар. У қўлидаги ёзиқ расмий қоғозга қараганича, ўқий бошлади:

— Жаноблар, олдиларингизда турган Ҳарри Ҳаллер бизнинг маниявий театримизни қасддан суистеъмол килганликда айбланади. Ҳаллер гўзал суратхонамизни воқелик деб аталмиш рўё билан чалкаштириб юбориб, ойнада акс этган қизни кўзгуда тасвиrlанган пичоқ билан

* Гильотина – бош оладиган жоди (дастлаб 1792 йилда Францияда ишга солинган).

уриб ўлдириб, бу билан нафақат юксак санъатни оёқости килди, балки яна юмордан холи бир тарзда театримизни ўз жонига қасд қилиш механикасига истифода эттириш нияти ҳам борлигини намойиш этди. Бунинг учун биз Ҳаллерни абадий ҳаёт жазосига маҳқум этиб, уни театримизга кириш ҳуқуқидан ўн икки соат муддатга маҳрум қиласиз. Бундан ташқари, айбланувчининг устидан бир марта яхшилаб кулиб ҳам оламиз, у бу жазога ҳам лойик. Қани, жаноблар, бошладик: бир-икки-уч!

Йигилганлар баравар кулиб юбориши. Бу кулги юксак хор кулгиси, нариги дунёдан эшитилаётган қўрқинчли, одам боласи чидай олмайдиган кулги эди...

Ўзимга келганимда, Моцарт боягидек ёнимда ўтиради. У елкамга қоқиб, деди: — Ана, ҳукмни ҳам эшитдингиз. Энди бундан буён ҳаёт радиомузыкасини тинглаб боришига қўнишишингизга тўғри келади. Бу сизга маъқул бўлади, деб ўйлайман. Қобилиятингиз ўта суст, тентаккинам, лекин сиздан ўзи нима талаб қилинаётганини аста-секин тушуниб оласиз. Сиз кулишни ўрганишишингиз лозим, сиздан мана шу нарса талаб қилингапти. Сиз ҳаёт юморини, бу тирикликтинг фамгин, маъюс кулгисини англаш етишингиз лозим. Аммо-лекин сиз ўзингиздан талаб қилинаётганидан бошқа дунёдаги жамики нарсага тайёрсиз! Сиз қизларни пичоқ билан ўлдиришига тайёрсиз, сиз ўзингизни тантанавор тарзда қатл эттиришига ҳам тайёрсиз, сиз эҳтимол, ўзингизни ўзингиз юз йиллар танқид қилиб, қийнабазоблаб, ҳатто бичиб ташлашшига ҳам тайёрдирсиз, шундай эмасми?

— О, албатта, бажонидил тайёрман, — дедим мен ноилож.

— Ана шундай! Сиз, саховатли жаноб, ҳар бир аҳмокона ва юморсиз тадбирга, нимаики ҳаяжон-эҳтиросли ҳамда нодонлик бўлса, ҳаммасига тайёрсиз! Хўш, энди

менга келсак, бу сизнинг барча романтик пушаймон ҳамда тавба-тазарруларингизни сариқ чақага ҳам олмайман. Сиз қатл этилишга, бошингизни олдиришга розисиз, одам деган шунақаям қутуриб кетадими! Бу бемаъни омол учун сиз ҳали ўнта қотиллик қилишга ҳам тайёrsиз. Сиз кўрқок, ўлишга тайёrsиз, аммо яшашга эмас. Жин урсин, яшашингиз керак-ку, ахир! Ўзи сизни энг оғир жазога ҳукм қилишса, тўғри бўларкан.

— О, бу қанақанги жазо бўларкин?

— Масалан, дейлик, қизни қайтадан тирилтириб, икковларингизни уйлантириб қўямиз.

— Йўқ, бўлмайди, мен бунга рози эмасман. Бу баҳтсизлик бўлур эди.

— Гўё қилган қилмишингиз баҳтсизлик эмасдай гапирасиз-а. Бироқ энди ҳис-ҳаяжон, эҳтирос ва қотилликка чек қўйиш керак. Эс-хушиңгизни йиғиб олинг, энди! Сиз яшашингиз керак, шунингдек, кулишни ҳам ўрганиб олишиңгиз лозим. Сиз ҳаётнинг лаънати радиомусиқасини тинглашни, унинг ортидаги рухни хурмат қилишни, ундаги қувноқ вағир-вугур устидан қулишни ўрганиб олишиңгиз лозим. Тамом, сиздан ортиқ ҳеч нарса талаб қилинмайди.

Тишни тишга босиб туарканман, секин сўрадим:

— Мабодо йўқ десам-чи, жаноб Моцарт? Агар мен сизни Чўл бўрисининг тақдирига аралашиб ҳуқуқидан мосуво қилсан-чи, унда нима бўлади?

— Унда, — деди Моцарт бамайлихотир, — мен сенга яна ажойиб сигаретамдан бир дона чекиб кўришни таклиф қиласман.

Шундай деб, нимчасининг чўнтагидан сигарета чиқариб, менга тутқазди, бироқ у энди Моцарт эмасди, балки дўстим Пабло эди. Унинг ажнабийларга хос қора кўзлари менга қараб туар, шу туришида у доначалар

ёрдамида менга шоҳмот ўйинини ўргатган ҳов ўша одам билан эгизакка ҳам ўхшаб кетарди.

— Пабло! — қичқирдим мен сесканиб. — Пабло, биз қаердамиз?

Пабло менга сигарета бериб, олов тутди.

— Биз, — жилмайди у, — менинг мафиявий театримдамиз. Мабодо тангони ўрганмоқчи ё генерал бўлмоқчи ёки Улур Александр (Искандар) билан сухбат қурмоқчи бўлсанг, буларнинг барчаси энди кейинги гал, албатта, ихтиёрингда бўлади. Аммо-лекин шуни айтишим керакки, сен бир оз ҳафсаламни пир қилдинг. Сен бунда ўзингни яхшигина йўқотиб қўйдинг, менинг мўъжазгина театримдаги юморни ёриб ўтиб, bemaza iш қилдинг, пичоқ ишлатиб, бизнинг гўзал суратлар оламимизни воқелик доғлари билан булғадинг. Бу, албатта, яхши иш бўлмади. Буни, менимча, Ҳермина билан менинг бирга ётганимни кўриб, рашидан қилган бўлсанг керак, шундайми? Афсуски, ушбу фигура билан муомала қилишни эплаёлмадинг — мен сени ўйинни яхшироқ ўрганиб олган бўлсанг керак, деб ўйлагандим. Энди эса хатони тузатишга тўғри келади.

У бармоқларида шу заҳоти миттигина ўйин дона-часига айланиб қолган Ҳерминани олиб, яна ҳозиргина сигарета чиқарган нимчасининг чўнтағига солиб қўйди.

Ширин, оғир тутун ҳиди ёқимли анқиди. Шу топда мен бир йил ухлашга ҳам тайёр эдим.

О, мен энди ҳаммасини, Паблони ҳам, Моцартни ҳам англаб етдим, қаердадир ортимда унинг даҳшатли кулгиси қулогимга чалинди. Ҳаёт ўйинларининг юз минг фигураси чўнтағимда эди, мен энди уларнинг барчасини яхши билардим, уларнинг мазмун-моҳиятини ҳаяжон

билин олдиндан сезиб, айтиб бера олардим. Ўйинни яна қайтадан бошлашга, унинг азобларини яна бир бор бошдан кечириб, тотиб кўришга, унинг бемаъниликлари олдида қайтадан изтиробга тушишга, қалб-кўнглимнинг жаҳаннами узра яна бир бор ва кўп марта кезиб, тентирашга ҳам тайёр эдим.

Ахир бир кун, пайти келиб, фигуralар ўйинини мен ҳам яхшироқ ўйнай оларман. Бир кунмас, бир кун қулиши ҳам ўрганиб олардим. Пабло мени кутарди. Моцарт мени кутарди...



Х О Т И М А

Асарларни ўқувчи маълум даражада тўғри ёки нотўғри тушуниши мумкин. Кўп ҳолларда эса бу нарса муаллифга боғлик бўлмайди, натижада асарни тўғри тушуниш ўрнига англашилмовчилик содир бўла бошлайди. Баъзи бир муаллифнинг шундай ўқувчилари борки, унинг асари ўзидан кўра ҳам уларга қўпроқ равshan ва тушунарлидир. Бундан ташқари, англашилмовчиликлар ҳам мурайян шароитларда самарали бўлиши мумкин.

Ҳар ҳолда менга «Чўл бўриси» китобларим орасида қўпроқ нотўғри тушунилган асар бўлиб кўринади. Кўпинча унинг ўқувчилари хайрихоҳ, инкор қилиш у ёқда турсин, ҳатто қойил қолишган китобхонлардир, уларнинг ушбу китоб ҳақидаги фикрлари, шу билан бирга, фалати ва ҳайратланарли ҳамдир. Бундай ҳолатларнинг кўп учраш сабаби қисман, ҳа, қисман шунда кўринадики, эллик ёшли муаллиф томонидан ёзилган ҳамда айнан шу ёш муаммоларидан ҳикоя қиласиган ушбу китоб жуда кўп ҳолларда бутунлай навқирон ўқувчилар қўлига бориб тушган.

Бироқ менинг ёшимдаги китобхонлар орасида ҳам шундайлар кўп учрайдики, улар каминанинг китобидан мутаассир бўлишган, лекин қизифи шундаки, улар асар мазмун-моҳиятининг атиги ярминигина тушуниб етишган, холос. Ушбу ўқувчилар, менинг назаримда, Чўл бўрисида ўзларини топишган, ўзларини унга ўхшатиб, у билан тенглаштиришган, унинг изтиробларига шерик

бўлишиб, орзуларини баҳам кўришган, шу аснода эса, улар бир нарсани назардан қочиришган, у ҳам бўлса шуки, ушбу китобда Ҳарри Ҳаллер ва унинг муаммола-ридан ташқари яна бошқа нарсалар хусусида ҳам сўз борадики, Чўл бўриси ва унинг зиддиятли ҳаёти узра иккинчи, янада юксакроқ, бокий бир дунё қад ростлаб туради ва «трактат» ҳамда китобнинг Рух, санъат ва «умри боқийлар» ҳақида ҳикоя қилинадиган ўша барча жойларида Чўл бўрисининг изтироблар оламига бошқа бир дунё — ижобий, қувноқ, ақл бовар қилмайдиган, мислсиз ва Вактга боғлиқ бўлмаган, абадий Илохий Дунё қарама-қарши қўйилади, чунончи, китоб изтироб ва мусибатлардан сўйласа-да, бироқ у асло рухи туш-ган, тушкун кайфиятдаги одамнинг эмас, балки диндорнинг китобидир.

Мен, албатта, китобхонларга ушбу қиссамни қандай тушунишлари хусусида маслаҳат бера олмайман ва бермоқчи ҳам эмасман. Ҳар бир ўқувчи ундан ўзига керакли ва фойдали холосани ўзи чиқариб олаверсин! Чўл бўриси ҳақидаги ҳикоя, гарчи хасталик ва тангликни тасвирласа-да, бироқ бу хасталик ўлимга олиб бормайди, бу танглик эса таназзул эмас, балки аксинча: шифо, даво, муолажадир. Кўпчилик китобхонлар мана шу нарсани эътиборга олиб қўйсалар, мен хурсанд бўлар эдим.

МУНДАРИЖА

Рұхий олам изтироблари	3
Муқаддима	12
Херри Ҳаллер	33
Чўл бўриси ҳақида трактат	52
Хотима	260

Адабий-бадиий нашр

Ҳерманн Ҳессе

ЧҮЛ БҮРИСИ

(роман)

қайта нашр

Олмон тилидан Мирзаали АКБАРОВ таржимаси

Мухаррир *P. Субҳон*

Бадиий мухаррир *И. Йўлдошев*

Техник мухаррир *Т. Харитонова*

Мусаххих *М. Якубджанова*

Компьютерда сахифаловчи *Ф. Чанишева*

Нашриёт лицензияси AI №158, 14.08.2009. Босишга 2015 йил

З марта руҳсат этилди. «Газетная пухлая» қоғози.

Бичими 80×100¹/₃₂. «Peterburg Uz» гарнитурасида оғсет

усулида босилди. Шартли босма табори 12,21.

Нашр табори 12,29. Адади 2000 нусха.

Буюртма №15-24

Ўзбекистон Матбуот ва ахборот агентлигининг

«O'zbekiston» нашриёт-матбаа ижодий уйи.

100129, Тошкент, Навоий кўчаси, 30

Телефон: (371) 244-87-55, 244-87-20

Факс: (371) 244-37-81, 244-38-10.

e-mail: uzbekistan@iptd-uzbekistan.uz

www.iptd-uzbekistan.uz

60000

Ҳессе, Ҳерманн

**Х – 43 Чўл бўриси: роман, қайта нашри, таржимон
М. Ақбаров. – Тошкент: «O'zbekiston», 2014.
264 б.**

ISBN 978-9943-28-162-2

Ҳерман Ҳессе (1877–1962) XX аср олмон адабиётининг йирик намояндадаридан бири, адабиёт соҳасидаги Халқаро Нобель мукофотининг совриндори. Унинг кўплаб роман, қисса, хикоялари, шеърлари, сиёсий ва адабий-танқидий руҳдаги асарлари чоп этилган.

Илк бор 1927 йилда босилиб чиқсан «Чўл бўриси» романни Ҳерманн Ҳессега оламшумул шуҳрат келтирган теран психологик асардир. «Чўл бўриси»да ўз-ўзини таҳлил қилиш ва ҳал этилмаган маънавий-рухий зиддиятларни енгиш йўлидаги саъй-ҳаракатлар қаламга олинади.

Ёзувчи Томас Манн ушбу роман ҳақида шундай деб ёзган эди:
«Чўл бўриси» менга анчадан буён илк бор ҳақиқий китоб мутолааси не эканини қайтадан ўргатган асардир».

**УЎК: 821.512.133
КБК 84 (4 Гем)**